

Cy apres comence le livre François q'est apellé Mirour de l'omme, le quel se divide en x parties, c'est assavoir :

- ¶ la primere partie est coment de la malice du diable peccé fuit conceu, et de la maldite progenie des vices, qe puis de lui nasquirent, dont le frele homme a grant peril de noet et jour par forte guerre toutdys est assailli.
- ¶ la seconde partie est coment resoun fuit conjoint al alme, dont les vertus morales por l'omme defendre sont deinz la conscience par la divine grace inspirez et fraunchement engendrez.
- ¶ la tierce partie est por considerer parentre d'eux l'estat des hommes sur terre, especialment de les haltz prelatz, ovesque lour archediaknes, officials, deans et autres, q'ont la governaunce de l'espiritiele cure, et sount lumere et essample de bien et d'onest vie.
- ¶ la quarte partie trete l'estat des Religions, si bien possessioners come mendiantz, q'ont lessé les vanités de cest present vie por contempler du ciel les joies perdurables.
- ¶ la quinte partie trete l'estat du temporel gouvernement selonc le corps, le quel appartient as Emperours, Rois et autres nobles Princes, qe doivent maintenir la loy et doner justice a lour poeple liege.
- ¶ la sisme partie trete l'estat de la chivalerie et de les gentz d'armes, qui doivent le droit de seint esglise et la fraunchise supporter et defendre, et qu'ils ne lesseront lour propre païs destitut por travaillier en estranges regions a cause de veine gloire q'ils ont de la renomée mondeine.
- ¶ la septisme partie trete l'estat des Ministres de la loy, c'est assavoir Jugges, Pledours, Viscontes, Baillifs et Questours, qui sont juretz a foi tenir et poiser le droit par tiele egalité que covetise ascunepart ne lour destorne.
- ¶ l'oetisme partie trete l'estat des Marchantz, Artificers et Vitailleurs, qui selonc la droite policie des Citées, si fraude et tricherie ne se mellont, sont au commun profit honests et necessaires.
- ¶ la noefisme partie trete de ceo que chescun en soum endroit blasme le Siecle, et coment le siecle des toutz partz notablement s'escuse, forsque soulement de l'omme peccheur, en qui defaute les autres creatures sont sovent a meschief et mesmes dieux en est auci corussez.
- ¶ la disme partie trete coment l'omme peccheur lessant ses mals se doit reformer a dieu et avoir pardoun par l'eyde de nostre seigneur Jhesu Christ et de sa douce Miere la Vierge gloriose.

MIROUR DE L'OMME*

[After the Table of Contents four leaves are lost, containing probably about forty-seven stanzas.]

Escoulte cea, chascun amant,
 qui tant perestes desirant
 du peccé, dont l'amour est fals :
 fessetz la Miere ove tout s'enfant,
 car qui plus est leur attendant,
 au fin avra chapeal de sauls :
 lors est il fols qui ses travaux
 met en amour si desloiaux,
 dont au final nuls est joyant.
 Mais quiq' en voet fuir les mals,
 Entende et tiegne mes consals,
 Que je luy dirray en avant.
 Ce n'est pas chose controvée,
 Dont pense affaire ma ditée ;
 Ainz vuill conter tout voirement
 Coment les filles du Pecché
 Font que tous sont enamouré
 Par leur deceipte vilement.
 He, amoureuse sote gent,
 Si scieussetz le diffinement
 De ce dont avetz commencé,
 Je croy que vostre fol talent
 Changeast, qui muetz au present
 Reson en bestialité.
 Car s'un soul homme avoir porroit
 Quand' en son coer souhaideroit
 Du siecle, pour soy deliter,
 Trestout come songe passeroit
 En nient, et quant l'en meinz quidoit,
 Par grant dolour doit terminer : 30

f. 5 Et puisque l'amour seculer
 En nient au fin doit retourner,
 Pour ce, si bon vous sembleroit,
 Un poy du nient je vuill conter ;
 Dont quant l'en quide avoir plenier
 La main, tout vuide passer doit.

Au commencement de cest
 oeuvre, qui parlera des vices et
 des vertus, dirra primierement
 coment peccé anientist les crea-
 tures et fuist cause originale dez
 tous lez mals.

Tout estoit nient, quanq' om ore tient
 Et tout ce nient en nient revient
 Par nient, qui tout fait anientir : 39
 C'est nient q'en soy tous mals contient
 Du quoy tout temps quant me sovient,
 M'estoet a trere maint suspir,
 Que je voi tanz mals avenir
 Du nient, car tous ont leur desir
 En nient q'au siecle se partient ;
 Que nient les fait leur dieu guerpier
 Pour nient, q'en nient doit revertir
 Et devenir plus vil que fient.
 Jehan l'apostre evangelist
 En l'evangile qu'il escrist 50
 Tesmoigne q'au commencement
 Dieux crea toute chose et fist,
 Mais nient fuist fait sanz luy, ce dist :

* MS. Camb. Univ. Add. 3035

Dont saint Gregoire sagement,
 Qui puis en fist l'exponement,
 Par le divin inspirement
 Du nient la forme nous aprist,
 Disant que nient en soy comprant
 Le noun du peccché soulement,
 Car peccché tous biens anientist. 60

Primer quant dieus ot fait les cieus,
 Des tous angres espiritieux
 Un Lucifer fuist principals ;
 Mais du peccché q'estoit mortieux
 Chaoit de les celestieux
 Au nient devers les infernaux :
 Peccché fuist source de les mals,
 Tornant les joyes en travals,
 De halt en bas changeant les lieux :
 Nient est peccché ly desloyals, 70
 Car par son vuill et ses consals
 Volt anientir quanque fist dieus.

Cil Lucifer nonpas solein
 Chaist du ciel, ançois tout plein
 Des autres lors furent peris
 Par peccché, dont ly sovereign
 Leur fist chaoir, siq' en certain
 Du peccché vint ce que je dis,
 Dont l'angre furent anientiz :
 Mais tous vous avetz bien oïz, 80
 Comme dieu puis de sa propre mein
 Adam crea deinz paradis,
 Et sa compaignie au droit divis
 Le fist avoir du dame Evein.

Pour le peccché, pour le forsfait,
 Dont Lucifer avoit mesfait,
 Dieus, q'en vist la desconvenue,
 Coment son ciel estoit desfait,—
 Pour ce tantost Adam fuist fait
 Et Eve auci tout nu a nue 90
 En paradis dessoutz la nue :
 Siq' en apres de celle issue
 Que de leur corps serroit estrait,
 Soit restoré q'estoit perdue
 Amont le ciel, a la value
 Que Lucifer avoit sustrait.

55 en fist

87 qen vist
119 en mangast

Du noble main no duy parent
 Estoient fait molt noblement,
 Car dieu le piere les forma :
 Pour noble cause et ensement
 Estoient fait, quant tielement
 A son ciel dieu les ordina :
 En noble lieu dieu les crea
 Et paradis tout leur bailla,
 Que molt fuist noble au tiele gent ;
 Mais l'en puet dire bien cela,
 Helas ! quant le peccché de la
 Les anientist si vilement.

Chacun de vous ad bien of
 Coment Adam se departi
 De Paradis, mais nepourquant,
 Solonc que truis en genesi
 Vous en dirray trestout ensi :
 Dont falt savoir primer avant
 Q'en Paradis avoit estant
 Une arbre dieu luy toutpuissant,
 Dont il les pommes deffendi
 A Adam, qu'il n'en fuist mangant,
 Et dist, s'il en mangast, par tant
 Du mort en serroit anienti. 120

Bien tost apres, ce truis escrit,
 Cil Lucifer dont vous ay dit
 S'aparçut de la covenant ;
 Et ot d'Adam trop grant despit,
 Qu'il fuist a celle joye eslit,
 Dont mesmes par sa mescheance
 Estoit cheeuz : lors sa semblance
 Mue, si que par resemblance
 En forme d'un serpent s'assit
 Dessur celle arbre, et d'aquointance 130
 Pria dame Eve, a qui constance
 De sa nature ert entredit.

Au frele et fieble femeline
 En la figure serpentine,
 Dessur celle arbre u qu'il seoit,
 Ly deable conta sa covine :
 Si dist, 'He, femme, pren sesine
 Du fruit qui tant prest benoit :
 Car lors serras en ton endroit

113 endirray

120 en serroit

118 nen fuist

du bien et mal, du tort et droit, 140
 sachant come dieu.' O la falsine !
 Par ce q'ensi la promettoit,
 La femme son voloir tornoit
 Contre la volenté divine.

La femme, qui par tricherie
 Fuist du serpent ensi trahie,
 Mangut le pomme, helas, mortal :
 Quant ot fait la felonie,
 Tantost s'en vait come fole amie 150
 Pour tempter son especial ;
 Tant luy dist que parigal
 Le fist de cel original ;
 Le fruit mangut par compaignie.

Ensi ly serpent fuist causal
 Du femme, et femme auci du mal
 Qu'osoit que l'omme fist folie.
 Au mors du pomme tant amer
 Mort et peccché tout au primer
 Bedeinz Adam pristront demure :
 Car il ne savoit excuser 160

La conscience, ainz accuser
 De la mortiele forsfaiture.
 Helas ! cil qui tant fuist dessure
 Fuist tant dessoutz en si poy d'ure ;
 Car dieux luy fist nud despoiler :
 Come sa malvoise creature,
 Atteinte ovesque la menure
 Le fist come traître forsjuger.

C'estoit du dieu le Jugement,
 Q'Adam serroit vilaynement 170
 Botuz du Paradis en terre ;
 U q'en dolour molt tristement
 Sa viande et son vestement
 Irroit a pourchacer et querre :
 Sa femme auci pour son contrere,
 De ce q'a dieu ne voloit plere,
 Tous jours a son enfantement,
 Quant vient au naturel affere,
 Doit tous ses fils et files trere 180
 En plour et en ghemissement.

Mais tout ce n'eust esté que jeeu,
 Si plus du paine n'eust eü ;
 Mais sur trestout c'estoit le pis

198 en apres

213 plustrichereuse

217 agre

La mort, dont au darrein perdu
 Furont loigns en enfern de dieu
 Et piere et miere et file et fils,
 Sanz fin pour demourer toutdis. 1.6
 Lors pourray dire a mon avis,
 Du peccché vient en chacun lieu
 Ce dont ly bon sont anientiz, 190
 Car ciel et terre et paradis
 De sa malice ad corrompu.

Pour ce vous dirray la maniere
 Comment Pecché nasquit primere,
 Et de ses files tout ades ;
 Si vous dirray qui fuist son piere,
 Et u nasquist celle adversiere
 Trestout dirray cy en apres.
 Ly deable mesme a son decess,
 Quant il perdist sanz nul reless 200
 Du ciel la belle meson cliere,
 Lors engendra tieu fals enress,
 Come vous orretz, si faites pes ;
 Car je vuill conter la matiere.

Comment Pecché nasquist du
 deble, et comment Mort nasquist
 du Pecché, et coment Mort espousa
 sa miere et engendra sur luy les
 sept vices mortieux.

Ly deable, qui tous mals soubtile
 Et trestous biens hiet et revile,
 De sa malice concevoit
 Et puis enfantoit une file,
 Q'ert tresmalvoise, laide et vile, 210
 La quelle Pecché noun avoit.
 Il mesmes sa norrice estoit,
 Et la gardoit et doctrinoit
 De sa plus trichereuse guile ;
 Par quoy la file en son endroit
 Si violente devenoit,
 Que riens ne touche que n'avile.

Tant perservoit le deble a gré
 Sa jofne file en son degré
 Et tant luy fist plesant desport,
 Dont il fuist tant enamouré, 220
 Que sur sa file ad engendré
 Un fils, que l'en appella Mort.

Lors ot le deable grant confort,
 Car tout quidoit par leur enhort
 De l'ome avoir sa volenté;
 Car quant ils deux sont d'un acort,
 Tout quanque vient a leur resort
 Le deble tient inherité.
 Au pierre furent molt chers
 Pecché sa file et Mort son fils, 230
 Car trop luy furent ressemblant:
 Et pour cela par son devis,
 Pour plus avoir de ses norris,
 La miere espousa son enfant:
 Si vont sept files engendrant,
 Qui sont d'enfern inheritant
 Et ont le mond tout entrepris;
 Come je vous serray devisant,
 Des queux nouns om leur est nomant
 Et du mestier dont sont appris. 240
 Les nouns des files du Pecché
 L'un apres l'autre en leur degré
 Dirray, des quelles la primere
 Orguil ad nom, celle est l'ainnée,
 La tresmalvoise maturé,
 Que plus resemble a son fals pierre;
 L'autre est Envy, que sa chiere
 Belle ad devant, et parderere
 Plaine est du male volenté;
 Ire est la tierce, et trop est fiere, 250
 Que jammais n'ot sa pes plenerie,
 Ainz fait trestoute adversité:
 La quarte est celle d'Avarice,
 Que l'or plus que son dieu cherice;
 La quinte Accide demy morte,
 Q'au dieu n'au monde fait service;
 La siste file en son office
 C'est Glotonie, que la porte
 Des vices gart, et tout apporte
 Ce dont la frele char supporte; 260
 Du foldelit c'est la norrice:
 Mais la septime se desporte,
 C'est Leccherie, que se porte
 Sur toutes autres la plus nice.
 Ensi comme je le vous ay dit,
 Pecché du deable q'est maldit

254 *lor with erasure (prob. of a second r)*

Primerement prist sa nescance,
 Et puis du Pecché Mort nasquit,
 Dont plus avant comme j'ay descript
 Par si tresmalvoise alliance 270
 Nasquiront plain du malfesance
 Ly autre sept, que d'attendance
 Au deble sont par tout soubgit;
 Dont cil qui tous les mals avance,
 Quant naistre vit ytielle enfance,
 De sa part grantment s'esjoit.

**Comment le deable envoya
 Pecché ovesque ses sept files au
 Siecle, et comment il tient puis son
 parlement pour l'omme enginer.**

Ly deable, q'est tout plain du rage,
 Quant vist qu'il ot si grant lignage,
 Au Siecle tous les envoia:
 Pecché la fole et la salvage 280
 Ses propres files du putage
 Parmi le Siecle convoia;
 Et tant y fist et engina
 Que ly fals Siecle s'enclina
 De faire tout par leur menage,
 Par ceaux sa gloire devisa,
 Par ceaux toutdis se conseila,
 Par ceaux fist maint horrible oultrage.

Chascune solonc son endroit
 Office seculiere avoit 290
 Le Siecle pour plus enginer:
 Orguil sa gloire maintenoit,
 Envie ades luy consailloit,
 Et d'Ire fist son guerrier,
 Et d'Avarice tresorer,
 Accidie estoit son chamberer,
 Et Glotonie de son droit
 Estoit son maistre boteller,
 Et Leccherie en son mestier
 Sur tous sa chiere amie estoit. 300

Cil qui trestous ceos mals engendre,
 Quant vist les files de son gendre
 Mener le Siecle a leur voloir,
 Lors comença conseil a prendre
 Coment cel homme pot susprendre,
 Le quel devant ot fait chaoir

269 plusauant 276 grantement

Du paradis le beau Manoir;
 Car bien scieust que par estovoir
 Cel homme doit el siecle attendre,
 Dont au petit tient son pooir, 310
 Si l'omme n'en poet decevoir,
 Pour faire en son enfern descendre.

Ly deable, qui tous mals engine,
 Quant vist qu'il ot par sa falsine
 Du paradis l'omme abatu,
 Hors de la joye celestine
 En la deserte salvagine,
 D'un autre mal lors s'est pourveu,
 Dont l'omme q'ançois ot deceu 320
 Teroit encore au plus bass lieu,
 U fen languist sanz medicine,
 Au fin q'ensi serroit perdu
 Sanz esperance de salu:
 Oietz qu'il fist de sa covine.

Au Siecle mesmes s'en ala,
 Et tout son consail luy conta,
 Et pria qu'il luy voit aider:
 Tant luy promist, tant luy dona,
 Que l'un a l'autre s'accorda, 330
 Et le firont entrejurer;
 Mais pour son purpos achever
 Communement volt assembler
 Tous ses amys, et pour cela
 Un parlement faisoit crier,
 Par queux se pourroit consailler
 Comme son purpos achievera.

Les bries tantost furent escrits
 A ceaux qui furent ses amys,
 Que tous viennent au parlement,
 N'en est un soul qui soit remis: 340
 Pecché la dame du pais
 Ove ses sept files noblement
 Vint primer a l'assemblément;
 Le Siecle y vient ensemblement
 Ove belle route a son devis;
 Mais Mort venoit darreinement:
 Et lors quant tous furent present,
 Le deable disoit son avis.

Devant trestous en audience
 Le deable sa reson commence, 350

Et si leur dist parole fiere:
 'J'en ay,' fait il, 'al dieu offense
 L'omme abatu par ma science
 Du paradis, u jadis iere,
 Dont il est mis a son derere
 En terre plaine de misere:
 Mais plus avant de ma prudence
 Si en enfern de la terrere
 Le porray trete en tieu maniere,
 Lors serroit fait ce que je pense. 360

'Par ceste cause je vous pri,
 Sicomme vous m'estez tout amy,
 Consaillez moy en cest ovraigne,
 Au fin que porray faire ensi.'
 Pecché sa file respondi,
 Si dist sa reson primeraine:
 'Piere, tenez ma foy certaine,
 Je fray tricher la char humaine
 Ove mes sept files q'ay norri:
 Car s'il d'icelles s'acompaigne, 370
 Ne poet faillir de male estraine, f.
 Dont en la fin ert malbailli.'

Le Siecle auci de sa partie
 Promist au deable son aie,
 Ensi le faisoit assavoir:
 'Je fray,' ce dist, 'ma tricherie
 De la richesce et manantie
 Que je retiens en mon pooir;
 Du quoy trestout a ton voloir
 Cel homme porray decevoir. 380
 Du bien promette faldray mie
 Qu'il doit trestoute joye avoir,
 Mais en la fin, sachiez du voir,
 Je le lerray sanz compaignie.'

Après le Siecle parla Mort,
 Que toute vie au fin remort:
 'De l'omme je te vengeray,
 Car pour deduyt ne pour desport
 Du moy ne poet avoir desport,
 Que je son corps ne tuerai; 390
 Mais pour voir dire, je ne say
 Si l'alme mortefieray,
 Car ce partient a ton enhort:
 Fay bien de l'alme ton essay,

320 plusbass

Et je du corps responderay,
 Qu'il doit venir a mon resort.
 Ly deable grantment s'esjoit
 De ce que chacun luy promist,
 Dont chierement leur meritoit;
 Et oultre ce conseil enquist, 400
 Et pria que chascun luy dist
 De leur avis que sembleroit,
 S'il apres l'omme manderait
 Pour savoir ce qu'il en dirroit,
 Sur quoy chacun luy respondist
 Que bien affaire ce serroit,
 Q'un messenger a grant exploit
 Apres luy maintenant tramist.
 Cil messenger par son droit noun
 Je l'oi nommer Temptacioun, 410
 Qui droit a l'omme s'en ala:
 Sanz noise faire ne halt noun
 Dist son message, et sa reson
 El cuer de l'omme il oreilla,
 Depar le deable et luy pria
 Q'au venir tost se hastera,
 U sont ensemble ly baroun;
 Et dist que quant venu serra,
 Des tieux nouvelles il orra
 Dont doit avoir sa garison. 420
 Temptacioun soulement
 Tant fist par son enticement
 Que l'omme vint ovesque luy,
 Pour savoir plus pleniement
 La cause de tieu mandement:
 Et maintenant, quant venoit y,
 De sa venue s'esjoÿ
 Ly deable, qui molt le chery
 Ove tous les autres ensemment.
 Chacun de sa part le servi, 430
 Que l'omme estoit tout esbahy
 De l'onour que chacun luy tent.
 Ly deble commence a parler,
 Si dist pour l'omme losenger
 Devant trestout le remenant:
 'Bealsire, je t'ay fait mander,
 Pour ce que vuil a toy parler
 Au fin que soiez mon serviant;

397 grantement

Et si te soit ensi plesant,
 Je t'en vois loer promettant
 Tiel come tu vorras demander:
 Ne t'en soietz du rien doubtant,
 Trestous les jours de ton vivant
 Tu porras joye demener.
 'He, homme, enten ce que j'ay dit,
 Et n'eietz honte ne despit
 Du quelque chose que te die:
 Car si voes estre mon soubgit,
 N'y ad honour, n'y ad prouffit,
 Q'apartient au presente vie,
 Dont tu n'avras a ta partie
 Si largement sanz nul faillie,
 Que tu dirras que ce suffit:
 Et si t'en fra sa compaignie
 Pecché ma file suef norrie,
 Pour faire trestout ton delit.
 Pecché parloit apres son pierre,
 Q'estoit plesant de sa maniere:
 'He, homme, croiez a ses dis,
 Car de ma part te ferray chiere:
 Si tu voes faire ma priere, 460
 Dont ton corps serra rejotz,
 Ce que mon pierre t'ad promis
 En ceste vie t'ert complis;
 Car je serray ta chamberere
 Pour faire tout a ton devis
 Et tes plaisirs et tes delis,
 Dont dois avoir ta joye entiere.'
 Et puis le Siecle du noblesce
 Promist a l'omme sa largesce,
 Et si luy dist pour plus cherir:
 'He, homme, asculte ma promesse,
 De mon avoir, de ma richesse
 Te fray molt largement richir.
 Car si mon conseil voes tenir,
 Tu dois no capitain servir;
 Et s'ensi fais, je t'en confesse
 Que prest serray pour sustenir
 Solonc que te vient au plesir
 Ta vie plaine de leesce.' 480
 Mais a celle heure nequedent
 Mort endroit soy n'y fuist present,

404 endirroit

Auci pour l'omme consailler;
 Car plain estoit du maltalent,
 Qu'il ne savoit aucunement
 Ne bell promettre ne donner:
 Pour ce ne volt lors apparer,
 Ainz en secré se fist muscer,
 Et ce fuist par commun assent;
 Car l'omme pour plus enginer 490
 Lors ne voloient molester
 Du chose contre son talent.
 Mais au darrein par son degre
 Lors vint avant tout en celée
 Temptacion ly decevant;
 C'estoit ly messagier privé,
 Qui primes l'omme ot amené,
 Come je vous contay cy devant;
 Cil dist a l'omme en consaillant:
 'He, homme, a quoy vas tarant 500
 De recevoir tiele ameisté,
 Dont tu pourras toutdis avant
 Avoir le corps par tout joyant
 Sanz point d'aucune adverseté?'
 Mais cil qui lors ust bien of
 Temptacioun come il blandi
 Par la douçour de sa parole,
 Il porroit dire bien de fi
 Que ja n'otist puisqu'il nasqui
 Un vantparlour de tiele escole:
 Car plus fuist douce sa parole 510
 Que n'estoit harpe ne citole.
 Dont l'omme quant il l'entendi,
 Au tiele vie douce et mole
 La char, q'estoit sauvage et fole,
 Tantost de sa part consenti.
 La char de l'omme consentoit
 A ce que l'en luy promettoit,
 Si fist hommage et reverence
 Au deable, qu'il luy serviroit:
 Mais l'Alme moult dolente estoit, 520
 Quant vist sa char sanz sa licence
 Avoir mesfait de tiele offense;
 Dont se complaint au Conscience
 Que sur cela consailleroit,
 Et maintenant en sa presence

499 enconsaillant

A resonner sa char commence
 Par ceste voie, et si disoit:
 Comment l'Alme aresona la Char,
 q'avoit fait hommage au deable, et
 comment au darrein par l'eide du
 Resoun et de Paour le Char s'en
 parti du diable et du Pecché et se
 soubmist al governance de l'Alme.
 'He, fole Char, he, Char sauvage,
 Par quel folour, par quelle rage 530
 Te fais lever encontre moy?
 Remembre toi q'al dieu ymage
 Fui faite, et pour toum governage
 Fui mis dedeinz le corps de toi.
 He, vile Char, avoi, avoi!
 Remembre aussi que tu la loy
 Primer rompis en cel estage
 U dieu nous avoit mis tout coi,
 Dont nuyt et jour es en effroy.
 Ne te suffist si grant damage? 540
 'He, Char, remembre, car bien scies
 Ly deable par ses malvoistés
 Du tieu barat te baratta,
 Dont en dolour tu es ruez
 Des haltes joyes honorez
 Q'a toy dieu lors abandona.
 He, Char, pren garde de cela,
 Ainz qu'il plus bass te ruera:
 Cil qui sur tout est malurez,
 C'est cil qui jadis t'engina, 550
 Et tous les jours t'engina,
 Tanqu'il t'avra pis enginez.
 'He, Char, desserre ton oraille,
 Enten, car je te le consaille;
 Et certes si tu m'en creras,
 Tieu grace dieus te repparaille
 Que tu remonteras sanz faille
 Au lieu dont jady avalas: f. 8
 Et autrement tout seur serras,
 Si tu le deable serviras, 560
 Quant ceste vie te defaille,
 Tantsoulement pour toum trespas
 Et toi et moi saldrans si bas,
 Dont dieux ne voet que l'en resaille.

528(R) senparti

548 plusbass

'He, Char, come tu fais grant folie,
 Q'au tiele false compaignie
 Si loigns de moy te fais attraire,
 Que tout sont plain du tricherie :
 Car tu scies bien que par envie
 Le deble a toi est adversaire. 570
 Pecché primer te porra plaire,
 Mais au darrein te doit desplaire ;
 Ly Siecle aici de sa partie,
 S'il t'eust donné tout soum doaire,
 Au fin te lerra q'une haire,
 Que plus n'en porteras tu mie.
 'He, Char, des tieux amys fier
 N'estoet, car prou n'en dois porter ;
 Come tu sovent as bien oï,
 Que bel promettre et riens donner 580
 Ce fait le fol reconforter :
 Aguair pour ce, ainz que trahi
 Soietz, je t'amoneste et pri.
 He, Char, pour dieu fai que te di,
 Laissez tieux fals amys estier ;
 Car, Char, si tu ne fais ensi,
 Je, lass ! serray pour toi hony,
 Que mieux t'en doie consailler.
 'He, Char, remembre aici coment
 Entre nous deux conjoignentment 590
 En un corps suismes sanz demise :
 Dont falt que resonablement
 Soions tout d'un acordement.
 Car s'il avient que d'autre guise
 No cause soit deinz soi devise,
 Lors devons perdre la franchise
 Q'au nostre franc pooir attent ;
 C'est de monter par bone aprise
 En paradis, dont par mesprise
 Susmes cheeus si folement. 600
 'He, Char, tu porras bien entendre,
 Mieux valt remonter et ascendre
 En celles joyes plus haltaines,
 Qe d'un bass en plus bass descendre,
 U l'en ne doit socour attendre
 Mais sanz fin les ardantes paines.
 He, Char, s'au deable t'accompaignes

645 nensoiez

Et a les autres ses compaignes,
 Ne dois faillir du paine prendre :
 Mais, Char, si tu ta char restraines, 610
 Tes joyes serront si certaines
 Que sanz fin nul t'en poet reprandre.
 La Char s'estuit et se pensa,
 Et en partie s'esmaia
 De ce que l'Alme a luy disoit.
 Mais d'autrepart quant regarda
 Les autres, tant s'en delita,
 Que pour voidire ne savoit
 Au queu part trere se pourroit.
 Mais au Pecché quant remiroit, 620
 De son amour tant suspira
 Et d'autrepart tant covoit
 Le Siecle, qu'il tresoublia
 Tout qanque l'Alme a luy precha.
 Et lors quant l'Alme s'aparçuit
 Que contre luy la Char s'estuit,
 Dont devoit estre governals,
 Trop avoit perdu son deduyt :
 Et nepourquant apres luy suyt
 Ensi disant, 'He, desloyals ! 630
 Male es, pource te tiens as mals.
 Mais bien verras que trop est fals
 Cil anemy, qui te poursuit
 Pour toi ruer es infernals :
 Te fait moustrer les beals journals,
 Dont pers memoire de la nuyt.
 'He, Char, si fuissetz avisée
 Come par tresoum ymaginé
 Ly deble, qui te voet trahir,
 Le riche Siecle t'a moustré 640
 Et la plesance du Pecché,
 Mais Mort, par qui tu dois morir,
 Ne voet il faire avant venir,
 Ainz l'ad muscé du fals conspir,
 Que tu n'en soiez remembré !
 Car il te vorra pervertir
 Si fort que jamais convertir
 Ne t'en lerra par nul degré.
 Lors prist ly deable a coroucer,
 Quant l'alme oïst ensi parler, 650
 Et commanda que maintenant

Pecché de son plesant mestier
 Ove tout le vice seculier
 Fuissent la Char reconfortant,
 Et qu'ils la feissent si avant
 A leur delices entendant,
 Dont Mort pourroit tresoublier.
 Trestout en firent son commant,
 Du quoy la Char fuist si joyant
 Q'au Mort ne pot considerer. 660
 Mais l'Alme, que tout fuist divine,
 Quant vist sa char q'ensi decline,
 Reson appelloit et Paour,
 Qui sont sergant de sa covine ;
 Car sovent par leur discipline
 La frele Char laist sa folour.
 Pour ce celle Alme en grand dolour
 Fist sa compleinte et sa clamour,
 Sique la Char par leur doctrine 670
 Pourroit conoistre la verrouir
 Du Mort, que l'autre tricheour
 Ont fait muscer de leur falsine.
 Reson, q'a l'alme est necessaire,
 Au Char de l'omme lors repaire,
 Et Paour luy suioit apres :
 Mais d'autrepart fuist au contraire
 Temptacioun ly secretaire,
 Q'au Char tempter ne falt jammes.
 L'un volt entrer par bonne pes,
 Mais l'autre se tenoit si pres 680
 Au Char tempter du tiel affaire,
 Par quoy la Char sanz nul decess
 A tieu delit se tient ades,
 Que Reson ne l'en pot retraire.
 Resoum la Char aresonna,
 Et tant come pot la conseila
 Du bonne contemplacioun
 Que sa folie lessera :
 Et ce luy dist, q'au fin morra
 En grande tribulacioun. 690
 Mais d'autrepart Temptacioun
 Au Char fist sa collacioun,
 Et tieux delices luy moustra,
 Du pecché delectacioun
 Et seculiere elacioun,

658 enfront

Par quoy la Char desresonna.
 Et quant Paour ce vist, coment
 La Char par si fals temptement
 S'estoit du Resoum departie,
 Lors dist au Char tresfierement : 700
 'He, Char tresfole et negligent,
 He, Char mortiele, he, Char porrie,
 Trop es deçu du deablerie,
 Q'au toi muscont par tricherie
 La Mort que vient sodainement.
 Mais vien devers ma compaignie,
 Si te moustray l'erbergerie
 U l'ont muscé secretement.
 Paour q'estoit spiritual
 Lors prist la Char superflual, 710
 Si l'amena droit par la main
 Serchant amont et puis aval
 Trestous les chambres de l'ostal,
 Tanqu'ils troveront au darrein
 U Mort l'orrible capitein,
 Covert d'un mantelet mondein,
 Deinz une chambre cordial
 S'estoit muscé trestout soulein,
 En aguaitant la Char humein,
 Quelle est sa proie natural. 720
 Mais quant la Char vist la figure
 De celle horrible creature,
 Dedeinz soy comença trembler,
 Et tant se dolt en sa nature
 Que tout tenoit a mesprise
 Ce dont se soloit deliter.
 Vers Pecché n'osa plus garder,
 Ne vers le Siecle au covoitier,
 Ainz s'avisa du Mort tout hure :
 Si volt vers Resoum retourner, 730
 Sa conscience d'amender
 Et servir l'Alme en vie pure.
 Paour ensi la Char rebroie,
 Q'au Conscience la renvoie,
 Et Conscience plus avant
 Au bonne Resoum la convoie,
 Et puis Resoum par juste voie
 A l'Alme la fait acordant.
 Dont l'Alme, q'ot esté devant

719 Enaguaitant

735 plusauant

Du Char folie languissant,
Reprist s'espiritale joye,
Et vait la Char si chastiant
Par quoy la Char molt repentant
S'en part du deble et sa menoie.

La Char du deble s'en parti
Et du Pecché tout autrecey,
Ne point el Siecle se fia :
Paour l'avoit tant esbahy,
Q'a l'alme tout se converti
Sicome Resoun l'amonesta. f.9
Mais quant ly deble vist cela, 751
Comment Reson luy surmonta
Sique de l'omme estoit failli,
Ove Pecché lors se conseilla,
Et puis au Siecle compleigna
Par grant tristour disant ensi :

**Comment la Char de l'omme
s'estoit partie du deble par le conseil
du Resoun et de Paour: lors
coment le deble s'en complaignoit
au Siecle et donna pour ce lez
sept files du Pecché en mariage au
Siecle pour l'omme plus enginer.**

'He, Pecché, q'est ce que tu fais,
Par ton delit quant ne desfais
Paour du mort que l'omme meine ?
He, Siecle, pour quoy te retrais, 760
Qu[e] tu de ton honour n'attrais
Pour moy servir la Char humeine ?
Paour du mort ensi l'estreine,
Dont Resoun est la capitaine,
Q'a moy s'acordera jammais :

Du ceste chose je ne pleigne,
Car s'il eschape mon demeine,
Lors ay perdu tous mes essais.'
Pecché reconforta son pierre,
Et si luy dist en tieu maniere : 770
'He, pierre, je m'aviseraï :
Je suy des autres sept la miere,
Au Siecle auci je suy treschiere,
Dont leur conseil demanderay ;
Et solonc que je troveray,
Par leur avis te conteray

761 Qu

Que soit affaire en la matiere.
Car endroit moy me peneray,
Le corps, si puiss, je tricheray,
Dont l'omme dois avoir arere.' 780

Au Siecle lors s'en vait Pecché,
Si ad son consail demandé,
Et ove ses files lors conspire
Come porront faire en leur degré
Que l'omme arere soit mené
Au deble qui tant le desire.
Mais nepourquant Paour le tire,
Q'a l'un ne l'autre ne remire,
Ainçois les ad tous refusé ;
Sique le Siecle, pour voidire, 790
Ne Pecché ne le pot suffire,
Mais sanz exploit sont returné.

De ceste chose fuist dolent
Pecché, quant par s'enticement
Ne poait l'omme decevoir :
Mais ore oretz come fausement
Le Siecle par compassement
Au deble faisoit assavoir.
Il dist que c'il a son voloir
Les files Pecché poet avoir 800
En mariage proprement,
N'estoet doubter q'a son espoir
Il entrera tiel estovoir,
Dont l'omme ert tout a son talent.

Ly deble quant oyt cela,
Un petit se reconforta,
Et au Pecché de ce parloit
Pour savoir ce q'elle en dirra,
Et si luy plect q'ensi dorra
Ses files que l'en demandoit : 810
Car quant a soy, ce dist, sembloit
Le mariage bien seoit,
Dont tiele issue engendrera
Que son lignage enresceroit,
Et l'omme, qui tant desiroit,
Encontre Reson conquerra.

Pecché respont disant ensi :
'O pierre, a ton voloir parmy
Mes files sont en ton servage :
Fay que t'en plect, q'atant vous dy, 820

808 endirra

Moult bon me semble et je l'ottry,
L'alliance et le mariage.
Le Siecle est bien soutil et sage,
Dont m'est avis, sanz desparage
Mes filles puiss donner a luy,
Pour engendrer de no lignage,
Dont conquerras tiel avantage
Pour guerroier ton anemy.'

Et pour voidire courtement,
Tous s'acorderont d'un assent, 830
Le mariage devoit prendre :
Et maintenant tout en present
Le Siecle Orguil au femme prent,
Quelle ot le port de halte gendre.
Mais pour ce que l'en doit aprendre
Si noble feste de comprendre,
Comme fuist au tiel assement,
S'un poy m'en vuillez cy attendre,
Le vous ferray trestout entendre,
Sicome fuist fait solempnement. 840

**Comment les sept files du
Pecché vindront vers leur mariage,
et de leur arrai et de leur chiere.**

Chascune soer endroit du soy
L'un apres l'autre ove son conroi
Vint en sa guise noblement,
Enchivalchant par grant desroy ;
Mais ce n'estoit sur palefroy,
Ne sur les mules d'orient :
Orguil qui vint primerement
S'estoit monté moult fierement
Sur un lioun, q'aler en coy 850
Ne volt pour nul chastement,
Ainz salt sur la menue gent,
Du qui tous furent en effroy.

Du selle et frein quoy vous dirray,
Du mantellet ou d'autre array ?
Trestout fuist plain du queinterie ;
Car unques préee flouriz en mail
N'estoit au regarder si gay
Des fleurs, comme ce fuist du perrie :
Et sur son destre poign saisie
Une aigle avoit, que signefie 860
Qu'il trestous autres a l'essay
Volt surmonter de s'estutye.

Ensi vint a la reverie
La dame dont parlé vous ay.
Puis vint Envyte en son degré,
Q'estoit dessus un chien monté,
Et sur son destre poign portoit
Un espervier q'estoit mué :
La face ot moult descolouré
Et pale des maïs que pensoit, 870
Et son mantell dont s'affouloit
Du purpre au droit devis estoit
Ove cuers ardans bien enbroudé,
Et entre d'eux, qui bien seoit,
Du serpent langues y avoit
Par tout menuement poudré.

Après Envyte vint suiant
Sa soer dame Ire enchivalchant
Moult fierement sur un sengler,
Et sur son poign un cock portant. 880
Soulaine vint, car attendant
Avoit ne sergant n'escuier ;
La cote avoit du fin acier,
Et des culteals plus d'un millier
Q'au coste luy furent pendant :
Trop fuist la dame a redouter,
Tous s'en fuioit de son sentier,
Et la lessont passer avant.

Dessus un asne lent et lass
Enchivalchant le petit pass 890
Puis vint Accidie loign derere,
Et sur son poign pour son solas
Tint un huan ferm par un las :
Si ot toutdis pres sa costiere
Sa couche faite en sa litiere ;
N'estoit du merriem ne de pierre,
Ainz fuist de plom de halt en bass.
Si vint au feste en tieu maniere,
Mais aulques fuist de mate chere,
Pour ce q'assetz ne dormi pas. 900

Dame Avarice apres cela
Vint vers le feste et chivalcha
Sur un baucan qui voit toutdis
Devers la terre, et pour cela
Nulle autre beste tant prisa :
Si ot sur l'un des poigns assis
Un ostour qui s'en vait toutdis

Pour proye, et dessus l'autre ot mis
Un merlot q'en larcine va.
Des bources portoit plus que dis, 910
Que tout de l'orr sont replenis :
Moult fuist l'onour q'om le porta.

Bien tost apres il me sovient
Que dame Gloutonie vient,
Que sur le lou s'est chivalché,
Et sur son poign un coufle tient,
Q'a sa nature bien avient ;
Si fist porter pres sa costée
Beau cop de vin envessellé :
N'ot guaire deux pass chivalchée, 920
Quant Yveresce luy survient,
Saisist le frein, si l'ad mené,
Et dist de son droit heritée
Que cel office a luy partient.

Puis vi venir du queinte atour
La dame q'ad fait maint fol tour,
C'est Leccherie la plus queinte :
En un manteal de fol amour
Sist sur le chievre q'est lecchour,
En qui luxure n'est restreinte, 930
Et sur son poign soutz sa constreinte
Porte un colomb ; dont meint et f. 10
meinte

Pour l'aguarder s'en vont entour.
Du beal colour la face ot peinte,
Oels vairs riantz, dont mainte espeinte
Ruoit au fole gent entour.

Et d'autre part sans nul demeure
Le Siecle vint en mesme l'eure,
Et c'estoit en le temps joly
Du Maii, quant la deesce Nature 940
Bois, champs et préés de sa verdure
Reveste, et l'oysel font leur cry,
Chantant deinz ce buisson flori,
Que point l'amie ove son amy :
Lors cils que vous nomay desseure
Les noces font, comme je vous dy :
Moult furent richement servy
Sanz point, sanz reule et sanz mesure.

Comment lez sept files du Pecché
furont espousez au Siecle, des

910 plusque

927 plusqueinte

quelles la primere ot a noun dame
Orguil.

As noces de si hault affaire
Ly deables ce q'estoit a faire 950
Tout ordena par son devis ;
Si leur donna cil adversaire
Trestout enferr a leur doaire.

Trop fuist la feste de grant pris ;
Ly Siecle Orguil a femme ad pris,
Et puis les autres toutes sis,
Pecché leur Mere debonnaire
Se mostra lors, mais Mort son fitz
N'estoit illeoque a mon avis,
Dont fuist leur feste et joye maire. 960

Au table q'estoit principal
Pluto d'enfern Emperial
Ove Proserpine s'asseoit ;
Puis fist seoir tout perigal
Le jofne mary mondial,
Qui richement se contenoit :
Puis sist Pecché, q'ove soy tenoit
Ses filles solonc leur endroit :
Mais pour servir d'especial
Bachus la sale ministroit, 970
Et Venus plus avant servoit
Toutes les chambres del hostal.

Savoir poetz q'a celle feste
Riens y faillist q'estoit terrestre,
Ny' fuist absent ascune Vice,
Chascun pour bien servir s'apreste :
Mais sur trestous ly plus domestie,
Qui mieulx servoit de son office,
C'estoit Temptacioun la nyce,
Q'as tous plesoit de son service ; 980
Car mainte delitable geste
Leur dist, dont il les cuers entice
Des jofnes dames au delice
Sanz cry, sanz noise et sanz tempeste.

Lors Gloutonie a grant mesure
Du large main mettoit sa cure
As grans hanaps du vin emplir,
Le quel versoit par envoisure
As ses sorours, Orguil, Luxure,
Car trop se peine a leur servir. 990

971 plusauant

Des menestrals om pot oïr,
Que tout les firon rejoin
Par melodie de nature :
Et pour solemnement tenir
Le feste, a toute gent ovir
Les portes firon a toute hure.
Mais l'omme, qui de loigns s'estuit
En ascultant, quant s'aparçuit
Del tiel revel, du tiele joye,
La Char de luy par jour et nuyt 1000
De venir a si grant deduyt
Moult se pena diverse voie :
Mais l'Alme que Resoun convoie
Au Char que tielement foloie
Du Conscience ensi restuit,
Que partir ne s'en ose envoie ;
Ainz pour le temps se tient tout coie,
Comme bonne ancelle et l'Alme suit.

Ensi comme je vous ay conté,
Les filles furent marié 1010
Hors de les chambres enferrals
Au Siecle, qui les tint en gré ;
Car sur chascune en soun degré
Cink autres laides et mortals
Puis engendra luy desloyals :
Moult s'entr'estoient parigals
Les filles q'ensi furent née ;
Car tous leur fais et leur consals
Sont contraire a l'espirtuals
Du malice et soutileté. 1020

Entendre devetz tout avant,
Tous ceux dont vous irray contant,
Comme puis orretz l'estoire dite,
Naiscont du merveillous semblant ;
Car de nature a leur naiscant
Trestous sont mostre hermafodrite :
Sicome le livre m'en recite,
Ce sont quant double forme habite
Femelle et madle en un enfant :
Si noun de femme les endite, 1030
Les filles dont je vous endite
Sont auci homme nepourquant.
Dont falt que l'Alme bien s'avise,
Que Resoun ne luy soit divise,

998 Enascultant

Pour soy defendre et saulf garder :
Les filles sont du tiele aprise,
Si bonne garde ne soit mise,
Moult tost la pourront enginer.
Dont si vous vulliez ascoulter,
Les nouns des filles vull conter 1040
Et leur engin et leur queintise,
Comment trichont de leur mestier
Trestout pour l'Alme forsvoier ;
Ore ascultez par quelle guise.
Orguil, des autres capiteine,
La nuyt gisoit tout primereine
Avec le Siecle son amy :
Pecché sa mere bien l'enseigne,
Que celle nuyt fuist chamberleine,
Comment doit plere a son mary. 1050
Tant l'acolla, tant le blandi,
Dont celle nuyt avint ensi,
Que dame Orguil tout grosse et pleine
Devint, dont moult se rejoÿ.
Mais du primere qui nasqui
Je vous dirray verray enseigne.

Comment le Siecle avoit cink
files engendrez d'Orguil, desquelles
la primere avoit a noun Ipocresie.

Des files q'Orguil enfantoit
La primeraine a noun avoit
Ma damoiselle Ipocresie :
C'est une file que vorroit 1060
Q'au seinte l'en la quideroit ;
Pour ce du mainte fantasie
Compassé et fait sa guilerie :
Al oill se mostre et glorefie,
Dont par semblant la gent deçoit :
Tant plus come plourt ou pèche ou prie,
Tant plus s'eslonge en sa partie
De dieu qui son corage voit.
Ipocresie est singulere
Devant les gens, noun pas derere ;
Car u plus voit l'assemblément 1071
Ou a moster ou a marchiere,
Ipocresie en la corniere
Se contient moult devoltement ;

1016 sentrestoit

Et si nul povre de la gent
Lors quiert avoir de son argent,
Ipocresie est almosnere.
Car nul bien fait celement
Pour dieu, ainz tout apertement
Pour la loenge seculere. 1080
Rois Ezechie, truis lisant,
Par cause qu'il fuist demostrant
Le tresor q'ot el temple dieu
As messagiers du Babilant,
Par le prophete devinant
Par force apres luy fuist tollu.
Par ceste essample est entendu
Que le tresor q'om ad reçu,
Quel est a l'alme partenant,
Ne soit apertement veu 1090
Au siecle; car tout ert perdu,
Si l'en s'en vait glorifiant.
Ipocresie l'orgueilleuse
Resemble trop celestieuse;
Car par son dit tous mals argue,
Mais deinz son cuer maliciose
Trop est mondeine et vicieuse,
Quant tout au plain serra conue.
Ipocresie est a la veue
Du saint habit dehors vestue, 1100
Auci comme l'aignel graciose;
Mais en la fin, quant se desnue,
Si comme le lou que l'aignel tue,
Perest cruele et perillouse.
Ipocresie la nounstable
Reprove qu'il voit reprobable
En la condicioun d'autri,
Mais son grant crime abhominable,
Dont mesmes est en soy coupable,
Ne parle, ainz tout met en oubli. 1110
D'Ipocresie il est ensi,
Elle ad la face d'orr burny,
Et l'oill du cristal amiable,
Mais pardedeins le cuer de luy
Tout est du plom, mat et failly,
Et du merdaille nounvaillable.
Dieus l'ipocrite ad resemblé
Au beal sepulcre q'est dorré,

1092 senvalt

f. II

1131 adire

Dehors tout plain d'ymagerie,
Mais pardedeinz y gist muscé 1120
Puant caroine et abhosmé,
Que l'ipocrite signifie:
Car pardehors ypocrisie
Resplent du sainte apparantie,
Mais pardedeinz le cuer celée
Gist toute ordure et tricherie:
Dont l'en poet lire en Ysate
Coment tieux gens sont maluré.
Ipocresie est ensi belle,
Sicome ly verm que l'en appelle 1130
Noctiluca, c'est tant a dire
Luisant de nuit sicomme chandelle,
Mais du cler jour que riens concelle
Quant hom le voit et le remire,
Lors c'est un verm q'om fait despire,
Que riens ne valt en nul empire.
Ipocresie ensi porte elle
Apparissance du martire,
Mais au jour devant nostre sire
Lors appara come chaitivelle. 1140
Ipocresie d'autre guise
Soy mesmes vilement despise
Devant tous en comun audit,
Et tout ce fait du fole enprise,
Au fin que l'en le loe et prise:
Dont saint Bernard, 'Helas!' ce dist,
'Ils ce font deable d'espirit,
Que l'en les tiene en leur habit
Corsaint du l'angeline aprise.'
Mais l'angle qui du ciel chait 1150
D'un tiel corsaint moult s'esjoit,
Q'ensi sciet faire sa queintise.
Ipocresie est accusé
De sotie et soutileté:
Car il est sot tout voirement,
Quant il son corps par aspreté
Du grief penance ad affligé,
Et s'alme nul merite en prent;
Il est en ce sot ensement,
Q'au corps tolt le sustienement 1160
Et paist le Siecle et le malfée;
Mais sur tout plus fait sotement,

1158 enprent

Qu'il quide guiler l'autre gent,
Dont mesmes est au fin guilé.
Trop est subtil a demesure,
Quant il deçoit en sa mesure
Tous autres q'ont en luy credence,
Emblant par false couverture
Les dignetés dont om l'onure
Du foy parfaite et reverence: 1170
Mais ove soy mesmes mal despense,
Quant il son corps met en despense
Pour s'alme anientir et destrure:
Trop ad tempeste en conscience
Q'ove l'un et l'autre ensemble tence,
Dont l'un et l'autre est en lesure.
L'omme ypocrite en son endroit
Parentre deux est en destroit;
Car deux debletz luy vont temptant:
L'un dist qu'il bien mangue et boit
Derere gent, par quoy qu'il soit 1181
Au siecle bell et apparant;
Mais l'autre en est contrariant,
Et dist qu'il serra poy mangant,
Si q'om le pale et megre voit
Au saint prodhomme ressemblant:
Trop est subtil ymaginant
Cil q'a ces deux accorder doit.
Ipocrisie en dieu prier 1190
As autres ne poet proufiter
Et a soy mesmes fait damage:
Car quant du siecle quert loer,
N'est droit que dieus l'en doit loer.
Mais ce dist Augustin ly sage,
Qui prie d'indevoult corage
Il prie contre son visage
Le jugement q'om doit doubter.
Mieux valsist d'estre sanz langage
Muét sicomme l'oiseil en gage,
Q'ensi fole oreisoun orer. 1200
La seconde file d'Orguil, quelle
ad a noun Vaine gloire.
La Vaine gloire, q'est seconde,
De son sen et de sa faconde
C'est une dame trop mondeine:
Car pour la vanité du monde

Son corps ove tout dont elle abonde
Despent et gaste en gloire veine:
Tout se travaille et tout se peine
Pour estre appellé cheventeine,
Du quoy son vein honour rebonde.
Si tiel honour tient en demeine, 1210
Lors est si fiere et si halteine
Qu'il n'ad parail q'a luy responde.
La Vaine gloire d'oultre mer
Par tout se peine a travailler,
Plus pour conquerre los et pris
Du mond pour son noun eshalcer,
Que pour servir et honorer
Dieu pour l'onour du paradis.
La Veine gloire en son pais
Controve et fait novel devys 1220
De vestir et apparailler.
Quant Veine gloire est poestis,
Tous ceaux qui sont a luy soubgis
Sovent leur estoet genuller.
Du Veine gloire ly client
Ne soeffre ja son garnement
Ne son souler ne sa chaulçure
Estre enboez, ainz nettement
Qanque est dehors al oill du gent
Parant, le garde en sa mesure, 1230
Si qu'il n'ait tache en sa vesture;
Mais celle tache et celle ordure
Des vices, dont son cuer esprent,
Ne voet monder, ainz met sa cure
Au corps, et l'alme a nounchalure
Laist enboer tresvilement.
Trop est la Veine gloire gay
Du vesture et tout autre array;
Mais quant avient par aventure
Que celle dame sanz esmay 1240
S'est acemé du suhgenay,
Ove la pierrouse botenure
Du riche entaille a sa mesure,
He, qui lors prise la faiture,
Disant que c'est la belle maii
Et la tresbelle creature,
Ne quide lors que dieus dessure
La poet forsfaire en nul essay.

1183 enest

c

Mais courtement pour terminer,
 La Veine gloire seculer 1250
 Trop s'esjoÿt du vein honour,
 Du pris, renom, avoir, poer,
 Du sen, science et bealparler,
 Du beauté, force et de valour,
 Du riche array, du beal atour,
 Du fort chastel, de halte tour,
 Et qu'il les gens poet commander :
 Mieux quide d'estre creatour
 Que creature : he, quel foulour,
 Q'au mesme dieu voet guerrier ! 1260
 La Veine gloire laisse nient
 Que toutdis ove soy ne retient
 La cornette et la chalemelle,
 Pour solacer, u qu'il devient :
 Tous en parlont, 'Vei la q'il vient,
 Vei la, qui sur tous mieulx revele !'
 Quant il asculte leur favelle,
 Que tous luy prison, cil et celle,
 Tieu veine gloire luy survient,
 Orguil luy monte en la cervelle, 1270
 Dont s'alme laisse chaitivelle,
 Et son corps glorios maintient.
 Du bon saint Job tieu sont ly dit,
 Que le vain homme s'esjoÿt
 De la musike d'estrument ;
 Mais quant il plus s'en rejoyt,
 Lors en un point du mort soubit
 En la douleur d'enfern decant.
 Auci parlant de tiele gent
 Dist Ysate tielement, 1280
 Que toute gloire et vain delit,
 Que le vain siecle en soy comprnt,
 Serra torné soudainement
 En le desert q'est infint.
 Saint Ysate demandoit
 De Baruch, a quoy il querroit
 En ceste vie a soy leesce,
 Depuis que dieus envoieoit
 Sur toute gent q'en terre soit
 Pesance, douleur et tristesse. 1290
 Johel aici cela confesse,
 Q'au fin ert Veine gloire oppresse

1265 enparlont

Et tout confuse par destroit ;
 Dont cils qui vuillont par noblesce
 Monter la seculere haltesce
 Devont descendre a mal exploit.
 Solonc le dit d'un sage auctour,
 Gloire au riche homme c'est honour :
 Du qui l'escript evangelin
 Dit, quant es foires fait son tour, 1300
 Trop ayme q'autre gent menour
 Le saluent par bass enclin,
 Comme s'il fuist Charles ou Pepin ;
 Ne voet porter noun du voisin,
 Mais noun du maistre et du seignour :
 Si quert avoir l'onour terrin
 As festes, car sicomme divin
 Devant tous quert le see primour. f. 12
 Mais si riche homme honour desire,
 Du cause vient q'a ce luy tire ; 1310
 Mais l'omme povre q'est haltein
 Et quert l'onour avoir du sire,
 Quant il n'ad propre seal ne cire,
 Ne riens dont poet paier u mein,
 Cil quert sa gloire trop en vein :
 Car povre Orguil, je suy certain,
 Comme Salomon le fait descrire,
 C'est un des quatre plus vilein,
 Que mesmes dieu tient en desdeign,
 Et a bon droit le fait despire. 1320
 Ascun sa gloire vait menant
 En soul sa malvoisté fesant,
 N'en quert honour, ainz quert le vice,
 Du quoy s'en vait glorifiant.
 D'un tiel David vait demandant :
 'A quoy fais gloire en ta malice
 Tu q'es puissant du malefice ?'
 Ne say queu deble a ce l'entice,
 Quant nulle part porras par tant
 Avoir honour ne benefice : 1330
 Trop est ta gloire veine et nice,
 Dont nul profit te vient suiant.
 O Gloire que tant es estoute,
 Ce que saint Job te dist ascoulte :
 Il dist, 'Si fuissez eshalcez
 Jusques au ciel, enmy la route

Tu encherres, car dieus te bouste,
 Et come fymer au fin serres
 Purriz, perduz et avilez.'
 Auci de ce t'ad doctrinez 1340
 Ly sages, qui te dist sanz doubté
 De les humaines vanités,
 En plour et doel ert occupiez
 Le fin du Veine gloire toute.
 Au Veine gloire est ressemblé
 L'estorbuillon desmesuré,
 Que par soufler de sa tempeste
 Devant sa voie ad tout rué
 Le fruyt dont l'arbre sont chargé :
 Q'en tiele guise se tempeste 1350
 La Veine gloire en homme honeste ;
 Car tout le bien que l'omme aqeste,
 Dont l'alme a dieu soit honouré,
 Tieu gloire en soy le deshoneste ;
 Si torne joye en grief moleste
 Et en nounsaint la sainteté.
 La Vaine gloire ad Fole emprise,
 C'est un servant du grant reprise,
 Qui tous jours fait son mestre en-
 prendre
 Les faitz qui sont de halt emprise, 1360
 Au fin que l'autre gent luy prise,
 Dont vain honour pourra comprendre.
 Et pour cela tout fait despense,
 Corps, biens et temps sanz prou re-
 prendre,
 Fors soul le vent, q'au dos luy frise.
 S'il poet en vain honour ascendre,
 Le corps laist travailler en cendre,
 Mais l'alme en pert toute franchise.
 Encore une autre soe amie
 Ad Vaine gloire en compaignie, 1370
 Que par droit noun est appellé
 Ma damoiselle Flaterie,
 Que par tout est tresbien oïe,
 Et des seignours moult bien amé :
 C'est celle qui d'un page au pié
 Fait q'en la court est allévé
 A grant estat du seigneurie ;
 C'est celle sur tous plus secrée,

1368 enpert

Quant consail serra demandé,
 Car a son dit n'est qui repplie. 1380
 L'en poet bien dire que Flatour
 Est un subtil enchanteour ;
 Car par son vein enchantement
 Fait croire au dame et au seignour
 Que sur tous autres de valour
 Sont plus digne et plus excellent :
 Mais n'ont du bonté soulement
 Un point, mais par blandisement
 Il leur tresgette un si fals tour,
 Pour avoegler la vaine gent, 1390
 Qu'il quidont veoir clerement
 Ce qu'il ne verront a nul jour.
 Mais Flaterie trop mesfait
 Quant elle excuse le mesfait
 Et en apert et en silence,
 Et fait ressembler a bien fait
 Par argument q'est contrefait,
 Du quoy la veine gent ensense :
 Et pour gagner un poi despense
 Avoec l'autri pecché despense, 1400
 Et le procure q'om le fait,
 Dont suit mainte inconveniencie
 D'orguil et fole incontence,
 Dont maint homme ad esté desfait.
 Pour ressembler Flatour, est cil
 Semblable au coue du goupil,
 Que le vilté covere au derere ;
 Car ly flatour ensi fait il,
 Tout qanq'il voit en l'autri vil
 Du pecché covere en tieu maniere : 1410
 Et aici il est mençongere,
 Car s'un soul point en l'autre pierre
 Du bien, il en dirra tieu mil :
 Solonc qu'il voit changer ta chere
 Se torne avant et puis arere ;
 Trop pent sa lange a pliant fil.
 Quoy que l'en parle du folie,
 Toutdis l'en verras Flaterie
 A l'autry dit estre acordant : 1419
 'Bien' dist toutdis si l'en 'bien' die,
 Et s'om dist 'mal,' lors 'mal' repplie,
 Et si l'en rit, il est riant ;

1386 plusdigne

1413 endirra

Car sa parole et son semblant
 Tout ert a l'autri ressemblant :
 Ne plus ne meinz ce signefie
 Echo, que qanq' om est sonant,
 De la response est resonant
 Tout d'un acord et d'une oÿe.
 As fils pour ce de l'adverser
 La Flaterie en son mestier 1430
 Est la norrice et la gardeine :
 Si les endormist en peccher
 Par son chanter et mailloier
 En allaitant du gloire veine ;
 Mais puis les hoste a mal estreine
 De la mamelle q'est mondeine,
 Dont suef les faisoit allaiter,
 Et lors en perdurable peine
 D'enfern, u que ly deable enseigne,
 Sanz fin les fait escolerier. 1440

**La tierce file d'Orguil, la quelle
 ad a nonn Surquiderie.**

La tierce fille par decente
 Qe dame Orguil au mond presente,
 L'en appella Surquiderie.
 Celle est du cuer tant excellente,
 Que d'acun autre ne talente
 Avoir pareill en ceste vie.
 Ly clerks qui ceste file guie
 Tout quide en sa philosophie
 Qu'il Aristotle represente ;
 De les sept ars se glorifie, 1450
 Quant soul logique ne sciet mie
 Le firmament trestout extente.
 Ly Surquiders bien quide et croit
 Du quelque vertu q'a luy soit,
 Que par ce tous vait surmontant.
 De son quider trop se deçoit :
 Quant il meinz valt en son endroit,
 Lors quide avoir nul comparant.
 Ly Surquiders, sicome l'enfant,
 Qe sa pelote est plus amant 1460
 Que tout le tresor que l'en voit,
 D'un petit bien se vait loant,
 Dont il se quide estre auçi grant
 Come l'emperour du Rome estoit.

1488 Surquidour

Ly Surquiders, quant il est fortz,
 Quide a lier lions et tors,
 Dont il a Sampson contrevaile :
 Ly Surquiders, eiant beals corps,
 Quant se remire, il quide lors
 Ressembler Absolon d'entaile : 1470
 Ly Surquiders hardis sanz faile
 Tout quide a veintre la bataille,
 Sicome fist Lancellot et Boors.
 Quant Surquider les gens consaile,
 N'est pas certain son divinaille,
 Ne ses augurres ne ses sortz :

Mais nepourquant par s'enticer
 Sovent as gens fait comencer
 Tieu chose que jammais nul jour
 Ne la pourront bien terminer ; 1480
 Dont en la fin leur falt ruer
 De sus en jus leur grant honour,
 Leur sen deschiet en grant folour,
 Et leur richesce en povre atour ;
 Leur peas destourne en guerroier,
 Leur repos chiet en grant labour,
 Tornent leur joyes en dolour :
 Vei la le fin du Surquider !

Surquiderie est celle tour,
 Muré du fort orguil entour, 1490
 En quel ly deable a son voloir
 Gart tout l'espiritel errour
 Des tous pecchés en leur folour
 Dessoutz le chief du fol espoir.
 Car cil q'est surquidous pour voir,
 Combien qu'il soit du grant savoir,
 Ly deable en tolt le fruit et flour,
 Et soul le fuill luy laist avoir, f. 13
 Le quel d'un vent d'orguil movoir
 Fait et l'abat au chief du tour. 1500

Ly Surquiders que plus amonte
 Est cil q'ad perdu toute honte ;
 Car pour nul bien que dieus luy donne,
 Pour adjudger au droit accompte,
 Ne rent au dieu resoun ne conte ;
 Ainz quide, qanque luy fuissonne,
 Que destiné luy habandonne
 Pour la vertu de sa personne,

Dont il les autres tout surmonte.
 Mais qant meux quide avoir coronne,
 Dieu de s'onour luy descoronne, 1511
 Et de son halt en bass desmonte.

Ly Surquiders est singuler,
 Q'a nully voet acompaigner,
 Car il ad celle enfermeté
 Que plus s'agregge par toucher ;
 Et pour cela l'en solt nommer
 Le mal *Noli me tangere*.
 Car Surquiders en nul degré
 L'autry toucher ne prent en gré, 1520
 Ou soit en fait ou en parler,
 Ainz en devient d'orguil enflé :
 Car tout quide a sa volenté
 Le siecle a son voloir mener.

Surquiderie au compaignon
 Retient ove soy Presumpcionn,
 Que tant du fol orguil esprent,
 Qu'il quide tout le divin don
 Pour son merite en reguerdown
 Avoir deservy duement. 1530
 Un clerks dist que presument
 Est traitres et confondement
 D'umaine cogitacionn
 Dedeinz le cuer secretement :
 Car tout le bien q'a l'alme appent
 Perverte a sa dampnacionn.

Presumpcionn q'orguil desguise
 Deçoit les gens par mainte guise,
 Et les saintz hommes molt sovent,
 Quant ils quidont de son aprise, 1540
 Pour sainteté qu'ils ont enprise,
 Qu'ils valent plus que l'autre gent ;
 Dont veine gloire les susprent,
 Et font des autres jugement,
 Qu'ils sont coupable a la Juise ;
 Et deinz soy surquidousement
 Fensont q'au dieu plenerement
 Ont tout bien fait sanz nul mesprise.

Presumptuose veine gloire
 Trestout attrait a sa memoire 1550
 La sainte vie q'ad mené ;
 Dont en certain se fait a croire

1522 endevient

Que l'en ne trove en nulle histoire
 Un autre de sa sainteté :
 Et si luy vient prosperité,
 Bon los, quiete, ou ameisté,
 Ou du bataille la victoire,
 Tout quide avoir par dueté
 Deservy ; siq'en tieu degré
 Sa bonté blanche refait noire. 1560
 Presumpcionn la surquidé
 Est tielement en soy guilée,
 Sicomme la Tigre en soy se guile,
 Quant en sa voie voit getté
 Le mirour, dont quant s'est miré,
 Lors quide apertement sanz guile
 Veoir dedeinz son filz ou file :
 Mais ly venour trop se soubtile,
 Q'ove soy les ad tous asporté.
 Ensi ly deables prent et pile 1570
 Quanque Presumpcionn compile ;
 Quant quide avoir, tout est alé.

Au presumptive gent c'estoit
 Q'en l'evangile dieu disoit :
 ' Je vous ay, ' fait il, ' honouré,
 Et vous par orguillous endroit,
 Encontre courtoisie et droit,
 M'avetz au fin deshonoré.'
 Car pour bien ne prosperité,
 Q'au tiele gent dieus ad donné, 1580
 Ne pour vertu le quelque soit,
 Des tieus n'ert dieu regracié ;
 Mais come ce fuist leur propreté,
 Chascun sur soy les biens reçoit.

De la presumptuose rage
 Aucun y a, ce dist ly sage,
 Qui quide nestre franchement,
 Q'au dieu n'en doit aucun servage,
 Nient plus que l'asne q'est sauvage, 1590
 Q'au bois sanz frein jolyement
 S'en court trestout a son talent,
 Mais qui luy fist primerement,
 Ne qui luy donne pastourage
 Ne sciet ; et ensi folement
 Se contient sanz amendement
 Ly presumptif deinz son corage.

Pour ce ly sage Salomon
 Ce dist : 'O tu, Presumpcioun,
 O tu malvoise, o tu vilaine,
 Qui te crea ?' Dy et respoun ! 1600
 Qui te donna sen et resoun ?
 Qui te donna la vie humaine ?
 Qui te donna viande et laine ?
 Qui te donna bois et champaine ?
 As tu rien propre ? Certes noun :
 Tout est a dieu q'as en demaine,
 Dy lors q'est ce q'orguil te maine,
 Quant tu rien as mais d'autri down ?
 Presumpcioun ad une amye,
 Cousine de Surquiderie, 1610
 C'est Vaine curiosité,
 Q'est d'orgueilleuse fantasie ;
 Car tous jours serche l'autri vie,
 Et de soy ne s'est remembré :
 Trop se fait sage et surquidée,
 Quant sciet et juggle en son degré
 Tous autres, et soy ne sciet mic.
 Dont Bernard dist, 'Trop ad torné
 Sa sapience en vanité
 Cil q'autri sciet et soy oublie.' 1620
 Mais de la curieuse gent,
 Q'ensi presumpuousement
 Scievont et juggont chauny,
 En l'evangile proprement
 Dieus dist que pour leur juggement
 Forsjuggé serront et puny.
 Par Isate dieus auci
 Dist qu'il destruiera parmy
 La sapience au sapient,
 Qui se fait sage de l'autry ; 1630
 Mais fals orguil tout prent sur luy,
 Come c'il fuist sire omnipotent.
 De l'orgueilleuse Surquidance
 Vous dy qu'elle ad de s'aqueintance
 Derision, qui d'orguil rit
 Tous autres de sa mesdisance,
 Leur fait, leur dit, leur contenance
 Escharne et mocke par despit :
 Car dieus tiel homme unques ne fist
 Si vertuous ne si parfit 1640
 Que cil musard ne desavance,

Et par escharn et par mesdit
 L'autry vertus par contreplait
 Des vices torne a la semblance.
 Saint Job se plaingt disant ensi :
 'Des tieux,' ce dist, 'suy escharni
 Qui meindre sont du temps et age.'
 Saint Job se plaingt disant auci,
 Que la simplesce de celluy
 Q'est just et humble de corage 1650
 Ly derisour le desparage.
 Mais un grant clere q'estoit bien sage,
 Maximian dist, qui d'autri
 Desrit, n'ert mesmes sanz partage,
 Ainz en desris et en hontage
 Le fin doit revertir sur luy.
 Dedeinz la bible essample truis,
 Q'escharn au fin serra perduz,
 Sicomme d'Egipcien estoit,
 Q'en servitude les Hebrus 1660
 Tenoient a leur propres us ;
 Mais sur tous mals pis leur faisoit
 Cils du pais en leur endroit,
 Quant chascun les escharnissoit :
 Mais leur escharn de sus en jus
 Dieu moult soudeinement changoit ;
 Enmy la rouge mer salvoit
 Les uns, et l'autres ad conclus.
 Ce nous dist sage Salomon,
 Que vile abhominacioun 1670
 A dieu sont tout ly derisour :
 Et pour ce la dampnacioun
 De leur mockante elacioun
 Au juggement u n'ert fals tour
 Dieus appaillie sanz retour.
 De ce David nous est auctour,
 Q'au dieu fait reclamacioun
 Disant, 'O dieus, droit Juggeour,
 Tu mockeras le mockeour
 Du fole ymaginacioun.' 1680
 Derision pour luy servir
 Ad fait un servant retenir,
 Que l'en appelle Malapert.
 Par tout u cil pourra venir,
 Honte et Vergoigne fait sufr
 Pour mals qu'il leur dist en apert :

Car moult sovent a desouvert
 Dist chose que serroit covert,
 Pour les gens simples escharnir ; 1689
 Mais coment qu'il as autres sert, f. 14
 L'en trove au court, j'en suy bien cert,
 Qui volentiers le voet oir.
 Si centz fuissent en compaignie,
 Soul Malapert du janglerie
 Trestous les serroit surmontant :
 Plus est jolys que n'est la pie,
 Devant les autres dance et crie,
 U que la presse voit plus grant ;
 Car il surquide que son chant
 Soit molt plus douls et plus plesant 1700
 Que soit nulle autre melodie,
 Et que son corps soit avenant ;
 Pour ce se moustre et met avant,
 Que rien luy chalt qoi nuls en die.
 Cil Malapert ly bealpinée,
 Alant le pass engalopée
 Ove la ceinture bass assisse,
 Par tout, u vient a l'assemblée,
 A luy se sont tout ascoultée,
 Qu'il endirra du fole aprise ; 1710
 Car si nuls soit deinz la pourprise
 Curtois sanz nul vilain enprise,
 Cil Malapert ly malsenée
 Par contrefait tout le devise :
 Si l'autre en ad response mise,
 Lors serra son escharn doublée.
 Pour ce t'en fait ly sage aprendre
 Que derisour ne dois reprendre ;
 Car cil qui derisour reprent,
 Quert a soy mesmes tache prendre : 1720
 Car jammais fol ne doit comprendre
 Le bien de ton chastement,
 Ainz t'en harra et laidement
 Te mockera devant la gent.
 Pour ce l'en dist, tu dois entendre
 Que chien dormant aucunement
 N'esveilleras, car autrement
 D'abay ne te pourras defendre.
 La quarte file d'Orguil, la quelle
 ad a noun Avantance.

1700 plusdouls

1704 endie

1715 enad

1740 plusauant

1758 enest

La quarte file enorgueillant
 Par tous ses ditz s'est avantant ; 1730
 Pour ce son noun est Avantance.
 Cil q'est de ceste file amant,
 Et en voir dire et en mentant
 Sovent s'avante en sa parlance
 De son grant sen, de sa puissance,
 De sa valour, de sa substance ;
 Ne fait nul bien dont est celant,
 Ainz dist toute sa sufficence,
 Dont il son propre honour avance ;
 Herald n'en dirroit plus avant. 1740
 Le Vanteour de plus en plus
 De vanter ne s'est abstenus,
 Dont croit qu'il son honour remonte :
 Car s'il soit beals ou fortz ou prus,
 Au fin q'as tous ce soit conus,
 Fait mainte longe et belle conte ;
 Et s'il soit riches, lors acompte
 Devant trestous combien amonte
 Le grant tresor qu'il tient reclus :
 Trop s'esjoÿt, quant il reconte 1750
 Come il les autres gens surmonte
 Des bonnes mours et des vertus.
 Qui bien entent les ditz des sages
 Et s'orguillist, il est nounsages,
 Du soy pour faire aucun avant :
 Car s'il soit beals et pense oultrages,
 Repenser doit deinz ses corages
 Ce que Boëce en est parlant ;
 Si dist que l'oill de son voiant
 Perest si fieble en regardant, 1760
 Qu'il plus ne voit fors les ymages
 Dehors ; mais si par tout avant
 Pourroit veoir le remenant,
 Ne se tendroit a les visages.
 Hom list que linc ad tiele veue,
 Si trespersante et si ague,
 Que trespersant les murs du pieré
 Voit clerement la chose nue :
 Dont dist Senec, 'He, dieus aieue
 Quel'oill de l'omme en tieu manere, 1770
 Dehors, dedeinz, devant, derere,
 La vile ordure et la matiere

Q'en nostre corps gist retenue
 Verroit du regardure clere :
 Ore voi je tiele qui s'appiere,
 Que lors voit estre desconue.
 Et d'autre part s'orguil deinz soy
 Se vante et face son buffoy
 Du force dont qu'il est plener,
 Repenser doit deinz son recoy 1780
 Que molt sovent d'un petit quoy
 S'effroie ; car l'en voit grever
 Petite mosche au fort destrer.
 Saint Augustin s'en fait parler,
 Si dist, 'O force, tien te coy ;
 Quant tu la puice resister
 Ne puis au lit pour reposer,
 Me semble que ta force est poy.
 Et s'om se vante de richesce,
 Solonc Boëce je confesse 1790
 Ly bien mondein sont decevable :
 Seurté promettent et leesce,
 Et donmont paour et tristesse ;
 Promettent l'omme seignorable,
 Et le font serf, et de nounstable
 Promettent chose permanable ;
 Des grans delices font promesse,
 Et sont poignant, et de la fable
 Promettent estre veritable :
 Au fin se pleingt qui les adesce. 1800
 Et oultre ce, qui bien remire,
 Ly bien mondain sont a despire,
 Qu'ils promettent de leur falsine
 A sauler l'omme et a suffire
 Au tout ce que ly cuers desire ;
 Et en certain par leur saisine
 Suffraite donmont et famine ;
 Car qui plus ad, plus enfamine.
 Mais fole orguil de son empire
 Si ferme croit l'onour terrine, 1810
 Q'aler jammais quide en ruine,
 Pour rien que l'en luy porra dire.
 Ly philosphre q'estoit sage
 Dist, 'Tiel quel es deinz ton corage,
 Tiel ta parole expressera.
 Ce piert d'orguil, q'en son oultrage
 De sa science et son lignage

Et de ses biens se vantera :
 Car ses vertus tout contera,
 Au fin que tous sachont cela, 1820
 Siqu'il n'ait pier du voisinage
 En la Cité u tiel esta :
 Comme Salomon le tesmoigna,
 Sovent l'en voit venir damage.
 Par soun prophete Sephonie
 Dieus dist que gens de vanterie
 D'entour les soens il hostera.
 Si dist auci par Jeremie
 Que la vantante halte vie
 De halt en bass la ruera, 1830
 Toute arrogance humilera :
 Et ensi dieus nous manaca
 Par Salomon et Isate :
 'Heu,' dist, 'cil qui se vantera !
 Par ce toutdis de luy serra
 Trestoute vertu forsbanic.'
 Del phariseu l'en voit lisant
 Pour ce q'el temple son avant
 De ses bienfaitz au dieu faisoit,
 Son pris perdist de maintenant 1840
 Et son loer du bienfesant :
 Mais cil qui pupplian estoit
 Tout autrement se contenoit,
 De ses mesfais mercy prioit :
 Dont l'un, q'ert juste pardevant,
 De son avant se pervertoit,
 Et l'autre, qui devant pecchoit,
 Devint just par soy despisant.
 Ce dist Solyn en l'escripture :
 'Ossifragus de sa nature 1850
 C'est un oisel qui seulement
 Du moel des oss prent sa pasture ;
 Mais quant ne poet par aventure
 L'oss debriser, lors monte au vent
 Volant en halt, et garde prent
 D'ascune roche, et tielement
 Puis laist chaour l'oss pardessure,
 Que tout en pieces le purfent :
 Ensi devoure a son talent
 Sa proie parmy la fendure.' 1860
 Ly deable auci par cas semblable,
 Pour faire l'omme saint muable,

Primerement le fait monter
 En vaine gloire surquidable,
 Et par ce fait qu'il est cheable
 Dessur la roche de vanter.
 Ce dist David en son psalter :
 'Qui d'orguil fait son cuer lever,
 Dieus contre luy se fait levable' :
 Et ensi comme falcon muer 1870
 Le fiert, dont l'estoet tresbuscher
 Si bass dont puis n'est relevable.
 De Lucifer hom voit lisant,
 Tantost qu'il ust fait son avant,
 Qu'il volt le see divin ascendre
 Et ressembler au toutpuissant,
 Dieus le rua de maintenant
 Jusq'en abisme, et fist descendre
 El fiou qui toutdiz art sanz cendre.
 En ciel fist dieus vengeance prendre f. 15
 D'orguil qui s'en aloit vantant : 1881
 Par ce poet om essample prendre
 Que bobancers fait a reprendre,
 Car il au deable est ressemblant.
 La vanterie en terre auci
 Dieus hiet et toutdis ad hal.
 Du Nabugod ce poet om lire,
 Qui se vantoit jadyz ensi
 Qu'il Babiloyne ot establi
 En gloire de son halt empire : 1890
 Mais ainz qu'il pot au plain suffire
 Son grant orguil vanter et dire,
 Soudainement tout s'esvany,
 Et transmua par le dieu ire
 Sa forme d'omme en beste pire
 Sept auns, ainz qu'il en ot mercy.
 Simon Magus quant se vantoit
 Q'en halt le ciel voler vorroit,
 Par l'art magike en l'air bien sus
 Au Rome en son orguil montoit ; 1900
 Mais quant plus halt monter quidoit,
 Soudainement dieus l'ot confus,
 Et de son halt le ruoit jus ;
 Dont il le corps ot confusus,
 Et l'alme as deables s'en aloit.
 Vei la le gaign q'en orguil truis :

Quant l'en se vante estre au dessus,
 Par cas plus tost chaour l'en doit.
 Par autre guise s'est vanté
 Le Vanteour desmesuré, 1910
 Dont luy maldie Jhesu Crist :
 Car si d'amour tout en secré
 Soit d'une dame bien amé,
 En soy vantant par tout le dist,
 Dont l'autre honour trop amerrist.
 Plust ore a dieu cil q'ensi fist,
 Ou fait, ou fra, fuist forsjuggé,
 Et par la goule en halt pendist ;
 Quant faire pecché ne suffist,
 Mais q'om se vante du pecché. 1920
 O dieus, comment il se desroie
 Le Vanteour, quant il donnoie,
 Seant d'encoste ses amours !
 C'est cil alors qui tout mestroie,
 C'est cil qui terre ad et monoie,
 C'est cil qui sciet trestous honours,
 C'est cil q'est fort en grans estours,
 C'est cil qui conquerra les tours,
 C'est cil qui valt par toute voie ;
 Sa langue est plaine des valours, 1930
 Mais plus promette en quatre jours
 Q'en cinquans ans ne confpleroie.
 Car qui s'avante volenters,
 Sovent avient qu'il est mentiers,
 Contant du soy que ja n'estoit :
 S'il n'ait en bource deux deniers,
 Il dist qu'il ad ses tresorers
 Pour achater que bon luy soit,
 Dont sa largesce faire doit.
 Tieu conquerrou l'en loeroit, 1940
 Car s'il soit d'armes costummers,
 Il dist tieu chose parferroit,
 La quelle enprendre n'oseroit
 Pour tout l'avoir du Montpellers.
 Tout ensemment come le paintour,
 Quant il portrait un grant estour,
 Fiert les grans cops en sa peinture,
 Tout autreci ly Vanteour
 En recotant de sa valour
 Se vante et parle a demesure : 1950

Mainte merveille et aventure,
Sa grosse langue afferme et jure
De son sen et de sa folour,
Du peas et d'armes, q'a nulle hure
Estoient voir, ainz controveure,
Dont quide eshalcer son honour.

Le Vanteour sovent sur soy
Emprent qu'il est privé du Roy,
Si qu'il n'en poet avoir essoigne;
Et dist as gens, 'Parlez au moy : 1960
Si vous me donnez le pourquoy,
Je fray l'exploit de vo busoigne.'
Jaket son varlet le tesmoigne,
Et dist au fin que l'en luy doigne,
'Tout est ce voir, tenez ma foy.'
Ensi les larges downs enpoigne;
Mais en la fin c'est grant vergoigne,
Car sa vantance est tout gabboy.

Sicomme du vertu corporal,
Quant orguil par especial 1970
Devant les autres ad le gré,
Se vante et fait desparigal,
Tout ensi de l'espiritual,
Quant fait aucune charité,
Ou soit apert ou soit privé,
Au double ou plus s'en est vanté,
Comme s'il fuist tout celestial :
Sique les biens du tout degré,
Dont corps et alme sont doé,
Sa langue soule torne en mal. 1980

Le Vanteour de sa semblance
Porte au geline resemblance,
Que de ses oefs criant entour
S'en vait, dont l'en aparceance
Prent de son ny, si q'au finance
Tout pert ses oefs par sa clamour :
Et ensi fait ly Vanteour ;
Quant il ad fait aucun bon tour,
N'el voet celer, ainz par bobance
S'en vante pour acquere honour 1990
Au corps ; mais l'alme au darrein jour
S'en vait sanz part du bienfaisance.

Mais pour descrire en sa maniere,
Ly Vanteour est ly fol liere,

Qui tout s'afforce en sa covine
D'emblar la gloire a dieu le pierre,
A qui tout honour se refiere ;
Mais il le tolt de sa ravine.
Et a soy propre le destine.
Par quoy du redde discipline 2000
Drois est qu'il son orguil compiere :
Pour s'avantance q'est terrine
En paine que jammais ne fine
De son avant ert mis derere.

**La quinte file d'Orguil, la quelle
ad a noun Inobedience.**

La quinte, ensi come je le pense,
Son noun est Inobedience ;
Q'a nully voet estre soubgis
Pour digneté ne pour science,
Ne porte a nully reverence,
Tant ad le cuer d'orguil espris. 2010
C'est un pecché par quoy ly fitz
Sovent des pieres sont malditz,
Quant par vertu d'obedience
Ne vuillont estre bien apris.
C'est un pecché q'a son avis
N'ad cure de la dieu offence.

C'est un pecché de son mester
Qui taire voet quant dust parler,
Et quant dust parler se voet taire.
C'est un pecché q'apostazer 2020
Fait maint et mainte reguler,
Trestout lessant et frocke et haire.
C'est un pecché qui fait desplaire
La femme qui n'est debonnaire
Au mary, qui la volt amer.
C'est un pecché qui le contraire
En toutes choses vorra faire,
Q'a nul bien se voet acorder.

C'est un pecché q'ad trop de peine,
Quant force a servir le constreine ; 2030
Sovent grondile a bass suspir,
Trop ad la volenté vileine.
Qui plus d'amour vers luy se peine
Del faire aler ou retenir,
Tant plus se fait desobeir :
Si plus ne puet contretenir,

Tout maldirra du bass aleine,
Q'au nulle loy voet obeir,
Pour faire droit ne droit souffrir
N'a son prochein n'a sa procheine. 2040

C'est un pecché que son amant
Aprent qu'il soit desobeissant
Vers dieu et vers son voisinage :
Vers qui des deux soit malfaisant,
Jammais du gré n'ert repentant,
Dont confesser voet le damage,
Ne faire peas de son outrage.
Ne croit q'au dieu doit son hommage,
Et a tout autre rien vivant
Il ad contraire le corage : 2050
Nul le pourra treter si sage,
Q'as autres le face acordant.

Desobeissance en sa pectrine
Ad le cuer dur plus que perrine,
Que n'amollist aucunement
Pour la divine discipline,
Que dieu par droite medicine
Envoit pour son amendement :
Ainz, quanque dieus benignement
Luy donne a son relievement, 2060
Il le destorne a sa ruine ;
Et pour ce q'en gré ne le prent,
Du double mal la paine attend
En lieu d'enfern, qui ja ne fine.

Quant ceste file se mesprent
Vers dieu, et dieu revengement
Prent en pité, dont l'en chastie,
Ou soit par mort de son parent,
Ou soit du perte ou d'accident,
De blesceure ou de maladie, f.16
Orguil de ce dieu ne mercie ; 2071
Ainz en tençant trestout defie
Encontre le chastiment
De dieu, mais puis de sa folie
Ne pert tantsolement la vie,
Mais l'alme perdurablement.

Car saint Gregoire bien le dist,
Solonc que truis en son escript,
Que dieu chastie son amy,
Tanqu'il a soy l'ad fait soubgit : 2080

Mais s'il avient par autre plit
Qu'il ne s'ament, ainz en oublit
Met le chastiment de luy,
C'est un vray signe q'a celluy
Dieus ad sa grace tout desdit,
Et voet au fin qu'il soit peri ;
Dont son orguil soit remeri,
Quant corps et alme ensemble occit.
Grant mal vient par desobeissance ;
L'apostre en porte tesmoignance, 2090
Disant que par desobeir
D'Adam primer vint la vengeance,
Dont naiscons serf et en penance ;
N'est un qui ce poet eschulr :
Moises le dist, cil q'obeir
Ne voet al dieu precept tenir
Solonc la divine observance,
Il doit par jugement morir ;
Dont puis sanz fin l'estoet perir,
Et languir en desesperance. 2100

Del unicorn ce dist Solyn,
N'el poet danter aucun engin,
Mais moert ainz q'om le poet danter,
Tant ad le cuer gross et ferin.
Orguil ensi le fol cristin
Sanz obeir le fait errer
Du bonne aprise et salvager ;
Par quoy ne sciet son dieu amer,
Ne vivre egal ove son voisin,
Tout ordre fait desordener, 2110
N'ad cure du loy seculer,
Ne doubte du precept divin.

Cil q'Inobedience meine
Resemble au corps du char humeine
Q'est mort, dont om ne poet plier
Les membres ; car pour nulle peine
Au souverain n'au souveraine
Orguil se voet humilier.
Mais cil qui voet le mont monter,
Ainçois l'estoet le doss courber 2120
Qu'il truis la voie droite et pleine :
Orguil pour ce ne poet durer
Amont le ciel en halt aler,
Car ne s'abesse a nul enseine.

Urse et Lionn qui sont salvage,
Ostour et la faucon ramage,
Dedeinz un an jusques au mein
L'en poet danter au saulf menage ;
Mais deinz sessante al dieu servage
Pour reclamer c'est tout en vein 2130
Un fol peccant. He, queu vilein !
Quant par precher du chapelein,
Ne pour fieblesce de son age,
Ne reconoist son souverain ;
Ainz plus se fait de dieu loigertein
Que ne fait beste en le boschage.

L'orguil de l'Inobedient
En ceste siecle aici sovent
Fait guerre sourdre et grant distance ;
Dont la maldiont mainte gent, 2140
Et dieus la maldist ensemment.
Ce duissent savoir cils de France,
Que dieus hiet la desobeissance,
De ce q'encontre leur ligance
Chascun par guerre se defent
De faire hommage et obeissance
A celluy qui de sa nescance
Le droit depar sa mere prent.

Dame Orguil trop s'entente mist,
Quant ceste file ensi norrist, 2150
Baillant a luy deux servitours,
Dont ly primer ad nonm Despit,
Qui curtoisie sanz respit
Guerroie et dist maintes folours :
L'autre est Desdaign, q'en toutez courtz
Parole et fait tout a rebours,
N'agarde a ce que Resown dist.
Dame Orguil, l'aisné des sorours,
Ces deux servantz pour leur erroirs
Avoec sa file les assist. 2160

Despit la sert en son degré,
Que ja ne souffre de bon gré
Que l'en luy donne aucune aprise ;
Ne combien qu'il en soit prié
En sa science ou faculté
D'enseigner autre, en nulle guise
Ne voet ce faire, ainz le despise :

2126 la faucon ram in ras
2181 enperdist

Q'a son avis l'autry franchise
Luy est servage abandonné ;
Et pour cela de sa mesprise 2170
Le pris de son voisin desprise,
Au fin qu'il mesmes soit prisé.

Asses trovons d'essamplerie
Q'en despiser ad grant folie,
Et molt sovent mal en avient :
Ce parust bien du feel Golie,
Quant despisoit de s'estoutie
David, q'a sa bataille vient ;
Mais dieu, qui tout crea du nient,
Pour l'orguil qui son cuer retient 2180
Fist tant qu'il en perdist la vie.

Au despitous despit avient,
Car mort soubite luy survient
Du permanable vilenie.
'Way,' ce dist Isate, 'a vous,
Q'as autres estes despitous !
Car quant vous serrez enlassé
A despire autrez, lors de tous
Serretz despit' ; dont entre nous
Falt bien que soions avisé. 2190

Ce dist David en son decrée :
'Ly toutpuissant deinz son pensée
Despise tous les orguillous,'
Et tout le mond les tient en hée :
Drois est pour ce que maluré
Soient aveoc les malurous.

Par Moÿsen dieus a sa gent
Dist, que s'ils son commandement
Vorront despire, lors en vain
Les champs font semer du frument.
Ou planter vine aucunement ; 2201
Car dieus trestout le fruit et grain
Leur fra tollir au forte main ;
Ils gaigneront sanz avoir gain,
Et viveront sanz vivement.
He fol orguil, qui tols le pain,
Trop es au propre corps vilain,
Et t'alme nul prouffit en prent.

Par Ezechiel dieu disoit,
A cause que son poeple erroit 2210

2164 ensoit 2175 enavient
2208 enprent

Ses covenances despisant,
Tieux reetz dist qu'il extenderoit,
Dont pris trestous attrapperoit
En tieu prisonn, que puis avant
Nuls leur puet estre rechatant,
Ainz y morront sanz nul garant.
Vei la le fin q'avenir doit
Au despitous desobeissant ;
Car cil q'au dieu n'est obeissant
Au deable obeiera par droit. 2220

Roy Salomon de son aprise
Dist, cil qui povre gent despise
Reproeche fait au creatour.
Et Malachie en tiele guise
Demande, puisque d'une assise
Un dieus de tous estoit fesour,
Pour quoy la dame ou le seignour
Despiseront la gent menour,
Que de nature et de franchise
Ont alme et corps semblable a lour.
A ce demande, O despisour, 2231
Tu dois respondre a grant Juise.

Despit, qui porte cuer inflat
Du vent d'orguil, dont il abat
Humbleesce par desobeissance,
Ne fait honour a nul estat,
N'au duc, n'au conte, n'au prelat,
Ne voet soutz l'autry governance
Servir, mais par contrariance
Du dit, du fait, du contenance 2240
Desobeit du cuer elat.
Gregoire en porte tesmoignance,
Que cuer enflé de tiele estance
Au toute verité debat.

Despit, qui sert Delacioun,
Naist d'une eructuacioun
De l'estommac au deble issant,
Du quelle par temptacioun
A l'homme donne inflacioun
D'orguil que dieu vait despisant. 2250
D'un malvois ny s'est evolant,
Et au peiour s'est retornant,
Q'est fait a sa dampnacioun
Deinz la puante goule ardant

2242 enporte

De Sathan, u mort est vivant
D'eterne lamentacioun.

Desdaign, quant passe aval la rue,
Par fier regard les ocls il rue
Dessus les povres gens menuz ;
Et si nul povre le salue, 2260
Il passe avant comme beste mue,
Que ne respont a leur saluz : f. 17
Et s'om ne dist le bien venuz,
Lors son orguil luy monte sus,
Que l'en n'agarde a sa venue ;
Sicomme lionn, encore et plus,
Rampant s'en vait col estenduz,
Comme s'il volsist toucher la nuc.

Desdeign des autrez se desdeigne,
Come l'escripture nous enseigne ; 2270
Sicome Judas se desdeignoit
Du bienfait de la Magdeleine,
Quant d'oingt versoit la boiste pleine,
Dont de Jhesu les piés oignoit :
Un archevresce aici estoit,
Que de Jhesu se desdeignoit,
Quant l'omme languissant en peine
Au jour de Sabat garisoit :
L'un contre dieu desdeign portoit,
Et l'autre contre sa procheine. 2280

Ce nous dist Salomon le sage,
Que cil qui plus deinz son corage
Est d'indignacioun prochein,
Cil est plus pres d'estre en servage
As autres vices ; car l'outrage,
Que gist el vice de desdeign,
Tant fait le cuer gross et vilein,
Qu'il n'est egal vers son prochein,
Ne soubgit vers son seignorage ;
Tout obeissance tient en vein, 2290
D'umilité se tient forein
D'orguil en le plus halt estage.

De celle generacioun
Portant les ocls d'elacioun
Ove la palpebre en halt assise,
Que ja d'umiliacioun
Ne prent consideracioun,
Les ocls du tiele gent despise

2284 pluspres

2292 plushalt

Roy Salomon de son aprise ;
 Et le prophete ne les prise, 2300
 Ainz dist en reprobacion,
 Que dieus les oels de halte enprise
 Humilera de sa reprise
 En la basse obscuracion.
 Mais d'autre part Danger auçi,
 Qui du Franchise est anemy,
 A ceste route associa
 Dame Orguil pour servir ensi,
 Que jammais au voloir d'autri
 De son bon gré n'obeiera. 2310
 Unques Danger fuist ne serra
 Amé, qu'il unques nul ama,
 Car Groucer, ly vilain failly,
 De son conseil toutdis esta :
 Qui plus vers luy s'umilera,
 Plus trovera contraire en luy.
 Orguil, qui tous biens desordeigne
 Et trestous mals au point ordeigne,
 Trois autres sers fist ordeigner,
 Queux Inobedience meine 2320
 Chascune jour de la semeigne
 Pour luy servir et consailler.
 Murmur hom fait l'un appeller,
 Et l'autre, q'est trop adverser,
 Rebellion, qui dieu desdeigne ;
 Contumacie ot nommer
 Le tierce, qui s'umilier
 Ne voet pour nul amour ne peine.
 Pour Murmur et Rebellioun
 Dieus se vengra, car nous lison 2330
 Que les Hebreus, qu'il ot mené
 Hors du servage a Pharaon,
 En la deserte regioun
 Trestous occit pour ce peché ;
 Q'un soul de tous en salveté,
 Fors soul Caleph et Josué,
 En terre du promission
 Ne pot venir ; car sanz pité
 Dieu, qui vist leur rebelleté,
 Les ot mis a perdicion. 2340
 La terre en soy se desferma,
 Et en abisme transgluta

2348 pluspuissant

Dithan et Abiron vivant ;
 Et puis du ciel dieus envoia
 La flamme, qui tout vif bruilla
 Choré ove tout le remenant,
 Q'a luy s'estoient adherant :
 Que cils furent ly plus puissant
 De les Hebreus, mais pourcela
 Qu'ils deinz soy furent murmurant, 2350
 Dieus se vengra, que plus avant
 Les autres par ce chastia.
 A Saül dieus disoit ce point,
 Que d'aguillon contre le point
 C'est dure chose a regibber :
 Mais Orguil ne s'en garde point,
 Combien qu'il soit constraint et point
 De dieu, pour ce ne veot lesser
 Encontre dieu de rebeller :
 Car il ad un son consailler, 2360
 Que jammais ert en humble point,
 Contumacie l'oi nommer,
 Q'au tout precept q'om doit garder
 Cil fait encontre tout a point.
 Contumacie se refiere
 As trois parties : la primere
 A mesmes dieu fait sa mesprise,
 Et la seconde au pierre et miere,
 Et l'une et l'autre est trop amiere ;
 La tierce au gent du sainte eglise, 2370
 Q'a leur somonce et leur aprise
 Ne s'obeit, ainz les despise,
 Et leur sentence met derere.
 De ces trois pointz, dont je devise,
 Dieus se corouce en mainte guise,
 Et prent vengeance horrible et fiere.
 Seron le Prince de Surrie
 Cil vint en sa contumacie
 A rebeller encontre dieu,
 Comme cil q'au dieu n'obeia mye ; 2380
 Si volt combatre en s'estultie
 Ove bon Judas le Machabieu ;
 Mais au parfin fuist tout vencu.
 Antiochus aussi refu,
 Q'a dieu d'orguil se contralie,
 Dont puis fuist mort et confundu.

2374 ce

Asses des autres l'en ad veu
 Perir de celle maladie.
 Fils contumas a son parent
 El viele loy par juggement, 2390
 Atteint quant il en fuist prové,
 Tantost serroit molt vilement
 Amené pardevant la gent
 Au porte, u cils de la cité
 Le verront estre forsjuggé,
 Que cil q'ot cuer de dureté
 A dure mort soudeinement
 Des pierres serroit lapidé :
 De tiel fait soient essamplé
 Ly fils d'Orguil qui sont present. 2400
 Desobeissance en sa maison
 Deux autres ad, dont l'un par noun
 Contrarious est appelé,
 Et l'autre Contradicioin,
 Par quelle, ensi comme nous lison,
 Dieus ove son poeple estoit iré,
 Qu'il ot d'Egipe hors mené ;
 Et ce fuist quant la dureté
 Du roche versoit a fuision
 Cliere eaue, dont cils abevré 2410
 Furont, q'avant sa deité
 Contredisoient au perroun.
 De l'autre vice a son deces
 Au poeple precha Moyses,
 Qu'ils s'en duissent bien abstenir :
 Si les remembra leur viels fetz
 Contrarious, dont maintz griefs fees
 Dieus leur en ot fait sustenir.
 N'est pas legier contretenir
 Ne rebeller du fol conspir 2420
 Au dieu, qui poet sanz nul reles
 Par son dit faire tout perir :
 Et q'a ce mal doit mal venir,
 Ly sages le tesmoigne ades.
 De Nichanor fuist apparant
 Que dieus orguil vait despisant ;
 Car il avoit oultre mesure
 Empris orguil, quant ly tirant
 Jerusalem vint guerrioiant ;

2391 enfuist

2418 enot
2460 enpurra

Mais quant quidoit estre a dessure, 2430
 Dieu le rua par aventure,
 Dont il perdist le chief al hure,
 Q'estoit porté de maintenant
 Deinz la Cité sanz nul demure,
 Pour moustrer la disconfiture
 De l'orguil qu'il avoit si grant.
 A ceste route s'associe
 Blaspheme la dieu anemie,
 Q'ad d'orguil si tresvilain port,
 Q'au mesmes dieu dist vileinie. 2440
 'Way soit,' pour ce dist Ysate,
 'A tous qui font si mal report.'
 Ce parust bien, quant de son tort
 Senacherib vint au plus fort
 Pour guerroier Roy Ezechie
 En blasphemant ; dont sanz desport
 Vengeance de soudaine mort
 L'envoia dieus pour s'estultie.
 Du viele loy je truis ensi,
 Que ly blasphemus sanz mercy 2450
 De male mort morir devoit :
 Si lis de la nouvelle auçi,
 Quant nostre sire en crois pendi,
 Un des larrons q'ove luy pendoit f. 18
 En mesdisant le blasphemoit ;
 Dont maintenant dieus se vengoit,
 Car quant le corps s'estoit fini,
 La fole alme en enfern plungoit :
 Qui ceste essample bien conçoit,
 Estre en purra le mieux garni. 2460
 Des tous pechés q'Orguil estable,
 C'est un des tous le plus grevable ;
 Sicomme le nous fait essampler
 L'apocalips, qui n'est pas fable,
 D'un monstre horrible espoentable
 Dont saint Jehans fait deviser,
 Q'issoit de la parfonde meer ;
 Si ot escript cil adverser
 Enmy le front le noun au deable,
 C'estoit blaspheme, a despiser 2470
 Le noun de dieu et aviler
 Les saintz q'au dieu sont concordable.

2444 plusfort
2462 plusgreuable
2446 Enblasphemant

La descripcioun d'Orguil en especial.

N'est pas tresdoulce celle Miere,
Dont tant du progenie amere
Est descendu, comme vous ay dit;
Ainz tant perest horrible et fiere
Que n'est si fort, s'au droit le fiere,
Que maintenant n'ad desconfit
Le corps ovesque l'espirit.
Car comme plus haltement s'assit 2480
Orguil du prince en la chaire,
Et plus se vante et s'esjoyt,
Tant plus le tient dieus en despit
Et le tresbuche a sa misere.
Orguil perest si veine et fole,
Que les plus sages elle affole,
Quant a sa part les poet attraire:
Orguil qant moustre sa parole,
Ne voet souffrir q'om reparole
Du chose que luy soit contraire: 2490
Orguil sovent se veste en haire
Devant les gens en saintuaire,
Et par soy meine vie mole:
Orguil soulein tout quide a faire;
Dont ne requiert d'ascun affaire
Son dieu plus que le vent que vole.
Orguil vantparle en toute assisse,
Et quiert qu'il soit primer assisse,
Comme sur trestous ly plus eslit:
Plus est Orguil de halte enprise 2500
Que n'est Lioun deinz sa pourprise,
Ou que destrer quant il henyt:
Unques ne vi si fait escript,
El quel Orguil au plain descrit
Trovay, tant ad en luy mesprise;
Ne ja par moy poet estre dit,
Car proprement dieus la maldit,
Dont est bien digne a la Juise.
Sidrac, qant il d'Orguil treta,
Dist et par resoun le prova, 2510
Orguil endroit de sa malice
Fust le primer apostata:
Pour ce dist Salomon cela,
Que dieus et homme par justice

2486 plussages

Devont haïr si orde vice:
L'alme orgueilleuse peccatrice
Par Moysen dieus commanda
Q'om l'osteroit de son service;
Car Orguil plect en nul office,
Ainz loigns des tous biens perira. 2520
Orguil est celle enfermetée,
Que le triacle de sautéte,
Q'om fait de vertu et doctrine,
Torne en poison envenimé.
Au frenesie est comparée,
Que tolt la resoun enterine,
Siqu'il n'ad doubte en sa covine
De dieu ne de sa discipline;
Ne d'omme nul s'est ahontée,
Ne de son propre estat la line 2530
Conoist, tanqu'il en sa ruine
Trestout au deable soit alé.
Sur tous pecchés pour acompter
Orguil fait plus a redoubter
De sa tresfiere vassellage;
Car c'est des vices le primer,
Q'assalt et fiert le chivaler,
Et le darrein a son passage.
He, halt Orguil du bass estage,
Devant trestous de ton lignage, 2540
Comme file et heir, tu dois porter
Après ton pierre l'eritage
Du regionn u ja n'assuage
Ly fieus, qui doit sanz fin durer.
O comme perverse et maluré
Perest Orguil en tout degré,
Dont dieus se venge en chacun plit.
Ly sages dist que dieus le sée
As ducs destruit par ce peccché,
Et en leur lieu seoir y fist 2550
Ceux qui sont humbles d'espirit.
Ytieu vengeance ad dieu confit,
Comme David l'ot prophetizé,
As riches, mais au gent petit,
Solonc que Salomon escrit,
Plus asprement serra vengé.
La halte poesté divine
L'Orguil des gens ove leur racine

Sanz reverdir ensechera,
Dont filz et file ert en ruine; 2560
Et en leur lieu pour medicine
Les debonnaires plantera:
Leur terre auçi subvertira
Des tieles gens, q'il ne lerra
A leur proufit ne bié ne vine;
Ainz jusq'au fundament le fra
Trestout destruire, et puis dorra
Au gent paisible la saisine.
Trop est Orguil en soy maldite,
Si est le lieu u q'elle habite, 2570
Si sont auçi tous ses amys.
L'Orguil del angre fuist despite
El ciel, et puis refuist desdite
As noz parens en paradis;
Orguil en terre ad les païs
Ove les inhabitans malmsis;
Orguil en l'air est contredite,
Et en enfer serront toutdis
Ly deable ovesque l'espirit 2580
Par dame Orguil que les endite.
Serf doit honour au seignourie,
Et filz amour sanz estultie
Doit a son pierre par douçour;
Dont dieus demande en sa partie
Par son prophete Malachie,
Et vers Orguil fait sa clamour:
'Si je suy sire, u est l'onour,
Si je suy pierre, u est l'amour,
Que l'en me doit et donne mie?'
Responde, Orguil, di la verroure; 2590
Tu l'as tollu de ton errour,
Dont reson est q'il t'en chastie.
He, Orguil, fole capiteine
Des vices et la primereine,
De jadis te fay remembrer;
Encore car sur toy l'enseigne
Apiert, quant tu le sée halteine
Encontre dieu vols attempter.
Tu vols tous autres surmonter,
Dont la justice dieu ruer 2600
Te fist en la plus basse peine.
Dy lors pour quoy tu viens clamer
La terre, quant tu as plener

Trestout enfern a ton demeine.
He, Orguil, ce n'est resoun mie,
Que de la terre avras partie;
Car c'est a nous tout proprement,
Qui naiscons de l'umaine vie,
Et devons porter compaignie
Chascun vers autre bonnement: 2610
Mais a cela tu n'as talent,
Car compaignie a toy n'apent,
Ainz tu quiers avoir la maistrice:
Pour ce retray toy de la gent,
Et tien d'enfern le regiment,
Car ce partient a ta baillie.

Des cynk files dame Envyé, dont la primere ad a noun Detraccioun.

Ore a parler du progenie
Que vient naiscant du dame Envyé,
La primere est Detraccioun:
Celle est d'Acord droit anemie, 2620
Q'ad de sa faulse janglerie
Destruite mainte regionn;
Car jammais parle si mal noun
Du voisin ne de compaignoun,
Dont peas et fame soit blemie.
Qui pres de luy tient sa mesoun,
Sovent orra tiele enchesoun,
U trop avra du vilanie.
Haymo, qui molt estoit sachant,
De ceste fille est difinant, 2630
Si dist que c'est uns anemys
Qui d'autri mal se vait janglant,
Et d'autri bien se vait tesant:
Car jammais jour a nul devys
Ne se consente a l'autri pris,
Et nepourquant devant le vis
Losengera, mais au tournant
Du doss lors dirra son avis
Si mal que nuls le pourra pis;
Du quoy saint Job s'estoit pleignant.
Sicomme se musce ly serpent 2640
En l'erbe, et point soudainement
Quant hom le touche, tout ensi f. 19
Detractour d'envieuse dent
Mordt en secré la bonne gent;

D

Dont l'en doit abhosmer celui
 Par qui ly bon sont detrahy.
 Ly sages le vous dist ensi,
 Que cil q'au detrahir mesprunt
 S'est obligez ad anemy 2650
 Qu'il ne s'en poet partir de luy,
 Si plus du grace ne luy prent.
 Maria la soer Moyses
 Son frere detrahist du pres,
 Qu'il ot pris femme ethiopesse :
 Mais sa detraccion apres
 La fist porter trop chagant fees ;
 Car dieus en son corous l'adesce
 Du lepre, qui par tout la blesce,
 Dont par sept jours gisoit oppresse ; 2660
 Mais lors l'en fesoit dieu reles.
 Du cest essample me confesse,
 Qe j'ay matiere overte expresse
 De laisser saint proddhomme en pes.
 Saint Isate tielement
 Dist a la Babiloine gent :
 ' Pource que detrahi avetz
 A mesmes dieu primerement
 Et as ses saintz communement,
 Vous fais savoir que vous serrez 2670
 Et detrahiz et avilez
 Ou lac q'est plain d'orribletés
 Du bass enfern parfondement.
 He, comme poet estre espoentez,
 Que ly prophete ad manacez
 Si tresespoentablement !
 Iceste fille malurée
 Ad un soen chambirlain privée,
 Qui Malebouche ot nommer.
 Cil est toutdis acustummé 2680
 Derere gent au plus celée
 De mentir et de malparler :
 Trop fait sa langue travailler
 Pour ses mensonges avancer,
 Dont bonne fame est desfamée ;
 Car par son conte mesconter
 Le bien en mal fait destorner,
 Dont sert sa dame tout en gré.
 Cil Malebouche mesdisant,

Par ce qu'il voit un soul semblant, 2690
 Voet dire qu'il ad veu le fait ;
 Et d'une parole asculant,
 Tout une conte maintenant
 De sa malice propre fait.
 Pour ce de son tresmal agait
 Sovent avient as bons deshait,
 Ainz qu'ils s'en vont apercevant ;
 Car s'il ne voit aucun forsfait,
 De sa mençonge contrefait
 Ja ne serra le meinz parlant. 2700
 Quant Malebouche soul et sole
 Voit homme ove femme qui parole,
 Combien qu'ils n'eiont de mesfaire
 Voloir, nientmeinz, ' Vei ci la fole !'
 Dist il, ' Vei cy comme se rigole !
 Trop est comune leur affaire.'
 De malparler ne s'en poet taire ;
 Pour ce sovent, u qu'il repaire,
 Sanz nul deserte esclandre vole,
 Que rougist dames le viaire ; 2710
 Par quoy maldiont le contraire
 De Malebouche et de s'escole.
 Quant ceste fille son amy
 Vorra priser vers ascuny,
 ' Salve,' endirra darreinement ;
 Lors contera trestout parmy,
 Si male teche soit en luy ;
 Sique du pris le finement
 Ert a blamer : et molt sovent,
 Quant om parolt de bonne gent, 2720
 Lors fait comparisoun ensi,
 Sique le pris q'al un y tent
 N'est dit pour pris, ainz soulement
 Pour amerrir le pris d'autry.
 Ensi si Malebouche morde,
 C'est pour le mal quoy q'il recorde,
 Dont sont destourbé ly plusour ;
 Car toutdis trait la false corde,
 Du quelle a son poair discorde
 L'acord q'est fait de bon amour ; 2730
 Et s'il par cas soit courteour,
 Sovent reconte a son seignour
 Tieu chose qu'il sciet la plus orde

2733 plusorde

Des autres ; mais certes honour
 Ne poet avoir que losengour
 Escoulte et est de sa concorde.
 Cil Malebouche ad male aleine,
 Et porte langue trop vileine,
 Q'a detrahir est tout parfite
 Et pierre et miere et soer germeine, 2740
 Moigne, Frere, Canon, Noneine,
 Prestre, Clerc, Reclus, Hermite,
 Les grans seignours, la gent petite ;
 En malparler neis un respite,
 Que tous derere doss n'asseine :
 S'il leur mals sciet, leur mals recite,
 Et s'il n'en sciet, lors il endite
 Du mal qu'il tient en son demeine.
 Fagolidros, comme fait escire
 Jerom, en grieu valt tant a dire 2750
 Comme cil qui chose q'est maldite
 Mangut, dont le vomit desire :
 Et ensi cil q'en voet mesdire,
 De l'autri mals trop se delite
 A manger les ; mais au vomite
 Les fait venir, et les recite,
 Quant il les autres voet despire :
 Mais la viande ensi confite
 A soy et autre desprofite,
 Car corps et alme en sont ly pire. 2760
 J'en tray David a mon auctour,
 Qe soutz la lange au detractour
 Gisont cink pointz que dieus maldie ;
 Des queux mesdit est ly primour,
 Cil amerrist d'autri l'onour ;
 Et amertume en sa partie,
 Que serche l'autry vilenie ;
 Ly tierce point c'est tricherie,
 Que par deceipte vait entour
 Et cause les descors d'envie, 2770
 Dont sovent la paisible vie
 Despaise et met en grief destour :
 Labour, dolour sont au darrain
 Dessoutz la langue du vilain ;
 Car detractour ne s'est tenu,
 Qu'il ne labourt du cuer et main,
 Dont la dolour de son prochain

2750 adire

De sa malice soit accru.
 Pour ce ly saint prophete dieu
 Dist qu'ils leur lange ont fait agu 2780
 Comme du serpent, et plus grevain
 Dedeinz leur lieveres ont reçu
 Venym, que quant s'est espandu,
 Fait a doubter pres et longtain.
 A male langue est ressemblant
 L'espeie d'ambe partz trenchant,
 Ce nous dist sage Salomon ;
 Car d'ambe partz ly mesdisant
 Des bons et mals vait detrahant :
 Dont ly prophete en sa leçon 2790
 Se plaingt et dist, par enchesoun
 Qu'il volt sufr bien et resoun,
 Luy detrahiront ly alquant.
 He, dieus, du langue si feloun
 Qui passera ? Je certes noun,
 Quant si proddhomme n'ert passant.
 Mais qui du lange espeie font,
 Dont bonne fame se confont,
 Dieus les maldist par Jeremie ;
 Et dist q'au male mort morront, 2800
 Sique leur femmes demourront
 Soleinement en triste vie
 Sanz nul confort du progenie ;
 Car dieus voet bien que l'en occie
 Leur jofne gent, u qu'il s'en vont,
 Si q'en leur maison soit oïe
 La vois du doel, qui brait et crie :
 C'est le loer qu'ils porteront.
 Ly saint prophete en son escript
 Les lievres tricheros maldit, 2810
 Q'au detrahir par tout se ploient
 De leur mensonge et leur mesdit ;
 Dont il ensi dieu prie et dist :
 ' O dieus, fai que fals lievres soient
 Tout mutz, et que les oels ne voient,
 Qe l'autry mal au cuer convoient,
 Dont male langue s'esjoÿt ;
 Car l'un et l'autre tant envoient
 Des mals, q'ilz molt sovent desvoient
 Les bonnes gens de leur delit.' 2820
 Malveise langue ja ne fine,

2760 arme ensont

D 2

Ainçois compasse et ymagine
 Comme poet la *bonne* gent trahir.
 Ja n'iert si *bonne* la veisine
 Ne le voisin, *que* par falsine
 Ne fra ses dentz au doss sentir ;
 Car en mensonge et fals conspir
 C'est sa plesance et son desir,
 Dont met les autres a ruine :
 Semblable l'en la poet tenir 2830
 Au deble, qui du fals mentir
 Est *proprement* pierre et racine.
 Comme la saiette du leger,
 Quelle ist du main au fort archer,
 Entre en la char q'est tendre et
 mole, f. 20
 Mais du grant peine et *grant* danger
 La tret om hors au resacher,
 Tout ensi vait de la parole
 Que de malvoise langue vole :
 Legierement le *noun* affole 2840
 D'un *homme*, qui puis amender
 N'en poet ; et ensi nous escole
 Alphonses, qui de *bonne* escole
 Fist l'un a l'autre comparer.
 Solins d'un serpent fait conter,
 Le quel Sirene om fait nommer,
 Corant par terre *comme* chival,
 Si vole en l'air come l'*esperver*,
 Mais qanq'il touche par souffler,
 Ainz que l'en poet sentir le mal, 2850
 Occit de son venim mortal.
 Ensi la bouche au desloyal
 Par souffle de son malparler
 La renomée du bon vassal
 Soudaignement en un journal
 A tous jours mais ferra tourner.
 Le souffle au bouche detrahan
 C'est le mal vent du Babilant,
 Dont dieus se pleint du violence
 Par Jeremie, ensi disant : 2860
 'Ils vont encontre moi levant
 Leur cuer, leur vois, et leur sentence,
 Si *comme* le vent du pestilence.'
 He, vice odible el dieu presence,

2870 enocit

Solone l'apostre tesmoignant
 Tu fais a mesmes dieu l'offense,
 Dont as perdu la conscience,
 Que mais n'en scies estre tesant.
 Langue enviouse du *feloun*
 Trois en occit de sa leçon, 2870
 Comme saint Jerom le fait escrire,
 Soy mesme et puis son *compaignoun*
 Q'escoulte sa detraccioun ;
 Car saint Bernars ne sciet descrire
 Qui soit de deux plus a despire :
 Si fait aici le tierce occire,
 Vers qui la desfamacioun
 De sa malice a tort conspire :
 Cil ad du siecle son martire,
 Et l'autre ont leur dampnacioun. 2880
 Malvoise bouche a nul desporte,
 Ainz tout le pis q'il sciet reporte
 Par mesdisance et fals report :
 Semblance a la hyene porte,
 Que char mangut de la gent morte ;
 Car Malebouche *rounge* et mort
 Ensi le vif sicomme le mort ;
 Car *quique* veille ou *quique* dort,
 Ou face chose droite ou torte,
 Tout fait venir a son resort. 2890
 He, quelle bouche horrible et fort,
 Que tout mangut et riens desporte !
 La hupe toutdis fait son ny,
 Et l'escarbud converse aici,
 Entour l'ordure et le merdaille ;
 Mais de ces champs qui sont flori
 N'ont garde : et par semblance ensi
 Malvoise langue d'enviaille
 De l'autri vice et ribaudaille
 A ce se tient et se paraille, 2900
 Pour detrahir de chacuny ;
 Mais des vertus dont l'autre vaille,
 Pour les oir n'ad point d'oraille,
 Ne bouche a parler bien de luy.
 Par tout u Malebouche irra,
 Disfame ades luy suiera :
 C'est un peché trop violent ;
 Car l'escriture dist cela,

Que cil q'autry disfamera
 Et tolt le bon *noun* de la gent, 2910
 Cil pecche plus grevouement
 Que cil qui d'autri tolt et prent
 Ses biens ; car ce par cas pourra
 Redrescer par amendement,
 Mais l'autre *jammais* plainement
 Au paine se redrescera.
 'Way,' ce dist dieus, 'a l'*omme*
 soit,
 Par qui l'esclandre venir doit,
 Dont il ou autre ert disfamez ;
 Car au tiel *homme* mieulx serroit 2920
 Que mole du molyn pendoit
 Au coll, et fuist en mer noiez.'
 Dieus dist aici, 'Crevez, couplez,
 Tes oels, tes mains, dont esclandrez
 Estes, car mieulx,' ce dist, 'valroit
 Entrer tout voegle et desmembrez
 El ciel, q'en enfern tout membrez
 Ardoir sanz fin en grief destroit.'
 Encontre l'envious mesdit
 Par le *prophete* dieus ce dist : 2930
 'Tu as d'envie esclandre mis
 Envers tes freres, dont maldit
 Serretz, car pleinement escrit
 Sont tes mensonges et folz ditz,
 Dont tu les autres as laidis ;
 Que te serront apres toutdis
 A ton reprouche et ton despit
 Encontre ton visage assis ;
 Car quant du siecle es departiz
 Lors ton esclandre ert infinit.' 2940
 El viele loy, qui disfamant
 Mesdist du vierge, truis lisant,
 En trois degrés ot sa penance ;
 Primer au pierre de l'enfant
 D'argent cent cicles fuist rendant,
 Si fuist batuz pour sa penance,
 Et pour *parfaire* l'acordance
 La vierge prist en governance,
 Et tient espouse a son vivant :
 Dont m'est avis par celle usance 2950

2911 plusgreouement

2955 deliurer, ç. l. 4832
plusdebonnaire

Disfame n'est pas sanz vengeance
 Du siecle ou de la mort suiant.
 Mais sur tous autres cil pis fait,
 Q'esclandre de son *propre* fait ;
 Soy mesmes car deliverer
 Lors ne s'en poet de son mesfait :
 Quant il est cause du forsfait,
 C'est droit qu'il ait la blame entier ;
 Et ce pour nous endoctriner
 Ezechiel fait tesmoigner. 2960
 Mais male langue ne tient plait
 De sainte escripture essampler,
 Ainz quert disfame a son danger,
 Et al autry, *comment* qu'il vait.
 Disfame ad de sa retenue
 Deux autres serfs en son aie,
 Des queux l'un Vituperie ad *noun*,
 N'est plus *feloun* dessoutz la nue ;
 Du bouche car trestout desnue
 Les mals d'autry condicioun : 2970
 Derere doss dist sa leçon,
 Et tout fait sa disputeioun
 De l'autry vice, et tant argue
 Q'au fin c'est sa conclusioun,
 De l'autry tolt le bon *renoun*
 En corps, et soy en alme tue.
 Tant *comme* *prodhomme* en son
 degré
 Soit de greignour honesteté,
 Plus just, plus douls, plus *debonnaire*,
 Tant plus Envie malurée 2980
 Du vituperie ymaginée
 S'applie a dire le contraire.
 David se plaint de tiel affaire,
 Et dist qu'il presde son viaire
 Le vituperie ad escoulte
 Des gens plusours *pour* luy desfaire.
 He, vice, trop es de mal aire,
 Dont ly bien sont en mal torné.
 Reproof est l'autre, qui devant
 Les gens lour mal vait *reprovant* 2990
 De ce qu'il plus les poet grever ;
Nounpas q'ils soient amendant,

2979 Plusiust plusdouls

Mais pource que par malvuillant
D'envie les voet reproever,
Pour leurs mals faire aperticer.
De la festue sciet parler,
Q'el oill d'autri voit arestant,
Mais son oill propre laist ester
Tout plain d'ordure sanz drescer
Ses propres mals en amendant. 3000

Ly sages dist, cil q'est espris
De ceste vice bien apris
Jamais serra, car toute apriise
Hiet : car il ad deinz soy compris
Si grande envie, dont le pris
Del autri sen comme fol desprise ;
Et sur ce dist de sa mesprise
Parole de si fole enprise,
Que l'autre en ert tout entrepris
De l'escouler, dont la juise 3010
Au fin sur soy serra remise,
Que tanz des mals sur autre ad mis.

He, Malebouche, tant mal fais,
Dont sont et ont esté desfaitz
Plusours ; mais sicomme dist ly sage,
Quiconque soit, ou clers ou lais,
Qui vorra dire l'autri lais,
Cil orra de son propre oultrage
Soudainement nouvelle rage ;
Car qui les autres desparage, 3020
C'est droit qu'il sente le relais
De la tempeste et de l'orage,
Dont il les autres vente, et nage
Tant qu'il en soit au fin desfais.

La seconde file d'Envye, q'ad a
noun Dolour d'autry Joye.
De la seconde file apres 3021
Que naist d'Envie, ad mal enres,
Si ad noun d'autry bien Dolour ;
La quelle deinz son cuer jammes
N'ot une fois amour ne pes,
Ainz est tout plain du mal ardur : 3030
Car ly chald feus sans nul retour
D'envie bruyt de nuyt et jour
Son cheitif cuer sanz nul reles ;

3000 enamendant 3009 enert
3044 plusaltement 3056 enfait

Tant comme voit autre avoir l'onour
Devant luy, lors de sa tristour
Ne poet garir ne loign ne pres.

Iceste file plain d'envie,
Quant doit venir au mangerie,
U grant serra l'assemblément,
Si homme ne l'onoure mie 3040
Dessus toute la compaignie,
De son manger perdra talent ;
Car quant regarde l'autre gent
Seoir de luy plus haltement,
Dedeinz son cuer tous les desfic,
Ne ja pour clarré ne pyment
Ne se conforte aucunement,
Tant est du deable malnorric.

Et d'autre part, quant sciet et voit
Q'une autre q'est de son endroit 3050
Soit reputé de luy plus bele,
Ou plus de luy faitice soit,
Ly cuers d'envie tant enboit,
Que tout entrouble la cervele ;
Car lors se tient a chativelle
Et a soy mesme en fait querelle,
Quant l'onour d'autry aparçoit.
Ensi luy vient toutdis nouvelle
Paine, et comme l'en plus revelle
Du joye, tant plus est destruit. 3060

Dissencioun ne falt jammes,
Que ceste fille tout ades
Ne suit sicomme sa chamberere,
Et porte trop le cuer engress,
Quant voit un autre du plus pres
Avoir l'onour et la chaere
Devant sa dame ; et lors la fiere
L'estat del autre au nient affiere,
Disant que c'est contre la pees
Q'om met ensi sa dame arere : 3070
Ainçois duist estre la primere,
Et l'autre duist sufr apres.

Itiel Dolour au court du Roy
Sovent se plaint, si comme je croy,
Quant voit des autres plus privez,
Dont n'ose faire aucun desroy.

3013 male bouche 3024 ensoit
3065 pluspres 3075 pluspriuez

Lors deinz son cuer tout en recoy
Envie eschalfe ses pensés,
Dont ad dolours ymaginés ;
Car s'il fuist a ses volentés, 3080
Nuls serroit plus privé du soy :
Mais lors maldist ses destinés ;
Car quant sur tous n'est eshalciez,
De son estat luy semble poy.

Sovent entour religioun
Y fait sa conversacioun
Itiel Dolour, quant vont eslire
Leur primat, mais quant il le down
N'en prent, lors pour confusioun
Nuls sa dolour pourra descrire : 3090
Quant voit q'uns autres serra sire,
Envie le deboute et tire,
Et tolt toute devocioun,
Q'au paine poet ces heures dire.
Trop est tiel orguil a despire,
Que duist estre en subgeccioun.

Et nepourquant tout tiele entente
En general trop se desmente,
Quant presde luy voit avancer, 3100
Ou soit parent ou soit parente ;
Car il perdrait sa propre rente
Pour l'autry faire damager.
Car pour prier ne pour donner,
Ne pour les membres decouper,
A l'autry proufit ne consente ;
Ainz plourt, quant autri voit rier.
Pour ce dolour sanz terminer
Ert tout soen propre par descende.

De tiel pecché furent commeu
Ly maistre Scribe et Phariseu, 3110
Q'estoient de la Juerie,
Qant ont Jehan et Pierre veu
Precher comment ly fils de dieu
S'estoit levé du mort en vie ;
Du poeple dont une partie,
Q'avoit leur predicacioun ofe,
Sont au baptesme et foy venu :
Dont leur grant joye multiplie,
Mais l'autre de leur false envie
De leur joye ont dolour reçu. 3120

3081 pluspriue

De les grans biens que dieu auci
Fist, tancomme fuist en terre yci,
Quant de son tresbenigne otroy
Les languisantes gens gary,
Qui du santé sont esjoy,
Les maistres de la viele loy
Du dolour furent en effroy,
De l'autry joye ert leur annoy.
He, cuer d'envye mal norry,
Qui ne voet faire bien du soy, 3130
Et sa dolour maine a rebroy
De ce qu'il voit bienfaire autry.

De tiel dolour David prioit,
Que sur le chief revertiroit
Le doel de luy q'en fuist dolent ;
Car qui tiel doel deinz soi conçoit,
Comme ly prophete nous disoit,
Iniquité tout proprement
De luy naist a l'enfantement,
La quelle nepourquant descent 3140
El haterel du luy toutdroit,
Du qui nasquist primerement :
Si chiet el fosse au finement
Qu'il mesmes de sa main fesoit.

Baruch se plaint, q'estoit prophete,
Si dist : 'Way moy del inquiete,
Que dieus dolour sur ma dolour
M'ad ajusté, si que quiete
N'en puiss trover en nulle mete.' 3150
Ensi diront cil peccheour ;
Car sur dolour dolour peiour
Leur doit venir u n'est sojour,
Ainz toute paine y ert complete ;
C'est en enfer, u la tristour
Est perdurable sanz retour,
La prent Envye sa dyete.

La tierce file d'Envye, q'ad noun
Joye d'autry mal.
La tierce soer est molt diverse,
A la seconde soer reverse,
Mais sont d'envie parigal ;
Si l'une est mal, l'autre est prverse, 3160
Que l'un sanz l'autre ne converse,
Les tient leur Miere einz son hostal.

3160 male

Ceste ad nom Joye d'autri mal :
De ce dont plouront communal
Sa joye double, et lors reherce
Chançon d'envie especial,
Q'elle ad appris du doctrinal
Sa miere, celle horrible adverse.

Quant voit gent aller en declin,
Ou soit estrange ou de son lin, 3170
Tournant de richesse en poverte,
Tantost dirra, ' Vecy le fin !

Quantqu'il conquist du mal engin,
Ore ad perdu par sa deserte.
Ensi le noun d'autry perverte,
Et s'esjoÿt, quant elle est certe
Du grief qui dolt a son veisin :
Sicomme goupil d'oreile overte
Les chiens escoulte, ensi la perte
De l'autri fait soir et matin. 3180

Quant ceste fille est courteur,
Et voit ceaux de la court maiour
Leur lieu de halt en bass changer,
Et perdre au fin bien et honour,
Sique l'en fait commun clamour
Pour leur estat plus aviler,
Lors ne falt pas a demander
Si ceste fille en son mestier
Se rejoÿt de leur dolour,
En esperance d'aprocher 3190
Plus pres du prince a demourer,
Et commander en lieu de lour.

Par tout yceste est envieuse,
Mais quant elle est religieuse,
Tant plus d'ardante envie boit,
Et plus se fait lée et joyouse,
Quant voit la fame ruinouse
De son confrere, quelqu'il soit ;
Voir si ce fuist de saint Benoit,
Et il en pure vie estoit, 3200
Encore la malicieuse,
Si mal de luy parler orroit,
Dedeinz son cuer s'esjoyeroit.
Vei la la fille perillouse !

Ensur les autrez soers d'Envie
A ceste soer plus est amye

3191 pluspres

3211 aderere

3233 enait

Detraccioun sa soer primere ;
Que molt sovent par compaignie
De Malebouche sa norrie
Fait envers luy sa messagiere : 3210
Le mal d'autry l'une a derere
Reconte, et l'autre la matiere
Ascoulte du joyouse oïe ;
Car d'autry perte elle est gaignere,
Si quide avoir celle adversiere f. 22
Honour del autry vilanie.

Tout va le mond a son desir,
Quant Malebouche poet oïr,
De ses voisins q'est desfamant :
De son mesdit, de son mentir 3220
Du rire ne se poet tenir,
Tant s'en delite en ascultant.
Pour ce q'est mesmes forsvoiant,
Vorroit que tous de son semblant
Fuissent malvois ; pour ce cherir
Fait Malebouche en son contant,
Que l'autri vices met avant,
Et les vertus fait resortir.

C'il q'est de ceste fille apris,
Trop est du fole envie apris ; 3230
Car il se souffre de son gré
Du propre estat estre arreris,
Par si q'un autre en ait le pis :
Sicome d'un homme estoit conté,
Qui de sa propre volenté
Eslust d'avoir l'un oïll hosté,
Issint q'uns autres ses amys
Ust ambedeux les oïls crevé.
Trop fuist ce loign du charité,
Quant ensi fuist le jeu partis. 3240

Au tiele gent, ce dist ly sages,
Qu'ils ont leur joye des damages
Dont voient leur veisin grever ;
Et d'autre part deinz leur corages,
Quant ils font mesmes les oultrages
De mesfaire ou de mesparler,
En ce se font deliter.
Par quoy David en son psalter
Se plaingt des tieles rigolages,
Et dist, ' Si je de mon sentier 3250

Me moeve, lors de m'encombrer
S'esjoyeront comme d'avantages.
Ezechiel prophetiza
As filz Amon disant cela,
Que pour ce qu'ils joyous estoient
Sur le meschief as filz Juda,
Dieus d'orient envoieira
Les gens qui leur destrueroient
Si nettement, que n'y lerroient
Leur noun sur terre, ainz l'osteroient,
Que puis memoire n'en serra : 3261
Pour ce fols sont qui se rejoyont
Sur l'autry mal, et point ne voient
Le mal qui puis leur avendra.

As ses disciples par un jour
Dieus dist, q'en leur tristesse et plour
Ly mondes s'esleescera.
Cestoit parole dur a lour,
Mais il dist puis, que leur tristour
En joye au fin revertira ; 3270
Et cil qui de leur doel pieça
Se fist joyous, dolent serra,
Quant la tenebre exterior
Soudainement luy surprendra,
U joye aucune ne verra,
Ainz infinit sont ly dolour.

Ce dist ly sage en general :
Quiconque s'esjoÿt du mal,
Serra du mal au fin noté
Et puny par especial 3280
Du vengeance judicial :
Car qui du mal font leur risée,
Leur lieu et paine est ordeiné
En l'infemale obscureté,
Comme l'evangeile est tesmoignal,
U que ly dent sont grundillé
Et plour est indeterminé,
Sanz nul espoir memorial.

La quarte file d'Envie, q'est dite
Supplantacioun.
La quarte fille par droit noun
Est dite Supplantacioun, 3290
Q'aprent d'Envie son mestier,
De controver occasioun

Par faulse mediacioun
Coment les gens doit supplanter,
Ou par priere ou par donner :
Car pour soy mesmes avancer,
Du quel qu'il soit condicioun
N'en voet aucun esparnier,
Que ne luy fait desavancer,
Ou soit ce lai ou soit clergoun. 3300

Car quique voet bargain avoir
Du terre ou du quiconque avoir,
Et en bargaign mesure tent,
Quant Supplant le porra savoir,
Tantost ferra tout son pouvoir
A destourber que l'autre enprent,
Et sur ce moult plus largement
Ferra son offre au paiement,
Pour l'autri faire remouvoir
De son bargaign ; car voirement 3310
Il se damage proprement,
Dont son voisin doit meinz valoir.

Mais quant Supplant en court royal
Voit autre plus especial
De luy en bonne office estant,
Curtois devient et liberal,
Si donne a ceaux qui sont menal,
Et vait au seignour blandisant,
Et entre ce vait compassant
Le mal d'autry, jusques atant 3320
Qu'il pourra tenir au final
Ce que ly autres tint devant :
Ensi son propre estat montant
Fait son voisin ruer aval.

Mais s'en la seculere guise
Supplant se queinte et se desguise
D'envie entre la laic gent,
Asses plus met de sa queintise
En ceaux qui sont de sainte eglise.
Qui garde au court de Rome en prent,
La poet om au commencement 3331
L'effect du fals supplantement
Veoir ove toute la mesprise ;
Et puis avant communement
Tous ensuient l'essablement
De si tresautentique aprise.

3330 enprent

Mais au meschant qui povere esta
 Envie ne se mellera,
 Quant il n'ad quoy dont supplanter
 Le poet, ainz est curtoise la, 3340
 Et d'autre part se tournera ;
 C'est envers ceaux qui pier a pier
 Vivont, es queux pourra trouver
 Richesce, honour, sens et poer ;
 Car de nature regnera
 U plus des biens voit habonder :
 Comme plus voit autre en pris monter,
 Tant plus Supplant l'envierra.
 Supplant d'envie trop se ploie
 As procurours et se suploie, 3350
 Si qu'ils soient de sa partie ;
 Sovent leur donne riche proie
 Et plus promet, et beal leur proie
 Q'a son pourpos facent aie :
 Ensi par sa procuracie,
 Par son decepte et par veisdye,
 Et par despense du monoye
 Aquier office, honour, baillie,
 Dont s'esjoÿt du faulse envie,
 Quant voit son prou que l'autre annoye.
 Ce dist Tullés en l'escripture, 3361
 Que mort, dolour, n'autre lesure
 D'ascune chose q'est foraine,
 N'est tant contraire a no nature
 Comme est quant l'en par conjecture
 Fait q'autri perde et mesmes gaine.
 Mais ce que chalt, quique s'en plaigne,
 Supplant sur l'autry mal bargaine ;
 Mais tant le fait par couverture,
 Qu'il ad ne compain ne compaigne 3370
 Qui poet savoir son overaigne,
 Ainçois qu'il ait parfait sa cure.
 Supplant nounpas les biens d'autri
 Tantsoulement attrait a luy,
 Ainz les honours et dignetés,
 Dont voit les autres esbaudy.
 N'ad cure q'en soit arrery,
 Mais qu'il soit mesmes avancés ;
 Pour ce se ploie de tous léés,
 Dont en honour soit eshalciez 3380

3376 esbandy

De ce q'un autre ert escharyn :
 Mais Aristole en ses decrés
 Dist certes, q'entre les peccés
 C'est un des tous le plus failly.
 Supplant endroit de sa vertu
 Bien fait du Jacob Esaü,
 Son propre frere n'espargnie.
 David dist que le filz de dieu,
 Q'estoit par fals Judas deçu,
 S'en complaignoit en prophécie, 3390
 Disant qu'il supplant magnefie
 Sur moy de sa tresfalse envie.
 Mais au parfin Judas deçu
 Estoit, car plain du deablerie
 Par male mort perdi la vie,
 Si ot la boële expandu.
 Supplant ad de sa nacioun
 Trois servantz : c'est Ambicion,
 Qui vait entour pour espier
 Les gens et leur condicion ; 3400
 Mais l'autre est Circumvencion,
 Cil sciet les causes procurer ;
 Q'au paine nul se sciet garder
 Que cils ne facent enginer
 Du false ymaginacion : f. 23
 Ly tierce dont vous vuil parler
 Confusion l'ot nommer,
 Qui plus des autres est felon.
 Ambicion c'est ly currou
 D'Envie, qui s'en vait entour 3410
 Par tout, u q'om l'envoiera :
 Si est auci ly procurour
 Des nobles courtz, qui tolt l'onour
 D'autry, q'a soy compilera.
 D'Ambicion prophetiza
 Baruch, qui molt le manaça,
 Disant, le fin de son labour
 En meschief se convertira ;
 Car c'est droitz q'autry ruera
 Qu'il soit ruez au chief de tour. 3420
 De Circumvencion le rage,
 Si comme dist Salomon ly sage,
 En les fols envieux habite ;
 Qui sont de si tresfel corage, 3380

3377 qensoit

Que ja prodhomme en nul estage
 Vuillent amer, ainçois despite
 Ont sa resoun et contredite ;
 Car quant voient qu'il leur endite
 Contraire chose a leur usage,
 Ils ont malice tost confite 3430
 Du fals compass, dont sanz merite
 Ils l'en ferront paine et damage.
 Confusion c'est ly darrein
 Qui sert Supplancement au mein ;
 Car cil ne laist jusq'en la fin,
 Tant comme prodhomme trove sein,
 Il suit come berecelet au sein,
 Pour luy ruer a son declin.
 Ja nuls serra si bon cristin,
 Qui mors ne soit de ce mastin, 3440
 Si dieus ne soit de luy gardein.
 Mais q'ensi confont son voisin,
 Doit bien savoir que tiel engin
 Serra puny come du vilein.
 Confusion, dist Jeremie,
 Est de si grande felonie,
 Q'il les labours du piere et miere,
 Les berbis ove la vacherie,
 Trestout du malvois dent d'envie
 Runge et mangut, que riens y piere ; 3450
 N'est chose qu'il laist a derere,
 Ainçois devoure et filz et frere
 Ove tout cele autre progenie :
 Car tant ad sa malice fiere,
 N'est tant prodhomme, s'il le fiere,
 Qu'il ne tresbusche en ceste vie.
 Mais en le livre au sage truis,
 Qu'un tiels malvois serra destruis ;
 Qu'il est escript que peccheur,
 Qui tient supplancement en us, 3460
 Par double voie ert confondus
 Du supplant a son darrein jour :
 Car Mort supplantera s'onour
 Du siecle, dont fuist supplantour,
 Et puis serra du ciel exclus
 Pour son peccé du fol erreur :
 Si l'un est mal, l'autre est peiour,
 Car doublement serra confus.

3451 aderere

La quinte file d'Envie, q'est dite
 Fals semblant.
 D'Envie encore une envieuse,
 La quinte file plus grevoue, 3470
 Naist, et le noun du Fals semblant
 Enporte, et est si perillouse,
 Si trescoverte et enginouse,
 Que quant trestout le remenant
 Des files, dont j'ay dit devant,
 Mener le mal d'envie avant
 Faillont, yceste tricherouse
 Le meine, si que nul vivant
 S'en aparçoit, jusques atant
 Qu'elle ait tout fait la venimouse. 3480
 Cil q'est du Fals semblant norry,
 Plus asprement deçoit celuy
 Vers qui plus porte compaignie ;
 Car come plus fait semblant d'amy
 Apertement, tant plus vous dy
 Qu'il ad covert sa tricherie.
 Qui ceste file meine et guie,
 Pour ce qu'il plect a dame Envie,
 Est sur les autres estably
 Son procurour et son espie, 3490
 De qui decepte et felonie
 Ont maint prodhomme esté trahy.
 Du Fals semblant la bele chere
 Odibles est et semble chiere ;
 Du bien parole en mal pensant,
 La chose douce fait amere,
 L'avant fait tourner en derere,
 Si fait le blanc en noir muant :
 Trop est son oigt au fin poignant,
 Du venym mordt en son baisant, 3500
 Et en plourant rit la trichere.
 Ostour en penne de phesant,
 Ne poet faillir en mal fesant
 Que sa malice au fin ne piere.
 Ce dist Tullés, qu'il n'est dolour
 D'aucun tort fait, qui soit peiour,
 Comme est quant l'en decepte pense
 Par couverture interieur,
 Et par semblant exteriour
 Du bon amour fait apparence. 3510

3471 falsembiant

Ce parust bien d'experience,
Quant Judas fist la reverence
Baisant la bouche al salveour;
C'estoit d'amour bonne evidence
Dehors, mais deinz sa conscience
Ly semblant fuist d'un autre tour.

Pour Fals semblant a droit servir,
Sa miere Envie ad fait venir
Bilingues, q'ad en une teste
Deux langues pour les gens trahir. 3520
N'est qui s'en poet contretenir,
Tant ad coverte sa tempeste;
Car d'une langue piert honeste
Al oill, que tout du joye et feste
Parolt, mais l'autre en soy tapir
Fait sa malice deshoneste,
Dont plus q'escorpioum agreste
Fait sa pointure au fin sentir.

Du double langue la parole
Trop semble debonaire et mole; 3530
Mais tant est dur, ce dist ly sage,
Que trespamy le ventre vole
Au cuer, dont maint *prodhomme* affole,
Ainçois qu'ils scievont son langage.
Ses ris q'om voit du lée visage
Sont mixt de doel deinz le corage,
Dont puis les innocens tribole:
A celle urtie q'est sauvage
Resemble, que gist en l'ombrage
Muscée dessoutz la primerole. 3540

Plus *que* nul oile par semblant
Sont mol ly dit du Fals semblant,
Solonc David, mais *pour* voidire
Ils sont come dart redd et trenchant.
Tiel envieux de son vivant
Est monstre horrible pour descrire:
Face ad d'un *homme*, qui le mire,
Mais du serpent la coue tire
Ove l'aiguiloun dont vait poignant;
Du tiel venym le fait confire, 3550
Que nul triacle poet suffire
Garir le mal au languissant.

Ce dist Sidrac, que doucement
Le harpe sonne, et nequedent

La langue mole au losengour,
Quant faire en voet deceivement,
Sonne asses plus deliement
A celui q'en est auditor.
Ly sages dist, que blandisour
Qui suef favelle par douçour 3560
Est un droit las al innocent,
Dont sont attrapé ly plusour:
Quant l'en meulx quide avoir honour,
De sa parole plus y ment.

Du Fals semblant om poet escrire,
Qu'il est semblable pour descrire
Au Mirre, *que* du bon odour
Delite et au gouster empire;
Car l'en ne trove en nul empire
Racine, gomme ne liquour, 3570
Que d'amertume soit peiour:
Ensi du traire losengour
Molt sont plesant au dame et sire
Les ditz, mais puis au chief de tour
Luy fait convertont en dolour,
Dont pardevant les faisoit rire.

Qui les oisealx deçoit et prent
Moult les frestelle gaiement,
Dont en ses reetz les porra traire;
Et ensi ly bilingues tent 3580
Ses reetz, quant il plus belement
Parole pour les gens desfaire.
He, vice al oill tant debonnaire,
Tu as du joye le viaire,
Et le penser come mort dolent:
Tu es la reule de contraire,
Le beau solail q'en toy s'esclaire
Par toy s'esclipse trop sovent.

Ly sages dist *que* nuls s'affie
En celluy, qui par sophistrie 3590
Parole, si *que* nuls l'entent;
Car tiel a dieu ne plerra mie,
Si est odible en ceste vie
Et pert les graces du present.
Maldit soient tout tiele gent, f. 24
Ce dist ly sages ensemment;
Et ly prophete auci dieu prie,
Qu'il perde et mette a son tourment

La langue que si doublement
Trestous deçoit par tricherie. 3600

Dieus par Baruch nous dist cela:
'Way soit a l'omme et way serra,
Qui donne a boire a son amy,
Le quel du fiel se mellera,
Dont puis quant l'autre enyvra,
Sa nueteé verra parmy;
Que despuillez et escharny
De ce serra plus malbailly,
Dont il sa gloire plus quida.
Mais double lange, atant vous dy, 3610
Si du fiel ne soit myparty,
Jamais parole ne dirra.

David demande en son psalter,
Q'est ce que l'en pourra donner
Au langue double en resemblance:
Si dist q'om le doit ressembler
A la saiette agu d'acier,
Que du main forte vole et lance;
Dont riens poet avoir contrestance,
Ainçois tresperce et desavance 3620
Le corps en qui la fait lancer:
Ensi ou plus sanz arestance
Ly langue double en sa parlance
Plusours en fait desavancer.

Auci David nous essamplant
La langue double est ressemblant
Au vif carbon de feu q'espart;
Qui bruit soy mesmes tout avant,
Et sur les autrez puis s'espant, 3630
Qui sont decoste luy a part:
Car langue double de sa part
Plus *que* carbon enflamme et art
Ceulx q'envers luy sont enclinant;
Mais pource q'ensi se depart
De dieu, au fin avra le hart
De l'enfernale paine ardent.

Les mais du double lange ensi
Descrist ly sages, que par luy
Sont gens paisibles perturbez,
Et les fortz chastealx enfouy, 3640
Et les cités murés auci
Destruit, et les vertus ruez

Du poeple, et les plus fortz tuez:
Tant fait par ses soubtilités,
Que nuls en poet estre garny.
De les tresclieres matinées
Trop fait obscures les vesprées;
C'est cil qui n'est ne la ne cy.

Au langue double en malvoisté
Perest un autre associé, 3650
Qui Falspenser om est nommant:
L'un est a l'autre tant secré,
Que l'un sanz l'autre en nul degré
Voet dire ou faire tant ne quant.
Ly tiers y est, q'en leur garant
Sovente fois se met avant;
Cil par droit *nom* est appellée
Dissimulacioun, qui tant
Sciet les faintises de truant,
Dont maint *prodhomme* sont guilée. 3660

Cist trois se sont d'un colour teint,
Et par ces trois furent atoint
Ly frere q'ont Josep deçu:
Trop fuist leur cuer d'envie peint,
Quant ont ensi leur frere enpeint
En la cisterne et puis vendu:
Mais Job, q'estoit l'amy de dieu,
Dist que penser de mal estru
Dieu le destruit, q'au fin ne meint.
Ce parust bien en mesme lieu: 3670
Josep fuist sur Egipte eslieu,
Quant tous si frere sont destreint.

Des tous peccchés qui sont *dampnable*
Ly fals pensiers est *conestable*
En l'avantgarde au Sathanas,
Et fait que l'alme en est menable
Ove mainte vice abhominable
Encontre dieu; mais tu orras
Comme ly prophete Micheas
Dist, 'Way te soit, qui pensé as 3680
Du chose q'est descovenable':
Et David dist, s'ensi le fras,
Des tes pensers tu descherras,
Solonc *que* tu en es coupable.

Par Jeremie dieu divise
Le vengement, q'en aspre guise

Au malpenser envoiera,
 Q'est d'indignacioun esprise
 Comme feu, que jamais pour l'en-
 prise
 Du Falspenser n'exteignera : 3690
 Car comme ly cuers d'envie esta
 Toutdis ardent, ensi serra
 Du Falspenser la paine assisse.
 Trop pourra penser a cela
 Qui soy coupable en sentira,
 Quant fin n'ara de sa juise.

La discipcioun d'Envie proprement.

D'Envie ce sont ly mestier :
 Son proesme a detrahir primer,
 Et s'esjoÿr de l'autry mals,
 Et doloir sur le prosperer 3700
 De ses voisins, queux supplanter
 Ses paines met et ses travails ;
 Et par semblant q'est feint et fals
 Se fait secré d'autry consals,
 Et puis le fait aperticer,
 Dont les meschines et vassals,
 As queux se fist amys corals,
 Fait en la fin deshonorer.

Uns clers d'Envie ensi commente,
 Si dist que celle est la serpente 3710
 Que plus ressemble a son fals pierre :
 Car nuyt ne jour son cuer n'alente
 Sur l'autry mal, ainz atalente
 Tout autry bien mettre a derere :
 C'est du malice la marchiere ;
 C'est le challou deinz la perriere,
 Qui porte feu deinz son entente ;
 C'est le rasour qui nous fait rere
 La barbe contre poil arere,
 Que jusq'al oss prent sa descente : 3720

C'est celle urtie mal poignant,
 Que d'amertume vait brillant
 La rose qui luy est voisine ;
 C'est ly serpens toutdis veillant,
 Q'en l'ille Colcos fuist gardant
 Le toison d'orr, dont par covine,
 Q'en fist Medea la meschine,

3695 ensentira 3714 aderere

Jason de sa prouesse fine
 Portoit grant pris en conquestant
 Malgré la geule serpentine. 3730
 He, false Envie malvoisine,
 Comme tu par tout es malvuillant !
 Envie est cil dragon mortiel,
 Ove qui l'archangre seint Michel,
 Sicomme l'apocalips devise,
 Se combatist, pour ce q'en oel
 L'amour accusoit fraternel,
 Et volt pervertir en sa guise ;
 Mais dieu en ad vengeance prise
 Par son saint angre, q'il molt prise, 3740
 Qui le dragon malvois et viel
 Venquist tanq'au recreandise,
 Et luy ruoit del halte assisse
 Bass en enfer perpetuel.

Envie d'omme resonnable
 De son venym est ressemblable
 Au Basilisque en sa figure ;
 Q'est uns serpens espoentable,
 Sur toutes bestes plus nuisable,
 Q'estaingt et tolt de sa nature 3750
 Du fuil et herbe la verdure :
 En tous les lieux u qu'il demeure
 Riens est qui soit fructefiable.
 Ensi d'Envie la sufflure,
 Honour, bonté, sen et mesure
 De ses voisins fait descheable.

Envie par especial
 Sur tous mals est desnatural,
 Car si trestout ussetz donné,
 Et corps et biens en general 3760
 A l'envious, cil au final
 Du mal t'ara reguerdonné.
 He, envious cuer maluré,
 Ne scies comme dieus t'ad commandé
 D'amer ton anemy mortal ?
 Et tu ton bon amy en hée
 Sans cause tiens trestout du grée.
 Respon, pour quoy tu fais si mal.

Sicomme du lepre est desformé
 En corps de l'omme la beuté, 3770
 Ensi de l'alme la figure

3716 challon 3727 Qen fist 3739 enad

Envie fait desfiguré.
 Ly sages l'ad bien tesmoigné,
 Q'Envie fait la purreture
 Des oss a celui qui l'endure.
 He, vice, comme peres oscure !
 Tu as ce deinz le cuer muscé,
 Dont le corage est en ardure,
 Que nuyt et jour a demesure,
 En flamme met ton fals pensé. 3780
 Dedeinz la bible ensi je lis,
 Q'om solt la lepre gent jadis
 De la Cité forainement
 Faire habiter es lieux sultis :
 Mais pleust a dieu et seint Denys,
 Que l'en feist ore tielement f. 25
 De l'envieuse male gent ;
 Siqu'ils fuissent souleinement
 Enhabité loign du pais.
 Prodons du deable se defent, 3790
 Mais noun d'Envie aucunement ;
 Ensi valt l'un de l'autre pis.

En ces trois poins Roy Salomon
 D'Envie fait describeioun,
 Disant q'Envie ad l'oill malvois,
 Et bouche de detraccioun,
 Ove pié de diffamacioun :
 N'est pas sanz vice q'ad ces trois.
 Qui list jadis de les fortz Rois
 Les cruautés et les desrois, 3800
 Sur tous tourmens ly plus feloun,
 Dont cil tirant furent destrois,
 C'estoit Envie ove le surcrois,
 Comme dist Orace en sa leçon.

Ly mons Ethna, quele art toutdiz,
 Nulle autre chose du pais
 Forsque soy mesmes poet ardoir ;
 Ensi q'Envie tient ou pis,
 En sentira deinz soy le pis.
 A ce s'acorde en son savoir 3810
 Ly philosphre, et dist pour voir
 Q'envie asses plus fait doloir
 Son portour, qui la tient saisis,
 Que l'autre contre qui movoir

Se fait, car l'un matin et soir
 La sente, et l'autre en est guaris.
 Au maladie q'est nommé
 Ethike Envie est comparé.
 C'est un desnaturel arduor,
 Que deinz le corps u s'est entré 3820
 De son chalour demesuré
 Arst comme ly feus dedeinz le four ;
 Dont ensechist du jour en jour
 Le cuer ove tout l'interiour,
 Que dieus en l'alme avoit posé ;
 Siqu'il n'y laist du bon amour
 Neis une goutte de liquour,
 Dont charité soit aroucée.

Envie ensur tout autre vice
 Est la plus vaine et la plus nice : 3830
 Sicomme ly sages la repute,
 Envie est celle peccatrice,
 Qes nobles courtz de son office
 Demoert et est commune pute.
 A les plus sages plus despute,
 A les plus fortz plus fait salute,
 Et as plus riches d'avarice
 Plus fait Envie sa poursute :
 A son pouvoir sovent transmute
 L'onour d'autry de sa malice. 3840

Uns clers en son escript difine
 Disant : ' N'est cil qui tant encline
 Au deable sicomme fait Envie ;
 La quelle a sa primere orine
 En paradis fist la ruine,
 Dont abeissa la nostre vie.'
 He, quel aguait, quele envale
 Nous faisoit lors de sa boidie,
 Q'elle ot muscé deinz sa peytrine !
 Et ore n'est ce point faillie ; 3850
 En tous pais la gent escrie
 Que trop endure sa covine.

**De les cink files de Ire, des queles
 la primere ad noun Malencolie.**

Si plus avant vous doie dire
 Des filles qui se naiscont d'Ire,

3801 plusfeloun

3809 Ensentira

3816 enest

3835 plussages

3836 plusfortz . . . sa lute

Cynk en y ad trop malurés,
L'une est malvoise et l'autre est pire :

Way, pourra dire cel Empire,
U que se serront mariés :
Car plus *person* desmesurés
En fais, en dis, et en pensés, 3860
Que nulle langue poet descrire.
Peas, concordance et unités
Ont sur tous autres desfiés,
Et plus les font a despire.

La primere est Malencolie,
C'est une file trop hastie,
Que se corouce du legier
Pour un soul mot, si nuls le die,
Voir d'une paille ou d'une mye
Se vorra malencolier. 3870

Cil qui le voet acompaigner,
Souffrir l'estoet sanz repleder,
O tout laisser sa compaignie :
Ne valt *resoun* pour l'attemprer,
Car l'ire sourt deinz son penser
Comme du fontaine la buillie.

Quant ceste fille prent seignour,
Qui plus pres est son servitour,
En aese au paine vivera ;
Ainz chier compiert le grant irrouer 3880

De luy, qui maintes fois le jour
Pour poy du riens l'avilera.
Sovent sa maison troublera,
Sea officers remuera :

Sa femme n'ert pas sanz douleur,
Car ja si bonne ne serra,
Comme plus d'amer se penera,
Tant meinz avra son bon amour.

Malencolie en ire flote
Et de discort tient la riote ; 3890

Car pour le temps que l'ire dure
Ne luy plerra chançon ne note :
Si tu bien dis, le mal en note,
Si tu voes chald, il voet freidure,
Quant tu te hastes, il demure,
Ore est dessoutz, ore est dessure,
Ore hiet et ore d'amour assote,
Ore voet, *noun* voet ; car sa mesure

Plus est movable de nature
Que n'est la chace du pelote. 3900

Malencolie en son bourdant
Se melle ensi comme combatant,
Car ire et jeu tient tout d'un pris :
Quique s'en vait esparniant,
S'il poet venir a son devant,
Il fait a son povoir le pis.

Ne sont pas sanz corous ses ris,
Non sont sanz maltalent ses dis,
Petit dura son beau semblant ;
Si rien vait contre son devis, 3910
Sovent enbronchera le vis ;
Plus est divers que nul enfant.

A son fils ce dist Salomon,
Q'en son hostell ne soit leon
En subvertant de sa moleste
Et sa familie et sa maison :

Mais reule essample ne *resoun*
Le Malencolien n'areste,
N'ad cure de maniere honneste,
Ainz comme *noun* resonnable beste 3920
A son corous quiert enchesoun ;
Quar quant ly vers *tourne* en sa teste,
Lors brait et crie et se tempeste
Si comme du meer l'estorbilloin.

Ly sages dist, ' Comme la Cité
Quelle est overte et desmurée,
Ensi celuy qui s'espirit
N'ad de ce vice refrené.'

Car l'un et l'autre en un degré
Legierement sont desconfit ; 3930
L'une est tost pris sanz contredit,
Et l'autre, comme ly sages dist,
Sicomme vaisseal q'est debrusé
Le cuer ad rout par si mal plit,
Qu'il sapience en fait ne dit
Ne poet garder en salveté.

Et ly prophetes dist aici,
Que le corage de celluy
Q'ad ceste vice, en flamme attent
Que d'ire esprent, sique par luy 3940
S'eschalfe, sanz ce q'ascuny
Le touche ou grieve ascunement :

Mais deinz son cuer tout proprement
Tieux fantasies d'ire aprent,
Dont souffre les hachées ensi
Si comme femme a l'enfantement :
C'est un mervaille qu'il ne fent
Del ire dont est repleny.

Malencolie a sa despense
Ad pour servir en sa presence 3950
Deux vices ove soy retenu ;
Ly uns de deux a *noun* Offense,
Et l'autre ad *noun* Inpacience.
Offense est plus chald que le fu,
Pour poy ou nient d'ire est *commu*,
N'ad si privé dont soit conu,
Tant est soudain ce q'il enpense ;
Car moult sovent par ton salu
Et ton bon dit il t'ad rendu
Et maldit et irreverence. 3960

L'Inpacient envers trestous
Est fel et trop contrarious ;
Car l'autry dit au paine prise,
Et en response est despitous,
Soudain et malencolious,
Que point ne souffre aucune aprise.
Trop est un tiel de sa mesprise
Au pacient paine et reprise,
Qu'il du folie est desirous
Et quiert discort en toute guise ; 3970
Car ainz q'estoupe soit esprise
Del fieu, cil esprent de corous.

Inpacience s'est guarnie
De deux servantz en compaignie ;
Dont l'un est Irritacioun,
C'est ly pecchés que dieus desfie ; f. 26
Come Moyses en prophecie
Au poeple hebreu fist sa leçon,
Quant firon leur processiou
En terre de promissiou, 3980
Disant que ce leur ert partie
En cause de destruccioin ;
Et puis fuis dist, sicomme lisoun,
D'Ezechiel et Jeremie.

Mais Provocacioun d'irrouer
Est ly seconde servitour ;

Car d'ire dont son cuer esprent
Tiele estencelle vole entour,
Dont il provoco en sa chalour
Les autres en eschalfement 3990
De corous et descordement :
Et tant y monte que sovent
Encontre dieu vait la folour ;
Dont se revenge irrouement
De l'un et l'autre ensemblement,
Sicome tesmoignent ly auctour.

Baruch, qui saint prophete estoit,
Au poeple d'Israel disoit,
Pource q'en ire ont provocé
Leur dieu, il s'en revengeroit 4000
Et comme caitifs les bailleroit
A ceulx qui les tienont en hée :
Sovent aici pour ce peccché
Vers Babiloigne et Ninivé
Dieus asprement se corouçoit.
Trop est ce vice malsené,
Que fait que dieus est coroucé
Et le provoco a ce qu'il soit.

C'est ly peccchés fol et sauvage,
Que quant par cas ascun damage 4010
Luy vient du perte ou de lesure,
Tantost come forsené s'esrage,
Dont dieu reneye et desparage,
Que pour le temps que l'ire endure
Ne sciet q'est dieu, tant perest dure ;
N'y ad serment q'a lors ne jure,
Dont dieu provoco en son oultrage :
Trop est vilaine creature,
Qui laist son dieu pour aventure
Et prent le deable a son menage. 4020

Par le prophete qui psalmoie
Dieus dist, ' Cil poeples que j'amoye
M'ont provocé vilainement,
En ce que je leur dieu ne soie ;
Dont je par mesme celle voie,
En ce qu'ils ne sont pas ma gent,
Provoceray leur nuysement,
Et comme cils q'ont fait folement,
Leur tariance faire en doie :
Quant ne vuillont come pacient 403

Que soie leur, tout tielement
Ne vuil je point q'ils soient moye.'

Par ce que vous ay dit dessus,
Fols est a qui ce n'est conus
Que bon est q'om Malencolie
Eschive, par qui les vertus
Come pour le temps sont confondus,
Par qui resoun se mortefie
Et tourne en la forsenerie,
Par qui sovent en compaignie 4040
Les bonnes gens sont esperdus,
Par qui maint hom en ceste vie
Soy mesme et puis son dieu oublie,
Dont en la fin serra perdus.

**La seconde file de Ire, c'est
Tençoun.**

La file d'Ire q'est seconde
Sa langue affile et sa faconde
D'estrif et de contencioin :
Ne parle point comme chose monde,
Ainz par tencer tous ceux du monde
Revile par contempcioin. 4050
Comme plus l'en fait defencioin,
Tant plus est plain d'offencioin ;
Sa langue n'en sciet garder bonde,
Ainz crie sanz descencioin
Plain d'ire et de dissencioin,
Dont environ luy lieus redonde.

C'est grant mervaille au tele peine
Coment luy vient si longe aleine,
Que sans mesure brait et tence ;
Car de sa langue q'est vileine 4060
Pour une soule la douszeine
Rent des paroles par sentence.
Si tout le siecle en sa presence
Volt contreplaider sa science,
N'en taiseroit de la semeine ;
Ainz tout le pis que sciet ou pense
Par contumelie et par offence
Encontre tous respont souleine.

Iceste fille en propre noun
Est appellé dame Tençon, 4070
Quelle en parlant nully respite,

4091 enpoet

4109 This line and 4116 are written over erasures, in a hand probably the same as that which appears on f. 157 vo.

Seigneur, voisin, ne compaignoun,
Mais pource q'elle est si feloun,
Au debles est amie eslite.
Qui juste luy du pres habite,
Doit bien savoir ce q'elle endite
N'est pas l'aprise de Catoun ;
Car quanque l'ire au cuer excite,
Sa langue est preste et le recite,
Voir si ce fuist confessioin. 4080

Vers son amy Tençon diverse,
Quant le consail apert reherse
Q'a luy conta secretement :
Tantcomme plus sciet q'al autre adverse,
S'irrouse langue q'est perverse
Plus le reconte apertement.
He, dieus, come il desaese attend
Qui ceste file espouse et prent ;
Car en tous poins ele est traverse,
Ne lerra pour chastement : 4090
Qui faire en poet departement,
Fols est q'ensemble ove luy converse.

Cil q'unques tencer ne savoit,
Tout plainement de ce porroit
Du male femme avoir aprise,
Quant vers son mary tenceroit :
Car viene quanque venir doit,
N'en lerra, quant elle est esprise,
D'un membre en autre le despise,
Que pour bastoun ne pour juise 4100
Un soul mot ne desporteroit ;
Car ce tendroit recreandise,
En tençant perdre sa franchise,
Q'elle est serpente en son endroit.

Ja ne poet estre tant batue
Tençon, par quoy serra rendue
Darreinement que ne parole
Si halt que bien ert entendue,
D'overte goule et estendue.
Maldite soit tieu chanterole ! 4110
Bien fuist si tiele russinole,
Sanz encager au vent que vole,
Seroit parmy le bek pendue ;
Car l'en ne trove nulle escole,

Baston ne verge ne gaiole,
Qe poet tenir sa lange en mue.
Trois choses sont, ce dist ly sage,
Que l'omme boutent du cotage
Par fine force et par destrece :
Ce sont fumée et goute eauage, 4120
Mais plus encore fait le rage
Du male femme tencerresse.
De converser ove tiele hostesse
Meulx valt serpente felonnesse
Et en desert et en boschage ;
Car l'une ove charme l'en compesce,
Mais l'autre nuyt et jour ne cesse,
Ainz est sanz nul repos salvage.

Depar dieus a la male gent
Dist Jeremie tielement : 4130
' Pour faire vostre affliccioin
J'envoieray ytiel serpent,
As queux aucun enchantement
Ne poet valoir, tant sont feloun.'
Ce sont cil en comparisoin
Q'ont male femme a compaignoun,
As quelles nul chastement
Ou du priere ou du bastoun
Les pourra mener a resoun,
Tant sont salvage et violent. 4140

Cest un dit du proverbiour,
Qe des tous chiefs n'est chief peiour
De la serpente ; et tout ensi
Des toutes ires n'est irrouir
Pis que du femme ove sa clamour,
Quant tence : car ly sage aici
Ce dist, que deinz le cuer de luy
Folie buylle trespamy
Comme du fontaine la liquour.
Riens sciet q'a lors ne soit oi ; 4150
Trop mette en doute le mary,
Sil ad forsfait, de perdre honour.

Tençon, q'a nul amy desporte,
Son cuer enemy sa bouche porte ;
Ce dist ly sage en son aprise :
Car qanq' en son corage porte
Laist issir par l'overte porte,
Que de l'oïr c'est un juise.

Senec aici Tençon divise
A la fournaise q'est esprise, 4160
Dont ert jammais la flamme morte ;
Car toute l'eau de Tamise,
Neisque Geronde y serroit mise,
N'en poet valoir, tant pèrest forte.

Tençon, que toutdis est contraire,
De sa nature en fin repaire
En bouche au femme malurée. f. 27
Danz Socrates de tiel affaire
Senti quoy femme en savoit faire ;
Car quant s'espouse l'ot tencée 4170
Et il se taist trestout du grée,
Lors monta l'ire et fuist doublé,
Dont il ot muillé le viaire
D'un pot plain d'eau q'ot versée
Dessus sa teste et debrisée :
Trop fuist tiel homme debonnaire.

Car sanz soy plaindre ascunement,
Ou sanz en prendre vengeance,
Dist, ' Ore au primes puiss veïr
Comment ma femme proprement 4180
M'ad fait le cours du firmament ;
Car pluie doit le vent suïr :
Primer me fist le vent sentir
De sa tençon, dont a souffrir
M'estoet celle eau.' Et nequedent
Qui ceste essample voet tenir
Avisé soy ; car sans mentir
Ja ne serray si pacient.

Ly sage dist que par l'espée
Plusours des gens ont mort esté, 4190
Mais nounpas tantz, sicomme disoit,
Comme sont par lange envenimée :
Si dist que molt est benuré
Q'est loign du lange si maloit,
Ne parmy l'ire s'en passoit,
Ne q'en tieu jug jammais trahoit,
N'en tieux liens ne s'est liée,
Qe sont, ce dist, en leur endroit
Asses plus durr q'acier ne soit,
Et plus grevous q'enfermeté. 4200

Si dist aici que le morir
De Tençon plus q'enfern haïr

4169 ensauoit

4178 enprendre

4190 on

L'en doit, dont puis il te consaile,
 Q'ainçois que tiele lange oir
 Tu dois l'espines desfourir
 Pour haie en faire et estoupaile
 Parmy l'overt de ton oraille,
 Que tu n'escoutes le merveille :
 Car sa lesure om doit fuir
 Comme du leon qui l'omme assaille ;
 Car lange ad vie et mort en baille, 4211
 Dont l'en garist et fait perir.

Saint Jaques ce fait tesmoigner,
 Que de nature om poet dancier
 Toute autre beste que l'en prent ;
 Mais male lange du tencer
 N'est cil qui sciet engin trover
 De luy dancier aucunement.
 Car c'est la goufre plain du vent,
 Dont Amos la malvoise gent 4220
 Depar dieus faisoit manacer,
 Disant qu'il leur enemy le dent
 En volt ferir si roidement,
 Que plus que feu doit eschauffer.

Saint Augustins le nous enseigne,
 Que de trestous n'est overeigne
 Qui tant s'acorde et est semblable
 As oeuvres queux ly deable meine,
 Sicomme Tençon de la vileine.
 Mais pour ce q'elle est tant nuysable
 Q'au dieu n'a homme est amiable, 4231
 Ly malvois angre espoentable
 Doit contre luy porter l'enseigne :
 Car nuls fors luy n'est defensible
 A souffrir, quant elle est tençable,
 Le cop de sa tresforte aleine.

Ly saint prophete Zacharie
 Par demonstrence en prophete
 Vist une femme en l'air seant
 En une pot q'estoit polie 4240
 De verre, et ot en compaignie
 Deux femmes que la vont portant.
 Si ot a noun par droit nommant,
 Ensi comme l'angre fuist disant,
 Iniquité du tencerie ;
 Q'estoit porté en terre avant

4206 enfaire

4223 Envolt

4259 aluy

As mals pour estre y conversant,

Comme leur espouse et leur amie.
 De les deux femmes q'ont porté
 Amont en l'air Iniquité 4250
 Essample avons en terre yci.
 Chascune est d'autre supportée,
 Quant tencer voet en son degré
 De sa malice ove son mary ;
 Car lors s'assemblont tout au cry
 Comme chat salvage, et tout ensi
 Vienont rampant du main et pié.
 Du tencerresse a tant vous dy ;
 Mais qui bonne ad, bien est a luy,
 Ja ne me soit autre donné. 4260

Le pot du verre est frel et tendre
 Et de legier om le poet fendre,
 Mais lors s'espant que deinz y a ;
 Auci legier sont pour offendre
 Les femmes, que nuls poet defendre
 Que tout ne vole cy et la
 Leur tençon que plus grevera.
 Sur tieles femmes escherra
 La sort du males gens, que prendre
 Mondaine paine par cela 4270
 Pourront, mais dire way porra
 Cil qui covient tieu paine aprendre.

Ramponne ove Tençon sa cousine
 Demoert toutdis et est voisine,
 Que porte langue envenimé
 Plus que n'est langue serpentine ;
 Si ad toutdis plain la pectrine
 D'eisil et feel entremellé ;
 Dont si par toy serra touché,
 De l'amertume ers entusché : 4280
 Car de sa bouche, q'est canine,
 Abaiera la malvoisté
 De toy et de ton parenté,
 N'est mal q'a lors ne te destine.

Car Tençon q'est deinz son en-
 tente
 Naufré d'irroure porte une tente,
 Q'est du ramponne, au cuer parmy ;
 Mais par la bouche se destente,
 Et lors au tout plus large extente

Fait l'autry vices extenter ; 4290
 Car toutdis a son destenter
 Esclandre y est ove Desfamer,
 Qui font la plaie si pulente,
 Que si l'en n'ait un triacler
 Pour les enfleures allegger,
 Mortz est qui la puore en sente.

Tençon auci n'est pas guarie
 Du celle irrouse maladie,
 Q'est dite Inquietacion :
 C'est de nature l'anemie, 4300
 Que sanz repos le cuer detrie
 Et du venim mortal feloun
 Est plain, si que soy mesmes nonn,
 Ne son voisin ne compaignoun
 Laist reposer, maisq'om l'occie.
 Qui presde luy maint envioun,
 Se quart sicome d'escorpioun,
 S'il voet mener paisible vie.
 Mais come Tençon dont l'en se
 pleint

Entre les males femmes meint, 4310
 Entre les hommes mals ensi
 Maint contumelie irrous atteint,
 Dont pacience est trop constreint :
 Car Salomon, comme je vous dy,
 Dist, plus legier est au demy
 Porter grant fes que soul celuy
 Q'ad cuer du contumelie enpeint :
 Car il ad dire forsban
 Toute quiete loign de luy,
 Si ad le pont d'amour tout freint. 4320

Ly sages dist que ceste vice
 Doit ly mals oms de sa malice
 Tout proprement enheriter :
 Mais way dirront en son service
 Son fils, sa femme et sa norrice,
 Et chascun q'est son officer ;
 Car sanz desport les fait tencer.
 Semblable est au salvage mer,
 Quant la tempeste plus l'entice,
 Dont ne se pourra reposer : 4330
 Q'en tiel orage doit sigler,
 Merveilles est s'il n'en perisse.

4296 ensente

La tierce file de Ire, q'est appellé
 Hange.

Ore ensuiant vous vorrai dire
 Du tierce file que naist d'Ire ;
 Hange est nomé de pute orine :
 Je ne puis tous ses mals escrire,
 Mais en partie vuil descrire
 De sa nature la covine :
 C'est celle que deinz sa pectrine
 Ire ad covert que ja ne fine, 4340
 Ainz nuyt et jour sur ce conspire,
 Jusques atant que la ruine
 De son voisin ou sa voisine
 Tout plainement porra confire.

Cil q'ad ce vice est sanz amour,
 Car l'Ire q'est interieur
 Ne souffre pas que l'amour dure :
 Combien que par exterior
 Sicomme ton frere ou ta sorour
 Te fait semblant par couverture, 4350
 Soutz ce d'irrouse conjecture
 Compasse, tanq'en aventure
 Te poet moustrer le grant irroure
 Du quoy son cuer maint en ardure :
 Tiele amisté trop est obscure,
 Q'en soy retient mortiel haour.

Pour ce s'un tiel devant ta face
 Semblant de bon amour te face, f. 28
 Ne t'assurez en son desport ;
 Car soutz cela portrait et trace 4360
 De t'enginer au faulse trace
 De double chiere et double port.
 Quant plus te fait joye et confort
 Devant la gent, lors au plus fort
 Dedeinz son cuer il te manace ;
 Quant meulx quides estre en salf port,
 Du vent la perillouse sort
 En halte mer te boute et chace.

Ly sages te fait assavoir,
 Que d'un amy loyal et voir 4370
 Mieulx te valroit en pacience
 Souffrir a plaies recevoir,
 Que les baisers q'au decevoir
 Te sont donnés du providence :

4364 plusfort

Car bon amy s'il fiert ou tence,
 Ce vient d'amour, nounpas d'offence,
 Qu'il te chastie en bon voloir ;
 Mais qui te hiet en conscience,
 S'en un soul point te reverence,
 En mil te fra vergoigne avoir. 4380
 Cil qui te hiet, ce dist ly sage,
 Devant les oels de ton visage
 Par grant deceipte lermiera,
 Mais quant verra son avantage
 Ou en champaine ou en boscage
 De ton sanc il se saulera.
 Six sont que dieus unques n'ama ;
 L'un est cuer q'ymaginera
 Du malpenser l'autry damage :
 Auci Senec dist bien cela, 4390
 Que sur tous autres pis ferra
 Irrour muscé deinz fals corage.
 Ce dist Tullés, que d'amisté
 Hange est le venim maluré,
 Dont sont plusours sodeinement,
 Quant ils quidont meulx estre amé,
 Mortielement enpuisonné
 De tieu poison que tout les fent :
 Pour ce ne fait pas sagement
 Cil qui d'un tiel la grace attent ; 4400
 Car ja n'ert grace tant trové,
 Q'om poet apres aucunement
 En tiel lieu estre seurement
 U pardevant estoit en hée.
 Qui contre Hange riens mesfait,
 Si tost n'en poet venger le fait,
 En coy retient ses maltalens,
 De son rancour semblant ne fait,
 Mais il engorge le forsfait
 Tout pres du cuer deinz son pourpens ;
 Dont pour priere de les gens, 4411
 Ou des amys ou des parens,
 L'acord n'en serra ja parfait,
 Ainçois qu'il voit venir le temps
 Q'il prendre en poet tieux vengemens,
 Dont l'autre as tous jours soit desfait.
 Hange est bien semblable au Camele,
 Quant hom le bat en la maisselle

Ou autrepart dont ad lesure,
 Tout coy le souffre et le concelle ; 4420
 Mais soit certain ou cil ou celle
 Qui l'ad batu, quant verra l'ure,
 Soudainement par aventure
 Ou mort ou fiert de sa nature,
 Du quoy revenge sa querelle.
 Du malvois homme ne t'assure,
 Car par si faite couverture,
 Quant voit son point, il te flaielle.
 Mais Hange q'ensi le ferra
 Jammais bien ne se confessa ; 4430
 Car combien qu'il son maltalent,
 Quant il au chapellain irra,
 Dist pour le temps q'il le lerra,
 Tost apres Pasques le repret,
 Comme chiens font leur vomitement.
 He, dieus, par quel encombrement,
 Tant comme en tiele vie esta,
 Voet recevoir le sacrement ;
 Dont s'alme perdurablement
 Par son peccé forsjuggera. 4440
 Trop est vilains q'en bonne ville
 Son hoste herberge et puis reville,
 Quant il ad dit le bien venu.
 Ensi fait ceste irrouse fille ;
 Quant deinz son cuer les mals enfile
 Et les baratz dont s'est commu,
 L'esprit saint qui vient de dieu,
 Q'avant en s'alme ot retenu
 Pour herberger, alors exile,
 Et le malfé prent en son lieu : 4450
 Mal est ytiel eschange eslieu,
 Si plustost ne se reconcile.
 Beemoth, q'ove la lampreie engendre,
 C'est uns serpens, tu dois entendre,
 Q'ainçois q'il vait pour engendrer
 Laistson venym aillours attendre
 Come pour le temps, et puis reprendre
 Le vient, quant ad fait son mestier :
 A ce l'en poet bien ressembler
 Hayne, que son coroucer 4460
 Au jour de Pasques fait descendre
 Et laist le al huiss du saint moster,

Et quant revient puis del autier,
 Tantost recourt al ire extendre.
 Itieles gens font asses pis
 Q'unques ne firon les Juys,
 Du nosfresire en croix desfere ;
 Car a ce que leur fuist avis
 A l'omme soul ce fuist enpris,
 Nounpas a dieu ; mais l'autre affere 4470
 Fait l'omme crucifix en terre
 Et a la deité tient guerre,
 Encontre ce qu'il ad promis,
 Qu'il voet son dieu servir et crere.
 O comment ose ensi mesfere
 Cil q'est du sainte eglise apris ?
 De les Juys je truis lisant,
 Pour ce q'ils furont malvuillant
 Et odious au loy divine,
 Antiochus fuist survenant, 4480
 Qui leur haoit et fuist tirant,
 Et sicomme dieus leur mals destine,
 Il les destruit du tiele hatine
 Qu'ils par long temps de la ruine
 Ne se furont puis relevant.
 Quoy serra lors du gent cristine,
 Q'enmy le cuer ont la racine
 Dont nuls au paine est autre amant ?
 Hayne a dieu par nul degré
 Ne poet donner ses dons en gré 4490
 Ne ses offrendes acceptables ;
 Car cil q'au dieu n'ad soy donné,
 N'est droit que dieus ait accepté
 Ses biens, ainz soient refusablez.
 Deinz les vaissealx abhominablez
 Viandes ne sont delitablez,
 Ainçois om est tout abhosmé ;
 Tout tielement par cas semblablez
 Cil ne poet faire a dieu greablez
 Les faitz, q'ad malvois le pensée. 4500
 Hayne s'est associé
 Du Malice et Maligneté.
 Malice endroit de sa partie
 Ad ces trois pointz en propreté,
 Cuer double plain du malvoisté,
 Les lievres plain du felonie,

Et malfesantes mains d'envie.
 Icil qui meine tiele vie
 Sovent son dieu ad coroucié ;
 Et pour cela dist Ysafe, 4510
 Way soit au tiel, car sa folie
 Perest trop vile et malurée.
 Du double cuer les gens deçoit,
 Feignant de noun veoir q'il voit ;
 Et des fals lievres plus avant
 Par semblant parle en tiele endroit
 Comme bon amy le faire doit :
 Mais quant voit temps, lors maintenant
 Des mals mains vait malfesant,
 Et fait overt et apparant 4520
 Que pardevant se tapisoit ;
 Comme terremote tost s'espant,
 Soudainement et vient flatant,
 Quant l'en meinz quide que ce soit.
 Grant peccé fait qui fait malice ;
 Car soulement pour celle vice
 Dieus fuist menez a repentir
 Qu'il ot fait homme, et par justice
 Sur celle gent q'iert peccatrice
 Les cieus amont faisoit ovrir 4530
 Et pluyt sanz nul recoverir ;
 Dont toute beste estuit morir
 Fors l'arche, en quel Noë guarisse.
 Par tieus vengances sovenir
 Hom doit malices eschuir,
 Dont l'en pert grace et benefice.
 Mais a parler de la covine,
 Maligneté, q'est la cousine
 De Hange par especial,
 Celle est qui porte la racine 4540
 Dont le venym sanz medicine
 Croist ou jardin precordial,
 Q'engendre fruit discordial ;
 Car tout ensi comme le dial,
 Se tourne ades deinz sa pectrine,
 Pour compasser comment le mal
 Pourra mener jusq'au final,
 Dont l'autre soient en ruine.
 Come pour merite a recevoir
 L'en voue a sercher et veoir f. 29

Les lieux benoitz et les corseintz : 4551
 Ensi ly maïs du malvoiroir
 Promette et voue a decevoir
 Et de mal faire a ses prochains.
 Maligneté ne plus ne meinz
 Est des malvois ly capiteins,
 Que plus d'errour fait esmouvoir :
 C'est cil qui dist devant lez meins,
 ' Je voue a dieu, si je suy seins,
 Je fray les autres mal avoir.' 4560
 Quant depar dieus ly feus survient
 Du ciel et fist ce q'appartient
 Del viele loy au sacrefise,
 Lors du Maligneté luy vient,
 Que mal Cahim en hange tient
 Son frere Abel par tiele guise,
 Dont fust maldit et sa franchise
 Perdist en terre, et sanz dimise
 Serf a les autres en devient.
 David auci le prophetize, 4570
 Q'exterminer de sa juise
 Dieus doit la gent maligne au nient.
 Hayne encore en son aïue
 Ad deux servans de retenue,
 Ce sont Rancour et Maltalent.
 Rancour sicomme l'oïsel en mue
 Gist deinz le cuer, que ne se mue,
 Et contre amour l'ostel defent,
 Q'il n'y poet prendre herbergement :
 Car il hiet son aquoïnement, 4580
 Mais ja n'ert ire si menue
 Q'en remembrance ne la prent,
 Et la norrist estroitement,
 Tanq'elle au plain soit tout parcrue.
 De Rancour tant vous porrai dire,
 Que les petites causes d'ire
 En un papir trestout enclos
 Dedeinz son cuer les fait escrire,
 Et Maltalent y met la cire,
 Quant voit le tître escript au dos ; 4590
 Et si les garde en son depos,
 Mais ja ly cuers n'ert a repos,
 Devant q'il voit ce q'il desire,
 C'est quant pourra son mal pourpos

4569 endevient

Venger, et lors le fait desclos
 Si plain que tous le porront lire.
 L'en porra par resoun prover
 Que Hange endroit de son mestier
 Du deable est plus malicieux ;
 Car deable unques n'avoit poer 4600
 Sanz cause un homme de grever,
 Mais Hange du malvois irous
 Sanz cause hiet et est grevous.
 Trop est ce peccché perilous ;
 Car dieus s'en plaingt deinz le psalter,
 Come les Juys fals tricherous
 Trestout du gré malicieux
 Par hange le front tuer.
 Soy mesmes hiet qui hiet autry,
 Et qui soy mesmes hiet ensi 4610
 Dieus le herra, j'en suy certains :
 Et lors quoy dirrons de celuy,
 Que nulle part ad un amy,
 Ne dieu ne soy ne ses prochains ?
 Me semble droit q'uns tieus vilains
 Soit mis du toute gent longtains,
 U que l'en hiet et est hay,
 C'est en enfern, u n'est compains,
 Ainz tout amour y est forains,
 Et l'un a l'autre est anemy. 4620
 Hayne en fée comme son demeine
 Est d'Ire celle chamberleine
 Que nuyt et jour ove luy converse :
 Hayne est celle buïste pleine
 Du venym, dont chascun se pleigne
 Par tout u l'en l'espart ou verse :
 Hayne est celle horrible herce,
 Que deinz son cuer tue et enherce
 Et son prochain et sa procheine :
 Si est la pestilence adverse, 4630
 Que trop soudainement reverse
 La vie que l'en tient plus seine.
 La quarte file de Ire, q'est
 appellée Contek.
 La quarte file q'est irouse
 Perest cruele et perillouse,
 Que de sa lange point n'estrïve,
 Les jangles du litigieuse

4632 plusseine

Ne quiert, ainz quant est corouçouse,
 Tantost pour soy venger s'avive,
 Et en devient tantost hastive ;
 Dont son coutell maltalensive 4640
 Y trait et fiert malicieuse,
 Q'a lors n'espärne riens que vive :
 De nulle resoun est pensive,
 Tant a combatre est coragouse.
 Et pour cela, ce m'est avis,
 Son noun serra par droit devys
 Contek, tout plain de baterie.
 Quiconque soit de luy suspris
 Tant ad le cuer d'irroure espris,
 Que pacience ad forsbanie. 4650
 Car quant Contek le poeple guie,
 Tous se pleignent de sa folie
 Par les Cités, par les pais ;
 Mais riens ly chalt qui plourt ou crie,
 Ainçois quiert avoir la mestrie,
 Dont son barat soit acomplis.
 Quant Hange, q'est sa soer germeine,
 Hiet son prochain ou sa procheine,
 Et n'ose mesmes soy venger,
 Au Contek vient et si s'en pleigne, 4660
 Et luy promet de son demeine
 Pour l'autry teste debriser :
 Prest est Contek pour son loer
 Combatre et faire son mestier,
 Si prent les downs a male estreine ;
 Et quant celuy poet encontre,
 Tantost l'estoet ove luy meller,
 Si l'aresonne a courte aleine.
 Ove ses haspalds acustumés
 Contek es foires et marchées 4670
 Son corps brandist enmy la route ;
 Vers qui voet faire ses mellées
 Cil serra tost aresonnés ;
 Mais du resoun n'aguarde goute
 Ly fols, ainçois y fiert et boutte,
 Qu'il nul excusement escoulte,
 Comme pour le temps fust esragiez :
 Car du peril aucun n'ad doute,
 Tant met s'entencion trestoute
 De parfournir ses cruautés. 4680

4639 endeulent

Les gens du pees sont en freour
 Par Contek et par son destour ;
 Et maintesfois avient issi,
 Que sans hanap ly Conteckour
 Falt boire mesmes le liquour
 Qu'il verser vorroit a l'autry ;
 Le mal sovent rechiet sur luy,
 Le quel vers autres ad basti,
 Et de folie la folour
 Enporte, siqu'il chiet enmy 4690
 La fosse qu'il ot enfouy,
 Si prent le fin de son labour.
 Sovent avient grant troubleisoun,
 Quant ceste file en sa mesoun
 Ses deux sorours poet encontre,
 Malencolie avoec Tençoun ;
 Car n'est amour que par resoun
 Pourra ces trois entracorder :
 L'une est irouse en son penser,
 L'autre est irouse en son parler, 4700
 La tierce fiert de son bastoun.
 Qui tiele gent doit gouverner
 Sovent avra grant destourber,
 Voir si ce fust mestre Catoun.
 Contek ad un soen attendant,
 Mehaïn a noun ly mesfesant,
 Qui trop est plain du mal oltrage :
 Riens que soit fait en combatant
 Ne luy souffist, jusques atant
 Qu'il pourra prendre en avantage 4710
 Ascun des membres a tollage,
 Soit main ou pié, ou le visage
 Desformer, si que lors avant
 L'autre en doit sentir le damage :
 Pour ce se garde chascun sage
 D'accompaignier au tiel sergant.
 El viele loy je truis certain
 Et du Contek et du Mehaïn,
 Par ire quant ascun feri
 Ou sa prochaine ou son prochain, 4720
 Solonc l'effect de son bargaign
 Serroit ovelement puny :
 S'il ot fait plaies a l'autry,
 Lors fust replaiez autrecy, .

4660 senpleigne

4714 endoit

Ou oill pour oill, ou main pour main ;
 Par jugement l'en fist de luy
 Ce dont les autres ot laidy,
 Et du gentil et du vilain.
 Auci del ancien decret,
 Quant ly seigneur ot mehaigné 4730
 Son serf du membre ou du visage,
 Par ce serroit ly serfs blescé
 En lieu d'amende quit lessé,
 Comme enfranchy de son servage.
 He, come fuist droite celle usage,
 Quant povre encontre seignourage
 Maintint ! Mais ore c'est alé :
 Ly povre souffront del damage,
 Si font l'amende del oultrage,
 Ce m'est avis torte equité. f. 30
 Contek du Fole hastivesse 4741
 Fait sa privé consailleresse,
 Que n'ad ne reson ne mesure :
 Quiconque en son corous l'adesce,
 Molt plus soudeinement le blesce
 Que ne fait fouldre pardessure,
 Quant vient du sodeine aventure ;
 Car Folhastif de sa nature
 De nul peril voit la destresce, 4750
 Ainz tout par rage le court sure,
 Tanqu'il ait fait sa demesure,
 Ou soit desfait, car l'un ne lesse.
 Et pour cela dist Ysate
 Q'om doit fuir la compaignie
 De l'omme q'ad son esprit
 En ses narils, car sa folie
 Grieve a celluy qui l'associe.
 Et Salomon auci te dit,
 Q'ove folhardy pour nul excit
 Tu dois aler, car pour petit 4760
 Il te metra la jupartie,
 Dont tu serres en malvois plit ;
 Qu'il ad le cuer si mal confit,
 Meller l'estoet, maisq'om l'occie.
 Ly folhastif son fol appell
 A poursuir pour nul reppell
 Ne voet lesser a tort n'a droit ;
 Dont molt sovent tout le meinz bel

4745 plussoudeinent

Luy vient, come fist a Asahel,
 Qui frere de Joab estoit, 4770
 Apres Abner quant poursuioit,
 Qui bone pees luy demandoit,
 Mais l'autre q'estoit fol et feel
 En son corous tant le hastoit,
 Q'en haste quant il meinz quidoit
 Sur luy reverti le flaiell.
 Mais au final si me refiere
 Au fol Contek, qui pierre et miere
 De sa main fole et violente
 Blesce ou mehaigne, trop est fiere 4780
 Et trop perest celle ire amere.
 Q'au tiel oultrage se consente,
 Cil n'est pas digne a mon entente
 De vivre ensi come la jument,
 Ne tant come chiens de sa manere
 Ne valt ; car chascun beste avente
 Nature, mais en sa jovente
 L'omme est plus nyce que la fiere.
 La quinte file de Ire, q'est
 appellé Homicide.
 De ceste file je ne say
 Comment ses mals descriveray, 4790
 Ma langue a ce ne me souffist :
 Car soulement quant penseray
 Du grant hisdour, ensi m'esmay
 Que tout mon cuer de ce fremist.
 La nuyt primere quant nasquist,
 Ly deable y vint et la norrist
 Du lait mortiel, si chanta way,
 En berces u la fole gist,
 Et Homicide a nom le mist,
 Q'est trop horrible a tout essay. 4800
 Cil q'est a ceste file dru,
 Privé serra de Belsabu
 Et de l'enfern chief citezein ;
 Car il met toute sa vertu,
 Que par ses mains soit espandu
 Sicome du porc le sanc humein.
 Du false guerre est capitein,
 Dont maint prodomme et maint vilein
 Par luy sont mort et confondu,
 Car c'est sa joye soverein : 4810

Quant poet tuer du propre mein,
 Jammais ne querroit autre jeu.
 Fol Homicide en sa partie
 Ne voet ferir maisqu'il occie
 La povre gent noun defensible ;
 Ne pour mercy que l'en luy crie
 Laisser ne voet sa felonnie,
 Car d'autry mort n'est merciabile.
 He, vice trop abhominable,
 Horrible, laide, espoentable, 4820
 En qui pités est forsbanie,
 Dont mort eterne et perdurable
 Taguaite ove paine lamentable
 Del infernale deverie !
 Fol Homicide en sa contrée
 Pour poy du riens, quant est irré,
 Ne chalt de son voisin tuer ;
 Ainz dist que tout est bien alé,
 S'il poet fuir en salveté
 Ou a chapelle ou a mouster ; 4830
 Mais ce n'ert pas pour confesser,
 Ainz est pour soy delivrer,
 Par quoy ne soit emprisonné :
 Del alme soit comme poet aler,
 Maisque le corps poet eschaper,
 Confessioun est oublée.
 Avant ce que ly fieus s'espant,
 Fume et vapour s'en vont issant ;
 Et tout ensi ce dist ly sage,
 U q'omicide vient suiant, 4840
 Manace doit venir devant
 Come son bedell et son message.
 Terrou, Freour a son menage
 Vienont ove luy, que le corage
 Des innocens vont despuillant ;
 Que si l'en n'eust plus de damage,
 As simples gens trop fait oultrage
 Cil q'ensi les vait manaçant.
 Car quant Manace y est venu,
 As simples cuers trop est cremu, 4850
 Voir plus que fouldre ne tonaire :
 Du soun q'est de sa bouche issu
 Quant les orailles sont feru,

4832 deliurer; cf. l. 2955

4874 Encompassant

Jusques au cuer descent l'esclaire.
 Q'au dieu ne poet Manace plaire
 Nous en trovons bon essamplaire
 De les manaces Eseau,
 Qant dist qu'il voit Jacob desfaire :
 Dieu le haoit de tiel affaire
 Et a Rebecke en ad desplu. 4860
 Mais l'Omicide ad un servant
 Q'est d'autre fourme mesfaisant
 Mortiel, et si ad Moerdre a noun :
 Cist tue viel, cist tue enfant,
 Cist tue femmes enpreignant,
 Cist ad du rien compassioun,
 Cist est et traitres et feloun,
 Cist tue l'omme par poison,
 Cist tue l'omme en son dormant, 4870
 Cist est ly serpens ou giroun,
 Qui point du mortiel aguiloun,
 Dont l'en ne poet trover garant.
 Trop perest Moerdre horrible et fals
 En compassant ses fais mortals,
 Comme plus secré pourra tuer ;
 Car n'ose aperticer ses mals :
 Pour ce sicome ly desloyals
 Occist la gent sans manacer.
 Envers le mond se voet celer,
 Mais ja pour dieu ne voet lesser, 4880
 Qui tout survoit et monts et vals :
 Mais sache bien cil adverser,
 Quant dieus vendra pour ly juger,
 Tout serront overt ses consals.
 He, Moerdre du male aventure,
 Q'occit encontre sa nature
 Sans avoir mercy ne pité !
 Dont dieus, qui tout voit pardessure,
 Maldist si faite couverture
 De luy qui fiert ensi celé, 4890
 Que ja du sanc n'est saoulé.
 Mais sache bien cil maluré,
 Le sanc d'umeine creature
 Vengeance crie a dampnedée,
 Dont trop poet estre espoenté
 Qui s'ad mis en tiel aventure.

4856 entrouons

4860 enad

Dedeins la bible escript y a,
 Que quant Rachab et Banaa
 Le filz Saoul en son dormant,
 Le quel hom Hisboseth noma, 4900
 Moerdron, David pourcela
 Tantost les aloit pourjugant,
 Si furent mort tout maintenant :
 Dont fuist et est tout apparant
 Que dieus Moerdrer unques n'ama ;
 Mais sicome dieus le vait disant,
 Qui fiert d'espeie, sans garant
 Au fin d'espeie perira.

N'est pas sans moerdre la puteine,
 Quant ce que de nature humeine 4910
 Conceive ne le vait gardant :
 Ascune y a q'est tant vileine
 Que par les herbes boire exteigne
 Ce q'ad conceu de meintenant ;
 Ascune attent jusques atant
 Que le voit née, et lors vivant
 Le fait noier en la fonteine ;
 Ascune est yvre et en dormant
 Surgist et tue son enfant :
 Vei cy d'enfern la citezeine ! 4920

Au plain nul poet conter le mal
 Que d'Omicide en general
 Avient, dont soy nature pleint ;
 Car ce q'elle en especial
 Fait vivre, l'autre desloyal
 A son poair du mort exteint,
 Que par son vuill petit remeint :
 Dont mesmes dieu et tout ly seint
 Le dampnont comme desnatural ;
 En terre aici, si ne se feingt, f. 31
 La loy tout homicide atteint 4931
 Condempne au jugement mortal.

El viele loy du poeple hebreu,
 Si l'un avoit l'autre feru
 En volenté de luy tuer,
 De son voloir qu'il ad ceu
 Pour homicide il fuist tenu,
 Dont l'en le firon forsjuger
 Et si l'eust occis au plener,
 Tantost firon avant mener 4940

4918 endormant

Le frere au mort ou le neveu,
 Qui duist le sanc du mort venger,
 Et mort pour mort sanz respiter
 A l'omicide fuist rendu.

Cil d'autrepart qui son voisin
 Ou par aguait ou par engin
 Du fals compas alors tua,
 Ne se pot rembre de nul fin,
 Que morir ne l'estoet au fin,
 N'estoit riens que le garanta : 4950
 Car mesme dieu ce commanda,
 Q'om de son temple esrachera,
 De son autier le plus divin,
 Un tiel feloun, s'il y serra,
 Et q'om son sanc espandera
 Qui d'autri sanc se fist sanguin.

Trop fist Achab a dieu destance,
 Quant il Naboth par l'ordinance
 De Jesabell au mort conspire ;
 Car dieus de mesme la balance 4960
 De l'un et l'autre prist vengeance :
 Et d'autrepart l'en pourra lire
 Coment Nathan du nostre sire
 Vint a David, pour luy descrire
 Qu'il n'ert pas digne au dieu plesance
 De son saint temple au plain confire ;
 Q'il ot fait faire Urie occire
 Pour Bersabé fole aquointance.

Chaým son frere Abel occit,
 Et pour cela dieus le maldit 4970
 Avoec toute sa progenie ;
 Et puis la loy dieus establit,
 Et a Noë ensi le dit,

' Quiconque de l'umaine vie
 Le sanc espant, que l'en l'occie ;'
 Si que son sanc du compaignie
 De l'omme et toute rien que vit
 En soit hosté sans esparnie :
 Car qui nature contralie
 Doit estre as tous ly plus sougit. 4980

Mais l'Omicide, u q'il repaire,
 Ad toutdis un soen secretaire ;
 C'est Cruauté, q'est sans mercy,
 Q'aprist Herodes l'essamplaire,

Dont les enfans faisoit desfaire
 Entour Bethlem, qant dieus nasqui ;
 Mais dieus se vengra puis de luy.
 Asses des autres sont aici,
 Des queux hom poet essample traire,
 Qui ont esté par ce peri ; 4990
 Car dieus n'ad pité de celui
 Qui du pité fait le contraire.

Vengeance la dieu anemie
 A Cruauté tant est amie
 Qe riens ne fait sanz son assent ;
 Si font de Rancour leur espie,
 Et par l'aguard d'irrouse envie
 Tienont le mortiel parlement.
 Sur quoy ly sage tielement
 Nous dist, que la malvoise gent 5000
 Se voet venger en ceste vie ;
 Dont sur vengeance vengeance
 Leur envoit dieus au finement
 Du mort que jammais ert complie.

Ezechiel prophetiza
 Disant, pour ce q'Ydumea
 En sa malice de reddour
 Ot fait vengeance as fils Juda,
 Sa main vengante extendera
 Dieus, pour destruire y tout honour, 5010
 Si q'en la terre tout entour
 Ne lerra beste ne pastour,
 Ainz toute la desertera.
 Mais fol n'en pense au present jour ;
 Dont, qant meulx quide estre a sojour,
 Le coup desur son chief cherra.

Par Ysala ensi dist dieux :
 ' O tu vengat, o tu crueux,
 Tu qui soloies gens plier,
 Ore es en terre au nient cheeuz ; 5020
 Que je t'ai plaiés et feruz
 Du plaie de ton adversier,
 Dont a guarir n'est pas legier :
 Molt ert cruel le chastoier
 Dont tu serras ades batuz ;
 Car pour ton corps poindre et bruiller
 Serpent et fieu sanz terminer
 Appailliez sont a ton us.'

Solyns, qui dist mainte aventure,

D'un oisel conte la figure 5030
 Q'ad face d'omme a diviser,
 Mais l'omme occit de sa nature ;
 Et tost apres en petite hure
 Se court en l'eau a remirer,
 Dont voit celuy q'ad fait tuer
 A son visage ressembler ;
 Et lors comence a demesure
 Si grant dolour a demener,
 Q'il moert sanz soy reconforter
 Pour la semblable creature. 5040

He, Homicide, je t'appell,
 Remembre toy de cest oisel
 Et d'autres bestes ensemment,
 Qe nul des tous est tant cruel
 Qu'il son semblable naturel
 Vorra tuer, mais autrement
 Chascun sa proie acuilt et prent ;
 Mais tu desnaturelement
 Ton proesme et ton amy charnel
 Deproies et t'en fais sanglent. 5050
 He, homme, vien au jugement,
 Et dy pour quoy tu est si fel.

La discipcion de Ire par
 especial.

Ore ay je dit et recitée
 Les filles qui sont d'Ire née,
 Come trop font a redoubter.
 Molt est cel homme benuré
 Qui s'en abstient, car leur peché
 Le corps et alme fait grever ;
 Car l'un ainçois fait periler
 Que l'ure vient de terminer 5060
 La vie q'est ennaturée ;
 Et l'autre fait desheriter
 Du ciel, u peas enheriter
 Doit sans nul fin glorifié.

He, Ire, ove ta cruele geste,
 En tous tes fais es deshonneste,
 Et en tous lieux la malvenue ;
 Car dieus ove qanque y est celeste,
 Et homme ove qanque y est terrestre
 Fais estormir de ta venue. 5070
 Fols est qui de ta retenue
 S'aquointe, car dessoutz la nue

Ne fais avoir forsque moleste,
 Du quoy l'en fiert ou tence ou tue :
 Si la puissance serroit tue,
 Tout fuist destruit, et homme et beste.
 He, Ire tant espoentable,
 Q'au corps n'a l'alme es delitable,
 Ne say du quoy tu dois servir,
 Qant nulle part es acceptable. 5080
 Dont saint Jerom te fait semblable
 As furiiis, qui font ghemir
 L'enfern des almes espenir ;
 Ce sont qui tout font estormir
 L'abisme en paine perdurable :
 Et tu la terre ensi fremir
 Fais, dont par tout l'estoet sentir
 Ta cruauté desmesurable.
 Ire est en soy toutdis divise,
 Car de soy mesmes ne s'avise 5090
 Et de l'autry nul garde prent,
 D'enflure dont elle est esprise :
 Au cardiaque l'en divise
 Le mal de luy, car tristement
 Fait vivre, et trop soudeinement
 Le cuer ensecche tielement
 Q'a luy guarir n'est qui souffise ;
 Nonpas le corps tansoulement
 En fait perir, mais asprement
 Destourne l'alme a sa juise. 5100
 Ce dist uns clerks, et le diffine,
 Du cruele Ire qui ne fine,
 Du quoy nature en soi se pleingt,
 Q'elle est semblable en sa covine
 Au fieu gregois, dont la cretine
 Del eue le chalour n'exteingt.
 Ainz art trestout qanq' elle atteint :
 Ensi n'est resown qui restreint
 Le cuer u q'Ire la ferine
 De cruauté le rage enpeint ; 5110
 Ainz qanq' enemy sa voie meint
 A son poair met en ruine.
 En l'evangile dieus nous dist :
 'Gens qui sont povre d'espirit
 Le ciel avront tout proprement :'
 Et d'autrepart je truis escript,

5146 plusfort

Que dieus la terre auci promist
 A ceaux qui debonnairement
 Vivont. He, Ire, dy comment
 Et u quiers ton herbergement ? 5120
 Quant ciel et terre t'est desdit,
 Il covient necessairement
 Q'enfern te donne hostellement,
 U ton corous ert infinit. f. 32

**Ore dirra de Accidie et de ses
 cink files, dont la primere est
 Sompnolence.**

Pour vous conter en droite line
 D'Accidie, ove qui le Siecle alline,
 Celle ad cynk files enfanteez ;
 Des quelles tiele est la covine
 Qe pour labour du camp ne vine
 A nul temps serront travailleez, 5130
 Ne ne serront abandonnez
 A les prieres ordeinez,
 Comme sont precept du loy divine,
 Ainz queront ease des tous lees :
 Dont Sompnolence, ce sachies,
 La primere est de cest orine.

De Sompnolence atant vous dy,
 Quiconque soit son droit norry
 Fait son office en ce q'il dort :
 S'il ad du lit, lors couche ensy, 5140
 Si noun, solonc l'estat de luy
 Lors autrement quiert son desport ;
 Mais pour conseil ne pour enhort
 Ne fait labour, n'a droit n'a tort,
 Ainz comme pesant et endormy
 Ses deux oils clos songe au plus fort,
 Et ensi gist comme demy mort,
 Qu'il est d'Accidie ensevely.

En ease Sompnolence vit,
 Quant poet dormir sanz contredit 5150
 Sur mole couche q'est enclose
 De la curtine, u son soubgit
 Ne son servent pour nul proufit
 Ne pour damage esveiller l'ose ;
 Car lors en aise se repose,
 Et pense au tout le text et glose,

Comme plus pierra pour son delit ;
 Mais s'il doit lever une pose,
 Ce semble a luy molt dure chose,
 Tanq'il revait couchier ou lit. 5160
 Quant deinz son lit serra couchiee,
 Pour luy grater ert affaitiee,
 Ou soit varlet ou soit meschine,
 Par qui serra suef maniee
 Le pié, la main, et la costie,
 Le pis, le ventre avoec l'eschine ;
 D'ensi grater ades ne fine,
 Tanq'en dormant son chief recline.
 Tiele est sa vie acustummee,
 Ne la lerroit pour l'angeline : 5170
 Mieulx ayme l'aise q'est terrine
 Que d'estre en paradis aisee.
 Son chamberlain ses fees perdra,
 S'il molement n'ordeinera
 Son lit des draps et du litiere ;
 Et que sur tout n'oubliera
 Q'il d'eauerose arosera
 Et les lincaux et l'oreillere ;
 Car lors se couche a lee chiere, 5180
 Ne ja pour soun de la clochiere
 Au matin se descouchera :
 Ainz le labour de sa priere
 Laist sur la Nonne et sur le frere ;
 Asses est q'il ent soungera.
 Car Sompnolence ad joye grant
 Quant poet songer en son dormant,
 Et dist que ses avisiouns
 Vienont de dieu, dont en veillant
 Sicome luy plect vait divinant ;
 Car solonc ses condiciouns 5190
 En fait les exposiciouns,
 Et met y les addiciouns
 De sa mençonge en controevant ;
 Mais a les premuniciouns,
 Qui sont a ses perdiciouns,
 Ne vait du rien considerant.
 Un deblet q'est asses petit
 A provocer son appetit,
 Au fin q'il dorme plus et plus,
 Sur tous les autres est eslit ; 5200

5188 enveillant

Ly quel serra toutdis au lit
 Et tempre et tard luy bienvenus.
 Le noun de luy n'est desconus,
 Ainz est as dames bien conus,
 Tirelincel en chambre est dit :
 Qant l'alme enhorte a lever sus,
 Tirelincel dist, ' Couchiez jus,
 Car moim conseil n'ert pas desdit.'
 Au prime ou tierce qant s'esveille,
 Si lors se lieve c'est merveille ; 5210
 Car son deblet qui l'ad en cure
 Tout suef cornant dedeinz l'oreille
 En mainte guise le conseille,
 Si dist, ' Atten jusq' al hure
 Que satisfait a ta nature
 Eietz si preu ta norreture,
 Remembre toy du chalde teille
 U es touchies, je te conjure ;
 Car c'est la chose, je te jure,
 Que longue vie t'appareille.' 5220
 Mais quant pour loer deservir
 Au sompnolent estoet servir,
 Et q'au matin son mestre appelle,
 ' Ore ça vien tost !' he, quel suspir,
 He, quel dolour, quant doit partir
 Hors du chalour de sa lincelle !
 Dont au chaucier de sa braielle
 Enmy dormant fait sa querelle,
 Qu'il plus au plain ne poet dormir.
 Q'ad tiel varlet ou tiele ancelle, 5230
 Souhaider poet que cil et celle
 Fuissent alé sanz revenir.
 Ly Sompnolent sicome l'enfant
 Quiert estre deinz son lit couchant,
 Qant pour le froid n'en voet lever ;
 Et fait ensi pitous semblant
 A descoucher, jusques atant
 Qu'il poet sa chemise eschauffer :
 Demy se lieve, et recoucher
 Tantost se fait et l'oreiller 5240
 Enbrace, et puis luy dit avant,
 ' Dy, que me voes tu consailler,
 Ou plus dormir ou descoucher ?'
 Vei la du deable droit servant !

5191 Enfait

5193 encontreuant

Au Somnolent trop fait moleste,
 Quant matin doit en haulte feste
 Ou a mouster ou a chapelle
 Venir; mais ja du riens s'apreste
 A dieu prier, ainz bass la teste
 Mettra tout suef sur l'eschamelle, 5250
 Et dort, et songe en sa cervelle
 Qu'il est au bout de la tonelle,
 U qu'il oit chanter la geste
 De Troylus et de la belle
 Creseide, et ensi se concelle
 A dieu d'y faire sa requeste.

Ly sages dist que sicome l'uiss
 Deinz son chanel et son pertuis
 Se tourne et moet aiseement,
 Ensi en ease encore et plus 5260
 Par nuyt et jour du commun us
 Dedeinz son lit ly Somnolent
 Se tourne et moet a son talent
 Solonc le corps; mais nequedent
 Resoum del alme est tout confus:
 Car danz Catoums ce nous aprent,
 Que long repos de songement
 Norrist les vices au dessus.

El livre de levitici
 Dieus ad defendu que nully 5270
 A Somnolence doit entendre;
 Car c'est un peché desgarni,
 Qui du laron et d'anemy
 Laist sa maison fourir et fendre
 Sanz resister et sanz defendre:
 Q'ainçois q'il porra garde prendre,
 Ou q'il le cuer ait esveilly
 Pour grace et pour vertu reprendre,
 Ly laron vient pour luy surprendre,
 De ses pechés tout endormi. 5280

Dieus a les gens du Babilant,
 Q'en leur pechés furent dormant,
 Par son prophete Jeremie,
 'Dorment,' ce dist, 'cil fol truant,
 Et si songent en leur songant
 Du sempiterne songerie,
 Dont lever ne se pourront mie.'
 He, Somnolence au char amie,
 Tu moers tant comme tu es vivant,

Et puis enfern te mortefie, 5290
 Sique tu es toutdis sanz vie;
 Trop perdist dieus en toy faisant.

Iceste fille ad une aqueinte,
 Que molt se fait paisible et queinte,
 Sique labour ne la surquiere:
 Tendresce a noun, si est trop feinte
 Et du petit fait sa compleinte,
 Voir, si ly ventz au doss la fiere.
 Ne vait as champs comme charuere,
 N'a la montaigne comme berchere, 5300
 Ne poet souffrir si dure enpeinte;
 Mais comme la tendre chamberere
 Du tout labour se trait arere;
 Trop est en luy nature exteinte.

Mais quant Tendresce est chamber-
 leine
 Au frere, au moigne, ou a nonneine,
 Cel ordre vait trop a rebours;
 Car pour cherir la char humeine
 Dormont tout suef a longe aleine,
 Et sont de leur vigile courtz. f. 33

N'est pas bien ordiné ce cours; 5311
 Car ce dist dieus, q'es roials courtz
 Sont cil qui vestont mole leine,
 Nonpas en cloistres n'en dortours;
 Mais tant sont tendre ly priours,
 N'ont cure a ce que dieus enseigne.

Tendresce est celle que debat
 Au cuer et le corage abat,
 Et si luy dist, 'Prens remembrance
 Que tu primer fus delicat 5320

Norry, pour ce sustien l'estat
 Dont es estrait du jofne enfance.'
 Ensi le cuer met en errance,
 Dont le corage desavance
 Et du soubgit fait potestat,
 C'est de sa char, q'en habondance
 Repose, et l'alme a sa penance
 S'en vait tout povre et desolat.

Ly sages dist parole voire:
 'O come amiere est la memoire 5330
 A l'omme pensant de la mort,
 Quant est enemy sa tendre gloire!
 Car tout luy changera l'estoire

Soutz terre, uque ly serpens mort
 Sa tendre char, et la qu'il dort
 Un oreiller boscheus et tort
 Avra de la crepalde noire:
 Mais que pis est, l'alme au plus fort
 En paine irra par desconfort,
 U sanz mercy l'en desespoire. 5340

Dieus, qui jadis fuist coroucié
 Au poeple hebreu pour luy peché,
 Ensi disant leur manaça:
 'La tendre femme que son piée
 Planter au terre n'est osée
 Pour sa tendresce, temps verra,
 Qant par suffreite mangera
 Ses propres filz.' Dy lors quoy fra
 Cil homme tendre en son degré:
 Quant de la femme ensi serra, 5350
 Je croy que l'omme pis avra
 Que femme pour sa tendreté.

Mais qui Tendresce voet descrire,
 Solonc les clerics il porra dire
 Que c'est du cuer une moleste,
 Dont le corage tant empire
 Qu'il laist la char tenir l'empire
 Sur l'alme plus que fole beste.
 Car au labour d'umeine geste,
 Dont l'en pain et vesture acqueste,
 N'ad volenté que poet souffire, 5361
 N'a dieu servir ja ne s'apreste.
 La vie q'est tant deshonneste
 Du cristien om doit despire.

Tendresce est ly malade sein,
 Q'au tout labour est fieble et vein,
 Et fort as tous ses eases prendre
 Es chambres sanz aler longtein:
 Ensi comme l'oill ensi la main
 Cherist et quart tout mol et tendre,
 Car il ne voet sa char offendre 5371
 Pour l'alme; mais il doit entendre,
 Q'en ceste vie unques vilein
 Ne poet si grief labour enprendre,
 Que plus grevous pour luy sur-
 prendre

Luy dorra dieus a son darrein.

5338 plusfort

La seconde file de Accidie, q'est
 appelée Peresce.

Peresce, q'est de ceste issue
 La soer seconde, ja ne sue,
 Ce sachiez bien, pour nul labour;
 Ainz coy sicomme l'oiseil en mue 5380
 Se tient, q'au labour ne se mue
 Pour nul proufit de nuyt ne jour.
 Quiq'est des armes conquerour,
 Ou de les champs cultefiour,
 Peresce est hors de retenue,
 Q'al un ne l'autre est soldeour:
 Maisqu'il le corps ait a sojour,
 Ja d'autre bien ne s'esvertue:

Peresce, tant comme l'ivern dure,
 Ne voet issir pour la freidure 5390
 De labourer en champ ne vine,
 N'en temps d'estée pour la chalure:
 Si tous fuissent de sa nature,
 Je croy que trop y ust famine.
 Peresce ensi come chat ferine,
 Qui volt manger piscon marine,
 Mais noun ses piés de la moisture
 Voet eneauer deinz la cretine,
 Quiert des proufis avoir seisine,
 Mais de les charges point ne cure. 5400

Peresce quant a manger vient
 Et est assis, legier devient;
 Mais puis, qant faire doit servise,
 En tant comme poet lors s'en abstient,
 Et au busoign du loign se tient,
 Comme cil q'est plain de truandise:
 Quique les autres blame ou prise,
 Maisqu'il poet avoir sa franchise,
 N'ad cure d'autre, quoy q'avient:
 Trop est tiel servant de reprise; 5410
 Car prendre voet ce que souffise,
 Mais du deserte ne fait nient.

Qui faire voet son messenger
 Du lumaçoun, ou son destrer
 De l'asne, ensi porra cil faire
 Qui le perceus voet envoyer
 Pour ses busoignes reparer.
 Car tard y vait et tard repaire:

5386 Qal lun (cp. 5591)

Quant l'en mieulx quide a bon chief traire
 La cause, lors serra l'affaire 5420
 De la busoigne au commencer.
 C'est ly sot qui ne cure guaire
 Du bien, d'onour, ne d'essamplaire,
 Dont l'en porroit bien essampler.
 Peresce, pour warder son frein,
 Toutdis d'encoste bien prochein
 Fole esperance meyne ove soy ;
 Et d'autrepart nonpas longtein
 Vait Folquider son chambirlein.
 Ce sont qui scievoit en recoy 5430
 Promettre molt et donner poy :
 Qui se purvoit de leur arroy,
 Huy sur la chance de demein
 Expent, et prent son aese en coy ;
 Mais au darrein, qant n'ad du quoy,
 Lors est il sage apres la mein.
 Om dist, qant ees son aguilon
 Avra perdu, lors a meson
 Se tient et ce que l'autre apporte
 Devoure, siq'en nul sesoun 5440
 A pourchacer sa guarisoun
 Se vole ; et ensi nous enhorte
 Peresce, que nuls doit sa porte
 Passer pour labour que l'en porte,
 Tant comme de ses voisins entour
 Poet aprompter dont se desporte :
 Mais en la fin se desconforte,
 Quant par ce falt tenir prisoun.
 Peresce, sicome dist ly sage,
 En yvern pour le froid orage 5450
 Ne voet arer, dont en estee
 Luy falt aler en beguinage ;
 Mais n'est qui pain ne compernage
 Luy donne en sa necessite ;
 Car par l'apostre est desveie
 Le pain a qui n'ad labouré ;
 Et c'est auci ne loy n'usage,
 Solonc que truis en le decré,
 Cil qui le charge n'ad porté,
 Qu'il en doit porter l'avantage. 5460
 Peresce de sa retenance
 Ad Coardie et Inconstance,

5460 endoit 5464 enporte

Souhaid et Pusillamité ;
 Ly sage en porte tesmoignance,
 Que d'inconstante variance
 Sovent avra sa volenté
 D'un point en autre rechangé ;
 Car cuer de mutabilité
 Ly pent toutdis en la balance ;
 Dont voet, non voet, par tieu degré
 Qu'il tout son temps en vanité 5471
 Lerra passer sanz bienfaisance.
 Auci Peresce pour servir
 Y vient Souhaid, qui par desire
 Covoite toute chose avoir,
 Disant sovent a bass suspir,
 ' He, dieus me doingt a mon plesir
 Argent, chastell, ville et manoir ! '
 Mais ja son pié ne voet movoir
 Pour mettre main, dont son voloir 5480
 Porra d'ascune part complir :
 Siq'en la fin doit bien savoir,
 Ainz qu'il s'en poet aparcevoir
 Poverté luy doit survenir.
 Mais Pusillamité la nyce
 Sert a Peresce d'autre vice ;
 Car celle n'ose commencer
 Sur soy d'emprendre ascun office,
 Ou de labour ou de service,
 Du quoy se porroit prouffiter ; 5490
 Ainz est tant plain de supposer
 Et des perils ymaginer,
 Que cuer luy falt, sique justice
 En pert, dont mesmes soy aider
 Ne voet, ainz laist trestout aler,
 Et l'onour et le benefice.
 Coardz les vertus assaillir,
 Ne les peccés n'ose eschuir ;
 Car c'est cil fol, comme dist ly sage,
 Qui la putaigne a son plesir f. 34
 Areste et lie et fait tenir 5501
 Pour bordeller en son putage,
 Sicomme la beste en pasturage ;
 Qu'il n'ad point tant du vasselage,
 Qu'il resister sache ou fuir,
 Ainçois se laist a son hontage

5483 senpoet 5494 Enpert

Effeminer de son corage,
 Dont fait hommesse en soy perir.
 Sicome l'enfant se tourne en voie,
 Et n'ose aler avant la voie 5510
 Pour l'oue que luy sifflera,
 Pour meinz encore se desvoie
 Ly fol coard, qant om l'envoie.
 Tieu messenger petit valra ;
 Car combien q'il fort corps avra,
 Le cuer dedeinz malade esta,
 Du quoy le pulmon et la foie
 Ove tout l'entraile tremblera :
 Tieu parlesle ne guarra
 Cil qui guarist Ector de Troie. 5520
 Om dist, ' manace n'est pas lance ' :
 Mais au coard parmy la pance
 Luy semble avoir esté feru
 D'un mot del autry malvuillance.
 Trop est du povre contenance ;
 Car quant il voit l'espeie nu,
 Tout quide avoir le ferr sentu :
 C'est un mal champion de dieu,
 Q'ensi Peresce desavance ;
 Trop est le pain en luy perdu, 5530
 Qant corps et alme est sanz vertu
 De l'un et l'autre sustenance.
 Car, si Peresce dont vous dis
 Fait l'omme tard et allentis
 Solonc le corps de ce q'appent
 Au monde, encore plus tardis
 Fait le corage et plus eschis
 De ce que l'alme proprement
 Duist faire a dieu ; car point ne rent,
 N'en dit n'en fait n'en pensement, 5540
 Les charges qui luy sont assis
 Du sainte eglise, et meement
 Prier ne poet aucunement,
 Ne juner, si ne soit envis.
 Atant vous dy je de Peresce,
 En halt estat qant est clergesce
 Chargé de cure et preclacie,
 Si lors dirra matins ou messe,
 Ce fait ensi comme par destresce ;
 Car au primer de sa clergie 5550

5564 demaintenant

Devocioun luy est faillie,
 Du quoy ne preche ne ne prie,
 Ainz laist celle alme pecceresse
 Sanz bonne garde en sa baillie
 Perir ; car tout le charge oublie
 Del ordre dont elle est professe.
 Peresce auci fait q'omme lais,
 Ja soit il sessant ains et mais,
 Ne sciet sa paternoster dire,
 A dieu prier pour ses mesfais ; 5560
 Dont qant au Moustier s'est attrais,
 Ja d'autre chose ne s'atire,
 Mais quique voet jangler et rire
 A luy de maintenant se tire,
 Q'au paine s'il ses mains jammais
 Vorra lever vers nostre sire.
 Tieu vielard fait son dieu despire
 Et est au deable trop curtais.
 En l'evangile est dieus disant,
 Que l'arbre nient fructefiant 5570
 Hom doit ardoir ; lors quoy serra
 Cil q'ove les arbres est crescant,
 Et est mortiel et resonnant,
 S'il point ne fructefiera ?
 Quant sa jovente passera
 Sanz vertu qu'il en portera,
 Et sa vielesce est survenant,
 Et qu'il baraigne ensecchera,
 Sanz reverdir l'alme ardera,
 Car d'autre bien n'est apparant. 5580
 La tierce file de Accidie, quelle
 est appelée Lachesce.
 La tierce fille apres suiant,
 D'Accidie quelle est descendant,
 Trop ad pesante contenance :
 N'est chose qui du maintenant
 Voet faire, ainçois en tariant
 Mettra tous biens en pourloignance.
 De son nonn la signefiance
 A ses fais porte tesmoignance,
 Car Lachesce hom la vait nommant,
 Q'est lache au toute bienfaisance ; 5590
 Q'al un n'a l'autre pourvoiance
 Du corps ne d'alme est entendant.

5576 enportera

5585 entariant

Endementiers *que* l'erbe es vals
 Renaist et croist, moert ly chivals:
 Ensi quant om par lacheté
 Ses fais *pourloigne* et ses journals
 Espiritals ou corporals,
 Tancome ses jours ad *pourloigné*,
 Son temps luy est mortefié;
 Sique merite en nul degré 5600
 Luy doit venir, quant nuls travals
 Ad fait, car veine volenté
 Que n'est des oeuvres achievé
 Est a les sounges perigals.

Des causes q'il tient entre mein
 Lachesce dist, 'Demein, demein,'
 Et laist passer le jour *present*.
 Quant siet decoste son *prochein*,
 Mainte excusacioun en vein,
 Du chald, du froid, du pluie et vent, 5610
 Allegge a son excusement;
 Mais toutes voies il attent,
 Sique *jammis* son *oeuvre* au plein
 Serra *parfait*; ainz lentement
 Trestout met en delaiement,
 Et le divin et le mondein.

Tout ce q'appent a dieu servise
 Lachesce en sa darreine assise
 Le met; car il ne vient *jammis*
 Les jours du feste au sainte eglise 5620
 Par temps, ainz dist q'asses suffise
 S'il vient au temps baiser la pes:
 Et d'autrepart s'abstient ades,
 Qu'il n'ert en trestout l'an confes,
 Fors q'une fois, pour nulle aprise,
 Et ce serra du Pasques pres,
 Quant *pourloigner* ne s'en poet mes:
 Vei la devoute truandise!

Tropcourt vers dieu Lachesce en dette,
 Q'au temps ne paie et se desdette 5630
 La dueté de son labour.
 Dieus la devocioun rejette
 Du prestre, qant il huy tresjette
 Ses heures tanq'en autre jour:
 Car *que* l'en doit sanz nul destour
 Loenge rendre au creatour

5640 landes

Essample avons de l'alouette,
 Que bien matin de tour en tour
 Monte, et de dieu volant entour
 Les laudes chante en sa gorgette. 5640

Lachesce fait le Pelerin
 Enlasser, siqu'il son chemin
 Ne poet *parfaire* duement,
 Dont son loer pert en la fin:
 Car qui ne sert jusq'au *parfin*,
 Comme l'evangile nous aprent,
 N'est apt ne digne aucunement
 Du ciel a son definement;
 Ainz par le jugement divin
 Doit *perdre* tout le precedent 5650
 De son labour, *que* plus n'en prent
 Que cil qui *jammis* fuisist cristin.

Lachesce est celle charuere
 Que lente et regardant arere
 Sa main fait mettre a la charue:
 La tour *commence* auçi primere,
 Mais ne la poet *parfaire* entiere,
 Dont om au fin l'escharne et hue.
 Je truis que de la gent hebrue
 La reregarde fuisist venue, 5660
 Quant par lachesce estoit derere,
 Dont Amalech les fiert et tue:
 Mais ja tieu chose n'eust venue,
 S'avant fuissent ove la banere.

Om ne doit mettre a *nunchaloir*
 Proverbe q'est du grant savoir,
 Car jadis om solt dire ensi:
 Cil qui ne voet quant ad pooir,
 N'el porra puis qant ad voloir,
 Ainz serra son *pourpos* failli. 5670
 Lachesce fait tout autreçy
 Du tout ce q'appartient a luy:
 Quant poet ne fait le soen devoir,
 Par quoy sovent est escharni:
 Car quant au fin s'est enpovri,
 Lors quiert ce *que* ne poet avoir.

Senec le dist, q'a son avis
 Trop s'aliene et est caitis
 Du foy cil qui sa repentance
 Deferre tanqu'il soit antis, 5680

5651 nenprent

Quant du jofnesse est desfloris,
 Et q'au peccher n'ad sufficance;
 Car c'est un povre bienvuillance,
 Q'a dieu lors offre la pitance
 Du viele lie q'est remis,
 Quant tous les flours *par* fole errance
 De sa jovente et sa substance
 As deables ad offert toutdis.

Ce dist ly deable au Lacheté:
 'Jofne es et ta jolieté f. 35
 Te poet encore long durer, 5691
 Et lors porras ta malvoisté
 Par loisir a ta volenté
 Tout a belle heure redrescer.'
 Ensi le met en folquider,
 Plus nyce que le prisonner
 Qui tout jour voit l'uiss desfermé,
 Dont il pourroit en saulf aler,
 Mais ne se voet desprisonner,
 Tanq'il au gibet soit mené. 5700

Mais a Lachesce avient sovent,
 Que par son fol deslaiement,
 Quant voit comment ad tous perdu,
 Les biens du siecle et ensement
 Les biens del alme, et folement
 Son temps en mal ad despendu,
 Lors deinz son cuer s'est enbatu
 Tristesce, dont tant est *commu*,
 Que sa mort *propre* tristement
 Desire, et est tant esperdu 5710
 Que ja pour *homme* ne pour dieu
 Ne s'en conforte ascunement.

De la tristesse q'est mondeine
 Ly sages son enfant enseigne
 Qu'il doit fuir la maladie,
 Q'au cuer del *homme* est tant greveine,
 Comme est la tine au drap du leine,
 Ou verm que l'arbre mortefie.
 Car la tristesse en sa folie
 Les oss ensecche, et puis la vie 5720
 Escourte et la vielesce meine,
 Avant que l'oure soit complie
 Que nature avoit establee:
 C'est maladie trop vileine.
 Tristesce est celle nyce fole

Que la resoun trestoute affole,
 Sique ly deable a son plesir
 De luy se jue et se rigole;
 Et si la prent de tiele escole
 Dont l'art est sanz recoverir. 5730
 Car du Tristesce le conspir
 Fait Obstinacioun venir,
 Que verité tient a frivole,
 Sique resoun ne voet oïr,
 Du pecché pour soy repentir;
 Car du pardoun ne tient parole.

Le vice d'Obstinacioun
 Par nulle predicacioun
 A repentance ne s'applies,
 Mais par fole hesitacioun 5740
 De sa continuacioun
 Pert grace, dont en heresie
 Argue et tient que sa folie
 Est tant alé q'en ceste vie
 N'en poet faire emendacioun:
 Dont il la dieu mercy desfie,
 Que confesser ne se voet mye,
 Ainz chiet en desparacioun.

Molt ad grant joye ly malfée
 Quant l'*omme* ad fait desesperé; 5750
 Car lors le meine *par* le frein
 Tout voegle apres sa volenté,
 Q'au droite voie en nul degré
 Rettourner sciet, siq'au darrein
 Se pent ou tue de sa mein;
 Dont est du double mort certain,
 Comme fuisist Judas ly maluré.
 Ce dist saint Job, 'Trop est en vein
 Que l'*omme* vit jusq'au demein,
 Qui s'est en desespoir rué.' 5760

Desesperance l'insolible
 C'est ly pecchés *que* deinz la bible
 Par Jeremie dieus blama,
 Et la *nomma* le vice horrible;
 Disant qu'il tant la fra passible
 Des mals *que* souffrir la ferra,
 Sique chascun *que* la verra
 Sur luy sa teste movera,
 Et tous dirront, 'Vei l'incredible,
 Q'en dieu mercy ne se fia! 5770

Dont sanz mercy puny serra
Du mort dont nuls est revertible.

**La quarte file d'Accidie, quelle
est appellée Oedivesce.**

La quarte file soer Peresce
Celle ad a noun dame Oedivesce,
Que de nul bien se voet meller,
Car par amour ne par destresse
N'ad cure qui doit chanter messe,
Ne qui les champs doit labourer,
Maisq'al hasard pourra juer,
Ou a merelle ou eschequer, 5780
Ou a la pierre jettesse :
Vei la le fin de son mestier !
Car pour prier ne pour loer
D'autre bienfait ja ne s'adresce.

Si l'omme oedif poet a les dées
Juer, tout ad ses volentés
Compli, car jamais autre joye
Ne quiert, tant comme prosperités
Du gaign luy vient ; mais plus d'asses
Du perte a son hasard s'effroie : 5790
Car quant ad perdu sa monoie,
Lors met ses draps et sa courroie,
Mais s'il tout pert, lors comme desvés
Maldit et jure vent et voie,
Son baptesme et son dieu renoie,
Et tout conjure les malfées.

Dame Oedivesce meine et guie
Ceaux qui par faignte truandie,
Quant sont a labourer puissant,
Se vont oieus au beggerie ; 5800
Car mieulx amont la soule mie
Ove l'aise q'est appartenant,
C'est du solail q'est eschauffant,
Et du sachel acostoiant,
Et du buisson perbergerie,
Que labourer pour leur vivant
Et d'estre riches et manant,
Voir si ce fuist de seignourie.

L'Oieus ja se pourvoit du nient,
Mais q'un jour vait et autre vient : 5810
Il dist, 'Dieus aide a la charette !'
Mais du labour q'a ce partient
Ja de sa main ne la sustient ;

Ainz plus oedif que l'oisellette,
De tous labours loign se desmette,
Q'au corps ne rent sa due dette
N'a l'alme fait ce que covient ;
Car pour loer que dieus promet
Ne moet son pié de la voiette,
U qu'il son fol penser enprient. 5820

Ly grisilons en temps d'estée
Chante et tressalt aval le pré
Joliement en celle herbage ;
Mais ja n'aguarde en sa pensée,
Quant ce bell temps serra passé,
U lors vitaille et herbergage
Avoir pourra, ainz comme volage
Oedif s'en vait en rigolage,
Et se pourvoit en nul degré :
Dont puis, quant vient le froid orage, 5830
Lors sanz hostell et compernage
Languir l'estoet en povreté.

Mal s'esjoÿt et chante en vein
Ly grisilons, quant au darrein
Son chant luy doit tourner en plour :
Ensi malfait l'oieus humein,
Q'au siecle ne voet mettre mein,
Ne cuer d'amer son creatour.
Ly sages dist que cest errour
Est vanité, quant pourchaçour 5840
Son pourchas laist au tieu vilein :
Quant il s'estrange au tout labour,
Resoun le voet que tout honour
Et tout prouffit luy soit forein.

Ly sages dist, nuls poet comprendre
Les griefs mals q'Oedivesce emprendre
Fait a la gent du fole enprise :
Car quant la char q'est frele et tendre
N'au dieu n'au siecle voet entendre,
A labourer d'aucune assise, 5850
Lors sanz arest deinz sa pourprise
Des vices ert vencie et prise,
Comme cil qui n'ad dont soi defendre.
Seint Jeremie en tiele guise
Dist q'Oedivesce ove sa mesprise
Sodome causa de mesprendre.

Dame Oedivesce est celle fole
Que plustost son aqueinte affole,

Soit homme ou femme, du peccé :
Car quant l'en meine vie mole, 5860
Et sanz labour le corps rigole,
Et l'alme auci n'est occupié
De ce q'affiert a son degré,
Lors est la maison ramouné ;
Par quoy sicomme deinz une escole
A demourer s'est herbergé
Ove ses disciples ly malfée,
Car l'evangile ensi parole.
Dame Oedivesce laist overt
Le pot, dont entre a descover 5870
La mousche q'est abhominable :
C'est celle auci qui tout s'ahert
As vanités, et deinz soy pert
Les biens de l'alme resonnable.
Dame Oedivesce la muable
Fait en peccé vertu changable ;
Car seint Bernard le nous fait cert,
Que du penser foldelitable
Au cuer le hault chemin menable 5879

D'emblem ou estre ensi tardis f. 37
En leur office, q'anientis 6071
En sont ly bien par Negligence.

Ly Necligens de s'aqueintance
Retient le vice d'Ignorance,
Qui bien ne sciet ne bien aprent.
Ly sage en porte tesmoignance,
Que ly malvois n'ad conoiscance
Du sapience aucunement,
Ainçois tout lass s'en vait sovent
La male voie, et ja ne prent 6080
La dieu voie en reconoiscance ;
Dont dist l'apostre tielement,
Celluy qui d'ignorance offend
Dieus met en sa desconoiscance.

El viele loy je truis lisant,
Ly Necligens q'iert ignorant
A garder le precept divin,
Dieus commanda du maintenant

Q'om l'osteroit, siq'en avant
Ne fuist du poeple dieu voisin 6090
Mais si le mal fuist pichelin,
Lors convenoit a faire fin
Du tiel offrende a dieu rendant,
Dont poet son necligent engin
Vers dieu redrescer en la fin,
Et amender le remenant.

Ly Necligens en sa mesoun
Encore un autre compaignoun
Retient ove soy, dont valt le pis ;
C'est ly tresfol Oublivioun, 6100
Que ja n'orra si bon sermoun,
Dont souvenir luy vient ou pis.
Seint Jake un tiel a son avis
Resemble a l'omme qui son vis
Deinz le mirour voit environ,
Mais quant s'en tourne ly caitis,
De son visage ad tout oublis
Qanqu'il veoit de la façon.

C'est ly peccés par quoy ly sages
Defent le vin as beverages 6110
Des juges, qu'ils n'oubliont mye
La cause as povres voisinages :
Car oubliance en nuls estages
Ne soy ne autres justefie.
Oseé dist en prophecie
Au poeple dieu et leur chastie
Disant, pour ce q'en leur corages
Chascun la loy son dieu oublie,
Dieus en oubli de sa partie
Lerra leur filz sanz heritages. 6120

C'est ly peccés universals,
Q'es choses que sont temporals
Non soulement est anenis,
Ainz plus grieve en espiritals :
Car s'il ait fait Cent Mil mortals,
Au paine luy sovient de diss,
Au confesser quant serra mis.
Comment serront ses mals guaris,
Quant confesser ne sciet ses mals ?
Pour ce q'icy ne sont punys, 6130

After L. 5879 one leaf of the MS. is lost, which contained 190 lines and the title introducing the description of 'Negligence,' the fifth daughter of Accidie. 6076 enporte 6079 servait.

Si dieu n'en fait a luy mercis,
Ne poet guarir des infernals.

La descripcion en especial d'Accidie.

O fole Accidie au deable amye,
Que l'amour dieu tu ne pus mie
Avoir, car nul amour desers,
Ainz es morte en humaine vie;
Dont sicomme songe et fantasie
S'en passent, tu le temps y pers.
Tu es des tous les vices sers,
Car seulement au char tu sers, 6140
Sans faire a l'alme compaignie,
Forsq'a tes sens, u tu t'adhers
Comme beste, mais tout au travers
Resoun en toy se mortefie.

He, vice, tu es hosteller,
Qui fais ta maison ramoner,
Que n'y remaint aucun vertu;
Dont ly malfées pour herberger
Y vient, et fait ove soy mener
Sept autres, et la s'est tenu, 6150

He, vice, come tu es perdu,
Q'au primer point malvois es tu,
Et au my lieu fais empirer,
Mais quant tu es au fin venu,
Lors es si tresmalvois, que dieu
Ove les plus mals te fait ruer.

He, vice, au droit pour toy descrire,
Tu es semblable au litargire,
Q'en dormant l'omme fait morir:
Ton cuer deinz soy nul bien desire, 6160

Ta main a nul bon oeuvre tire,
Ton oill le bien ne poet voir,
T'oraille auci n'el poet oïr,
Neis que ta bouche lais ovrir
Pour bien contier ne pour bien dire,
Des piés aler ne revenir
Te fais pour bien, si que merir
N'as membre qui te poet souffire.

He, fole Accidie, quoy diras,
Quant devant dieu acompteras 6170
Que tu n'as fait aucun prouffit
En ceste vie, u tu menas
Les eases, mais riens y pensas

6187 pluschiere

De l'alme? Pour ce ton delit
Se changera d'un autre plit;
Car corps avesques l'esperit
Dedeinz la chambre au Sathanas
Serront couchiez, u que ly lit
Sont plain de feu q'est infinit:
Vei la le fin de ton solas! 6180

**Ore dirra de Avarice et de ses
cink files, dont la primere est
Covoitise.**

Cynk files naiscont d'Avarice,
Des quelles par son droit office
Est Covoitise la primere:
C'est celle qui pour benefice
Du siecle laist le dieu service;
Car la richesse seculere
Luy est des autres la plus chiere,
Et pour gagner par tieu maniere
Retient ove soy tout autre vice;
Qui s'assemblont soutz sa baniere 6190
Pour verité mettre a derere
Et desconfire la justice.

C'est celle qui pour ses compains,
Ne ses sorours ne ses germains,
Ne voet laisser son avantage,
Ainçois s'avance as tous bargains.
U que pourra tenir ses gains,
N'ad cure quiq'en ait damage;
Car qui ses terres en morgage,
Ou qui voet mettre riche guage, 6200
Lors Covoitise y tent ses mains
Et les oblige a son païage;
Dont molt sovent sanz heritage
Laist en poverté ses prochains.

Iceste file, comme je pense,
Nasquist primer sanz conscience;
Dont quant aucune cause enprent,
Au commencer l'enqueste ensense
A jurer sur false evidence,
Q'est colouré du blanc argent; 6210
Et du fin orr au juge aprent,
Au fin qu'il puis en jugement
Pourra son tort en audience

6191 aderere

Justefier devant la gent:
Et ensi veint secretement
Le droit, que nuls le contretence.

Car quant Richesse vient pledant,
Poverté vait sanz defendant:
Richesse donne et l'autre prie,
Richesse attrait en son guarant 6220
Le juge, questour et sergant,
Par queux sa cause justefie;
Car Covoitise qui s'aplie
A la Richesse, ne voit mye
Le droit du povre mendiant.
Que jugges ne serroit partie
La loy defent, mais l'orr deffie
Le droit et met le tort avant.

Ly covoitous, quant s'aparçoit
Que presde luy jofne homme soit, 6230
Q'est riche des possessions
Et innocent, lors en destroit
Son cuer remaint comment porroit
Ses retz pourtendre a tieux buissons.
Sovent l'attret des beals sermons,
Sovent d'aprest, sovent des downs,
Dont l'innocent se fie et croit
En les fallas de ses resouns;
Mais l'autre en ses conclusionns 6240
Au fin l'attrappe et le deçoit.

Mais quant avient que son voisin
Tient presde luy rente ou molyn,
Que vendre en bon gré ne voldra,
Cil covoitous du fals engin
Met tiel obstacle en son chemin,
Dont en danger le ruera:
Car fausement l'enditera,
Ou d'autre part luy grevera,
Du quoy ly povres en la fin,
Ou de son corps hony serra, 6250
Par fine force ou il lerra
Sa terre a ce tirant mastin.

Sicomme le Luce en l'eaue gloute
Du piscon la menuse toute,
Qu'il presde luy verra noer,
Ensi ly riches ne laist goute
Des povres gens q'il pile et boutte:

6262 lesperner (for lesperuer)

Mais c'est le pis de son mestier,
Comme plus se prent a devorer, f. 38
Tant meinz se pourra saouler: 6260
Ce met le voisinage en doubte
Sicomme perdis de l'esperver,
Q'a luy soul n'osent resister,
Combien qu'ils soient une route.

Mais je ne dy pas nequedent
Que Covoitise soulement
Es cuers des riches gens habite;
Ainçois les cuers du povre gent
Assault et point asses sovent;
Et combien qu'il ne leur profite, 6270
Voir s'il n'en gagnont une myte,
Le vice encore les endite,
Dont sont coupable en pensement
L'evesque ensi comme l'eremite:
Solone que chascune appetite,
Dieus met leur cause en jugement.

Ly povre covoitous n'aresté
Ne son corps mesmes ne sa beste
Solone les sains commandemens,
Qu'il ne labourt au jour du feste, 6280
Si ce ne soit pour la tempeste
Que survient de l'orrible temps;
Mais lors s'atourne d'autre sens
De faire ses bargaignemens,
A la taverne, u deshoneste
Sa vie meine en janglemens.
Vei la les nobles sacremens,
Dont envrs dieu fait sa requeste!

Du covoitise trop s'avile
Cil q'au marché du bonne vile 6290
Envoit a vendre son frument,
Et par decepte puis s'affile,
Et vient y mesmes de sa guile
Pour l'achater tout proprement;
Et plus en donne de l'argent
Que la commune de la gent
Vendent, et ensi se soubtile,
Qu'il la chierté monter sovent
Fait du marché; si perdont cent 6300
Par ce q'il soul le gaign enpile.

6295 endonne

Q'ad sa mesure trop estreite,
 Soit pynte ou lot, dont il le vin
 Vent en taverne par deceite :
 Car de mesure contrefeite
 Sovent se pleignent ly voisin,
 Et sur trestous ly pelerin
 S'en pleint, qui lass en son chemin
 S'en vait et d'argent ad souffreite.
 Mais dieus, qui voit le mal engin, 6310
 Rent larges paines au parfin
 A luy qui tant estroito covoite.
 Ly covoitous en son ayue
 Ad cynk servans de retenue,
 Des queux Challenge est ly primer ;
 Soubtilité la desconue,
 Que sa faulsine ne desnue
 Est la seconde, et Perjurer,
 Prest ly tierce, et puis Tricher
 Ly quartz, et lors de son mestier 6320
 Ingratitude s'esvertue
 Du Covoitise acompaigner :
 Qui tieus compaigns doit encontre
 Se poet doubter de leur venue.
 Pour fals challenge sustenir
 Ly fals plaintif y doit venir,
 Qui fals tesmoign ove luy merra ;
 Si falt aici pour retenir
 Fals advocat pour plee tenir,
 Et fals notaire aici vendra, 6330
 Qui competent salaire avra ;
 Fals assissour y coviendra ;
 Mais pour la cause au point finir
 Challenge de son orr dorra
 Au juge, et lors tout seur serra
 Que tout ert fait a son plesir.
 Challenge aici d'un autre endroit,
 Ou soit a tort ou soit a droit,
 Au povre gent de leur bargaign
 Retient leur sold que paier doit ; 6340
 Combien qu'il nul defaute voit,
 Encore pour le petit gaign
 Ascune part retient ou main.
 Mais d'une chose soit certain,
 Comme Malechie le disoit,

6308 Senpleint

Q'ensi chalenge son prochain
 Dieu le chalenge a son derrain
 Du male mort, qu'il luy envoit.
 Au Fals chalenge un autre vice
 Est adjousté de son office, 6350
 Q'om nomme Fals occasion ;
 C'est ly droit cousins d'Avarice,
 Car pour guaigner le benefice
 Legierement troeve enchesoun
 Sovent sanz cause et sanz reson
 A deguerpir son compaignon ;
 ' Chascuns pour soy,' ce dist, ' chevisse' ;
 Pour mesmes recevoir le don,
 A l'autre en fra destourbeison :
 Fols est qui tiel amy cherice. 6360
 Au Babiloine et a Chaldée,
 Q'au tort le poeple ont chalengé,
 Par Jeremie dieus manda,
 Puisqu'ils sur gent de povreté
 Ont leur chalenge compassé,
 D'espeie il leur chalengera ;
 Dont ly plus fortz se tremblera,
 Et ly plus sage ensotera,
 Et le tresor q'ont amassé
 Trestout l'espeie devora ; 6370
 Et ensi rechallengera
 Le povre droit q'ont devoré.
 Soubtilité, qui vient apres,
 Se tient du Covoitise pres
 Comme s'amy et sa chamberere,
 Par qui conseil l'autry desces
 Compasse, dont son propre ences
 Pourra tenir, car a son piere
 Ferroit tresget en sa maniere :
 Car elle ad Guile a sa baniere, 6380
 Qui de sa cause tout le fes
 Enporte, si que par sa chiere
 Quant est devant ne quant derere
 Nuls s'aparçoit de luy jammes.
 Soubtilité dieus n'ayme mye,
 Ainz la maldist par Isate ;
 Car la soubtile Covoitise
 Ad toutdis en sa compaignie
 Et Conjecture et Guilerie,

6367 plusfortz

6368 plussage

Et si retient aici Queintise : 6390
 Car l'evangile nous devise,
 Que de la seculere aprise
 Om truiet plus quointes de boïdie
 Et plus soubtils d'une autre guise,
 Que ne sont cil q'ont tout assisse
 L'alme en divine queinterie.
 L'areine au mer, ce dist Ambrose,
 Quant voit que l'oistre se desclose,
 Mette une pierre en la fendure,
 Dont n'ad poair qu'il se reclose : 6400
 Mais quant l'escale n'y est close,
 Le piscon prent a l'ouverture
 Et le devore en sa nature.
 Ensi du False conjecture
 Ly Covoitous son gaign dispose
 Sur l'innocente creature,
 Et le devoure a sa mesure,
 Q'au paine y laist ascune chose.
 Perjurie, q'ad a soy perdu,
 Entre les autres s'est tenu 6410
 Au Covoitise pour servir :
 C'est cil qui n'ad cremour de dieu ;
 Maisqu'il del orr soit retenu,
 La conscience en fait fuir ;
 Car voir en fals sovent vertir,
 Et fals en voir fait revertir.
 C'est cil qui pour amy et dru
 Falsine fait ove soy tenir ;
 Que loialté ne poet venir,
 Si l'autre soit avant venu. 6420
 Grant peccché fait qui se perjure,
 Et ensi fait qui le procure ;
 Car peïour est le perjurer
 Que l'omicide en sa nature :
 Car l'en verra par cas tiele hure
 Q'un homme l'autre poet tuer,
 Mais l'en ne porroit deviser
 Perjurie de justefier
 Par reson ne par aventure :
 Dont trop se poet espoenter 6430
 Cil fals jurour qui pour loer
 Met si grant fait a nonchalure.
 Mais quoy dirrons du fals jurour,

6394 plussoubtils

6414 enfait

6464 enquide

Qui le saint corps son salveour
 Fait desmembrer du pié en teste
 Par grans sermens, dont chascun jour
 Il s'acustumme sanz paour ?
 Je dy, l'irresonnable beste
 Valt plus de luy, soit cil ou ceste ;
 Car qui q'ensi son dieu tempeste, 6440
 C'est du filz dieu ly tourmentour,
 Qui le flaielle et le moleste.
 He, quelle cause deshoneste
 Du creature au creatour !
 Qui par l'eglise jure et ment,
 Trestout perjure proprement
 Qanq'en eglise est contenu ;
 Et qui le ciel et firmament
 Perjure, lors trestout comprend
 Les angles et le throne dieu : 6450
 Dont Ysale en son hebreu, f. 39
 ' Way,' dist, ' au fals jurour mestru
 Q'ensi mesfait son serement.'
 C'est un des vices plus cremu,
 Q'expressement est defendu
 Par le divin commandement.
 Mais ly perjurs doit bien savoir,
 Que par nulle art q'il sciet avoir
 De sa parole ymaginée,
 Dont par fallace a son espoir 6460
 Quide a jurer et decevoir,
 Ert du peccché plus escusée ;
 Ainçois luy double le peccché,
 Quant dieus en quide avoir guilé,
 Qui tout survoit le fals et voir ;
 Car c'est escript en le decré,
 Solonc q'om charge le jurée
 Il doit son charge recevoir.
 Quiconque met sa main au livre
 A fals jurer pour marc ou livre, 6470
 En ce qu'il tent sa main avant
 A perjurer, tout se delivre
 De dieu, a qui sa foy suslivre,
 Comme cil qui jammes enavant
 A luy quiert estre appartenant,
 Et son hommage maintenant
 Pour tout le temps qu'il ad a vivre

Au deable fait en son jurant,
Qui s'esjoÿt du covenant
Et en enfer le fait escrire. 6480

N'est pas resoum que l'en oublie
L'avisioin de Zacharie,
Q'en halt le ciel voler veoit
Un grant volum, dont il lors prie
Al angre quoy ce signefie;
Qui dist que ce de dieu estoit
La maleïçon, que descendoit
A les maisons de ceaux toutdroit
Qui sont perjurs en ceste vie,
Et pardedeinz escript avoit 6490
Le juggement que leur portoit
Sentence d'escumengerie.

Perjurie ad un soen compaignoun,
Qui naist du deable et ad a noun
Mençonge, qui jammais parla
Parole, si tresfalse noun;
Dont vait a sa perdicioun,
Sicomme David prophetiza.
Par Malachie aussi cela
Dieux dist qu'il tieux accusera, 6500
Et leur malvois condicioun
A tesmoigner se hastera:
Ne say comment s'excusera
Q'attent tiele accusacioun.

Ly quartz q'au Covoitise encline,
C'est Tricherie q'est terrine,
A qui Decepte est attendant
Ove Falseté, q'est sa cousine.
Par leur consail, par leur covine
Ly covoitous vait compassant 6510
Comme soit les terres conquestant;
Et d'autre part ly fals marchand
Par leur avis son gaign divine;
L'un font de l'orr riche et manant,
Et l'autre de leur conspirant
Des terres mettont en seisine.

Cil Tricherous au repaïage
De l'autry bien prent le tollage
Par fals acompte ou autrement;
Et quant ad fait l'autri damage, 6520
Guaigné le tient en son corage,

Come s'il l'ust trové franchement.
Mais cil qui triche l'autre gent
Doit bien savoir, au finement
Que ce n'ert pas son avantage;
Car il se triche proprement
De tout le bien q'a l'alme appent,
Et ce tesmoigne bien ly sage.

El viele loy lors fuist ensi,
Que cil q'ot triché vers l'autri 6530
Du quelque chose, il la rendroit
Entiere arere envers celluy
Qu'il ot triché, ovesque auci
La quinte plus que ce n'estoit,
Et puis offrende a dieu dorroit,
Du quoy son pecché rechatoit,
Sicomme la loy l'ot establi.

Mais ly Tricher q'est orendroit
Sur l'alme laist a faire droit,
Dont cent mil fois plus ert puny. 6540

Encore Triche de son lyn
Ad sa cousine et son cousin
Tout presde luy pour consailler;
Ce sont et Fraude et Malengin.
Bien fuist, s'ils fuissent en l'engin
Pour loign jetter en halte mer;
Car ce sont qui jammais plener
Leur covenant font garder
N'envers dieu n'envers leur voisin:
Ce sont cils qui de leur mestier 6550
Font nele ove le frument semer,
Dont decevont maint homme au fin.

Ce sont q'ont double la balance
Et la mesure en decevance,
L'un meinz et l'autre trop comprent;
Du meindre vendont au creance,
Du greindre par multipliance
Achatont de la povre gent:
Plus ont deservy jugement
Que lieres que l'en treine et pent. 6560
La bible en porte tesmoignance,
Dieus en la viele loy defent
Mesure et pois que doublement
Se fait a la commun nuisance.

Entre les autres pour servir

6561 enporte

Au Tricherie vient Conspir,
La torte cause q'ymagine;
Et pour ce qu'il n'en doit faillir,
Confederacioun venir 6570
Y fait, par qui le droit engine;
Mais Champartie en leur covine
Se haste, et nuyt et jour ne fine,
De la busoigne au point finir.
Ce sont ly troy par qui falsine
Dame Equité vait en ruine,
Et tort se fait en halt tenir.

U Tricherie vait, du pres
Vient Circumvencioin apres,
Ove son compaign q'ad noun Brocage:
Ce sont qui portent le grief fes 6580
Du Covoitise et tous les fetz
Parfont; car l'un en son corage
Primer coviette l'avantage,
Et l'autre en fait le procurage
Solonc qu'il voit venir l'encress;
Q'au paine ascuns serra si sage,
Qui n'ert deceu par leur menage,
S'ils par deux fois l'eïont confess.

La voegle Ingratitude vient
Après les autres, et se tient 6590
Ove Covoitise main au main:
C'est ly pecchés q'au cuer enprient
Oblivioun, dont riens sovient
D'onour, du bien, que son prochain
L'ad fait devant, ainz comme vilain
De chescun prent, mais en certain
A nul redonne et tout retient:
C'est cil q'est toutdis fieble et vain
A l'autry prou, mais fort et sain
Au propre bien prest se contient. 6600

La foy, sicomme ly sages dist,
D'Ingratitude s'esvanist
Ensi comme glace se relente;
Car deinz brief temps trestout oublist
Le bien q'ainçois ascuns luy fist,
Q'au guerdonner ne se talente.
Fols est q'au tiel amy presente
Argent ou orr ou terre ou rente;
Car quant plus donner ne suffist,

Lors le deguerpe et destalente, 6610
Et au busoign plus que jumente
Irresonnable l'escondist.

A l'omme ingrat, tu dois savoir,
Que trop perest ce nounsavoir,
Si tu tes biens trestous dorroies;
Car prest serra de recevoir,
Mais redonner de son avoir
Ja n'ert ce temps que tu le voies:
Et d'autre part, si toutes voies
Al homme ingrat servy avoies 6620
Mill auns a ton loyal pooir,
En un soul jour tout le perdroyes;
Et quant meulx fait avoir quidoies,
Il te ferroit pis decevoir.

Ingratitude des seignours
Du povre gent prent les labours,
Mais point n'aguarde leur merite
A guerdonner; car povre as courtz
Ne poet que faire ses clamours,
Mais ja pour tant denier ne myte 6630
N'en porte: auci la gent petite
Ingratitude leur excite
Au sire qui les fait honours,
Que sa bonté serra desdite;
Et moult sovent qui plus profite
As tieus, meinz ad de leur amours.

Ingratitude est toutdis une
Q'au Covoitise se commune;
C'est cil q'au soir les biens du jour
Oublist et tout son propre adune, 6640
Car nulle chose en fait commune:
C'est cil qui porte sanz amour
Le cuer, car vers son creatour, f. 40
Qui l'ad donné sen et vigour,
N'en rent mercys ne grace aucune:
C'est cil a qui si tout honour
Ussetz donné, au chief de tour
Ne t'en redorroit une prune.

En l'omme ingrat ja ne te fie;
Car s'il t'avoit sa foy plevie, 6650
Et dieu juret et tous les seintz
Q'il jammais jour de sa partie
Ne te faldroit, ainz sanz partie

6581 enfait

Te volt amer malade et seins,
 Pour ce ne serres plus certains ;
 Car s'il te voit depuis constreins
 Du poverté ou du maladie,
 Ja plus ne luy serres procheins :
 L'en poet bien dire as tieus vileins,
 Poverte parte compaignie. 6660
 D'Ingratitude escript je truis
 La cause dont serra perdus ;
 Car l'omme ingrat est sanz pité,
 En tant que s'il trovast al huiss
 Son pierre et miere ensi confus,
 Q'au pain begant fuissent alé,
 Et par meschief desherbergé,
 Ja pour ce d'ospitalité
 Ne serroient par luy rescuz,
 Ainçois serroient refusé. 6670
 Fils q'ensi laist son parentée,
 C'est peccché qu'il doit vivre plus.
 L'ingrat q'ensi se desnature
 Est pis que chiens en sa nature :
 Car chien son seignour vif et mort
 Aime et defent a sa mesure,
 Mais l'omme ingrat a toi nulle hure
 Amour ne loialté ne port ;
 Pour ton baiser il te remort,
 Fay droit a luy, il te fra tort, 6680
 Pour t'onour il te deshonore :
 C'est cil qui mal pour bien report,
 Dont dieus pour son tresmalvois port
 Le hiet, et toute creature.
 Pour ce que l'omme ingrat est tiel,
 Il est nommé desnaturel,
 Dont quanque dieu fist et crea,
 En terre, en l'air, en mer, en ciel,
 Le dampnont, car pis q'amer fiel
 Le trouve qui le goustera : 6690
 Pour ce dieus le despiserá,
 Nature aici l'abhomera,
 Et l'angre q'est spirituel
 Ove toute beste le harra,
 Fors soul ly deable, a qui plerra,
 Car deable en soy sont autretiel.
 Quant hors del arche el temps
 picça

Noè le corbyn envoia
 Sur tous les autres en message,
 Desnaturel trop s'esprova, 6700
 Q'a luy depuis ne retourna
 Pour reconter de son rivage ;
 Dont la domesté et la salvage
 De toute beste en celle nage
 Le corbin de ce fait dampna :
 Mais plus me semble en son corage
 Que l'omme ingrat se desparage,
 Que l'oiseil q'ensi s'en vola.
 A ce corbin pres toute gent
 Sont semblable au jour present ; 6710
 Car chascun prent de son voisin
 Quanq'il poet prendre aucunement
 Du bien, d'onour, d'avancement ;
 Mais puis s'om le demande au fin
 Guerdoun, lors sicomme le corbin
 S'esloigne, et de son malengin
 S'escuse du guerdonnement ;
 Et ensi le pomme enterin
 Prent cil qui puis le soul pepin
 A redonner se fait dolent. 6720
 Je croy, quant Antecrist vendra,
 Plus des disciples ne merra,
 Q'Ingratitude atant ou plus
 Ove soy ne meyne ; et de cela
 Verrai tesmoign me portera
 L'experience en trestous lieux.
 L'amour commun ore est perdus,
 Si est l'amour novel conqúz,
 Du Covoitise qui naistra :
 Ne say queu part hucher les huiss, 6730
 Ingratitude u je ne truis
 Tout prest qui me respondera.
 Dame Covoitise en sa meson
 Est la norrice du treson,
 Que de sa mamelle allaiter
 Le fait, et puis met enviour
 Des vices une legioun,
 Que le devant acompaigner :
 Peril y vient son escuier,
 Qui toutdis fait ove soy mener 6740
 Soudeigne chance et Mal renom :
 U tieux serront a consailer

Le prince, trop se poet doubter
 La gent de celle region.
 La Covoitise n'ert soulaine,
 Q'as tantes vices s'accompaigne,
 Que luy servont comme soldier ;
 Par leur emprise ensi bargaine,
 Qe l'alme pert qant le corps gaine :
 Pour ce dist dieus, que plus legier 6750
 L'oill de l'aguile outrepasser
 Poet ly chameals, q'en ciel entrer
 La Covoitise q'est mondaine.
 Que valt pour ce de covoitier
 Le halt honour q'est seculer,
 Dont puis en bass enfern l'en baigne ?
 Du Covoitise ensi diffine
 L'apostre, et dist q'elle est racine
 De trestous mals plus nyce et veine.
 Senec aici de sa doctrine 6760
 Du pestilence et du morine
 Dist la plus fiere et plus grievaine
 Cest Covoitise, qui se peine
 En labour, en dolour, en peine,
 Fin quiert de ce que ja ne fine ;
 Car jammais jour de la semeine
 Ne dist asses de son demeine,
 Ainz comme plus ad, plus enfamine.
 Ly sages dist que saouler
 Ne se pourront en covoitier 6770
 Les oils, mais tout cela q'ils voient
 Voldront avoir par souhaider ;
 Dont molt sovent maint fol penser
 Au cuer du covoitous envoient.
 Achab et Jesabel quidoient,
 Quant ils la vyne covoitioient,
 Par ce leur pourpos achiever
 Que l'innocent Naboth tuoient ;
 Mais as tous autres essemploient
 Comme tiel pourchas fait a doubter. 6780
 Auci Joram filz Josapha
 Des mals essamples essampla,
 Quant il du fole Covoitise
 Ses propres freres sept tua
 Pour les Cités queux leur donna

Leur pierre, dont la manantise
 Voloit avoir ; mais sa juise
 Par lettre Helie le devise,
 Disant q'a male mort morra.
 Si morust puis du tiele assise, 6790
 Que sa boèle en orde guise
 Parmy le ventre se cola.
 La noctua de nuyt obscure
 Voit clierement de sa nature
 Quiconque chose que ce soit,
 Mais au clier jour sa regardure
 N'est pas si cliere ne si pure :
 Dont saint Ambrose ressembloit
 Le Covoitous au tiel endroit ;
 Car clierement du siecle voit 6800
 Les temporals en chascune hure,
 Mais dieu, q'est la lumere au droit,
 Dont l'alme d'omme enrichir doit,
 L'oill faut a regarder dessure.
 Crisostomus ce vait disant,
 Qe l'oill qui sont deinz soy pesant
 Voient le meulx en tenebrouer.
 Senec aici s'en vait parlant,
 Si dist que l'oill acustumant
 A les tenebres, du clier jour 6810
 Mirer ne pourront la luour,
 Tieux sont ly oill du Covoitour,
 Q'es biens obscurs vont regardant
 De la richesse et vain honour,
 Mais poy sont qui du fin amour
 Les biens verrais sont covoitant.
 Par tieus enseignes dois savoir
 Que Covoitise soul d'avoir
 Tous mals apporte en son office ;
 Car sens perverte en nounsavoir, 6820
 Et verité verte en nonnvour,
 Et d'equité fait injustice,
 Si rent malgré pour benefice,
 Et la bonté tourne en malice
 Et bienveillance en malvoloir ;
 Trestous vertus destourne en vice
 En luy qui covoitise entice ;
 C'est le parfit de son devoir.

La seconde file d'Avarice, la quele ad a nom Ravyne.
 La file q'est en ceste line
 Seconde est appellé Ravyne, 6830
 Que vivre fait des biens d'autry.
 Sicomme le coufle en sa famine
 Tolt les pulsins de la gelline, f. 41
 Et les transporte envers son ny,
 Si font trestout ly soen norry:
 Car n'est qui propre presde luy
 Pourra tenir, dont la saisine
 Ne voet avoir de chascuny;
 N'ad cure qui soit enmaigri,
 Mais q'elle ait crasse la peitrine. 6840
 Par le prophete truis escript,
 Qe comme leon, quant il rougit,
 Tressalt pour sa ravine faire,
 Et maintenant sa proie occit,
 Encore du plus fier habit
 Ly Raviner fait son affaire.
 Si est sa violence maire,
 Car l'un nature fait attraire,
 Et l'autre contre reson vit;
 L'un prent asses et lors retraire 6850
 S'en fait, mais l'autre par contraire
 Toutdis retient son appetit.
 Ly Tigres, qant sa proie quiert,
 Si point ne trove qu'il requiert,
 Sicomme saint Job le tesmoigna,
 Tantost de sa nature piert;
 Et ensi sovent le compiert
 Cil q'autry bien ravinera.
 Car Salomon nous dist cela,
 Tieux est qui l'autry proiera 6860
 Ne ja pour ce plus riches iert,
 Ainz au meschief plus en serra;
 Car quant sa proie luy faldra,
 Lors du vengeance dieus le fiert.
 'Way toy,' ce disoit Ysaie,
 'Qui fais ta proie en felonye;
 Car quant serres au proier lass,
 Lors serres proie au deablerie:'
 Tout autrecy dist Jeremie.
 Pour ce t'avise que tu fras, 6870

6845 plusfier 6861 plusriches 6862 enserra 6904 enest

Car quant tu vieve proieras
 Et l'orphanin destrueras,
 Combien que dieus en ceste vie
 Ne se revenge, seur serras,
 Quant tu ta vie fineras,
 Way t'en serra sanz departie.
 En Baruch truis, de tiele gent
 Dieus molt espoentablement
 Par l'angre dist, 'Esta, esta,
 Sanz retourner du vengement. 6881
 Houstes leur orr, houstes l'argent,
 Car dissipat trestout serra
 Ce q'ont d'autry proies pieça:
 N'ert membre qui sufficera,
 Tant serront fieble du tourment,
 Et leur visage ennercira
 Comme pot d'esteign, que l'en verra
 Neircir de les carbouns sovent.'
 Au Raviner de sa semblance
 Ly fresnes porte ressemblance, 6891
 Car soutz l'ombrage q'est fresine
 N'est plante n'erbe que crescance
 Avoir porra, mais desercance;
 Trop est la fresne malveisine.
 Ensi fait l'omme de ravine,
 Ne laist jardin ne champ ne vine,
 Dont il ne fait sa pourvoiance,
 Ne laist ne riche ne beguine,
 Qu'il tout ne pile a sa covine;
 Si vit de l'autry sustenance. 6901
 Ravine fait le fals sergant
 De l'autry biens fals acomptant;
 Ravine fait qui chose emblé
 Achat quant il en est sachant;
 Ravyne fait qui receyvant
 Larronn herberge acoustummé;
 Ravyne fait q'en sa contrée
 Les povres gens ad manacée,
 Dont vont truage a luy rendant;
 Ravyne fait que le soldée 6911
 Detient, quant homme ad labouré;
 Ravyne aici font ly tirant.
 Ravyne font l'executour,
 Qui sont fals et persecutour

As queux serroient amiable:
 Mais uns clerks dist que leur amour
 Resemble au chien, qui nuyt et jour
 Al huiss fait garder de l'estable
 Les chivals queux ly sire estable;
 Mais si morine les destable, 6920
 Lors est ly gardein devorour,
 Que plus ne leur est defensible,
 Ains prent q'au soy voit profitable,
 Le crass ove tout la char de leur.
 Ravyne tient de s'alliance
 Trois autres plain du malfesance,
 Dont Robberie en son mestier
 Est de sa primere aquoiance;
 Larcine aici du retienace
 Y vient pour l'autre acompaigner; 6930
 Ly tierce que j'oi nommer,
 Cest Sacrilege l'adverser,
 Qui sainte eglise desavance:
 Cil q'ad ces trois se poet vanter,
 N'est qui les poet ensi danter,
 Dont ne ferront leur pourvoiance.
 Du Robberie ove son compas
 Ly Marchant ne se loent pas,
 Car ils en sentont le damage:
 Qant quidont passer au mal pas, 6940
 De leur argent et de leur dras
 Il leur despuille en son oultrage:
 C'est cil q'aprent au voisinage
 Parler ce dolourous language,
 Que leur fait dire, 'Herrow, hélas!'
 Pour ce n'est autre qui plus sage
 Ravine tient, dont en message
 L'envoit a faire son pourchas.
 Sovent om voit les mains liez,
 Sovent les coffres debrisés, 6950
 U se gouverne Robberie:
 Pour meulx venir a ses marchées
 Des hostellers en les Cités
 Sovente fois fait son espie.
 Mal fait le droit du marchandie
 Qui tout acat et paie mye,
 Mais plus encore est malsenés
 Qui pour mes biens m'encordie et lie:

6939 ensentont 6946 plussage 6992 ensoit

Quant autrement ne m'en mercie,
 Ly deables l'en doit savoir grés. 6960
 U Robberie fait son tour,
 Dame Avarice est en destour,
 Quant l'autre commence a sercher
 Deinz son hostell par tout entour;
 Mais au darrein, quant vient au tour
 U sont ly cofre d'orr plener,
 Lors ne fait pas a demander,
 Quant Avarice voit piler
 Ses biens en un moment de jour,
 Q'avant Cent ans ad fait garder, 6970
 S'il ait dolour deinz son penser,
 Qe deables n'ot unques maieur.
 Mais au darrein n'ert pas segur
 Ly Robbeour q'enclos du mur
 Deinz la Gaiole gist en ferris;
 Et plus luy ert encore dur,
 Quant entre d'eux font leur conjur
 Ly coll et hart, dont au travers
 Pent au Gibet et pale et pers.
 Lors rent ses debtes tout apers, 6980
 Qu'il jadis tollist en oscur,
 Pour ce ly fals larrouns culvers
 Au temps present serroit convers
 Pour doubte du mal temps futur.
 C'est ly pecchés q'en Exody
 Au poeple dieus le defendi;
 C'est ly pecchés quel reprovoit
 En son psalter le Roy Davy;
 C'est aici ly pecchés sur qui
 Confusion se tient toutdroit, 6990
 Comme Salomon le nous disoit:
 Et s'aucun parcener en soit,
 De l'alme ad les vertus hay,
 Dont cil qui tous biens desrobboit
 El temps Adam, piler le doit
 Du mort soudaine sanz mercy.
 Que Robberie est digne a pendre
 Dedeinz la bible om poet aprendre:
 L'essample Achar nous est donnée,
 Dont nous devons aprise prendre, 7000
 Au Jericho quant par mesprendre
 Le mantell rouge avoit emblée

Et une reule d'orr forgée :
 Mais quant ce savoit Josué,
 Tout luy faisoit la chose rendre,
 Et puis l'occit en son peché ;
 Car dieus ensi l'ot commandé,
 Dont nulle loy le pot defendre.
 L'ostour, q'est un oisel du proie,
 Bat ses pulsins et cacche en voie 7010
 Hors de son ny, ne plus avant
 Ne leur voet paistre aucune voie,
 Si *que* leur falt au force proie
 Ravir ensi *comme* fist devant
 Leur pierre, et ce nous vait disant
 Ambroise ; et ensi son enfant
 Ly malvois pierre enhorte et proie
 Qu'il soit a ravine entendant ;
 Dont vait la povre gent pilant
 Et du vitaille et du monoie. 7020
 Larcine n'est pas tant apert
 Comme Robberie, ainz plus covert
 Fait son agait, quant ce poet estre ;
 Et nepourquant tant est culvert,
 Que quant ne truiest les huiss overt, f. 49
 Lors entre amont par la fenestre,
 Quant sciet q'absent y est ly mestre,
 Ne ly servant serront en l'estre :
 Tout ce qu'il trove au desouvert
 Prent en celée sanz noise acrestre ; 7030
 Ensi se fait vestir et pestre,
 Dont l'autre sa richesse pert.
 Larcine es folres et marchées
 S'embat enmy les assemblées
 Les riches bources pour copier
 Et les culteals a les costées ;
 N'en chalt a qui ils ont custées,
 Quant n'est qui l'en vient a culper.
 Et nepourquant grant encombrer
 Sovent eschiet de son mestier, 7040
 Dont est des maintes gens huez,
 Si q'au final pour l'amender
 Laist ses orailles enguager,
 Que puis ne serront desguagez.
 Larcine aici par autre guise,
 Quant doit servir, son fait desguise
 Au sire du qui la maisoun

Gouvernera ; car lors sa prise
 Diversement est de reprise,
 Puis qu'il ad tout a sa bandon : 7050
 Des toutes partz prent environ
 Et au garite et au dongon,
 Ne laist braiel ne laist chemise,
 Neis la value d'un tison,
 Dont il ne prent sa partison,
 Puisqu'il la main ait a ce mise.
 Office soutz la main du liere
 Sicomme chandelle en la maniere
 Du poy en poy gaste et degoute ;
 Car il sa main viscouise emblere 7060
 Ja ne la poet tenir arere,
 Ainçois par tout u q'il la boute
 Luy fault piler ou grain ou goute
 Tout en celée, *que* point ne doute
 D'acompte, si nuls le surquiere,
 Ne de ce qu'il sa foy ad route :
 Qui tieux servans tient de sa route,
 Poverte n'est pas loign derere.
 Soubtilement de son mestier
 Larcine se sciet excuser ; 7070
 Car si n'en soit atteint au fait,
 Ja nuls le savra tant culper,
 Q'ainçois se lerra perjurer
 Que regehir ce q'ad mesfait :
 Et s'om l'atteint de son forsfait,
 Lors ses cauteles contrefait,
 Que merveille est de l'esculter,
 Pour soy guarir, plus *que* ne fait
 Ly goupils qui fuiant s'en vait
 Devant les chiens pour soy garder. 7080
 Rachel se mist en jupartie
 De son honour et de sa vie,
 Quant de Laban en tiele guise
 Avoec Jacob s'estoit fuié,
 Et par Larcine avoit saisie
 Les dieus son pierre ; u la juise
 Ot deservy, mais *par* queintise
 Que femmes scievont de feintise
 Ensi covry sa felonnie,
 Q'atteinte n'en estoit ne prise ; 7090
 Du quoy la culpe fuist remise,
 Dont elle avoit mort deservie.

La statue d'Appollinis
 Au Rome estoit *par* tieu devis
 Fait deinz le temple antiquement ;
 D'un fin drap d'orr mantell du pris
 Avoit vestu, et en son vis
 Grant barbe d'orr ot ensemement,
 Le destre bras portoit extent
 L'anel ou doi moult richement ; 7100
 Mais par Larcine un Dyonis
 Tout luy despuilla plainement.
 Mais ore oietz *comme* faitement
 Il s'escusa, quant il fuist pris.
 Quant l'empereur luy demanda
 Pour quoy le mantell d'or embla,
 'Seignour,' ce dist, '*par* vostre grée
 J'en vous dirray *comment* il sta.
 L'orr en soy deux natures a ;
 Il est pesant, dont en estée 7110
 N'affiert *que* dieus l'ait affoublée,
 Froid est aici, du quoy ly diée
 El temps d'yvern refroidera :
 Pour ce le mantell l'ay houstée ;
 Car s'il l'ot guaire plus portée,
 Il le poet faire trop de mal.
 Auci, seignour, vous plest entendre
 Ce que je fis del anel prendre :
 Certainement il le m'offry,
 Car je le vi sa main estendre, 7120
 Et je n'osay le dieu offendre,
 Ainz en bon gré resceu de luy
 Le *donn* en disant grant mercy :
 La barbe d'orr je pris aici,
 Nounpas *que* je le pensay vendre,
 Mais pour ce *que* son pierre vi
 Sanz barbe, dont vouldray celuy
 Ressembler a son *propre* gendre.'
 Fuist il soubtills cil q'a l'empire
 Sceust s'excusacioun confire 7130
 De tieu response colourée ?
 Certes oill ; et pour descrire
 Le temps *present*, qui bien remire,
 Hom voit plusieurs en tiel degré
 Pilant, robbant leur voisinée,
 Et ont leur cause compassé,

7123 endisant

Qu'il semble al oill *que* doit suffire :
 Mais l'en dist, qui quiert escorchée
 Le pell du chat, dont soit furrée,
 Luy fault aucune chose dire. 7140
 Mais Sacrilege d'autre voie
 Du sainte eglise prent sa proie,
 Ou soit chalice ou vestement
 Ou les offrendes de monoie :
 Si dieus tiel *homme* ne benoie,
 N'est pas merveille, qant d'argent
 Ou d'yvor celle buiste prent
 U est repost le sacrement.
 He, fol cristin, come il forsvoie
 Q'ensi despuille *proprement* 7150
 Son dieu, et quant dieus est *present*,
 Ne quide pas *que* dieus le voie !
 Dieus des tous ceux fait sa que-
 relle,
 Du sacrilege et les appelle,
 S'ils n'en font restitucioun,
 Ly *quelque* soit, ou cil ou celle,
 Q'au tort detient, emble ou concele
 Ses dismes duez de *resoun*,
 Ou tolt les biens de sa *mesoun*,
 Soit chose sacre ou sacre *nom*. 7160
 Mais sacre chose, u que soit elle,
 Quiconque en fait mesprisioun,
 Du sacrilege il est *feloun*,
 Comme s'il tolsist de la chapelle.
 Trop est cil malfeloun deceu
 Q'ensi desrobbe maison dieu,
 Et de ses biens fait le deseres,
 Par qui tout bien sont avenu :
 Moult poy redoubte sa vertu
 Qui sa maison ne laist en pes ; 7170
 Car certes il se prent trop pres,
 Q'au mesmes dieu ne fait reles,
 Cil soldoier de Belsabu :
 Mais il verra tieu jour apres,
 Quant veuldroit bien q'au double encres
 Ust restoré ce q'ad tollu.
 Des les vengances qui lirroit
 Dedeins la bible, il trouveroit
 Que dieus moult trescruellement

7162 en fait

De sacrilege se vençoit. 718c
 Nabuzardan l'un d'aux estoit
 De qui dieus prist le vengeance ;
 Roy Baltazar tout ensement,
 Quant but de saint vessellement
 Et en ce se glorifioit,
 Lors apparust soudainement
 La main q'escript son jugement
 Devant la table u qu'il seoit.
 En Babyloine la Citée 7190
 Fuiſt la vengeance nounciée
 Que dieus a les malvois ferra
 Q'ont son saint temple violé,
 Solonc q'estoit prophetizé
 Par Jeremie : et ce serra
 En bass enfern ; car par cella
 Q'om Babyloine nommera,
 La Cit d'enfern est figurée ;
 U Sacrilege demorra
 Ove l'angre qui se desacra,
 Sique jammais n'ert resacré. 7200
 Mais d'autre voie manifeste
 Son sacrilege, qui la feste
 Des saintz ne quart q'est dediez,
 Ainçois labourt, dont il adqueste
 Prouffit et gaign du bien terrestre
 Es jours qui sont saintefiez
 A dieu et privilegiez,
 Sicomme tesmoigne ly decrez.
 La bible aici de vielle geste
 Que rien soit vendu n'achatez 7210
 Defent es festes celebrez,
 Ainz en repos soit homme et beste.
 Ore dirra de la tierce file d'Ava-
 rice, la quelle ad noun Usure.
 La tierce file ad noun Usure,
 Dont Avarice trop s'assure, f. 43
 Si maint entour la riche gent,
 Et sur les povres sans mesure
 Et sanz mercy par mesprisure
 Son gaign pourchace ; car l'argent
 Q'aprestre doit al indigent
 Sans surcrois au repaiement, 7220
 Jammais appreste, ainz a toute hure

7181 aux in rus

7224 enrit

7258 ensoient

Son gaign trete au commencement ;
 Car poy luy chault au finement,
 Maisqu'il en rit, si l'autre plure.
 Ses brocours et ses procuriers
 Retient ove luy comme soldoiers
 Cil Usurer deinz la Cité,
 Qui vont serchans les chevaliers,
 Les vavasours et l'escuiers :
 Quant ont leur terres engagé 7230
 Et vienont par necessité
 D'aprompter, lors ly maluré
 Les font mener as usurers,
 Et tantost serra compassé
 Ce q'est de novel appellé
 La chevisance des deniers.
 Comme cil qui chat achatera
 El sac, ainçois que le verra,
 Ensi vait de la chevisance :
 Car qui deniers apromptera 7240
 Fault acheter, mais ce serra
 Sanz veue, noun sanz repentance ;
 Et lors fault faire sa fiance
 Du paiement, et par semblance
 Puis doit revendre q'achata
 Au meindre pris. He, queu balance,
 Q'ensi le creançour avance
 Et le dettour destruiera !
 El viel et novel testament
 Usure mesmes dieux defent : 7250
 Lors est soubtil a mon avis
 Cil burgois, qui si faitement
 Savra par son compassement
 D'usure colourer le vis,
 Et la vestir par tieu devis,
 Sique les autres de pais
 Ne la savront aucunement
 Conoistre, ainz qu'ils en soient pris ;
 Dont leur covient au double pris
 Achater son aquoientement. 7260
 Du charité ne vient ce mye,
 Q'Usure ad toutdis son espie
 Sur ceux qui vuillont aprompter :
 Car comme plus ont mestier d'ale,
 Tant plus s'estrange en sa partie,

Pour plus attraire en son danger
 Ceux que luy vuillont aquointer :
 Mais ja se sciet nuls tant quointer,
 Q'ainçois q'il viegne au departie
 Qe de son fait se doit loer ; 7270
 Ainz qui plus quiert d'accompagner
 Plus perdra de sa compaignie.
 En les Citées ad une usage,
 Qui prent long jour de son paiaie
 Sa perte verra plus prochein :
 Comme plus le debte monte en age,
 De tant plus monte en halt estage
 Le pris de ce dont fait bargein.
 Que ceste chose est tout certain
 Scievent tresbien ly chambrelein, 7280
 Dont ly seignour ont grant damage ;
 Pour cynk acate et paie ou mein
 Pour siz, si paie au demein,
 Car c'est d'usure l'avantage.
 'Vien,' dist Usure, 'a ton plaisir,
 Si te repose en mon papir,
 Q'ert de ma propre main escrit.'
 Mais je dy, si te fais tenir
 En tieu repos, ne poes faillir
 Q'au fin serras lass et sougit. 7290
 Sicomme ly champs d'un grein petit
 Se multeplicie a grant prouffit
 Et fait ton large grange emplir,
 Ensi la somme q'est confit
 El papir croist, mais d'autre plit
 Ta bource vuide a son partir.
 Trop vait d'usure soubtilant
 Q'est mesmes d'usure apromptant,
 Quant voit q'il poet par aventure
 La somme apprestre plus avant, 7300
 Pour plus gaigner q'il pardevant
 N'en perdist au primere usure.
 Cil q'ensi doublement usure
 Et fait le vice ou le procure,
 Au deables est le droit marchant ;
 Dont en la Cité q'est obscure
 Pour gaign q'il prent a present hure
 Prendra le gaign del fieu ardent.
 Soubtilité ne Faux compas

7275 plusprochein

Ove Malengin ne faudront pas 7310
 Al usurer, qu'ils leur ale
 Ne luy ferront a son pourchas,
 Dont gaignera les six pour aas
 Des busoignous q'attrappe et lie.
 Mais par Osee en prophécie
 De la marchande tricherie
 Dieux se complaint, que par fallas
 L'en fait usure en ceste vie ;
 Mais pour le tresor de Pavie
 N'estoet a morir en ce cas. 7320
 En les Citées noun soulement,
 Ainz d'autre part forainement
 Usure maint en les contrés,
 Et vent a Noel son frument,
 Mais pour ce que sa paie attend
 Jusques a Pasques, ert doublez
 Le pris d'icell. He, queu marchiés !
 Ce q'om achat en les marchiés
 Pour quatre souldz communement,
 Usure a ses accoustummez 7330
 Pour six souldz par les chiminez
 En attendant sa paie vent.
 Les riches gens Usure endite,
 Quant a la gent povre et petite,
 Q'a labourer covient pour lour,
 Devant la main pour une myte
 Q'om leur appreste, et poy prouffite,
 Vuillont ravoit un autre jour
 Deux tant ou plus de leur labour :
 L'usure d'un tiel creançour 7340
 De la commune est trop despite,
 Et dieus ascoute a leur clamour ;
 Si q'en la terre est en haour,
 Et en le ciel aici despite.
 Ore dirra de la quarte file
 d'Avarice, la quelle ad noun
 Simonie.
 La file quarte et averouse
 Elle est clergesse covitoise,
 Quelle est appellé Simonie,
 Du faculté trop enginouse ;
 Car tant du siecle est curieuse,
 Qe tout corrumpe sa clergie. 7350

7300 plusauant

Ne lerrai mais *que* je le die,
 Cil clers a qui celle est amie
 Trop est sa vie perillouse ;
 Car qui bien sciet et ne fait mie,
 L'escole de philosophie
 Est a son fait contrariouse.
 Du Simonie ay tant oÿ,
 Om puet tout temps de l'an *parmy*
 Trouver les foires au plener
 Au Court de Rome, et qui vient y, 7360
 Maisqu'il soit fort del orr garny,
 Faillir ne puet de marchander.
 Pluralités y puet trouver,
 Et les prebendes achater,
 Et dispensacions auci,
 Pardon et indulgence entier :
 Si bien sa bource puet parler,
 Que l'eveschiés irront ove luy.
 Simon demeine grans desrois
 Entre les clers es Courtz des Rois,
 Que plus ne scievent *que* nature : 7371
 Car de Canon ne d'autres lois
 N'entendent latin ne gregois,
 Pour construer sainte escripture ;
 Mais de la temporele cure
 Scievent malice sanz mesure,
 A donner un consail malvois :
 Et nepourquant ensi *procure*
 Les *lettres* cil q'est sanz lettrure,
 Qu'il est eslit au plus hault dois. 7380
 Ore est ensi, chescuns le voit,
 La penne plus de bien envoie,
 Et plus enclinont a ses partz
 Ly *seignour* pour luy faire exploit,
 Q'au meillour clerc, qui sciet au droit
 Respondre a ses divines pars.
 Ore est auci *que* les sept mars
 Plus t'aideront *que* les sept ars,
 Car *nostre* Court ainsi pourvoit :
 Si largement ton orr depars, 7390
 Ainz ers *Evesque*, tu Renars,
 Qe l'aiguel q'est de dieu benoit.
 Jerom, Tulles, et Aristote
 Se pourront juer au pelote

7380 plusault

Dehors la porte en *nostre* Court,
 Combien *que* leur science flote,
 Quant Simon n'est en lour conflote.
 Du remenant chascuns tient court,
 Mais celle part u Simon court
 Chascuns la main tendue acourt, 7400
 Si luy crient a haulte note
 'Bien viene cil qui nous honourt !'
 Car quant la bource bien labourt,
 D'un tiel clergoun no Court assote.
 Pour ce l'escole du clergie f. 44
 En *nostre* Court n'est pas cherie,
 Q'elle est si povre et donne nient ;
 Car la duesse Simonie
 A nully porte compaignie
 Forsq'au gent riche, et la se tient. 7410
 Du *nostre* Court qui bien souvient
 Bien puet savoir u ce devient,
 Q'argent ainz *que* philosophie
 Monte en estat, q'au peine avient,
 Qant Simon ove son or survient,
 Poverte avoir la prelace.
 Ore fault au clerc roial support ;
 Ore falt servir et q'il se port
 Plain de losenge en tout office ;
 Ore falt argent ; car a no port 7420
 Q'ad nul des trois nul bien report,
 Ainz vuide irra sanz benefice.
 Mais quant la file d'Avarice
 Est en la Court mediatrice,
 C'est Simonie ove son recort,
 Du Court subverte la justice,
 Et de ses *doms* loy fait si nyce,
 Qe tout obeie a son acort.
 En l'evangile truis lisant
 Qe le vendant et l'achatat 7430
 De seculere marchandise,
 Q'el temple furont bargaignant,
 Dieus en chaça. Du maintenant
 Quoy dirrons lors, qui sainte eglise
 Acat ou vent par covoitise ?
 Je croy pour compter la reprise
 Poy gaigneront itiel marchant,
 Qant dieus a jour de grant Juise

7433 enchaca

Leur prive et houst sa franchise
 Et mette en paine plus avant. 7440
 Jehans q'escript l'apocalis
 D'un angel ad la vois ois,
 Que dist, 'Levetz et mesurez
 Le temple ove tout l'autier assis.'
 Au temps present, ce m'est avis,
 L'en fait ensi, car des tous lées
 Est sainte eglise mesurées,
 Combien vaillent les Eveschées ;
 Car solonc ce qu'ils sont de pris
 L'espiritaes dignetés 7450
 Serront poisez et bargaignez,
 C'est la coustume en noz paais.
 Ezechiel du tiele voie
 Dist, cil q'acat n'en avra joye.
 Sur ce dist Ysale auci
 Qe sicomme l'acatant forsvoie,
 Ensi ly vendant se desvoie,
 Et l'un et l'autre en sont laidi.
 Essample avons de Giesy,
 Quant il le *down* de dieu vendy 7460
 A Naaman, qui se rejoye
 Du lepre dont il fuist guari :
 Le mal sur l'autre reverti
 Pour vengeance de la monoie.
 Ensi, quant om ordre benoit
 Ou sacrement d'ascun endroit
 Acat ou vent de no creance,
 De Symonie il se forsvoit ;
 Car ce que franchement donnoit
 Dieus au primere *commençance*, 7470
 Ne doit om mettre en la balance
 Comme terriene soustienance.
 Mais Simonie atant deçoit
 Les clers, q'ils tout en oubliance
 Mettent et bible et concordance,
 Qe nuls fors q'a son gaign ne voit.
 Du viele loy fuist *commandé*,
 Qe ce q'au dieu fuist consecré
 Ne duist om vendre n'achater :
 Mais quoique parlont ly decrée, 7480
 Simon du penne q'ad dorree,
 Quoy *par* donner, quoy *par* gloser,

7440 plusaunt

7454 qatat (T)

7458 ensont

3 ensciet

7507 tenoit

Le tistre en sciet si bien gloser,
 N'est un qui le puet desgloser,
 Tanqu'il la *lettre* ait si glosée,
 Que pour Simon ly despenser
 La Court est preste a despenser
 Quanq'il desire en son pensée.
 De la quinte file d'Avarice, la
 quele ad nom Escharceté.
 La quinte file, soer germeine
 A celles q'Avarice meine, 7490
 Son nom est dit Escharceté :
 De son office elle est gardeine
 Et tout reserve a son demeine,
 Et pain et chars et vin et blée.
 Sa Miere ensi l'ad *commandé*,
 Et oultre ce luy ad baillé
 Tout son tresor, mais a grant peine
 Le quart, si *que* sa largeté
 N'a dieu n'a homme en nul degré
 N'en fait un jour de la semeine. 7500
 A ceux qui luy doivent servir
 Sovent sermone ove *grant* suspir
 Disant comment, quant et pour quoy
 Et u leur covient abstenir ;
 Si *que* largesce maintenir
 Ou en apert ou en recoy
 N'osent, ainz se tenont tout coy :
 Car tant *comme* plus il ait du quoy,
 Tant plus s'afforce d'esparnir ;
 Que certes fermement je croy, 7510
 Cil q'est privé de son secroy
 Puet de suffraite asses oïr.
 L'eschars enfrons estroit enhorté
 Celuy qui doit garder sa porte,
 Q'il povre gent n'y laist entrer,
 Ne leur message avant reporte
 Au paneter, qu'il leur apporte
 Du pain *pour* leur faym estancher :
 Ou autrement il fait lier,
 Que nul mendif y doit passer, 7520
 Un grant mastin, q'a nul desporte :
Pour ce du chien fait son portier,
 Qe s'aucuns povre vient crier,
 De sa maison nul bien ne porte.

Du leon et de loup la vie
 C'est a manger sanz compaignie,
 Comme dist Senec ; mais nepourquant
 L'enfrons eschars au mangerie
 Ne quiert avoir amy n'amy,
 Ainz tout solein s'en vait mangant ; 7530
 Et de s'escharceté menant
 Les grans tresors vait amassant,
 Nonpas pour soy, car sa partie
 N'en ose prendre a son vivant,
 Dont un estrange despendant
 Apres sa mort tout l'esparglie.
 L'enfrons eschars, voir a son pierre,
 Ad cuer plus dur que nulle pierre
 Sanz faire aucune bienfesançe ;
 Car nous lisons que la Rochiere 7540
 Au gent hebreu, qui dieus ot chiere,
 Donna del eaue sufficance
 El grant desert ; mais habondance
 Combien qu'il ait, du bienvuillance
 Vilains enfrons, si nuls le quiere,
 A nul jour dorra la pitance :
 Tieu boteler ja dieus n'avance,
 Ainz soif ardante le surquiere.
 Je lis aici deinz le psaltier
 Q'om puet du pierre mel sucher, 7550
 Et oille de la roche dure :
 C'est forte chose a controver ;
 Plus fort encore est a trouver
 Bonté, largesce ne mesure
 En l'omme eschars, car de nature
 Nul bien ferra, ainz d'aventure
 Ce vient, s'il unques proufiter
 Veuldra vers une creature ;
 Et quant le fait en aucune hure,
 Au miracle om le puet noter. 7560
 C'est cil q'au povre gent desdit
 Le pain, dont Salomon escrit
 La Cité se grondilera :
 C'est ly berbis qui sanz prouffit
 De soy as aultres son habit
 Du bonne layne portera.
 Escharcement qui semera,
 Escharcement puis siera,

7538 plusdur

Solonc ce que l'apostre dit :
 Drois est q'as povres poy dorra, 7570
 Qu'il poy pour ce resecevera
 De cel avoir q'est infinit.
 Pour ce que sanz misericorde
 Escharceté son cuer encorde,
 Q'as povres gens ne se desplie,
 Et qu'il d'almoisine ne recorde,
 Ainçois a charité descorde
 Et tout as propres oeps applie,
 Puis quant la mort luy est complie,
 Et l'alme pour mercy supplie, 7580
 A son clamour dieus ne s'acorde :
 Car cuer qui du pité ne plie,
 Dieus a l'encontre ensi replie,
 Et lie a mesme celle corde.
 Ore dirra la descripcioun de
 Avarice par especial.
 O Avarice la mondeine,
 Que ja n'es de richesce pleine,
 Tu es d'enfern ly droit pertus ;
 Car qanque enfern tient en demeine
 N'est uns qui jammais le remeine,
 Ainz ert illeoc sanz fin reclus ; 7590
 Ensi sont tout ly bien perclus
 Q'en ton tresor retiens enclus,
 Q'a ton prochein n'a ta procheine, f. 45
 Qui vont du poverté esperduz,
 N'en partes, dont au fin perduz
 Serras de l'infemale peine.
 A l'averous desresonnal
 Riens est qui soit celestial,
 Ce dist ly sage, ainz tout s'applique
 Au siecle, et d'ice mondial 7600
 Dedeinz la goule cordial
 N'iert unques plain en ceste vie.
 Cil q'ad le mal d'idropesie,
 Comme plus se prent a beverie,
 Tant plus du soif desnatural
 Ensecche ; et tiele maladie
 Ad l'averous de sa partie,
 Comme plus ad, meinz est liberal.
 Ce dist l'apostre, q'avarice
 Est des ydoles le service. 7610

7553 Plusfort

Amon, pour ce q'ensi servist,
 De la cruele dieu justice
 Deinz sa maison pour s'injustice
 Des ses gens propres uns l'ocist :
 Dont dieus par Jeremie dist,
 Pour l'avarice en quelle il gist
 Je suy irrez, et pour le vice
 Je l'ay feru, dont il languist.
 He quant dieus fiert, qui le garist ?
 N'est qui, si dieus ne l'en garisse. 7620
 Dame Avarice est dite aici
 Semblable au paine Tantali,
 Q'est deinz un flum d'enfern estant
 Jusq'au menton tout assorbi,
 Et pardessus le chief de luy
 Jusq'as narils le vait pendant
 Le fruit des pommes suef flairant ;
 Mais d'un ou d'autre n'est gustant,
 Dont soit du faym ou soif gary,
 Les queux tous jours vait endurant. 7630
 Dont m'est avis en covoitant
 Del averous il est ensi.
 Le philosopre al averous
 Ce dist, qu'il est malvois a tous
 Et a soy memes plus peiour,
 C'est cil q'est riche et souffreitous,
 Du propre et aici busoignous,
 Comme s'il du rien fuist possessour :
 Dont en parlant de tiel erreur
 Dist Marcial que jammais jour 7640
 Tant comme vivra n'a soy n'a vous
 Proufitera d'aucun bon tour ;
 Ainz est d'aqueter en dolour
 De ce dont jammais ert joious.
 L'en dist, mais c'est inproprement,
 Que l'averous ad grant argent ;
 Mais voir est que l'argent luy a :
 En servitude ensi le prent,
 Sique par resoun nulle aprent
 Pour son prou faire de cela ; 7650
 Mais comme cil qui s'enfievrera
 N'ad pas la fievre, ainz fievre l'a
 Soubgit, malade et pacient,
 Qu'il n'ad savour dont goustera,

7639 enparlant

7651 sen fievrera

Ensi cil q'averous esta
 Sert a son orr semblablement.
 Dame Avarice celle escolle
 Tient, u sempres chacun s'escolle
 Et entre y pour estudier,
 Nonpas d'apprendre a la citole, 7660
 Ainz est que chacun soul ou sole
 A soy pourra l'orr amasser.
 Trois pointz aprent, dont ly primer
 C'est ardantment a covoitier,
 Et puis du main dont bien ne vole
 Escharcement les biens user,
 Et puis estroitement garder
 L'orr q'il detient comme en gaiole.
 L'omme averous ensi se riche,
 Tant comme plus ad, plus en est chiche :
 Mais au darrein, sicomme perdis 7671
 Q'es champs a sa veisine triche,
 Se puet tenir pour fol et niche ;
 Car quant meulx quide a son avis
 De son avoir estre saisis,
 Soudainement serra suspris
 Du mort, qui les riches desriche ;
 Dont Jeremie quant je lis,
 Savoir pourray q'a son devis
 Fols est q'en tiel avoir se fiche. 7680
 Des quatre pointz Bede en parlant
 Vait avarice moult blamant :
 L'un est q'il tolt des gens la foy ;
 L'autre est q'amour fait discordant ;
 Du tierce il est descharitant ;
 Ly quarte tient tous mals en soy,
 En ce q'a dieu deinz son recoy
 Graces ne rent, s'il n'ait pour quoy
 De la peccune survenant ;
 Car autrement se tient tout coy 7690
 Sanz dieu conoistre ne sa loy :
 C'est un peccché trop deceivant.
 He, vice du mal esprit,
 Ascolte que Bernars t'ad dit,
 Que trop prest chose abusée
 Que tu q'es verm vil et petit
 Quiers estre riche et ton delit
 Avoir du siecle habandonné,

7670 enest

7681 enparlant

Quant pour toy dieus de magesté,
Par qui ly siecles fuist creé, 7700
Sa deité pour ton habit
Volt abeisser, et povreté
Souffrir, dont soietz essamplé.
He fol, pren garde a cest escrit !

**Ore dirra de les cink files de
Gloutenie, dont la primere est
appellée Ingluvies.**

Ore escultez trestous du pres,
Si vous vulliez oir apres
Du Glotonie et sa venue,
Que porte au siecle tiel encres,
Du quoy le ciel est en descres
Et pert sovent sa revenue. 7710

Cink files sont de ceste issue,
Qui sont du peché retenue,
La primere est Ingluvies :
Qui ceste file tient en mue,
S'il au plustost ne la remue,
Serra dolent a son deces.

Cil q'est a ceste file enclin,
Il ad son appetit canin ;
Car sicomme chiens gloute et de-
voure

Sibien au soir come au matin, 7720
Ne chault d'ascun precept divin
Pour agarder le temps ne l'oure,
Ainz paist son ventre, et tant l'onoure
Que du phisque ne laboure
Par l'abstinence d'un pepin :
C'est cil qui pense tant rescoure
Le corps, q'al alme ne socoure,
Ainz laist aler void et farin.

N'est coufle ne corbin ne pie,
Quant du caroigne ad fait l'espie, 7730
Qui tire tant gloutousement
Comme fait cil glous a mangerie,
Que riens n'y laist au departie
Forsque les oss tantsolement.
Ne quiert amasser son argent,
Ainçois qu'il ait primerement
Sa large pance au plein garnie,
Sicome le grange est du frument ;

A autre dieu car nullement
Forsq'a son ventre il sacrefie. 7740

Au palme qant om juer doit,
N'iert la pelote plus estroit
D'estoupe a faire un bon reboun,
Que n'iert le ventre en son endroit
Du glous, qui tout mangut et boit.
Ne luy souffist un soul capoun,
Ainçois le boef ove le moltoun,
La grosse luce et le salmoun,
A son avis tout mangeroit.
Cil qui retient de sa maisoun 7750
Tiel soldoier en garnisoun,
Il falt du loign q'il se pourvoit.

C'est cil qui du commun usage
Quiert large esquiele a son potage,
Si quiert auci large esquillier,
Car plus que beste q'est sauvage
Sa bouche extent d'overt estage,
Comme s'il volsist tout devorer
Le potage ove le potagier.

N'est riens qui le puet saouler, 7760
Ainz comme de Cilla le vorage
Les eaues par la haulte mier
Degloute, ensi cil adversier
Demeine en manger son oultrage.

Ingluvies pour dire au plein
Aucunement, ne juyn ne plein,
Est au bien faire sufficient :
Car qant est juyn, lors est si vein,
Q'unques en paradis Evein
Du pomme n'iert si fameillant, 7770
Dont lors puet faire tant ne qant
Pour faim que luy vait constreignant ;
N'apres manger n'est il pas sein,
Car lors devient il si pesant,
Q'au paine puet son ventre avant
Porter. Maldit soit tieu vilein !

C'est ly pechés dont Job disoit
Que tout covert du crasse avoit
La face, et de son ventre auci
Trestoute s'alme dependoit, 7780
Et cuer et force et quanque estoit
Se sont mys en l'umbil de luy ; f. 4^b
Dont ainz q'il ait son temps compli,

Devient corrupt et tout purri ;
Sique du ventre a qui plaisoit
Les autres membres sont hony,
Et pour le corps qu'il tant emply
L'alme en famine perir doit.

**Ore dirra de la seconde file de
Gule, la quelle ad noun Delicacie.**

De Gule la seconde file
Es noblez courtz la bouche enfile 7790
De ces seignours tantsolement,
Si est privé de leur famille ;
Q'es tous delices reconcile
Leur goust au Gule proprement
Pour vivre delicatement :
Dont elle ad noun semblablement
Delicacie la soubtile,
Car n'est si sages qui la prent,
Qu'il n'ert deceu soudainement
Et pris de la charniele guile. 7800

De ceste file ly norris
Des autres est ly plus cheris,
Qui servent Gloutenie au main ;
Primer le pain dont ert servis
Falt buleter par tieu devis,
Que tout le plus meillour du grain
Ert la substance de son pain :
Turtel, gastel et paindemain,
Et pain lumbard a son avis,
Et puis les gafres au darrain, 7810
C'est de ses mess ly primerain,
Du quoy sa bouche ert rejoiz.

Ne vuil les nouns del tout celer
Des vins q'il ad deinz son celer,
Le Gernache et la Malveisie,
Et le Clarré de l'espicer,
Dont il se puet plus enticer
A demener sa gloutenie ;
Si n'est il point sanz vin florie,
Dont chasteté soit deflorie : 7820
Mais d'autre vin n'estoit parler,
Que chascun jour luy multeplic,
Diversement dont soit complie
La gule de son fol gouter.

Si nous parlons de sa cusine,

7802 pluscheris

Celle est a Jupiter cousine,
Q'estoit jady dieus de delice,
Car n'est domestie ne ferine
Du bestial ne d'oiseline
Que n'est tout prest deinz cel office :
La sont perdus, la sont perdice, 7830
La sont lamprey, la sont crevice,
Pour mettre gule en la saisine
De gouverner tout autre vice ;
Car pour voir dire elle est norrice,
Vers quelle peché plus s'acline.

Ly delicat ne tient petit
Pour exciter son appetit ;
Diverses salses quiert avoir
Et a son rost et a son quit, 7840
Dont plus mangut a son delit.
Selonc que change son voloir,
Son parlement fait chascun soir,
Et as ses Coecs fait assavoir,
Qu'ils l'endemein soient soubgit
Tieu chose a faire a leur pavoir,
Du quoy le corps pourra valoir ;
Car poy luy chault de l'espirit.

Mais si par aventure avient
De haulte feste que survient, 7850
Sique juner luy coviendra,
Et q'il par cas ne mangut nient
Piscon ne char, ainz s'en abstient ;
Quidez vous point q'il par cela
Sa gloutenie abatera :
Certainement que noun ferra ;
Ainz au plus fort lors la maintient,
D'autres delices qu'il prendra ;
De jun la fourme guardera,
De gule et la matiere tient. 7860

Lors quiert a soy delice attraire
Du compost et d'electuaire
Et de l'espice bien confite :
De luy gaignont l'ipotecaire
Qui scievont tieux delices faire ;
Ly Coecs auci moult se proufite
De qui delice il se delite,
Du past ou du potage quite,
Au nees du bon odour que flaire,

7806 plusmeillour

7857 plusfort

Du quoy son appetit excite : 7870
 Tant plus ly Coecs p^rent du merite,
 Comme plus fait la delice maire.
 Sicomme Sathan environoit
 Les terres, ensi faire doit
 Ly Coecs, par tous pais irra
 Pour bien aprendre en son endroit,
 Ainçois q'il sache bien au droit
 Potages faire, dont pierra
 Au delicat qu'il servira :
 Du quelque terre qu'il serra, 7880
 Riens valt s'il d'autre apris ne soit.
 He, dieus, tiels sires de pieça
 Ne pense, quant il allaita
 Le povre lait qu'il desiroit.
 Des dames sont, sicomme je croy,
 Que mangont en la sale poy,
 Qant sont devant les autrez gentz,
 Mais puis, qant sont en leur recoi,
 U plus n'y ad que dui ou troi,
 Bien font de ce l'amendementz 7890
 Par delicatz festoientz
 Es chambres, qant ne sont p^resentz.
 Leur sires paient le pour quoy,
 Mais ja n'en ficheront les dentz ;
 Combien q'ils paient lez despens,
 Ne bruissieront a tiel arbroy.
 Les dames de burgoiserie
 Sovent auci par compaignie
 Font pour parler leur assemblés ;
 Si font guarnir Delicacie 7900
 Comme leur aqueinte et leur amie,
 Q'a sa maison l'enfermetés
 De leur flancs et de leur costées
 Vendront garir ; mais tant sachetz,
 Q'autre physique n'usont mye,
 Maisque soient bien festoiez,
 Et en gernache au matinez
 Font soupes de la tendre mie.
 Delicacie apres souper
 D'ascun delice a resouper 7910
 Quiert autresfois nouvellement ;
 Et puis matin pour son disner,
 Voir devant jour, sovent lever

7899 pour parler

Se fait ; ce veons au present
 En ce pais, dont sui dolent :
 Car Salomon ly sapient
 Ce dist pour nous enchastier,
 'Way a la terre u sont regent
 Itieu princier, car elle attend
 Poverte et soudain encombrer.' 7920
 Le vice auci dont nous lison
 S'est mis ore en religion,
 Et donne nouvelle observance,
 En lieu de contemplacioun
 A prendre recreacioun
 Du delitable sustenance,
 Pour bien emplir la grosse pance :
 Si laist luy moignes sa pitance
 Et prent sa saturacioun ;
 Sique la reule et la penance 7930
 Du Beneit mis en oubliance
 Ore ont ly moigne en no maisoun.
 Tiels est qui richement mangue,
 Mais poverement il se vertue,
 Car tout ly membre sont enclin,
 Main, bouche, nees, oraile et veue,
 Chascun de ceaux primer salue
 Le ventre sicomme leur divin,
 Et font l'offrende du bon vin ;
 Mais ja du boef de saint Martin 7940
 Ly tendre estomac ne s'englué.
 He, dieus, quoy pense itieu cristin ?
 Bien puet savoir comment au fin
 Tous tieux delices dieus argue.
 Au primer establissement
 Dieus les viandes de la gent,
 Du beste, oisel, piscon du mier,
 Fist ordiner tout proprement
 Sanz les curies autrement
 Des grantz delices adjouster : 7950
 Mais ore il falt braier, streigner,
 Et tout de sus en jus tourner,
 Que dieus ot fait si plainement ;
 Dont m'est avis q'en son manger
 Ly delicatz voldra changer
 Et dieu et son ordeignement.
 Et d'autre part a sa nature

Ly delicatz trop desnature,
 Quant l'estomac q'est asses plein
 Provoce a passer sa mesure 7960
 Par saules et par confiture,
 Q'om fait tous jours prest a sa mein.
 Il est auci vers son prochein
 Grevous, q'il tantz des biens soulein
 Devoure en une petite hure,
 Q'as plusours par un temps longtein
 Porroit souffire. He, quel vilein,
 Q'offent trestoute creature !
 Oisel par autre se chastie ;
 Et ensi puet de sa partie 7970
 Qui l'evangile a droit lira
 Du riche, qui toute sa vie
 Vivant en sa delicacie
 Son chaitif corps glorifia,
 Mais a Lazar qui s'escria
 Au porte et de son pain pria
 Ne volt donner la soule mye ;
 Dont lour estatz la mort changa,
 Et l'autre en ciel se glorifie. 7980
 Cil qui fuist riche et poestis
 Estoit en flamme ardante mis,
 Et cil qui povre et vil estoit
 Fuist ove les saintz du paradis
 El sein du patriarche assis :
 L'eschange moult se diversoit,
 La goute d'eaue l'un rovoit,
 Sa langue dont refroideroit
 En l'ardour dont il fuist suspris ;
 Mais qui la mie ne donnoit 7990
 Au povre, resoun le voloit
 Qu'il de la goute fuist mendis.
 Pour ce nous dist l'apostre Pierre,
 Que cil qui delicat s'appiere
 Et se delite en geule et feste,
 Ne puet faillir maisq'il compiere ;
 Car quelq'il soit, ou fils ou pierre,
 Il doit perir sicomme la beste.
 Car c'est le pecché deshoneste,
 Qui toute vertu deshoneste, 8000
 Et trestout vice a sa baniere

8004 aderece

8021 endeuent

8024 Senpart

Après soy trait, comme cil q'apreste
 Au char toute folie preste,
 Et trestout bien met a derere.
 En manger delicatement
 Le temps s'en passe vainement,
 La resoun dort et tout s'oublit,
 Le ventre veile et tant enprent
 Que plus ne puet ; mais nequedent
 La langue encontre l'appetit 8010
 Encore a taster un petit
 S'afforce, et a son ventre dist,
 'He, ventre, q'est ce ? dy comment :
 Ne pus tu plus de rost ne quit ?
 Je ne t'en laiss encore quit,
 Ainz falt a faire mon talent.'
 N'est il bien sot qui paist et porte
 Son anemy, qui luy reporte
 Reproeche et mal pour son bon port ?
 Ce fait cil qui sa char conforte, 8020
 Qu'elle en devient rebelle et forte,
 Et il est mesmes le meinz fort
 Du resoun, quelle sanz resort
 S'en part, qant voit du char la sort,
 Comment a Gule se resorte,
 Que qant pecché la point ou mort,
 N'en a pouvoir jusq'a la mort
 A guarir de la plaie morte.
 Ly sages dist, qant om d'enfance
 Norrist du tendre sustenance 8030
 Son serf, apres luy trovera
 Rebell, plain de desobeissance ;
 Car si tu sers serf au plaisance,
 De honte il toy reservira :
 Et qui plus a sa char plairra,
 Tant plus se desobeiera
 Contraire a toute bienfaisance.
 Car qui sa pees au char dorra,
 N'en porra faillir qu'il n'avra
 La guerre jusques al oultrance. 8040
 Par ce pecché, ce dist ly sage,
 Ont mainte gent de lour oultrage
 Esté jusq'a la mort peri.
 Par ce pecché devient le rage,
 Du quoy la gent devient sauvage,

Que dieus d'Egipt avoit guari ;
 Si ont depuis leur dieu guerpi
 Et les ydoles ont servy.
 Ce truis escript d'ice lignage
 El livre deutronomii ; 8050
 Mais ainz q'om laist son dieu ensi,
 Je loo laisser le compenage.
 'Asculte ça,' dist Ysale,
 'Tu Babilon, la suef norrie,
 Que delicat te fais tenir,
 Pour geule et pour delicacie
 Baraigne et souffraitouse vie
 Soudainement te doit venir,
 He, delicat, pour toy guarir.'
 Tu pus aici la vois oir 8060
 Comment l'apocalips t'escrie,
 Et dist, sicomme te fais joir
 De tes delices maintenir,
 Dolour d'enfern te multeplicie.
 Saint Job raconte la penance,
 De la divine pourvoiance
 Q'au delicat est ordeiné,
 Dont cil qui porte remembrance
 Fremir se puet de la doubtance ;
 Car jusque enferrn ert adrescé 8070
 Sa voie, u qu'il serra bruillé
 Du flammc, en negge et puis rué,
 Et le doulcour de sa pitance
 Serront crepalde envenimé :
 Ja d'autre puyment ne clarée
 Lors emplira sa vile pance.
 Mais les richesses qu'il pieça
 Par son delit tantz devora,
 Dieus pour revenger sa querele
 Lors de son ventre les trera ; 8080
 Le chief des serpens suchera,
 Sicomme fait enfes la mamelle,
 Et en suchant la serpentelle
 Du langue parmy sa boëlle
 Luy point, siq'elle l'occira.
 He, trop est froide la nouvelle,
 Quant mort ensi se renouvelle
 Sur luy q'au plain jammais morra.
 Tout ce, dist Job, avenir doit

8083 ensuchant

Au delicat qui ne laissoit
 De sa viande au povre gent, 8090
 Ainz tout au soy l'approprioit ;
 Dont en la fin n'est q'a luy soit
 Du bien ou grace aucunement,
 Ainz mangera tout autrement
 Del herbe amiere, et son puyment
 Serra du fiel, dont qant le boit
 Tout l'estomac desrout et fent :
 C'est as tiels glous le finement
 De festoier en tiel endroit. 8100
 Ly delicat qui solt user
 La chalde espiece a son manger,
 Sicome reconte Jeremie,
 L'estoet par famine embracier
 Puante merde a devorer
 El lieu de sa delicacie ;
 Sique du faim la desgarnie
 Morra, qu'il plus ne porra mye
 En son chemin avant aler.
 He, delicat, tu q'en ta vie 8110
 Ta vile pance as tant cherie,
 Chier dois ton ventre comparer.
 Ore dirra de la tierce file de
 Gule, la quelle ad noun Yveresce.
 La tierce file au deable proie,
 Dont Gloutenie multeploie,
 C'est Yveresce la nounsage,
 La quelle au boire tout se ploie
 Et en bon vin trestout emploie
 Son bien, son corps, et son corage.
 Mais qui se pvent a tiel usage, 8120
 Tantz mals suient a son menage,
 Que tous reconter ne pourroie ;
 Dont l'alme pert le seignourage
 Du corps, et corps de son oultrage
 Trestous ses membres plonge et noie.
 Iceste file beveresce
 Ne prent ja cure d'autre messe,
 Ou a moustier ou a chapelle,
 Forsq'au matin primer s'adresce
 A la tavernne, et se professe
 Tout droit au bout de la tonelle ; 8130
 El lieu du Crede au boire appelle,

Et ainçois moille sa frestelle,
 Qu'il du viande aucune adesce,
 Si noun que soit de la fenelle ;
 Dont boit q'en toute sa cervelle
 Ne remaint sens plus que d'anesse.
 Tant boit Yveresce a demesure,
 Q'a son quider trestout mesure
 Le ciel ove tout le firmament,
 Si voit deux lunes a celle hure : 8140
 Trop perest sages pardessure,
 Et pardessoutz tout ensement,
 Quant la terre en soy comprend,
 Ou soit langage ou autrement,
 De toute chose la nature
 Despute et donne jugement ;
 Qu'il est alors plus sapient
 Que dieus ou autre creature.
 Yveresce fait diverse chance,
 Latin fait parler et romance 8150
 Au laie gent, et au clergoun
 Tolt de latin la remembrance :
 Yveresce fait un Roy de France
 A la tavernne d'un garçoun :
 Yveresce tient come en prisoun
 Le corps, q'issir de la maisoun
 Ne puet, mais de sa folquidance
 Se croit plus fort que n'est leoun :
 N'est pas ovele la resoun
 Q'Yveresce poise en sa balance. 8160
 Yveresce est celle charetiere
 Qui sa charette en la rivere
 Ou en la fosse fait noier ;
 Car u q'Yveresce est la guidere,
 Lors n'est resoun, sen ne maniere,
 Q'au droit port se puet convoier ;
 Ainçois les fait tous forsvoier,
 Et en leur lieu fait envoier
 Pecché, que meyne ove soy misere :
 Car soit seigneur ou communer, 8170
 Quant il se volra communer
 D'Yveresce, falt q'il le compiere.
 Mais certes trop est chose vile,
 Quant lieu pecché seigneur avile ;
 8147 plussapient 8158 plus'ort
 8183 qensoit

Bon fuist qu'il n'en fuist avilez,
 Car tous en parlont de la vile,
 Et chascun son pecché revile,
 Et dieus en est trop coroucez.
 Cil qui s'est mesmes malmenez,
 Comment serront par luy menez 8180
 Les gens qui sont de sa famille ?
 Noun bien, car nief qui plus q'asses
 Se charge, falt q'en soit quassés,
 Dont soy et autres enperile.
 Mal est d'avoir le corps honiz,
 Mais l'alme perdre encore est pis ;
 Ce fait homme yvre en son degré.
 Car il n'ad corps, ainz enfielblis
 Plus que dormant s'est endormis,
 Et la resoun s'en est alé, 8190
 Dont l'alme serroit gouverné.
 Di lors, q'est il ? Ne say par dée.
 Il n'est pas homme au droit devis,
 Ne beste, ainz est disfiguré,
 Le monstre dont sont abhosmé
 Dieus et nature a leur avis.
 Yveresce est propre la cretine,
 Que par diluge repentine
 Les champs semez ensi suronde,
 Sique n'y laist grain ne racine, 8200
 Ainz tout esrache et desracine.
 Yveresce ensi, dessoutz sa bonde
 Ja n'ert vertu dont l'alme habonde
 Que tout ensemble ne confonde ;
 Si tolt au corps la discipline,
 Que membre a autre ne responde :
 C'est des tous vices la seconde,
 Que l'alme et corps met en ruine.
 Ly pechés dont je vois parant
 Ensi comme deable est blandisant, 8210
 Et semble suef de son affaire,
 C'est un venym doulz apparant.
 Saint Augustin le vait disant,
 L'omme yvres est en soy contraire,
 Q'il n'ad soy mesmes pour bienfaire,
 Ne sciet ne puet comment doit faire ;
 Car il n'est seulement pechant,

8176 enparlont

8178 enest

Ainz est de soy par son mesfaire
Trestout peccé, corps et viaire
Ove tout le membre appartenant. 8220
Tout ensement *comme* du chitoun,
Qui naist sanz vieue et sanz resoun,
Et point ne voit ne point n'entent,
Si vait de la condicioun
Del yvre; car discrecioun
Du corps ou d'alme ad nullement:
Les oels overtz ad nequedent,
Mais *comme* plus larges les extent,
Tant voit il meinz soy envioun;
Le cuer de l'omme ad ensement, 8230
Mais il n'ad tant d'entendement
Qu'il sciet nommer son propre noun.
L'omme yvre par fole ignorance
De soy ne d'autre ad conusance:
Ce parust bien el temps jadyz,
Quant Loth par sa desconusance
D'yveresce enprist la fole errance,
Dont ses deux files avoit pris
Et par incest s'estoit mespris;
Mais ja n'eust il le mal enpris, 8240
S'il fuist du sobre remembrance.
Pour ce trop boire a mon avis
Des tous peccés c'est un des pis,
Qui tolt au cuer la sovenance.
L'omme yvre en soy trop se deçoit,
Qu'il quide a boire qui luy boit;
C'est le bon vin, dont il est pris
Et liez, siq'en tiel destroit
N'ad membre propre q'a luy soit,
Ne resoun dont il soit apris; 8250
Ainz est plus sot et plus caitis
Que nulle beste du païs.
Dont saint Ambrose ensi disoit,
Que des tous vices ly soubgis
Et ly plus serf a son avis
C'est Yveresce en son endroit.
Sicome *prodhomme* le moustier
Quiert pour devotement orer,
L'omme yvre fait par autre guise,
Si quiert tavernę a son mestier: 8260
Car la taverna au droit juger

8228 pluslarges

Est pour le deable droite eglise,
U prent des soens le sacrefise.
Le corps lors paiera l'assise
De son escot au taverner,
Mais puis la mort pour la reprise,
Quant plus la bource ne suffise,
Lors fait sanz fin l'alme engager.
Saint Isale en son divin,
'Way vous,' ce dist, 'q'au jour matin 8270
Levetz et jusques au vesprée
A la taverna estes enclin,
D'yveresce plain plus que porcin:
Car proprement par tieu peccé
Ly poeples est chaitif mené,
Si ont mainte autre gent esté
Perdu de la vengeance au fin.'
Pour ce ly sage en son decret
Sicomme la mort nous ad veé,
Que nous ne bevons trop du vin. 8280
Uns clerks dist, Yveresce est celle
Q'encontre dieu tient la turelle,
U sont tous vices herbergez,
Pour guerre que se renouvelle,
Dont chascun jour vient la nouvelle
A dieu, dont trop est coroucez,
Q'ils ont tous vertus forschacez:
Par quoy dieus les ad manacez
Par Jeremie, et les appelle 8290
Disant q'as tous tieux forsenez
Il tient sa coupe apparaillez
Plain de vengeance a la tonelle.
Iveresce, qui dieus puet haïr,
Les uns en eaue fait perir,
Les uns en flamme fait ardoir,
Les uns du contek fait morir,
Les uns occist sanz repentir,
Les uns attrait a desesper,
Les uns fait perdre leur avoir,
Les uns joïr et surdoloir, 8300
Les uns desfame par mentir,
Les uns trahist par nounsavoir,
Les uns tolt resoun et pouvoir,
Les uns fait droite foy guerpir.
He, orde, vile et felonnesse

8251 plusstot

Est la folie d'Yveresce,
Par qui l'en pert grace et vertu
Du sen, beauté, force et richesce,
Science, honour, valour, haltesce:
Saunté du corps en est perdu, 8310
Et ly cynk sen sont confondu,
Ly bien parlant en devient mu,
Et ly clier oïl tourne en voeglesce;
N'ad pié dont il soit sustenu,
Ne main par qui soit defendu,
Noraille qui d'oïr ne cesse.
La bounté en devient malice,
La sobre contenance nice,
Et la resoun desresounal,
Si fait tout bien tourner en vice. 8320
Fols est pour ce que l'exercice
En prent, dont vienont tant de mal;
Car c'est le vice especial
Q'est fait du conseil infernal
Leur procurour, qui nous entice,
Pour mener a cel hospital
U sont ly tonell eternal
Plain de misere en son office.
Ore dirra de la quarte file de
Gule, q'ad noun Superfluité.
La quarte file est de surfait
Si plain que tous les jours surfait, 8330
Sibien en boire q'en manger.
Sur tous les autres plus forsfait;
Car de son ventre le forsfait
Est de vomite en grant danger,
Ou autrement l'estoet crever:
Si doit la goule acomparer
Ce qu'il de gule a tant mesfait;
Sanz digester, sanz avaler
Laist sa viande a realer, 8340
Par ou entra par la revait.
D'ice peccé par dueté
Le noun est Superflueté,
Q'est l'anemye de mesure:
Cil qui de luy ert enteché
Jamais du bouche sanz peccé
Mangut ne boit en aucun hure:
Il porte d'omme l'estature,

8310 enest

8312, 8317 endeucient

8322 Enprent

H

Et est semblable de nature
Au chien, quant ad le ventre enflé
Plain de caraigne et vile ordure, 8350
Dont pardessoutz et pardessure
S'espurge, et est trop abhosmé. f. 49
Come plus le vice dont vous dy
Est riches, tant plus ert laidy
Du jour en aultre; car lors a
Delicacie a son amy,
Par qui conseil se paist parmy,
Tanqu'il emplie le ventre avra,
Sicome tonell q'om emplira;
Q'avant qu'il superfluera 8360
Ne cesse emplir, et puis auci,
Quant void est, se reemplira,
Et past sur past adjoustera,
Comme cil q'au deable est le norri.
Sicome pour siege l'en vitaille
Chastell, ensi ly glous se taille
Quant doit juner a lendemein:
Qui lors verroit droit merveille
Comment le ventre d'omme vaille
Tant engorger devant la mein. 8370
Mais quidez vous q'un tiel vilein
Du juner paie son certain
A dieu? Nenil; aincois il faille:
Car dieus des tous glous tient desdein,
Et d'un tiel qui se paist trop plein
Maldist le ventre ou tout l'entraile.
Sicomme ly malvois hosteller,
Quant il enprent pour hosteller
Prodhomme, et puis vilainement
De son hostell deshosteller 8380
Le fait, ensi cil adversier
Par l'orde superflument
De gule, en son vomitement
Desgette le saint sacrement,
Q'il ot deinz soy fait herberger,
Et el lieu de son dieu reprint
Le deable. O quel eschangement,
Ensi pour mort vie eschanger!
D'ice peccé tresbien apiert, 8390
Cil qui le fait chier le compiert,
Car d'oultrageuse gloutenie,

Quant plus devoure *que* n'affiert,
Primer au corps le mal refiert,
Et l'alme apres en est perie.
He, vice plain du vilainie,
Du corps et alme l'anemie,
Par toy et l'un et l'autre piert :
Ja dieus ta bouche ne benye,
Ce dont ta pance as replenie
Fait *que* famine l'alme adquier. 8400

Ore dirra de la quinte file de

Gule, q'ad noun Prodegalité.

La puisné file apres la quarte
Ne boit *par* pynte ne par quarte,
Ainz *par* tonealx et par sestiers,
C'est ly pecchés qui se departe
De dieu, au siecle et tout departe
Et son catell et ses deniers
En festes et en grantmangiers,
Sanz estre au povre parçoniers.
Son tynel largement essarte
Soul pour les honours seculiers, 8410
Nonpas *comme* cil q'est aumosniers,
Si noun de Venus et de Marte.

Iceste file du Pecché

L'en *nomme* Prodegalité.
Follarges est en sa despense ;
Sovent devoure en une année
Plus q'en deux ans la faculté
De ses gagnages recompense.
Ly sires q'a ce vice pense 8420
Avant le fait ne contrepense
Le fin ; car de tieu largeté
Combien q'il quiert la reverence
Du siecle, dieus irreverence
Luy rent sanz avoir autre gré.

Ly *prodegus* q'ad seigneurage
Non soulement son heritage
Du follargesce fait gloutir,
Ainz de son povre veisinage
Tolt leur vitaille sanz paiage ;
Sic*omme* ly loups, qant vient ravir
Sa proie, ensi pour maintenir 8431
Sa geule il fait avant venir
Ce q'est dedeinz le mesuage

8394 enest

8444 enfait

Des povres, dont se fait emplir :
L'en doit tieu feste trop hair
Dont l'autre plourent *leur* damage.
Ly *prodegus* deinz sa maison
Son pourvoieur Extorcioun
Retient ; cil fait la pourvoiance :
Par tout le païs environn 8440
N'y laist gelline ne capoun,
Ainz tolt et pile a sa pitance,
Ove tout celle autre appourtenance ;
Et si ly povre en fait *par*lance,
Lors fait sa paie du bastoun,
Dont met les autrez en doubtance.
Cil q'ensi sa largesce avance
N'en duist du large avoir le noun.

Ne luy souffist tantsoulement
Ensi piler du povre gent, 8450
Ainçois des riches aprompter
Quiert et leur orr et leur argent,
Pour festoier plus largement ;
Car riens luy chalt qui doit paier,
Maisq'il s'en pourra festoier.
Et nepourqant n'y doit entrer
Ly povres, dont avient sovent
Tieux Mill paient *pour* son disner
Qe ja n'en doivent pain gouter :
Maldit soit tieu festoier ! 8460

Si ly follarges ust atant
Come ot Cresus en son vivant,
Qui dieu del orr om appelloit,
Trestout le serroit degastant,
Et au darrein en son passant
En dette et povre en fin irroit :
Car dame Geule luy deçoit,
Q'en son hostell mangut et boit,
Si font ly autre appartenant
Des vices solonc leur endroit ; 8470
Chascuns luy sert *comme* faire doit,
L'un apres l'autre a son *commant*.

Sa soer primere Ingluvies
Pour luy servir des larges mess
De son hostell est Seneschal :
Delicacie puis apres
Devant luy taille a son halt dess

8455 senpourra

8459 devoit

Du manger plus delicial :
Dame Iveresce en son hostal
Est boteler especial, 8480
Qui de sa coupe sert ades :
Sa quarte soer superflual
De la cusine est principal :
Tiel conseil retient de pres.

Si la commune gent menour
N'ait les richesses du seignour,
Dont largement sa geule emploie,
Nientmeinz qanq'il porra le jour
Gagner, au soir *par* sa folour
Du follargesce il engorgoie : 8490
Et s'il *par* cas falt de monoie,
Lors son coutell et sa courroie,
Au fin q'il soit bon potadour,
Enguage *pour* le ventre joye ;
Siq'il poverte enmy la voie
Luy vient au fin de son labour.

Qui follargesce meyne ensi,
Trop povrement ert remeri
Au fin, qant sa despense cesse :
Dist l'un, 'C'est grant pité de luy :'
'Bon compains fuist,' dist l'autre aici : 8500
Ly tierce dist, ' Je le confesse ;
Mais ore est sa folie expresse.'
Vei la le fin de follargesce !
Primer du siecle est escharni,
Ne dieus de sa part le redresce,
Siq'au final en sa destresce
Aucune part n'ad un amy.

Ore dirra la descripcioun de
Gule par especial.

Tout autrecey *comme* la norrice
Par son laiter l'enfant cherice, 8510
Si fait ma dame Gloutenie :
Tous les pecchés moet et entice
Et maintient du fol excercise,
Q'amender ne se pourront mye :
Car de l'umaine fole vie
Tient Gule la *connestablie*,
Comme cil qui sur tout autre vice
Conduit et l'avantgarde guye,
Et tous suient sa compaignie
Chascun endroit de son office. 8520

Phisque conte d'un grief mal
Q'est appellé le loup roial ;
Cil guaste toute medicine
Et si n'en guarist au final.
Ensi ly glous superflual
Devore et gaste en sa cusine
Le domest et le salvagine,
Ne laist terrestre ne marine,
Oisel, piscoun ne bestial,
Ne bois ne pré ne champ ne vine, 8530
Pepin ne fruit, flour ne racine,
Ainz tout deguaste en general.
Mill Elephantz, sicome je truis,
Tous en un bois sanz quere plus,
Senec ensi le fait escrire,
Porront bien estre sustenez ;
Mais l'omme, a ce q'il soit repuz,
La mer, la terre et l'air aspire,
N'est chose que luy poet suffire.
He, queu miracle de tiel sire, f. 50
Qui deinz son ventre ad tout reclus ! 8541
Mais ja sa paunce tant ne tire,
Que plus sa bouche ne desire,
N'est riens q'estanche ce pertus.

Trestous les jours *comme* chapellain
Ses heures dist ly glous villain,
Pour remembrer sa gloutenie :
Au matin dist, ' Je n'ay pas sain
La teste, dont m'estoet prochain
Manger, car juner ne puiss mie : ' 8550
Mais autrement ja dieu ne prie,
Ainçois d'une heure en autre crie,
' Ore ça du vin la coupe plain !'
Puis dist sa vespre et sa complie
De gule tanq'au departie,
Q'il n'ad poair du pié ne main.

He fole Gule, ascolute ça,
Enten comment te manaça
L'apostre, qui te dist ainsi :
' Le ventre a quique ce serra 8560
Q'au manger tout se pliera,
Et la viande de celluy,
Par quoy le ventre s'est joyé,
Le ventre et la viande aici
Dieus ambedeux destruiera.'

Car tout au fin serra purri,
 Quant le glos devouera icy
 Puis la crepalde devoura.

He, Gule, des tous mals causal,
 Tu es ly pescheur infernal,

Q'ove ta maçon soubtilement
 Dedeinz le pomme q'ert mortal
 Dame Eve par especial
 Preis par la goule fierement,

Et la treinas trop vilement
 Ovesque Adam le no parent

Du paradis tanq'en ce val
 U n'est que plour et marrement.

He, Gule, tu es proprement
 De tous noz mals l'origenal.

De Gule, sicome dist ly sage,
 Ont mainte gent resceue damage

Et sont jusq'a la mort peri :

De Gule avient le grant outrage,
 Par quoy la gent devient salvage,

Que dieus d'Egipte avoit guari,
 Mais ils l'avoient deguerpi

Et les ydoles ont servi.
 Ce truis escript de ce lignage

El livre deutonomii ;
 Mais ainz q'om lerroit dieus ensi,
 Meulx valt laisser le comparnage.

De Gule qui vouldra chanter
 Ses laudes, om la poet loer

De sesze pointz, dont je l'appelle :

L'estomac grieve au digestier,
 La resoum trouble au droit jugier,

Le ventre en dolt ove la bouelle,
 La gouste engendre et la cervelle

Subverte, et l'oill de cil ou celle
 Cacheus les fait enobscurer,

La bouche en put plus que chanelle,
 L'oraile aici et la naselle

Du merde fait superfluer.
 Gule ensemment adquiert pecché,

Luxure induce en propreté
 Et ja son dieu ne cesse offendre ;

Gule aici tolt en son degré

8591 Mainz ainz

8598 endolt

8620 enest

Science, honneur, force et sauté,
 Si tolt richesse et fait enprendre

Poverte, que l'en hiet aprendre ;
 Gule ensemment nous fait susprendre

Du mainte male enfermeté ;
 Physique ne le puet defendre

Que mort subite au fin n'engendre,
 Dont en enfer n'est avalé.

Ore dirra de les cink files de
 Leccherie, des quelles la primere
 ad noun Fornicacioun.

Luxure, que les almes tue,
 N'est pas des files sanz issue,

Ainz en ad cink trop deshonestez :

Resoum de l'alme en est perdue,
 Et pour le corps ont retenue

Nature avoec les autres bestes.
 Sicomme la mer plain de tempestes

Les niefs assorbe, ensi font cestes
 A quique soit leur dru ou drue :

Qui lire en voet les vieles gestes
 Verra q'au fin de leur molestes

Mainte merveille est avenue.
 Ces files dont vous dis dessure

Le corps par soy chascune assure
 De son charnel delitement ;

Dont la primere endroit sa cure
 En tielles gens son fait procure

Qui vont sanz ordre franchement
 Desliez, maisque soulement,

Sicome nature leur aprent,
 Faisont le pecché de nature,

Que Fornicacioun enprent ;
 Car c'est le noun tout proprement

De ceste file en sa luxure.
 Iceste Fornicacioun

N'ad cure de Religioun,
 Du prestre noun ne de mari ;

Ainz du meschine et valletoun
 Procure leur assembleisoun,

Et dist bien que pour faire ensi
 Ce n'est pecché mortiel, par qui

8602 enput

8626 envoet

8619 enad

Homme ert dampnez : mais je vous di,
 Ce n'est que fals menconge noun.

Si l'escriture n'est failli,
 Qui fait ce vice ert malbailli,

S'il n'ait avant de dieu pardoun.
 Om fait de ce pecché les mals

Plus commun es jours festivals
 Q'en autre jour de labourer :

Quant la meschine et ly vassals
 Sont deschargez de leur travaux,

Lors mettont lieu del assembler :

Quant Robin laist le charuer
 Et Marioun le canoller,

L'un est a l'autre parigals ;
 Ja jour ne vuillont celebrer ;

Pour leur corps faire deliter
 N'ont cure de l'espiritals.

Ore dirra de la seconde file de
 Luxure, la quele ad noun Stupre.

Une autre file ad Leccherie,
 Q'est plaine de delicacie ;

Et comme l'oiseil abat les flours
 De l'arbre quant la voit flourie,

Ensi fait Stupre en sa folie,
 Q'est la seconde des sorours.

C'est un pecché des males mours,
 Car ja ne quiert en ses amours

D'aucune femme avoir amie
 Si noun du vierge, u les honours

Abat, quant de ses fols ardours
 Son pucelage ad desflourie.

Ja Tullius, qui plus habonde
 Du Rethorique, en sa faconde

Ne parla meulx que cil ne fait,
 Ainçois q'il vierge ensi confonde ;

Car si la vierge luy responde,
 Qu'elle assentir ne voet au fait

Devant que l'affiance en ait
 Du mariage, lors attrait

La main et jure tout le monde
 Que son voloir serra parfait :

Ensi du false foy desfait
 Et desflourist la jofne blounde.

De Stupre cil qui se delite

Pour decevoir la vierge eslite
 Sa false foy sovent engage

Ove la parole bien confite ;
 Mais si tout ce ne luy proufite,

Au fin qu'il puist son fol corage
 Par ce complir, lors d'autre rage,

Sicomme la beste q'est sauvage,
 Quant faim luy streigne et appetite

Sa proie, ensi de son outrage
 Au force tolt le pucelage,

Q'a sa priere fuist desdite.

Mais cil n'ad pas la teste scins
 Q'aval les preetz a les Tousseins

Des herbes vait les flours serchant :

Mais d'autre part je sui certains,
 Que cil enquore est plus atteintz,

Q'en jofne vierge vait querant
 Ce qu'il ne puet parfaire avant,

Quant la tendresse d'un enfant
 Ne puet souffire plus ne meinz.

Q'ove tiele vait luxuriant,
 C'est aici come desnaturant

Du corps et alme ensi vileins.
 Mais quoy dirrons du viele trote,

Du jovencel quant elle assote,
 Si quiert avoir les fruitz primers :

Par quoy s'atiffe et fait mynote,
 Et pour luy traire a sa riote

L'acole et baise volentiers,
 Si donne pigne et volupiers

Et ses jolals et ses deniers,
 Dont met le jofne cuer en flote ;

Si q'au darrein par tieus baisers,
 Par tieux blanditz, par tieux loers,

La viele peal ly jofne frote.
 As autres jofnes femelines

De Stupre et de ses disciplines
 Sovent aici vient grant damage : f. 51

Quant de leur corps ne sont virgines,
 Et que l'en sciet de leur covines,

Par ce perdont leur mariage,
 Dont met esclandre en leur lignage,

Sique pour honte en leur putage
 Tout s'enfuient comme orphelines,

8683 enait

Dont croist sur honte plus hontage,
 Qant au bordell pour l'avantage
 De sustenance sont enclines.
 Sur tout pis fait en cest endroit
 La fole, qant enfant conçoit ;
 Car lors luy monte le peché
 Dedeinz le cuer, qant l'aparçoit : 8740
 Du quoy les medicines boit
 Pour anientir q'est engendré,
 Ou autrement, qant le voit née,
 Moerdrir le fait tout en secrée,
 Si qu'il baptesme ne reçoit ;
 Tant crient avoir la renomée
 Q'elle ad perdu virginité :
 He, comme ly deable la deçoit !
 Ore dirra de la tierce file de
 Luxure, q'ad noun Avolterie.
 La tierce fille de Luxure
 Trestoute esprent de fole ardure, 8750
 Dont dieu et son voisin offent :
 C'est, comme l'en dist au present
 hure,
 La mere de male aventure,
 Et son office en soy comprend
 A violer le sacrement
 De matrimoine, et soulement
 Vivre a la loy de sa nature ;
 Si ad a noun tout proprement
 Avolterie, q'a la gent
 Des almes fait la forsfaiture. 8760
 C'est ly pechés qui fait les cous,
 Dont maint homme ad esté jaloux,
 Et sont encore a mon avis ;
 Car tantz de cel ordre entre nous
 Sont profess et Religious,
 Q'om dist q'au poy nuls est maritz
 Qui de ce tache n'est laidis,
 Combien que ce n'apiert ou vis :
 Le mal est si contagious
 Q'au paine eschape un soul de diss,
 Mais cil q'en est au plain guaris 8771
 Poet dire qu'il est gracios
 Resoun le voet et je le croy,
 Que cil qui fait le mal de soy

8771 qenest

En duist porter la blame aici ;
 Mais ore est autrement, je voi,
 La dame fait le mal, par quoy
 Ly sire enporte tout le cry.
 Aval les rues quant vient y,
 Dist l'un a l'autre, 'Vei le cy ;' 8780
 Ensi luy font moustrer au doy :
 Trestous en parlont mal de luy ;
 Et si ne l'ad point deservy,
 C'est trop, me semble, encontre loy.
 Mais trop perest cil cous benoit,
 Qui point ne sciet ne point ne voit
 Comment sa femme se demeine,
 Et s'om luy conte, pas ne croit,
 Aviene ce q'avenir doit :
 Lors ert au meinz guari du peine 8790
 Dont jalousie se compleine.
 Mais dieus luy donne male estreine,
 Je di pour moy, ly quel q'il soit,
 Qui de ma femme male enseigne
 Me dist, quant je la tiens certeine ;
 Ne quier savoir del autre endroit.
 D'Avolterie au temps present
 Om parle moult diversement,
 Que trop commun est son affaire :
 Ascuns le font apertement, 8800
 Ascuns le font covertement,
 Mais l'un ne l'autre est necessaire :
 Mais qui le fait en secretaire
 Meinz peche, qant de son mesfaire
 Ne sourt esclandre de la gent ;
 Pour ce la femme debonnaire
 Du peché covere le viaire,
 Et laist le cuill aler au vent.
 Trop perest plain de guilerie
 La femme que d'Avolterie 8810
 S'aquite, par quoy son baroun
 Houster pourra de jalousie :
 Car lors fait mainte flaterie
 De semblant et de fals sermoun,
 Sique de sa convreisoun
 Avolterie en la meisoun
 Ly sires, qui n'aparçoit mye,
 Le souffre sanz suspescioun.

8775 Enduist

8782 enparlont

He comme dessoutz le chaperoun
 Luy siet la coife de sotie. 8820
 Bien sciet la femme en son mestier
 Son follehour entraqueinter
 Ove son baroun du bienvuillance,
 Dont il se porra herberger
 Sovente fois et sojourner,
 Qant luy plerra, d'acustumance.
 O leccherouse pourvoiance,
 Dont l'avoultier ensi s'avance,
 Et luy maritz desavancer
 Se fait de sa tresfol cuidance ; 8830
 Ne say si soule sa creance
 Luy doit par resoun excuser.
 He, comme ly sires est deçu
 Quant il dirra luy bienvenu
 Au tiel amy en son venant !
 Mais en proverbe est contenu,
 'Ly cous ad tout son fiel perdu
 Et ad dieu en son cuer devant :'
 Dont a sa femme est obeissant,
 Si n'ose parler tant ne qant, 8840
 Ainz est du sot amour vencu,
 Q'il n'est jaloux de nul semblant.
 Q'ensi vait homme chastiant
 Trop ad la femme grant vertu.
 Mais s'il avient que ly baroun
 Soit jaloux, et q'il sa leçoun
 Dist a sa femme irrousement,
 Lors moult plus fiere que leoun
 Et plus ardante que charboun
 La femme de corous esprent, 8850
 Si luy respont par maltalent :
 'He, sire, cest accusement
 Certes, si de vo teste noun,
 N'ad esté dit d'aucune gent :
 Sanz cause, dieu le sciet comment,
 Vers moy queretz tiele enchesoun.'
 Et lors deschiet trestoute en plour,
 Et en plourant fait sa clamour,
 Maldist trestout son parentée,
 Maldist le lieu, le temps, le jour, 8860
 Maldist trestout le consaillour,
 Maldist le prestre en son degré,

8848 plusfiere

8858 enplourant

Par qui fuist unques mariée :
 Si dist, 'O dieus de magesté,
 Qui toute chose vois entour,
 Tu scies comment il est alé.'
 Voir dist, mais par soubtilité
 Ensi s'escuse en sa folour.
 Sicomme la hupe en ressemblant,
 Qui fait maint fals pitous semblant,
 Quant om voudra sercher son ny, 8871
 Si plour la femme en suspirant ;
 Mais ja ly cuers n'est enpirant,
 Combien que l'oill se moustre ensi.
 Mais par ce veint son fol mari,
 Q'au fin tout piteus et marri
 La baise et vait mercy criant
 Pour sa peas faire ovesque luy ;
 Si dist qu'il jammais pour nully
 Serra jaloux de lors avant. 8880
 Ensi ert chastie ly sire
 Q'ad cuer plus suple que la cire,
 Le quel la femme pliera
 Toutdis apres qant le desire.
 Et lors ne chalt qui le remire,
 Ainçois vergoigne ensi perdra,
 Et ensi baude deviendra,
 Que puis ne doute qui viendra
 Soutz sa chemise pour escrire
 La carte que tesmoignera 8890
 Q'Avolterie y demourra,
 Quant n'est qui l'ose contredire.
 Sur toutes files de Luxure
 Se tient yceste plus segure
 En ses folies demenant ;
 Car s'elle engrosse a la ceinture,
 Bien sciet au tiele forsfaiture
 N'est pas a sercher son garant ;
 Quique ses buissoons vait batant,
 L'oiseil au mari nepourquant 8900
 Demorra : mais ce n'est droiture,
 Quant tiel puis ert enheritant,
 Q'om voit sovent d'un tiel enfant
 Venir mainte male aventure.
 Mais ce que chalt, au jour present
 Om voit la mere molt sovent

8897 autiele

Un tiel enfant plus chier tenir ;
 Et d'autre part, ne say comment,
 Dieu souffre au tiel heritement
 Et escheoir et avenir : 8910
 Mais sache bien sanz null faillir,
 Que ja ne puet en hault saillir
 Racine tiele aucunement,
 N'overage se puet establir
 Sur fondement de tiel atir,
 Comme l'evangile nous aprent.
 Mais veigne ce que venir doit, f. 52
 La male espouse en son endroit
 S'avoulterie ne lerra,
 Ainz se confourme a ce que soit : 8920
 Sovent par ce les dons reçoit,
 Son corps au vente dont metra,
 Sovent auci redonnera,
 Dont son corps abandonnera.
 Et l'un et l'autre est trop maloit ;
 Mais de deux mals plus grevera,
 Quant son baroun anientira
 Du poverté ainz q'il s'aparçoit.
 L'espouse q'ensi s'abandonne 8930
 Et les chateaux son mari donne
 A son lecchour, grantment mesfait ;
 Car ja n'ert chose que fuisonne
 Soutz tiele mein, ainz desfuisonne,
 Tanq'en poverté venir fait
 La maison u ly pechés vait.
 Sovent essample de tiel fait
 Cil qui les païs environne
 Porra veoir, car d'un attrait
 Richesce ovesque ytiel forsfait
 Fortune ensemble ne saisonne. 8940
 Di par resoun si je creroie
 L'espouse quelle je verroie
 Abandonné du fol amour.
 Qant elle ensi sa foy desloie
 Vers son mari, comment dirroie
 Q'elle ert certaine a son lecchour ?
 Non ert ; ainz comme ly veneour,
 Qui vait serchant le bois entour,
 Quert elle avoir nouvelle proie,
 Dont il avient q'au present jour 8950

8907 pluschier

8909 autiel

8974 enporte

Tiel chante 'J'aym tout la meillour,'
 Q'est plus comune que la voie.
 Celle avoultiere voet jurer
 A quique soit son avoultier
 Que 'ja nul jour estoie amy
 Forsq'a toy soul, q'es ly primer,
 Et certes tout le cuer entier
 Te laisse et donne en ta baillie.'
 Mais qant elle ad sa foy mentie
 Vers son baroun, ne croi je mie 8960
 Que sages ons se doit fier ;
 Et nepourquant de la sotie
 Je voi plusieurs en ceste vie,
 Qui ne se sciovent prou garder.
 Mais cil qui tous les mals entice,
 C'est ly malfiés, par l'exercice
 Que vient de la continuance
 La femme fait au fin si nice,
 Dont est de son baroun moerdrice.
 O dieus, vei quelle mescheance, 8970
 Du fole femme q'en semblance
 Plus porte al homme de nuisance
 Q'escorpioun ne cocatrice !
 Ly sage en porte tesmoignance,
 Q'om doit fair telle aqueintance,
 Car dieus le hiet de sa justice.
 Mais quoy dirrons des fols maritz,
 Qui de leur part se sont mespriz
 D'avoulterie, et ont faulsé
 Leur foy ? Certes de mon avis 8980
 Cils font encore asses du pis
 Que ne font femme en leur degré :
 Car ly mary pres sa costée
 Ad soubgite et abandonnée
 Sa femme, que luy est toutdis
 Preste a sa propre volenté ;
 Dont n'est ce pas necessité
 Qu'il d'autres femmes soit suspris.
 Ce nous recontont ly auctour,
 Quiconque soit fait gouvernour 8990
 A surveoir l'estat d'autri,
 S'il mesmes soit d'ascun errour
 Atteint, plus ert le deshonnour
 De luy, qant il mesfait ensi,

de d'autre ; et pourcela vous di,
 Plus est a blamer ly mary,
 Depuisqu'il est superiour,
 Que celle q'est soubgite a luy
 Et est plus frele et fieble auci
 Sibien du sens comme de vigour. 9000
 He, certes cil est trop apert,
 Qui pres sa femme tout apert
 Deinz sa maison tient concubine,
 Trop est malvois, trop est culvert,
 Q'ensi ses pechés fait overt,
 Molt petit crient la foy cristine :
 La femme, qant voit la covine,
 Que son mari tient sa meschine,
 Du cuer et corps ses joyes pert ;
 Vers dieu se pleint deinz sa poitrine, 9010
 Mais son mary la discipline,
 Que parler n'ose a desouvert.
 Pour ce q'ensi la loy offendont
 De matrimoyne et tant entendent
 A leur peché, ils perdont grace,
 Par quoy leur heritages vendont
 Et en poverté puis descendent :
 On voit plusours de celle trace,
 Et s'aucun tiel les biens pourchace
 Du siecle, nepourquant bien sace, 9020
 Nul bien apres la mort ly pendont,
 Ainz ont leur joye en ceste place
 Tous tieus : au fin dieus lez forschace
 Du ciel, s'ils ainçois ne s'amendent.
 Je n'en say point coment ce vait,
 Mais om le dist, cil q'ensi fait
 D'avoulterie son talent,
 Trois peines luy sont en agait ;
 Ou par mehaign serra desfait,
 Ou desfamez ert de la gent, 9030
 Ou il mourra soudainement ;
 A ce q'om dist certainement
 Ne doit faillir que l'un n'en ait.
 He, quel peché trop violent,
 Que tolt les joyes du present
 Et ad auci le ciel forsfait !
 Avoulterie est en sa mete
 Du pestilence la planete,

8999 plusfrele

9049 enporte

9064 enfaist

Dont mainte gent sont malbailli :
 Du grant venym dont est implete 9040
 Sempres la terre est tout replete,
 Mais cil qui sont infect de luy
 Au paine qant serront gari.
 Essample avons qu'il est ensi
 Du viele loy par le prophiete ;
 Et du nouvelle loy auci
 L'experience chascun di
 Nous fait certains de l'inquiete.
 La bible en porte tesmoignance
 Comme du primere commençaence, 9050
 Qant dieus avoit fourmé les gens,
 Envoia puis mainte vengeance
 Pour le peché dont fai parlance,
 Selonc l'histoire d'anciens ;
 Et qui bien garde en son purpens,
 N'est pas failli en nostre temps
 D'ice peché la mescheance :
 En chascun jour de cell offens,
 Si dieus n'en mette le defens,
 Doubter poons de la vengeance. 9060
 En la Cité Gabaonite
 Dieus pour la femme du Levite,
 Que l'en pourgue au force avoit,
 Fist que la gent en fuist maldite
 Et en bataille desconfite,
 Destruite et morte en tiel endroit
 Que nuls au paine y remanoit.
 C'est ly pechés que Job nomoit
 Le fieu gastant qui riens respite,
 Ainz tout devoure et tout enboit 9070
 Le bien del alme, quelque soit,
 Sanz laisser chose qui profite.
 Pour ce l'en doit bien redoubter
 Le matrimoine a violer ;
 Car c'est le sacrement de dieu,
 Q'en paradis tout au primer
 Il mesmes le fist confermer
 Et consecrer de sa vertu ;
 Dont puis l'avienement Jhesu
 Du sainte eglise est maintenu 9080
 Ly sacrement de l'espouser.
 Par quoy trop serra confondu

Qui l'espousaille ad corumpu,
S'il grace n'ait de l'amender.

Ore dira de la quarte file de

Luxure, quelle ad noun Incest.

Dame Incest est la quarte file,

Q'au lecherie tout s'affile,

Si ad les prestres retenus

Pour bordeller aval la vile :

Incest aici tous ceux avile

Qui les saintz ordres ont rescuz, 9090

Ou soit ce moigne ou soit reclus,

Ou frere ou nonne, tout conclus

Les tient Incest sans loy civile :

Car deinz sa court jammais en us

N'iert mariage meinz ou plus

Des ceaux qui sont de sa famille.

O come fait orde tricherie

Incest entour la prelacie,

Pour refuser sa sainte eglise,

Q'est pure et nette en sa partie ! 9100

Mais cil q'en fait la departie
Serroit bien digne de juise.

Molt fait cil prelat fole enprise,

Q'ad si tresbonne espouse prise,

Quant l'ad sa droite foy plevie,

S'il puis avoec puteine gise :

Itiel eschange est mal assisse f. 53

Et trop hontouse a sa clergie.

Incest du prestre portant cure

Trop prest orde sa luxure 9110

Endroit du loy judiciaire,

Quant il par sa mesaventure,

Par l'orde peccé de nature,

Corrupt la file spiritale,

Q'est propre sa parochiale,

Dessoutz sa garde pastourale,

Dont l'alme tient a sa tenure :

D'un tiel pastour la cure est male,

Q'ensi destreint sa propre aignale,

Et la devoure en sa pasture. 9120

Incest moignal n'est pas benoit

Selonc la reule saint Benoit,

Car ja n'en garde l'observance.

Concupiscence luy decoit,

9101 qenfait

Que point n'en chalt, u que ce soit,

Ainz met trestout en oubliance,

Et la vigile et la penance,

Ove tout celle autre circumstance

Qu'il de son ordre faire doit ;

Siq'au darrein de s'inconstance 9130

Et du peccé continuance

Incest apostazer l'en voit.

En l'ordre q'est possessouner

Incest, quant il est officier

Et vait les rentes reseivant,

Pour sa luxure demener

Despent et donne maint denier,

Dont a ses Abbes n'est comptant.

Mais plus me vois esmerveillant

Du povre frere mendiant, 9140

U ad du quoy pourra donner

Si largement, q'il tout avant,

Q'irroit au pié son pain querant,

De halt Incest doit chivauchier.

D'Incest del ordre as mendiantz

Je loo que tous jalous amantz

Pensent leur femmes a defendre :

Ly confessour, ly limitantz,

Chascun de s'aquointance ad tant

Pour confesser et pour aprendre, 9150

Que ce leur fait eslire et prendre

Tout la plus belle et la plus tendre,

Car d'autre ne sont desirantz.

Itiel Incest maint fils engendre

Dessur la femeline gendre,

Dont autre est pierre a les enfantz.

Incest est fole de Nonneine,

Celle est espouse au dieu demeine.

Mais trop devient sa char sauvage

Quant son corps a luxure meine, 9160

Quel jour que soit de la semeine,

Dont corrupt le dieu mariage :

Et d'autre part trop est volage

Ly fols lecchiers qui fait folage

Du matrimoine si halteine ;

Car plus d'assetz cil fait outrage

Qui dieu espouse desparage,

Que cil qui fait de sa procheine.

9152 plusbelle . . . plustendre

Incest aici fait son office

Quant une bonne dame entice 9170

La quelle ad chasteté voué,

Mais de sa char devient si nice

Que de luxure fait le vice,

Dont elle enfreint sa chasteté :

Nientmeinz ycelle niceté

Nous veons sovent esprové.

Ne sai si dieus en fait justice

Après la mort, car le decré

De ceste vie a tieu peccé

Despense bien pour l'avarice. 9180

Incest encore est d'autre chiere

Entre la gent fole et lecchiere,

Quant s'assemblont les parentés,

C'est assavoir file ove son pierre,

Ou autrement filz ove sa miere,

Ou frere au soer s'est acouplez.

Incest les ad trop encharnez,

Quant sont d'un sanc et d'un char nez,

Q'ensi mesfont de leur charniere ;

Puisq'autres femmes sont assetz, 9190

Trop sont du freleté quassez

Cils qui peccont de tieu maniere.

Ore dira de la quinte file de

Luxure, quelle ad noun Foldelit.

La quinte file est Foldelit,

Q'au peine poet dormir en lit,

Tant en luxure se delite,

Si est commune a chascun plit,

En fait, en penser et en dit :

Par ce que deinz son cuer recite

Les fols pensers, son corps excite,

Dont plus que nature appetite 9200

Encroistre fait son appetit

Du flamme que nulluy respite,

Ainz chasteté tient si despote

Que riens puet estre tant depit.

Chascune jour de la semaine,

Ve, Foldelit sa vie maine

Preste au bordell sanz nul retrait :

Trop vilement son corps y paine

Quant est a chescun fol compaigne,

Que riens luy chalt quel ordre il ait ;

9177 enfait

Ainz quique voet venir au fait, 9211

Elle est tout preste en son aguait

Et offre et souffre son overaigne :

Mais certes c'est un vil mesfait,

Quant de son corps la marchée fait,

Du quoy sa char vent et bargaine.

Trestout le mond ne puet garder

La fole pute au foloier ;

Quant elle esprent du fol amour ;

Mais s'il avient que sanz danger 9220

Porra ses joyes demener

Sanz nul aguait a bon leisour,

De tant fait son delit maieur,

En quanque de si fol amour

Sciet en son cuer ymaginer :

Quant pute gist ove son lecchour,

Sovent controvent tiel folour

Dont trop devoient vergunder.

He, pute, ascoulte, en cest escrit

Par Jeremie dieus t'ad dit, 9230

Que tu ton chaitif corps as mis

A chascun homme a chascun plit

Ensi commun au Foldelit

Comme sont les voies du paiis,

U ly prodhons et ly caitis

Communement a leur devis

Porront aler, grant et petit.

He, pute, q'est ce que tu dis ?

Comment respondras a ces dis,

Dont dieus t'appelle en ton despit ?

Responde, o pute, ne scies tu 9241

Queu part vergoigne est devenu ?

De tes parens essample toi,

Q'en paradis se vironent nu,

Dont vergondous et esperdu

Tantost chascun endroit de soy

D'un fuill covry le membre coy.

Mais tu, putaine, avoy, avoy !

Es tant aperte en chascun lieu,

Sanz honte avoir d'ascune loy, 9250

Que je dirray, ce poise moy,

Tu as vergoigne trop perdu.

Pute et lecchour sont ressemblé

A la pantiere techelée,

9184 Cestassauoir

Q'auci les autres fait tachous
Des bestes solonc leur degré
Q'a luy se sont acompaigné ;
Et ensi cil q'est lecherous
Par son peché contagious
Tost fait les autres vicious,
Queux vers luy tient associé ;
Tout sicomme ly berbis ruignous
Corrupt du fouc les autres tous
De sa ruignouse enfermeté.
El viele loy dieus defendi
Q'entre les gens qui sont de luy
Ne soit bordell ne bordellant
Pour la luxure de nully ;
Mais au jour d'uy, ne sai par qui,
La loy se tourne nepourquant,
Et est souffert par tout avant
Que l'en bordelle maintenant.
Mais une chose je vous di,
Que ja deuré d'ascun vivant
N'ert par resoun si avenant
Comme ce que dieus ot establi.
Mais cestes jofnes pucelletes
Auci se font jolivettes
Pour Foldelit q'est courteur,
Vestont les cercles et les frettes,
Crimile, esclaires et burettes
Et bende avoec la perle entour ;
Mais qant ont mis si bel atour,
Par Foldelit font maint fol tour
En chantant a leur chançonnettes,
Que tout sont fait du fol amour,
Pour faire que les gens d'onour
Se treont a leur amourettes.
Quant Foldelit la jofne guie,
Sur tout desire d'estre amye
A luy pour qui vait languissant ;
Mais pour sa honte elle ose mie
Demander telle druerie,
Si ce ne soit par fol semblant :
Et lors regarde en suspirant,
Et puis suspire en regardant,
Pour l'omme traire a sa folie,
Que tant valt a bon entendant

9269 Iourduy

9285 Enchantant

Sicomme dirroit, 'Venetz avant,
Je vuill avoir ta compaignie.'
Sovent ensi par sa presence
Le fol corage d'omme ensense,
Qui pardevant n'en ot desir ;
Mais quant la femme assalt commence,
Lors falt que l'omme ait sa defence,
Dont fiert quant meulx ne poet garir,
Quant fole vait un fol querir,
Du fol trover ne poet faillir ;
Car tost sciet fol quoy fole pense,
Et tost se sont au consentir,
Dont sovent au petit loisir
Feront la longue dieu offense.
Mais s'il avient en telle guise
Que l'en ad garde sur luy mise,
Dont femme a son loisir faldra,
Lors falt a sercher la queintise
Que femmes scievent du feintise,
Dont ses gardeins descevera ;
Mais sache bien chascuns cela,
Ja nuls si fort luy gardera
Que le pourpos dont est esprise
Au bon loisir ne parlera ;
Si forte chose ne serra,
Q'amour du Foldelit ne brise.
Ensi quant Foldelit maistroie
La jofne, lors par toute voie
Que cuers ymaginer porroit
Celle art du femme en soi desploie,
Dont l'omme assote et veint et ploie,
Que tout le tourne a son endroit
La femme q'ensi se pourvoit :
Tantost q'uns fols amans la voit
Ne se porra tourner en voie
Des fols regards qu'il aparçoit ;
Si quide que la belle soit
Sur tout sa souveraigne joye.
Un arbalaste en la turelle
Est celle dame ou dammoiselle,
Quelle as gens prendre tout s'esgaie ;
De la blanchour de sa maisselle,
De sa poitrine et sa mamelle
La moustre fait, que l'en l'essaie :

9295 ensuspirant

9296 enreguardant

Mais sur tout fait plus grieve plaie
Quant les fols cuers corrupt et plaie
Des fols regards, dont l'omme appelle.
N'ad membre dont les gens n'attraie,
Si est ly reetz dessoutz la haie,
Dont om les fols oiscals hardelle.
O dieus, comment acompter doit
La femme qui par-tiel endroit
Les gens sur luy fait assoter ?
Des tantes almes qui deçoit
Elle ert coupablez au bon droit
Devant dieu, car par regarder
La volenté vient de toucher,
Que valt atant deinz son penser
Comme s'il ust fait tout a l'espoit
Le peché ; et ce puiss trover
En l'evangile tesmoigner,
Sicomme dieu mesmes le disoit.
Mais si la femme mette cure
En foldelit, d'asses plus cure
Cil homme qui par tout s'avance,
Et fait desguiser sa vesture,
Et ad bien basse la ceinture,
Et sur tout ce carolle et dance
Ove bien jolye contenance :
D'amours est toute sa parlance,
Et ensi par tiele envoisure
Prent d'une et d'autre l'aqueintance ;
Car tant est plain de variance
Q'il quiert nouvelle a chescune hure.
Du foldelit tout se convoie,
Quant doit venir par celle voie
U que verra les dammoiselles ;
Ne puet faillir, maisq'il les voie,
Que par delit son cuer n'esfroie,
Tant est surpris d'amour de celles.
Ne chalt si dames ou pucelles,
Nompas les bonnes mais les belles,
Des quelles poet avoir sa proie ;
Siq'il sovent deinz les ridelles
Les taste si soient femelles,
C'est un solas dont se rejoye.
De nulle chose garde prent
Cil qui du foldelit esprent,

9343 plusgrieve

Un soul estat ja n'esparnie ;
Ou soit Religieuse gent,
Ou mariez ou continent,
Ou sage ou pleine de folie,
Ou soit virgine ou desflourie,
Ou soit parente, pour se mie
Ne voet laisser ce qu'il enprent ;
Ne sciet q'amour plus signefie,
Mais toutes femmes sont amye
Dont puet complir son foltalent.
En chascun lieu, ou que ce soit,
Quiconque parle ou parler doit
Du bien, d'onour, d'oneste vie,
Ly fols amantz a son endroit
Trestout le conte tourneroit
En autres ditz de lecherie :
Et qui voet faire compaignie
Au Foldelit par janglerie,
Par quoy son gré deservirot,
Ja n'estoet autre courtoisie
Mais tout parler de puterie,
Dont plus son cuer rejoyeroit.
Mais qant au fin pour son mesfaire
Serra somons de s'ordinaire,
Et est soutz peine amonestez
Pour soy de son peché retraire,
Si fra, ce dist ; mais qant repaire
U sont ses foles ameistés,
Tant plus assote en ses pensés
Comme plus d'amour soit traivelez,
Dont fait apres folie maire ;
Combien qu'il soit escoumengez,
Ses foldelitz recommencez
Ne lerra pour le saintuaire.
Mais Foldelit, qant avenir
Ne poet a faire son desir
De celle u q'ad son cuer assis,
Du fol amour l'estoet languir,
Ne puet manger, ne puet dormir,
En plour tout changera ses ris,
Comme s'il estoit du tout ravis ;
Lors fait les notes et les ditz,
Si fait ove ce maint fol suspir,
Dont a sa dame soit avis

9430

Q'il de s'amour soit tant surpris,
 Qe sanz retour l'estoet morir.

Mais si tout ce ne poet valoir
 Au fin qu'il pourra son voloir
 Parfaire, lors du meintenant
 Il offre a donner son avoir ;
 Et s'il par ce ne puet avoir
 De son amour le remenant,
 Encore quiert il plus avant
 La Maquerelle, q'est sachant 9440
 Plus que ly deable a tiel devoir ;
 Et si luy vait trestout contant,
 La quelle luy vait promettant,
 Du quoy s'est mis en bon espoir.

L'en dist ensi par envoisure,
 Ce que polain prent en danture
 Toute sa vie apres dura ;
 Ensi du jofne femme endure
 En sa vielesce la luxure
 Que de s'enfance acoustuma ; 9450
 Du foldelit tant comme pourra
 La jofne se delitera
 Sanz point, sanz reule et sanz mesure,
 Et qant n'est qui la requerra
 Pour sa vielesce, lors serra
 La Maquerelle de nature.

Et ensi qant au rigolage
 Pour la fieblesce du viel age
 Ne peut souffire proprement,
 De lors sustient par son brocage 9460
 La jofne gent en leur putage
 Par son malvois excitement :
 Car l'art du Maquerelle aprent,
 Par quoy des gens reporte et prent
 Du lecherie leur message ;
 Q'encore elle ad delitement
 Pour traier a tiel parlement,
 Dont rejoÿt son fol corage.

Ce veons bien que de nature,
 Quant jofne busche de verdure 9470
 Ne puet ardoir primerement,
 Om met du sech, et par sufflure
 Tantost s'esprend tout en ardure,
 Et l'un et l'autre ensemblement.

Ensi vait de la jofne gent ;
 Qant ne s'accordont a l'assent
 Du Foldelit, lors deinz brief hure
 La Maquerelle les esprent
 De son malvois enticement,
 Et les enflamme de luxure. 9480

Sicomme l'en voit que les veisines
 Vendont au marché leur gelines,
 Tout tielement vent et bargeine
 La Maquerelle les virgines,
 Et les fait estre concubines
 Au fol lecchour qui les assaine
 Et donne la primere estreine ;
 Et si les fiert de celle veine,
 Q'apres des nulles medicines f. 55
 Serra guarie. O quelle peine 9490
 Om deust donner a la vileine
 Que ce procure ove ses falsines !

Et tiele y a q'en sa vielesce
 Devient d'amour la sorceresse ;
 Dont, qant ne puet par autre voie,
 Les cuers d'amer met en destresce :
 Mais plus que deable elle est deblesce,
 Quant foldelit ensi convoie ;
 Et qui par tiele se pourvoie
 De l'amour dieu loign se desvoie ; 9500
 Car il au primes se professe
 Au deable, et puis son dieu renoie :
 Vei la tresdolorouse joye,
 Q'ensi laist dieu pour la duesse !

Du Foldelit aici se pleint
 Nature, au quelle meinte et meint
 Se sont forsfait de leur folie,
 Quant leur luxures ont enpeint
 Comme jady's firon ly nounseint
 En la Cité de Sodomie, 9510
 Quelle en abisme ert assorbie.
 C'est celle horrible lecherie
 En quelle toute ordure meint ;
 Dieus et nature le desfie :
 Mais plus parler n'en ose mie,
 Car honte et resoun me restreint.

L'en puet ressembler Foldelit
 Au salemandre, quelle vit

9509 nonn saint

De sa nature el fieu ardent ;
 Ensi du fol dont vous ay dit 9520
 Ly cuers toutdis sanz nul respit
 S'eschaffe et art en folpensant
 D'ardour qui tout vait degastant
 En ceste vie, et plus avant
 Le corps avesques l'espirit
 Enflamme, u que ly fol amant
 Pour nulle amye ert refroidant,
 Car tout amour luy est desdit.

Trop fuist du Foldelit apri
 Uns philosophes de jady's, 9530
 Qui Epicurus nonn avoit :
 Car ce fuist cil q'a son avis
 Disoit que ly charnels delitz
 Sovrain des autres biens estoit,
 Et pour cela trestout laissoit
 Les biens del alme et se donnoit
 A sa caroigne ; dont toutdis
 Depuis son temps assetz om voit
 De ses disciples, qui toutdroit
 Suivent s'escole a tiel devis. 9540

Resoun est morte en telle gent
 Vivant nonn resonnablement,
 Ensi comme fait la beste mue.
 Si ont perduz entendement,
 Ensi come pert son gustement
 Cil q'est malade en fiebre ague,
 Qui plus desire et plus mangue
 Contraire chose qui luy tue,
 Qu'il ne fait pain de bon frument
 Ou chose dont se revertue : 9550
 Ensi qui Foldelit englue
 Del alme nul phisque entent.

L'apostre par especial
 Ce dist, que l'omme bestial
 Ne puet gouter ne savourer
 Viande q'est espirital :
 Rois Salomon dist autre tal,
 Q'en malvoise alme a demourer
 Puet sapience nulle entrer, 9560
 N'en corps soubgit a folpenser
 Des vices qui sont corporal
 Jammais se deigne enhabiter :

9524 plusauant

Car qui pecché voet herberger
 Tout bien forsclot de son hostal.
 Ce dist Senec de sa science,
 Que la plus grieve pestilence
 Q'om en ce siecle puet avoir,
 C'est foldelit d'incontinence,
 Qant om a sa caroigne pense
 Et s'alme laist a nounchaloir. 9570
 Ce sont ly porc horrible et noir
 Es queux ly deable ad son pooir,
 Comme l'evangile nous ensense ;
 Car quant ne sciet u remanoir,
 Lors Foldelit matin et soir
 Le herberge en sa conscience.

Dieus, qui le saint prophete estable,
 Un mot q'est molt espoentable
 Par Amos dist, comme vous dirrai :
 De la maison foldelitable, 9580
 Au lecherie acoustumable,
 Ce dist dieus, ' Je destruirai
 Le septre et tout anientirai,
 Q'onour ne joye n'y lerrai,
 Ainz trestout bien fray descheable.'
 Des tieux parolles je m'esmay,
 Car tu scies bien et je le say,
 Que dieux dist ne puet estre fable.

Du Foldelit naist Fol desir,
 Qui porte cuer du fol suspir, 9590
 Ove l'oill climant du fol reguart ;
 La bouche ne se sciet tenir,
 Que les fols ris avant venir
 Ne fait ; et puis enseigne l'art
 Du fol toucher, du quoy s'espant
 Ly fieus du lecherie et art,
 Que la raison fait amortir,
 Sique la chasteté s'en part,
 Et lors luxure de sa part
 Tout son voloir fait acomplir. 9600
 As portes d'enfern vait huchant
 Cil qui les femmes vait baisant,
 Saint Bede le fait tesmoigner ;
 Mais trop est fol qui huche atant,
 Dont il les portes soit entrant :
 Car tant puet homme fol hucher

9566 plusgrieue

Q'entrer l'estoet ; car ly porter
Les portes pour soy desporter
Legerement vait desfermant,
Et laist celluy qui voet entrer 9610
Tanq'en la goule a l'adverser,
U piert la voie large et grant.

Du foldelit avoir solas,
Danz Tullius, comme tu orras,
Nous dist de son enseignement,
'Luxure est vile en chascun cas,
Mais oultre trestous autrez estatz
Elle est plus vile en viele gent,
Ou soit du fait ou soit d'assent ;
L'un pis et l'autre malement 9620
Ne s'en pourront excuser pas.
Senec demande tielement,
Quant la Vielesce en soy mesprant,
Di lors, Jovente, quoy ferras ?

Qui s'est au Foldelit donné
Tantsoulement du freleté
Ne pecche, ainçois soi mesme entice
Plus q'il ne souffist au pecché ;
Toutdis remaint en volenté,
Du quoy sa fole char fait nice : 9630
Dont dist Bernards *que par justice*
La soule volenté du vice
Plus ert punie et condempnée.
Voloir que toutdis voet malice,
S'il toutdis en enfern perisse,
C'est resoun et droite equité.

**Ore dirra la descripcioun du
Leccherie par especial.**

Je truis escript *que* Leccherie
A la tresorde maladie
Du lepre en trois pointz est semblable :
Le primer point ce signifie, 9640
Que lepre d'omme en char purrie
Fait tache molt abhominable ;
Luxure ensi q'est incurable
Fait tache en l'alme plus grevable,
Dont a null jour serra guarie :
Q'au dieu primer fuist ressemblable,
Luxure, q'est desamiable,
La fait semblable au deblerie.

9618 plusvile

9669 plusfort

9684 lenguarist

Lepre est auci si violente
Que l'air ove tout le vent *que* vente 9650
D'encoste luy fait corrompu :
En ce Luxure represente ;
Car *par* tout, u q'elle est presente,
Les gens q'a luy se sont tenu
Leur bonnes mours et leur vertu,
Dont l'alme serroit maintenu,
Fait destourner en mal entente,
Q'au paine se sont aparçu
De leur folie, ainz sont deçu
Et en vielesce et en jovente. 9660

Ly tierce point q'en lepre esta,
C'est q'elle de nature fra
Al homme avoir puante aleine ;
Ensi Luxure, u que s'en va,
Plus *que* nuis dire le pourra
Puit en ordure trop vileine
Devant la magesté halteine ;
Des tous pecchés el vie humeine
N'est un qui plus fort puera :
Pour ce la halte voie meine, 9670
U ly puours sanz fin remeine,
Et *jammis* bon odour serra.

He, Leccherie, en tout empire
Comme l'en te doit *par* droit despire !
Car *par* ta flamme violente,
Come deinz la bible om porra lire,
Les cink cités au grant martire
Tu feis foundrer *par* grief descente
Jusq'en abisme la pulente ; f. 56
U la vielesce et la jovente 9680
Par toi les faisoit dieus occire,
Q'un soul n'eschapa la *tourmente*,
Mais Loth, qui portoit chaste entente,
Pour ce l'en guarist *nostre* sire.

Du Leccherie la despote
Ly philosophes nous recite
Six pointz des queux fait a loer ;
Oietz comme chascun nous *proufite* :
Primer du corps qui s'en delite 9690
La force fait amenuser,
Et l'alme apres fait occier,
La bonne fame en mal *tourner*,

Et la richesce fait petite,
La cliere vois fait enroer,
Et les oils cliers fait avoegler :
Loenge tiele est mal confite.
He, Leccherie plain d'ordure,
Ovesque ta progeniture
Maint cuer humein as affolé ;
Car qui tu tiens dessoutz ta cure, 9700
Au paine s'il jammis une hure
Te voet laisser de son bon gré.
Helas, tant belle chasteté,
Espousaille et virginité,
As corrompu de ta luxure,
Ou soit en fait ou en pensé ;
Poi truis qui se sont bien gardé
Tout nettement sanz ta blemure.

He, Leccherie ove tes cink files,
Comme tes delices sont subtiles, 9710
Dont fais no frele char trahir !
Au corps plesantes sont tes guiles,
Mais as nos almes sont si viles
Que devant dieu les fait putr.
Quoy dirray plus puant plesir ?
Delit au mort, joye au suspir,
Ce sont ly bien que tu compiles.
Dieus doint q'en puissons abstenir :
Au benuré se puet tenir
Qui corps par ton delit n'aviles. 9720

Ore dirra comment ly debles
autre fois fist son parlement, pour
agarder et assembler toute la pro-
genied. *sque* sont engendrez :
puis le r *age* q'estoit parentre
le S^r Pecché, sicome ad esté
dit pardevant.

Ore ai *par* ordre au fin complice
Mon conte de la progenie
Des vices, qui sont descenduz
Du deable et du Pecché s'amie,
Selone que la genologie
Avetz of du meinz en plus.
Tant sont ly mal en terre accrus,
Que si ly toutpuissant dessus

9737 plusauant

9716 autresfois

9763 enpry

N'en deigne faire son aie,
Ly malfiés, qui les ad en us 9730
Trestous ensemble retenus,
Fra contre nous mainte envafe.

Car tout ensi comme vous ay dit,
Ly deable, qui tant est maldit,
Donna les files du Pecché
Au Siecle, qui leur est marit,
Dont plus avant comme j'ay escrit,
Il ad sur celles engendré
Les autres que vous ay nomé.
Savoir poves q'en son degré 9740
Ly deable molt se rejoÿt
Voiant si large parentée,
Dont tout quide a sa volenté
De l'omme avoir l'alme en soubit.

Et pour cela tout maintenant
Un autres fois, sicomme devant,
Ly deable pour soy consailler
Pecché, q'est son primer enfant,
Et puis trestout le remenant
Au parlement fist assembler ; 9750
Mais devant luy quant vist estier
Si grant lignage seculier,
Comme de sept files sont naseant,
Grantment se prist a conforter ;
Si les commence a resonner,
Comme vous orretz parler avant.

Ly deables lors commence a dire :
'He, Pecché, chief de mon empire,
Primement je pleins au toy
Et a ces autres que je mire, 9760
Dont tu es dame et je su sire,
Q'en ma presence yci je voy :
Je vous en pry, conseillez moy
Par vostre engin, que faire doy
Del homme, que je tant desire.
Soubit fuist jady a ma loy,
Mais puis apres, ne say pour quoy,
De sa raisoun me fait despire.

Pecché, tu scies qu'il est ensi :
En paradis je fui saisi 9770
Jadis del homme a mon talent,
Q'a moy servir se consenti,

A mon voloir et s'obei;
 Mais puis apres, ne say comment,
 Resoum de l'alme le defent,
 Q'a moy ne voet acordement:
 Paour aici s'est esbahy,
 Car Conscience le reprent;
 Sique je faille molt sovent,
 Que je n'ay plain poair de luy. 9780
 Et pour ce par commun avis
 Le Siecle, q'est bien mes amis,
 Fis marier a mon lignage,
 Qui loyallyment m'avoit promis,
 De l'omme tout a mon devis
 Me metteroit celle alme en gage,
 Dont c'est bien drois q'il se desgage
 Et mette l'omme en mon servage.
 Mais quant le Siecle ad tout otz,
 Lors il adresca le visage, 9790
 Et dist que tout fuisit son corage
 De faire ce qu'il ot enpris.
 Lors fuisit grant noise des tous leés,
 Chascun disoit, 'Bien ad parlés
 Ly Siecle, et tous devons aider,
 Qui sumes de ses parentées,
 A faire tous ses volentés.'
 Ensi commençont a traiter
 Comment pourroient mestreter
 La char del homme et losenger 9800
 D'engins et des soubtilités.
 Si se firent entrejurer
 Trestous ensemble et conjurer
 Le mal dont serroit attrappez.
 Et lors ly Siecle ove sa semence
 A tempter l'omme recommence;
 Dont tielement le forsvoia,
 Que pour conseil ne pour defense
 Du Resoum ou du Conscience
 La char de luy ne s'aresta, 9810
 Qe trestout ne s'abandonna
 Au foldelit, dont foloia,
 N'en voloit faire resistance
 Pour l'Alme que l'aresonna;
 Car nulle resoum ascoulta,
 Ainz tient le Siecle en reverence.

9786 mettroit

Ly deable qui fuisit tout lour pierce,
 Auci Pecché, q'estoit la miere,
 Avoec le Siecle et sa mesnie
 Des vices, dont fuisit a baniere, 9820
 Ascuns devant, ascuns derere,
 Firont a l'omme une envale.
 Chascuns le fiert de sa partie,
 Ly uns d'orguil, ly uns d'envie;
 Mais Gule y vient la tavernere,
 Que l'estandard du Leccherie
 Porte en sa main, et hault escrie,
 'Ore est a moy, que je luy fiere.'
 Lors Avarice ove son fardell
 Vient au bataille, et un sachell 9830
 Des ses florins tenoit tout plein,
 Dont l'omme fiert comme d'un flaiell:
 Mais cil, quant senti le catell,
 Ne rescut point tieux cops en vein;
 Ainz maintenant tendist sa mein
 Et se rendist au capitein,
 Qui l'amena droit au chastell
 D'Accidie, u qu'il chascun demein
 Au deable paia son certain,
 Comme cil q'ert prisoum du novell. 9840
 Et lors s'assemblont tous les vices,
 Chascun apportoit ses delices
 Pour leur prisoum reconforter;
 Mais ils ne furont pas si nices
 A souffrir que deinz leur offices
 Resoum al Alme y puet entrer,
 Ne Conscience s'esquiere,
 Ainz du chastell firont fermer
 Les entrées des portes colices,
 Qe tout sont fait du fol penser; 9850
 Dont l'omme ne puet remembrer
 De son dieu ne de ses justices.
 Ore ad le Siecle ove s'alliance
 De l'omme tout le governance,
 Q'ascuns ne puet parler a luy,
 Si ce ne soit par l'aqueintance
 Du Pecché, qui celle ordinance
 Sur tous les autres ad basty:
 Par quoy Resoum s'est departy,
 Et Conscience s'est fu, 9860

Q'ils ne sont plus du retenance.
 Si dieus n'en face sa mercy,
 Trop longement poet estre ensi,
 Ainz qu'il ait sa delivrance.
 O quelle generacioun, f. 57
 Primerement delacioun,
 Q'ove touz lez autrez dieus maldit:
 Quant en fay memoracioun
 Mon cuer du contoubacioun
 Est pres tout mat et desconfit: 9870
 Car ore au peine nully vit,
 Q'ascune fois ne soit soubgit
 De leur malvois temptacioun.
 Maldit soit l'oure quant nasquit
 Pecché, dont corps ad son delit,
 Et l'alme sa dampnacioun.
 O quel lignage trop adverse,
 Dont la fortune nous adverse,
 Et mesmes dieu point ne s'acorde
 A l'omme q'ensi se diverse, 9880
 Qant des pecchés chascun diverse
 Du jour en jour tant se recorde:
 Mais tant sont vices a la corde
 Des queux Pecché cel homme encorde,
 Q'au peine si ne le reverse
 U toute joye se descorde,
 Si dieus de sa misericorde
 Ne trait celle alme a luy converse.
 Ore dirra de la propreté du
 Pecché par especial.
 L'apocalips q'est tout celeste
 Reconte d'un horrible beste, 9890
 Q'issoit de la parfonde mer:
 Corps leopart, ce dist la geste,
 Mais du leoun ot geule et teste,
 Des piés fuisit urce a resembler,
 Sept chief portoit cil adversier,
 Si ot disz corns pour fort hurter,
 Ove disz couronnes du conquete:
 Merveille estoit del esgarder,
 Trop se faisoit a redoubter,
 Car trop demenoit grant tempeste. 9900
 Le noun du beste l'en nomoit
 Pecché; mais ce q'il corps avoit

9868 enfay

12

Tout techelé, ce signifie
 Diverses mals, dont nous deçoit;
 La geule du leon, c'estoit
 Q'il tout devoure en sa baillie;
 Sept chiefs, as sept pecchés s'applique;
 Mais de disz corns fait envale
 As disz pceptz que dieus donnoit:
 Les disz couronnes par meistrerie, 9910
 Ce sont victoire en ceste vie,
 Qu'il sur les gens conquerre doit.
 C'estoit le monstre a qui donné
 Fuisit plain poair et plain congié,
 Au fin qu'il duist contre les seintz
 Combatre et veintre du pecché.
 O dieus, comme dure destiné!
 Qant tieles gens serront atteinz,
 C'est grant dolour as tous humeinz;
 Car nous autres, qui valons meinz, 9920
 Ne sai comment serrons gardé
 Du beste qui tant est vileins:
 Pour moy le dy, je m'en compleins,
 Trop sui de son venym enflé.
 Ce beste aici des piés et bras
 Fuisit urce, et par ce tu porras
 Savoir que l'urce ad tost occis
 Sa prole, quant la tient en bas
 Soubz luy, et par semblable cas
 Tost serra mort et entrepris 9930
 Cil qui Pecché avera soubmis.
 Helas, Pecché, je te maldis,
 Car par les files que tu as
 Par tout le siecle a mon avis
 Et les cités et les pais
 Par toy porront bien dire, helas!
 Helas, Pecché, comme es grant
 mestre!
 Par doulgour que fais de toi nestre
 Trestout le mond sempres t'onourt,
 Et laie gent et clerc et prestre, 9940
 Dont leur delit pourront acrestre:
 Pour toi servir chascuns y court,
 Par toi vient Mort primer au court,
 Par toi tout bien en mal destourt,
 Par toi tout droit vait a senestre,

Par toi l'en rit, par toi l'en plourt,
 Par toi la fantasie sourt,
 Dont sont deceu tout ly terrestre.
 Je te ressemble a les Sereines,
 Quant par leur douces vois halteines,
 U qu'ils chantont par halte mer, 9951
 Attraire font en leur demeines
 Les niefs siglans, et par soudeines
 Tempestes puis les font noyer.
 Au chat aici te doy sembler,
 Quant du sourris se fait juer,
 Et puis l'occit mangant ses treines.
 Comme clier estée te fais moustrer,
 Plain des flourettes au primer,
 Mais en yvern sont pas certaines. 9960
 Je te ressemble au poire douche,
 Qui porte bon savour au bouche
 Et est a l'estommac grevable :
 Je te ressemble au noire mouche,
 Les pures chars qant souffle et touche,
 Corrupt et fait abhominable :
 Je te ressemble au songe et fable
 Q'au toute gent son deceivable :
 Je te ressemble au celle couche
 Dont nuls au peine est relevable : 9970
 Tu es d'enfern le connestable,
 Par qui tout mal se claime et vouche.
 Je te ressemble au huiste close,
 U son venym ly deable enclose ;
 Auci je te ressemble au pie,
 Qant sur caroigne soi repose :
 Tu as visage de la rose,
 Et es plus aspre que l'urtie :
 Tu es sophistre en la clergie,
 Dont l'art conclude en heresie : 9980
 Ne say la ryme ne la prose
 Dont la centisme part endie
 De ta malice, en ceste vie
 Ne te falt plus ascune chose.
 Qui du Pecché prent remembrance
 Comment primer a sa naissance
 Du ciel les angres fist ruer,
 Comme puis Adam par fole errance
 Envers son dieu mist en distance,

10012 plustost

Et puis en terre fist noyer 9990
 Trestous forsque piscon du mer
 Et soul Noë, qui dieus salver
 Voloit ovesque s'alliance,
 Et puis encore fist errer
 Pour les ydoles honorer
 Les gentz encontre leur creance.
 Des cestes choses qui bien pense,
 Et puis regarde a l'evidence,
 Comme chascun jour l'en puet veoir
 Mortiele guerre et pestilence, 10000
 Que du Pecché trestout commence,
 Lors doit il bien hidour avoir :
 Car n'est cité, chastel, manoir,
 En quel ne se fait remanoir
 Pecché, car tous obediene
 Luy portent, et pour dire voir
 Ou pour delit ou pour l'avoir
 Luy font honneur et reverence.
 Sur tous les regnes q'ore sont
 Pecché commant, Pecché somont, 10010
 Et tous au Pecché font hommage :
 Et molt plus tost d'assetz le font,
 Car ly malfiés, qui tout confont,
 Toutdis recovre al avantage,
 De ce qu'il fist le mariage
 Jadis du Siecle a son lignage,
 Comme je vous contay paramont.
 Si dieus ne pense a tiel oultrage
 Rescourre, trop ert le damage
 Des almes que perdu serront. 10020
 Mais des tous biens cil q'est ra-
 cine
 Ne laist ja mal sanz medicine ;
 Combien que ly malfiés soit fort
 Par Pecché q'est de sa covine,
 Nientmeinz de la vertu divine
 Dieus en volt faire son confort
 Pour l'alme, a resister le tort
 Du deable et du malvoise sort,
 La quelle vient de celle orine
 Que meyne jusques a la mort : 10030
 Mais ore oietz comme se remort
 Resoun par Conscience fine.

10026 envolt

Ore dirra comment Resoun et
 Conscience prieront dieu remede
 contre les sept vices mortielx
 ove leur progenie, et dieus donna
 sept vertus a Resoun contre
 eaux.

Trestous vous avez bien oi,
 Qant Pecché l'omme avoit saisi
 En sa prisonne, meintenant
 Resoun et Conscience aici
 Loign de la court furent bany :
 Mais ils s'aleront plus avant
 Pour soi compleindre au toutpuissant
 De ce que vous ay dit devant, 10040
 Comment cel homme estoit ravi
 Des vices, dont il avoit tant,
 Par quoy ne furent mais puissant
 A gouverner l'estat de luy.

Enmy la court superior
 Devant dieu firon leur clamour
 Ensi Resoun et Conscience :
 Leur advocat et procurour,
 Et sur tout leur coadjutour,
 C'estoit Mercy, qui d'eloquence f. 58
 Tous autres passoit du science. 10051
 Cil contoit en la dieu presence
 Le grant meschief, le grant dolour,
 Dont il prioit avoir defense :
 Dieus luy donna bonne audience
 Et sur ce luy promist socour.

Mais pour ce que les sept pechés
 Furont au Siecle mariez,
 Comme je dis au commencement,
 Et que tant sont multepliez 10060
 Les files q'en sont engendrez,
 Dieus ordina semblablement
 Un mariage, oietz comment.
 Il ot sept files proprement,
 Les quelles des tous biens doez
 Au Resoun donna franchement
 En mariage, et cil les prent
 Pour l'enchesoun que vous orrez.

Dieus, qui lez choses tout pourvoit,
 Pour ceste enchesoun le faisoit, 10070

10038 plusauant

De Resoun ensi marier,
 Qu'il des vertus q'espouseroit
 Autres vertus engendreroit,
 Dont se pourront multeplier ;
 Sique chascune en son mestier
 Doit contre un vice resister,
 Un contre un autre, au tiel endroit
 Que l'Alme se pot enforcer
 Son fol corps a desprisonner,
 Q'a lors des vices pris estoit. 10080

Resoun, q'estoit et simple et sage,
 Molt s'esjoyt deinz son corage
 Qu'il tieles femmes duist avoir,
 Q'estoient de si halt parage,
 Comme de son propre dieu lignage,
 Dont il fuist mis en bon espoir
 Les vices mettre a nonchaloir ;
 Car dieus l'accrust du grant pooir,
 Si luy donnoit en heritage
 De son saint ciel le beau manoir, 10090
 U qu'il sanz fin doit remanoir
 Et tenir en franc mariage.

Resoun, qui bien s'estoit pourveu
 Au jour des noeces, ot vestu
 La robe yndoise ove blanche raie ;
 Par l'un colour est entendu
 Constance en le service dieu,
 Et l'autre que du blanchour raie
 Signe est du netteté verrière ;
 La coife aici dont dieus s'appaie 10100
 Portoit, que tout estoit cosu
 De sapience : ensi s'esgaie
 Resoun, qui son penoun desplaie,
 Que ja des vices n'ert venu.

Les dames vienont de la tour,
 Chascune estoit du noble atour,
 En blanche robe bien vestue.
 Mais Conscience fait maint tour
 Pour adrescer la gent entour,
 Q'a celle feste estoit venue ; 10110
 Comme Mareschals les uns salue,
 Les uns cherist, les uns argue,
 Par tout se peine a faire honour :
 Sa robe estoit comme d'une nue,

10061 qensont

La quelle au plus sovent se mue
Diverse, et change sa colour.

Les dames ensi bien pareies
Se mistront hors de les pareies
Vers le moustier de saint delit,
U que leur mary toutes veies
Comme ses amies et ses preies

Leur attendoit; si ot eslit
Trois menestrals, ly quel sont dit
Bon pensement, Bon fait, Bon dit,
Qui les cornont par leur journeies,
Dont s'esjoyont grant et petit
Des joyes qui sont infinit,
Qui valent outre tous moneies.

Chascune dame en son degré
Portoit son noun approprié
Esript, dont fuist la meulx vailante;
Encontre Orgueil Humilité,
Encontre Envie est Charité,
Et encontre Ire la tençante
Est Pacience la taiçante;
Encontre Accidie la dormante
Prouesce y vient apparillée;
Contre Avarice la tenante
Franchise y vient la despendante,
N'ert pas ovele l'assemblée:

Et puis encontre Gloutenie,
Q'est de nature l'anemie,
La dame y vient q'ad noun Mesure;
Et lors encontre Leccherie
Vient Chasteté la dieu amy
Tout coiemment sanz demesure:
Et mcintenant vient pardessure
Ly prestres qui tous les assure,
Qui Gracedieu, si je bien die,
Avoit a noun, mais par droiture,
Pour ce qu'il savoit de lettrure,
Ad l'espousaille au fin complice.

En la presence au souverain
Vient Conscience primerein,
Q'au moustier les dames mena,
U Gracedieu leur chapellein
Les faisoit prendre mein au mein,
Et depar dieu les affia;

10115 plussouent

Et puis leur messe ensi chanta
Qe dieus en bon gré l'accepta,
Car l'Alme y offrist son certain,
Itiel comme dieus le commanda:
Resoun ses femmes moult ama,
Car moult furont du noble grein.

Ensi dieus de sa courtoisie
Encontre l'orde progenie
Des vices, qui tant sont maldit,
Au fin que l'alme en soit guarie,
Par mariage il associe
Les sept vertus, comme vous ai dit,
Qui sont verrai, bon et parfit
Par grace du seint esprit,
Au Resoun, qui de sa partie
S'enforce dont soit desconfit
Ly deable, et l'Alme a son droit plit
Remise: oietz chançon flourie.

Puisq'il ad dit devant comment
Resoun espousa les sept vertus,
oredirra comment contre chascune
file des vices engendra une file
des vertus. Et primerement com-
mencera a parler de les cink files
les quelles sont engendrez de
Humilité, dont la primere file ad
noun Devocioun, contre le vice de
Ypocrisie.

Humilité cink files meine,
Par quelles l'Alme se remeine
Au Resoun, dont tu dois nomer
Devocioun la primereine,
Quelle en secré simple et souleine
Y vient, qant voet son dieu prier.
Ensi nous fist dieus enseigner
Q'au temps que nous devons orer
N'ert chambrein ne chambreine,
Ainçois devons les huiss fermer
Pour noz prieres affermer;
Car dieus ascoulte au tiel enseine.

La vertu de Devocioun
Toutdis retient en sa maisoun

10168 ensoit

Une autre, que n'est pas aperte:
Celle ad tout proprement a noun
La bienamé sainte Oreisoun,
Qe ja ne quiert ou gaign ou perte
Du siecle avoir pour sa decerte,
Ainz loign des gens si comme deserte,
Que nuls en sache si dieus noun
En dieu priant se tient coverte,
Q'Ipocresie ne perverte
Ne son penser ne sa leçon.

Q'om doit orer souleinement,
Q'om doit orer tout plainement,
Q'om doit en lermes dieu prier,
Q'om doit orer bien humblement,
Q'om doit orer communement,
Q'om doit aici continuer,
Q'om doit la bonne peas orer,
Q'om doit par orisouns aider
Son Roy, aici la morte gent,
Q'om doit par priere allegger
Noz vices, tout ce puiss monstrer
Esript du viel essablement.

Q'om doit orer soul et celée:
Ce fist ly prophete Helisée,
Qant il sur soy les huiss ferma,
Que nuls agardoit son secré,
Par quoy l'enfant q'ot mort esté
En dieu priant resuscita;
Et Moyses en l'arche entra
Tout soul, qant pour le poeple ora:
Seint Luc aici par tiel degré
Dist que no sire soul monta
En la montaigne, u qu'il pria,
Qant l'autre gent s'estoit alé.

Q'om doit orer tout plainement
Senec nous fait enseignement,
Si dist, qant l'en dieu priera,
Sanz parler curiouslyement
Et sanz nul double entendement
Du plain penser plain mot dirra,
Car double lange dieus n'orra:
David tesmoigne bien cela,
Disant que dieus au toute gent
Est prest, qant om l'appellera,

Maisque tout verité serra
Q'il prie, et nounpas autrement.
Que l'en doit faire oracioun
Par grande humiliacioun,
Ce dist David, 'Soiez sougbit
Au dieu sanz point delacioun,
Si fai ta supplicacioun.'
Et tout ensi je truis escript
Que Daniel jady le fist;
Trois fois le jour au terre il gist
En sa genuflectacioun,
Priant au dieu q'il le guarist,
Q'en Babyloigne ne perist
D'estrangle fornicacioun.

De Machabeu aici lisant
Je truis q'au terre engenulant,
Et tout le poeple ovesque luy,
S'estoient mis en dieu priant
Qu'il leur aidast du fel tirant,
Antiochus leur anemy,
Le poeple dieu q'ot poursuy;
Dont leur priere dieus oy,
Si fist de sa vengeance tant
Qe tout vivant son corps purry:
Jerusalem s'estoit guarri
Par ce que vous ai dit devant.

Q'om doit orer en lermoiant,
De ce nous ert Sarre essamplant,
Q'en plours prioit trois jours et nuytz,
Au fin que dieus luy fuist aidant
De honte q'om luy vait disant
Pour sept barons q'elle ot perduz:
Des plours Thobie aici je truis,
Qant voegle estoit et fuist confus
Du femme qui luy vait tençant:
Molt fuist leur plours de grans vertus,
Car l'un et l'autre est socourrus,
Sicomme l'histoire est devisaunt.

Dans Helchana cil espousoit
Anne et Phenenne, et avenoit
Sique dame Anne estoit bareine;
Mais de ses lermes dieu prioit,
Dont Samuel deinz brief conçoit;
C'estoit priere bonne et seine.

10197 ensache

Et qui dist que la Magdaleine
 Lors ne plouroit au bone estreine,
 Qant au manger u dieus seoit 10281
 Pour un poy d'eau chalde et veine
 Du vie gaigna la fonteine,
 Qe des tous mals la garisoit ?
 Q'om doit aici toutdis orer
 Saint Luc le fait bien tesmoigner :
 Quant nostre sire ot en sa guise
 Conté comment se doit troubler
 Ly mals du siecle et adverser
 Contre le jour du grant Juise, 10290
 As ses disciples lors devise,
 Que s'ils en vuillont la reprise
 Et les *tourmens* sauf eschaper,
 Par grant devocioum enprise
 Priere sanz recreandise
 Leur falt toutdis continuer.
 L'apostre dist q'au dieu plesance
 Molt valdra la continuance
 Del *homme* just en dieu priant :
 La bible en porte tesmoignance, 10300
 Qant Amalech par mescreance
 Ove Josué s'est combatant ;
 Tant comme ses mains estoit levant
 Dans Moises en dieu priant,
 Ot Josué la meillour lance ;
 Mais qant des mains fuist avalant,
 Ert Amalech a son devant
 Et Josué fuist en balance.
 Q'om doit communement prier
 L'en poet avoir bon essampler 10310
 De Josaphat Roy de Juda,
 Qant le grant host vist assembler,
 Qe trop faisoit a redoubter,
 Des Ciriens qu'il redoubta :
 Le poeple en commun s'assembla,
 Chascuns devotement pria
 Qe dieus les volsist socourer :
 La vois commune dieus oya,
 Dont chascun autre entretua
 Des anemys a l'encontrer. 10320
 Q'om doit aici prier la pes
 Essample nous avons du pres

10292 envuillent

10300 enporte

10334 iensuy

10345 entrouvras

Par le prophete Jeremie,
 Qant *commandoit que* sanz reles
 Au poeple quel estoit remes
 Du *transmigracioum* en vie,
 De lors avant chascuns supplie
 Qe dieus en pes maintiene et guie
 Jerusalem, *sique* jammes
 Soit d'anemys prise ou saisie, 10330
Sique sa loy n'en soit blemie,
 Ne de son poeple y soit descres.
 Qe pour le Roy et pour ses fitz
 L'en doit orer j'en suy tout fis,
 Car ce faisoit Baruch escrire
 A Joachim, q'ert ses amys,
 Qu'il feist prier en son païs
 Pour Nabugod, qui tint l'empire,
 Et pour son fils, qui puis fuist sire,
 C'est Baltazar ; dont puisse je dire, 10340
 Puisqu'il ensi firont jadyz
 Pour Roy paien, meulx doit souffire
 Priere que l'en doit confire
 Pour cristien, ce m'est avis.

Un autre essample en troveras,
 Si tu la bible bien liras,
 Comment Cyrus ly Rois Persant
 Donna congé a Scribe Esdras
 D'edifier en son compas
 Jerusalem, qui pardevant 10350
 Fuist gaste : et ce faisoit par tant
 Qe tous fuissent pour luy priant
 Deinz la cité cils q'en ce cas
 Y duissent estre enhabitant,
 Au fin *que* dieus ly toutpuissant
 Govere ses roials estatz.

Q'om doit orer pour la gent morte
 Essample avons *que* nous enhorte
 De Machabeu certainement :
 Et sur ce resoun le nous porte 10360
 Que l'en par droit aide et supporte
 Celluy qui n'ad dont proprement
 Se poet aider ; car cil q'attent
 En purgatoire n'ad comment
 Pour allegger sa peine forte,
 Si noun qu'il plect au bonne gent

Prier pour son alleggement,
 Qe dieus en pité le conforte.
 Q'om doit orer remission
 Des pechés, je truis mencion ; 10370
 Cils d'Israel ensi faisoient
 Venant de leur captivesoun :
 Esdras commença s'oreisoun,
 Et cils del oir s'assembloient
 En la Cité u qu'ils estoient,
 Dont de leur mals pardoun prioient,
 De ce q'en fornicacioum
 Estranges femmes pris avoient :
 Pour ce q'ensi se repentoient
 Dieus en fist l'absolucioum. 10380

Mais en priant outre trestout
 Il falt *que* l'omme en soit devout,
 Car meulx valt prier sanz parole
 A celluy qui son cuer y bout,
 Qe vainement a parler moult
 Sanz bien penser, du lange sole :
 Car sainte lange ove pensé fole
 Ne valt ja plus que la frivole,
 Que sanz merite dieus debout ;
 Sicomme l'en fait de la citole, 10390
 Dont en descord la note vole
 Et grieve a celluy qui l'escoult.

Cuers q'a sa lange se descorde
 En sa priere a dieu n'acorde ;
 Ainz l'un ove l'autre ensemblement,
 Qant lange son penser recorde
 Et ly pensiers son cuer remorde,
 Lors prie a dieu devotement,
 Par si qu'il prie honnestement :
 Car ja si bon n'ert le piment, 10400
 S'il en puante coupe et orde
 Soit mis, au boire om pert talent ;
 Ne cil qui prie laidement
 Ja n'ara dieu de sa concorde.
 Isidre, q'estoit clerc parfait,
 Dist *que* priere est lors bien fait,
 Qant om ne pense point aillours ;
 Mais qant ly pensiers se retrait,
 Du quoy ly cuer au siecle vait,

10380 enfist

10381 enpriant

10382 ensoit

10416 enait

10435 plusbenignement

Qanque l'en prie est a rebours. 10410
 Seint Augustin ly *grans* doctours
 Dist que priere des criours,
 Ove cuer muet, est imparfait,
 Qant bouche et cuer sont descordours :
 Combien q'om prie as *grans* clamours,
 N'est resoun qu'il merite en ait.
 Ne poet valoir celle oreisoun
 Q'om prie sanz devocioum ;
 Ainz om la doit bien ressembler
 As nues fuiles du buissoun, 10420
 Qe fruit ne porte en sa saison ;
 Auci ressemble au messenger
 Q'om fait sanz *lettres* envoyer
 Et sanz enseignes pour aler
 Devers estrange regioum f. 60
 Au sire *que* l'en voet prier :
 Ove vuide main le fist mander,
 Dont vuid reverte a sa maisoun.
 Mais cil q'au droit voet dieu prier
 L'estoet encore a regarder 10430
 Q'il porte ove soy ascun present
 De son bon oeuvre a presenter,
 Tiel que son dieu voet accepter ;
 Dont pour le *down* q'est precedent
 Luy deigne plus benignement
 Donner pitous entendement
 A ce que l'en voet supplier :
 Car qui s'ordeine tielement
 Lors doit avoir par jugement
 Un *down* pour autre *down* donner.
 Je truis escript en Exodi, 10441
 Qe Moyses le dist aici
 Au poeple et ensi les enhorte,
 Qe devant dieu se doit nully
 Vuid apparer, ainz donne ensi
 Q'il pour son *down* loer reporte ;
 Car a celuy clot dieus sa porte
 Qui toutdis prie et riens apporte,
 Un tiel n'est pas le dieu amy :
 Mais q'umblement vers dieu se porte
 Et s'alme des bienfaitz supporte, 10451
 Cil fait molt beal present a luy.

L'en porra *prendre* essamplerie
 El temps qant regnoit Ezechie,
 Comment ly poeples lors prioit :
 Chascuns y plourt, chascuns y crie,
 Chascuns requiert, chascuns supplie,
 Et sur trestout chascuns donnoit
 Offrende solonc son endroit :
 Car lors fuist la priere au droit 10460
 Ove la devocioun complie ;
 Dont *notre* sires l'acceptoit,
 Grantoit, voloit et confermoit
 Que leur priere fuist ote.

L'en puet essampler ensemment
 Q'om doit donner devotement,
 En Exodi qui bien lirra,
 Qant l'en faisoit *primerement*
 Celle arche du viel testament,
 Chascun ses dons y presenta 10470
 Priant, et dieu les accepta :
 Devocioun fist tout cela,
 Car dieus les cuers voit et entent,
 Et quant le fait s'acordera,
 Lors est tout fait q'appartendra
 A prier dieu plainement.

Q'en Oreisoun soit grant vertu
 Essample avons q'est contenu
 Dedeinz la bible, u Moyses
 El grant desert le poeple hebreu 10480
 Mena, du ciel survint un ficu
 Par sa priere, et les malves,
 Q'encontre dieu furent engres,
 Tout arst, q'un soul n'y fuist remes,
 Droit pardevant celle arche dieu.
 El novell testament apres,
 Qui bien lira des seintz les fees,
 Maint beal miracle en est venu.

La vertu du *bonne* Oreisoun
 Est la verraie guarisoun 10490
 Encontre toute pestilence
 Q'al alma fait *invasioun* ;
 Car selonc la temptacioun
 Des sept pechés ove *leur* semence
 Sainte oreisoun, q'en dieu commence,
 Sept *bonnes* cures contrepense,

10488 enest

10499 endonner

10506 isucie

Dont guarist leur infeccioun,
 Sicomme Jerom de sa science,
 Pour nous en donner l'evidence,
 Reconte la devisioun. 10500

Encontre Orguil *primerement*
 Sainte Oreison molt humblement
 Au terre se genulle en bas ;
 Puis bat son pis molt reddement
 En cas q'Accidie le surprent ;
 Son cuer esveille isnele pas,
 Et puis encontre les fallas
 D'Envie et d'Ire dist, ' Helas !'
 Pour prier plus devotement :
 As tous pardonne leur trespas, 10510
 Au fin *que* par semblable cas
 Luy face dieus pardonement.

Encontre les mals d'Avarice
 Seinte Oreisoun de soun office
 En halt le ciel vait regardant ;
 U voit tant riche benefice,
 Dont tient cel homme plus *que* nyce
 Qui d'Avarice est covoitant :
 Et puis encontre le pecchant
 Du Leccherie le puant 10520
 Et Gloutenie ove sa delice,
 Des lermes s'alme vait lavant
 Et ensi se vait guarisant
 Du toute espritiele anguisse.

Devocioun en ses prieres
 Suspire et plourt *par* six manieres,
 Dont ad remors le pensement :
 Ses malvoistés q'il voit plenieres,
 Dont ad mesfait, sont les *primeres*
 Par quoy plourt au commencement :
 Et puis qant pense le tourment 10531
 Qu'il ad deservy duement,
 D'enfern les peines tant amieres,
 Trestout deschiet en plourement ;
 Car lors ne sciet sanz dieu comment
 Se puet aider en ses misereres.

Ly tierce plour *que* luy constreigne
 C'est du *prochein* et du *procheine*,
 Pour *leur* mesfait, pour leur peché,
 Q'il voit tout jour de la semeine : 10540

Et puis, qant voit *comme* se desmeine
 De ses voisins l'adverseté,
 Lors plourt et prie en grant pité,
 Comme s'il sentist en son degré
 Del autri grief toute la peine,
 Au fin que dieus en salveté
 Le corps a sa prosperité
 Et l'alme a sa mercy remeine.

Le quinte plour c'est qant il pense
 Comme ceste vie est plain d'offense,
 Et de bienfaire en aventure, 10551
 Si crient du char la negligence,
 Q'il n'en deschiece el dieu presence ;
 Car ce nous dist sainte escripture,
 Qui bien sta voie q'a nulle hure
 Soit jus rué de sa monture,
 Dont ait blemé la conscience :
 Car molt sovent qui plus s'assure
 Plus tost cherra, si dieus n'el cure
 Par support de sa providence. 10560

Le siste plour n'est pas en vein,
 Ainz est tout ly plus *soverein*
 Dont la bonne alma puet plorer :
 C'est pour l'amour de dieu soulein,
 A qui tout ly cynk sen forein,
 Ove le corage tout entier,
 Sont mis de servir et amer
 Par si tresardant desirer,
 Que tout le joye q'est mondein
 Luy semble anguisse et encombrer ;
 Dont falt toutdis a suspirer 10571
 Au fin q'il soit de dieu *prochein*.

Du plour q'ensi vous ai descrit
 En l'evangile truis escrit :
 ' Cil est benoit qui plourt yei
 En corps ; car puis en esprit
 Des joyes qui sont infinit
 Serra joyous devant celluy
 Par qui tout bien sont remery ' :
 Car dieus demande de nully 10580
 Forsque le cuer luy soit soubit
 En droit amour, car cil q'ensi
 Emploie son desir en luy
 Prent des tous bien le plus parfit.

10559 Plustost

10562 plussouerein

10604 Encontemplant

• Comme l'escripture nous diffine,
 Devocioun q'est *bonne* et fine
 Ad Contemplacioun s'amie
 De son conseil, de sa covine ;
 Que nuyt et jour jammais ne fine
 Pour dieu sercher de sa partie : 10590
 A ce tout met et tout applie
 Son cuer, son corps, sanz departie
 Ja d'autre chose n'est encline ;
 Dehors vit *par* humeine vie,
 Mais *pardedeinz* elle est ravie
 Siq'en pensant toute est divine.

Lors ayme a estre solitaire,
 Dont en les angles se fait traire,
 Siq'en repost soulainement
 Poet sa devocioun parfaire ; 10600
 Car ne voet point *que* son affaire
 Soit aparceu d'aucune gent :
 Mais la se tient tout colement
 En contemplant son pensement,
 Sicomme la vierge solait faire,
 Qant ayme et vergondousement
 Soulaine son amy attent,
 Dont soit ravie en secretaire.

Quant la *bonne* alma ensi sultive
 En l'amour dieu est ententive, 10610
 Dont soit ravie a son amant,
 Comme fuist saint Paul, lors est pensive
 En halt le ciel contemplative,
 Dedeinz son cuer considerant
 Comment entre eaux sont diversant
 Le ciel et terre en leur estant :
 L'un donne joye et l'autre prive, f. 61
 L'une est petite et l'autre grant,
 L'un est des tous biens habondant,
 Et l'autre du poverte estrive. 10620

Lors voit *que* l'un ad belle haltesce,
 Et l'autre est basse et tout oppresse,
 L'un ad franchise, l'autre ad servage,
 L'un ad clarté, l'autre ad voeglesce,
 L'un ad desport, l'autre ad destresce,
 L'un est constant, l'autre est salvage,
 L'un est certain, l'autre est volage,
 L'un ad mesure, l'autre ad oultrage,

L'un ad vilté, l'autre ad noblesce,
L'un est paisible, et l'autre esrage, 10630
L'un est tresfole, et l'autre est sage,
L'un fait guarir, et l'autre blesce.

Quant tout ce poise en sa balance,
Et plus avant prent remembrance
De son amour, de son desir,
Q'elle ad vers dieu, lors n'ad plesance
Du ceste vie, ainz par semblance
Commence au siecle de mourir,
Et pour despire et vil tenir
Qanque le mond poet contenir 10640
D'Orguil ove toute s'alliance :
Car tant luy tarde au dieu venir
Q'en ceste vie fait sentir
Tout autre joye a luy penance.

Car cils qui sont vrai contempliers
Sont demy mort as seculiers,
Si desiront la mort present
Plus que sauf port ly mariners,
Ou plus que fait ly labourers
En attendant son paiement, 10650
Plus que gagners son augst attent,
Ou que viners son vinement,
Ou plus que fait ly prisoniers
Son rançoun et delivrement
Ou plus que son revienement
Ly peregrins q'est long aliers.

Gregoire dist en son escrit,
En contemplacioun qui vit
Du riens ou monde est en paour ;
Comment q'il plourt, comment q'il rit,
Toutdis se tient en un soul plit, 10661
Tant est suspris de fin amour,
Qui luy constreigne nuyt et jour :
Pour regarder de son seignour
La face, c'est tout son delit,
C'est son penser sanz nul rettour ;
Dont dieus luy donne au chief de tour
Tout son desir sanz contredit.

Des philosophes ot plusour
Qui dieu constrent creatour 10670
Par ses foraines creatures,
Son sens, sa beauté, sa valour ;

10634 plusauant

Mais nepourqant le droit savour
Leur faillist, ainçois d'autres cures
Demeneront leur envoitures,
Ly uns pour savoir les natures
Des bestes et d'oisealx entour,
Ly autres firon conjectures
D'astronomye et des figures,
Q'a dieu ne firon plus d'onour. 10680

Mais Contemplacioun en dieu
Qui l'ad, lors est de grant vertu,
Q'il est ad dieu conjoint ensi
Par si tresamoureux englu,
Qe tout en un se sont tenu
Sanz departir : o dieus mercy !
De dieu penser tout est norry,
Repu, vestu et rejoy,
Dont corps et alme est soustenu :
Il met soy mesmes en oubly 10690
Par fin amour q'il ad de luy,
Tanq'il soit tout a luy venu.

Trop est l'amour fins et loyals
Qui tous les eases et travals
Oublist pour soul de dieu penser,
En qui tous biens sont principals.
Tiels cuers est bien celestials,
Qant tielement sciet dieu amer ;
Dont om pourra le contempler
A celle eschiele ressembler 10700
Que vist Jacob, qui parigals
Ove l'angel dieu se fist luter ;
Jusques au ciel la vist estier,
Dont y montont ly dieu vassals.

Du Contemplacioun la foy
Moult bien ressembler je le doy
A la chalandre en sa nature,
La quelle au mye nuyt tout coy
Devers le ciel prent son voloy
Si halt comme puet en sa mesure ; 10710
En terre auci qant y demure,
Ne voit malade en ascune hure
Qui doit mourir, ainz en effroy
S'en tourne et vole a grant alure :
Cist oisel porte la figure
Du Contemplacioun en soy.

10650 Enattendant

En la deserte regioun
Pres du pais Cithaie ad noun
Sont unes molt horribles bestes,
Q'ont corps et coue du lion, 10720
Et portent d'aigle la façoun
Des pées, des eles et des testes,
Si vont corrant par les terrestes,
Volant par l'air sicomme tempestes,
Oisel et beste, et sont Griffoun,
C'est leur droit noun selonc les gestes :
Ne pourra faillir des molestes
Cil q'ils tienont en leur bandoun.

Deinz le desert q'ai susnomé
La riche pierre y est trové 10730
Que l'en appelle Smaragdine,
Q'est des Griffons si fort gardé,
Qe par bataille ert conquesté
Ainçois que l'omme en ait seisine :
Mais une gent y ad veisine
Encoste celle salvagine,
Qui Arimaspi sont nomé,
Si n'ont q'un oill, mais tant est fine
Qe plus que deux leur eslumine
Du molt subtile clareté. 10740

Par celle gent, q'est bien hardie,
La riche pierre y est cuillie
Malgré Griffoun ne leur aguait ;
Mais nepourqant de leur partie
Trop font au gent dure envale,
Ainçois que nuls la pierre en ait.
Pour nostre essample est tout ce fait,
Comme saint Remy le nous attrait,
Qui fuist expert de la clergie :
Ce n'est pas chose contrefait, 10750
Car Contemplacioun parfait
Du grant misteire signefie.

Pour parler du desert primer,
Ce doit a nous signefier
Un cuer desert du toute cure
Du quelque chose seculier ;
Et puis du pierre pour parler,
Quelle est bien cliere en sa verdure,
Pour ce q'elle est tant fine et pure,
Tout signefie par figure 10760

10734 enait

Le dieu que nous devons amer ;
Mais ly Griffoun de leur nature
Sont deable, qui nous courront sure
De tout bon oeuvre a resister.
Car toutdis qant prodhomme enprent
A cuiller deinz son pensement
Dieu, q'est la pierre des vertus,
Ly deable par enticement
La pierre contre luy defent,
Q'au fin ne soit par luy tenuz : 10770
Mais celle gent q'ai dit dessus
D'un oil tout soul, qant sont venuz,—
C'est l'oil du cuer, dont clierement
Dieu voient,—tantost ont vencuz
Le deable, car ja n'ert deçuz
Cil qui voit dieus parfaitement.

C'est l'oil parfait, par quel om voit
Trover la pierre q'est benoit,
Quelle ad el ciel sa residence ;
C'est l'oil qui fait prier au droit, 10780
Q'ipocresie en nulle endroit
De la mondeine reverence
Luy touche, ainz dieu soul voit et pense ;
C'est l'oil de qui tout bien commence,
C'est l'oil q'en halt le ciel pourvoit
Et la vitaille et la despense,
Dont pardevant la dieu presence
Sanz fin celle alme vivre doit.

La vertu q'est en contempler
Gregoire le fait ressembler 10790
Al aigle blanc qui s'esvertue
Sur tous oisealx en halt voler,
Et d'autre part sanz obscurer
Il ad des oils si cliere veue,
Q'en regardant ne les remue
Pour clareté q'est espandue
Du solail, qant prent a raier,
Ainz celle ray q'est plus ague
Des oils regarde nu a nue,
Dont fait ses joyes demener. 10800

Albertes, qui savoit asses,
Et qui sovent l'ot esprovez,
Dist que d'oiseals est la nature,
Certainement qant les verrez

10746 enait

Leur nys avoir par leur degrés
 Amont les arbres plus dessure,
 C'est signe du bonne aventure :
 Ensi l'umaine creature
 Qant ad son cuer plus halt levez f. 62
 Vers dieu par conscience pure, 10810
 Lors la bonne alme plus s'assure
 Q'elle est plus digne d'estre amez.
 Devocioun q'ensi s'acline
 A dieu, Isidre la diffine
 Semblable au mousele en son degré ;
 La quelle au ryve q'est marine
 S'escales ouvre a la pectrine,
 Si en resçoit le douls rosé,
 Que chiet du ciel tout en celée,
 Dont puis deinz soi ad engendré 10820
 La margarite blanche et fine ;
 Ensi Devocioun en dée
 Concept, s'elle est continué,
 La Contemplacioun divine.
 Devocioun q'est si guarnie,
 Ove Contemplacion s'amie,
 Qant sont ensemblement conjoint,
 Tant sont fort contre l'envaie
 D'Orguil et fole Ypocresie,
 Qe jammais jour serront desjoint : 10830
 Car il y ad ne nerf ne joynt,
 Ne veine, que tout ne soit joynt
 Au dieu servir en ceste vie ;
 Par quoy dieus ne les oublist point,
 Ainz au darrein, qant vient a point,
 Ove soy sanz fin les glorifie.
 Ore dirra de la seconde file de
 Humilité, la quelle ad noun Paour,
 contre le vice de Veine gloire.
 Icele fille q'est seconde
 D'Umilité nette est et monde,
 La quelle dieus nomoit Paour :
 Si nage tous jours contre l'onde 10840
 Du Veine gloire et la confonde ;
 Car qant beauté, sen ou valour,
 Richesce, force ou vain honour
 Luy font sembler qu'il est meillour
 Des autres, dont Orguil habonde,
 10809 plushalt 10812 plusdigne

Paour repense un autre tour
 Que tout ce passe au darrein jour,
 Et q'a ses fais falt qu'il responde.
 De ceste vertu nous ensense
 Roy Salomon de sa science, 10850
 Qui dist que le commencement
 Du droite et pure sapience
 C'est en paour du conscience
 A doubter dieu primerement :
 Car cil q'au dieu doubter se prent,
 Du Veine gloire ja mesprent,
 Car Paour toutdis contrepense,
 Et dist deinz soy tout coïement,
 Ne puet finir joyusement
 La gloire que sanz dieu commence. 10860
 Trois choses sont, Paour confesse,
 Dont Vaine gloire nous adesse ;
 Car l'alme y ad primement,
 Quelle ad deinz soi resoun impressé.
 Du quoy ressemble en sa noblesse
 As angles par entendement ;
 Et puis le corps secondement,
 Q'est de ses membres noblement
 Doé ; la tierce est la richesce
 Du siecle, qui nous est present : 10870
 Mais chescun d'eux ad nequedent
 Un anemy qui trop luy blesce.
 Encontre l'alme tout primer
 Ly deable y vient pour essaier,
 Au fin qu'il par temptacioun
 Pourroit la raisoun forsvoier,
 Et l'alme ove ce faire envoier
 D'enfern a la dampnacioun :
 Luy corps d'umeine nacioun
 Des verms la congregacioun 10880
 L'aguaite en terre a devourer :
 Q'en prent consideracioun,
 Fols est, si veine elacioun
 Luy face yci glorefier.
 Pour les richesses dont vous dy
 Ly lieres est nostre anemy,
 Qant les desrobbe et tout asporte ;
 Et Salomon nous dist aici,
 Que plusours ont esté peri
 10818 enrescoit 10882 Qenprent

Pour la richesse que l'en porte : 10890
 Trop est pour ce la joye torte,
 Que Vaine gloire nous apporte,
 Car le certain pourra nully
 Savoir du fin ; dont nous enhorte
 Paour, q'est gardein a la porte,
 Que nuls en soit trop esjoy.
 Paour endroit de ce s'effroie,
 Dont Vaine gloire se rejoye ;
 Car l'un a l'autre sont contraire,
 Que d'un accord ne d'une voie 10900
 Serront jammais, ainz tout envoie
 Vait l'un del autre en son affaire ;
 Qe l'un plest, l'autre ne puet plaire,
 Qe l'un fait, l'autre voet desfaire ;
 L'un quiert le siecle et se desroie
 Du vanité, q'y pense attraire,
 Et l'autre pense pour bien faire,
 Au fin q'il ait parfaite joye.
 Uluxes, qant par mer sigla,
 Tout sauf le peril eschapa 10910
 De les Serceines ove leur chant :
 Un bon remede y ordina,
 Qu'il les orailles estouppa
 Des mariners, q'ils riens oiant
 Y fuissent, mais toutdroit avant
 Leur niefs aloient conduisant,
 Ne destourneront ça ne la ;
 Car s'ils en fuissent ascoulant,
 Peris fuissent du maintenant
 Du joye que l'en y chanta. 10920
 Ensi, qant Veine gloire vente
 De beauté, force ou du jovente,
 Ou du richesce ou du parage,
 Qant Paour voit q'ensi tourmente,
 S'oraille estouppa et son entente,
 Qe point n'ascoute a lour langage,
 Ainz tout tiel orguillous orage
 En ce fals siecle, q'est marage
 Du flaterie q'est presente,
 Eschape, et si conduit comme sage
 Sa nief toutdroit au sauf rivage, 10931
 U n'est tempeste violente.
 10896 ensoit 10918 enfuisent 10939 plushalt 10943 au fourduy
 10954 ensont

Ly sage Salomon disoit,
 Qui toutdis crient il est benoit ;
 Car sicomme ly nounsage myre
 Plusours occist, plusours deçoit,
 Ensi fortune en son endroit,—
 Qant l'en meulx quide a estre sire
 Et monter en plus halt empire,
 Fortune plus le fait despire, 10940
 Et lors le met plus en destroit :
 Soudainement sa roe vire,
 Que nuls au jour d'uy porroit dire
 Ce que demein avenir doit.
 Pour ce Senec le nous enseine,
 Disant que cil qui paour meine,
 Ce q'il ne voit ce crient il plus.
 Ly clerc Orace aici s'en pleigne,
 Si dist bien que la sort humeine
 S'est a un tendre fil penduz ; 10950
 Qant om meulx quide estre au dessus,
 Si le fil brise, est tost cheeuz :
 Nuls est certain de son oveigne,
 Tout ly plus cert en sont deçuz,
 Car molt sovent om truiet al huiss
 Ce que l'en quide estre longteine.
 Maistre Aristole en son escript
 Dist q'om doit criendre du petit ;
 Car du sintelle q'est petite
 Sovent naist un grant feu soubit : 10960
 Petit serpens grant tor occit,
 Sicomme Senec le nous endite :
 Mais d'autre essample nous excite
 Ly sages, qui paour recite ;
 Si dist, du poy qui tient despit
 Du poy en poy se desprofite,
 Dont au darrain par sort soubite
 Deschiet trestout en malvois plit.
 Ly sages ce te vait disant,
 ' Ne soies sanz paour vivant, 10970
 Ne ja dirrez comme fol hardy,
 " J'ay fait pecchés, et nepourquant
 N'est riens que m'en vait contristant " :
 Trop est cil fol qui dist ensi ;
 Car la dieu ire et la mercy

Tost vienont, quant ce plect a luy ;
 Mais l'ire dieu s'est regardant
 Tantsoulement dessus celluy
 Q'en ses peccés gist endormy ;
 Soudainement sur tiel s'espant. 10980
 C'est grant peril, tu dois savoir,
 Sanz paour esperance avoir,
 Du quoy *presumpcion* engendre ;
 Et d'avoir paour sanz espoir
 Ce fait venir en desespoir.
 Sanz l'un ne doit om l'autre prendre ;
 Mais si tu d'umble cuer et tendre
 Voes l'un ove l'autre bien comprendre,
 Lors *envers* dieu fras ton devoir :
 Si plainement tu dois entendre 10990
 Que des peccés du quelque genre
 Verray *pardoun* dois rescevoir.
 Mais nous veons q'ascune gent
 Ja n'averont paour autrement,
 Mais soul pour doubte seculier
 Du corporiel punisement,
 Ou perte avoir de leur argent :
 Du tiel paour scievont doubter, f. 63
 Car s'ils pourront quit eschaper
 Sanz l'un ou l'autre chastier, 11000
 Du corps et de l'avoir present,
 Lors ont leur joye si plener,
 Q'ils laissent le paour aler,
 Apres la mort qui leur attent.
 Mais autrement des gentz om voit
 Qui *criemont* dieu, mais *noun* a droit,
 Car ce font pour fuir la peine
 D'enfern, u ly mals estre doit,
 Auci pour ce que dieus envoit
 Anguisse en ceste vie humeine, 11010
 C'est ly paours qui peccé meine :
 Sicomme l'en poet trover enseigne,
 La gent paiene ensi faisoit,
 Pour la vengeance dieu souleine,
 Q'au plus sovent *leur* fuist greveine ;
 Nuls d'autre cause dieu cremoit.
 Essample en as, si garde prens,
 Quant rois Oseë fuist regens

11006 adroit

11015 plussouent
11053 enconseillant

11017 enas

En Israel, lors surveneront
 Evehi et Babiloniens 11020
 Ove tout plein des Assiriens,
 Qui les cités y conquereront
 En Samarie, ou demoureront.
 Mais quant lionn les devoreront,
 Du grant paour furent dolentz ;
 Pour sa vengeance dieu douteront,
 Mais as fals dieus sacrifieront,
 Car ce laisseront a nul temps.
 Qui bien se mire au present jour,
 Du tiele gent verra plusour, 11030
 Qui tant *comme* sentont la moleste,
 Molt cremont dieu du grant paour,
 Plus pour le mal que pour l'amour
 Q'ils ont vers luy ; ainz sicomme beste,
 Quant voient cesser la tempeste,
 Ja n'ert leur vie plus honneste,
 Ainz se revertont au folour,
 N'y ad paour qui leur areste :
 Mais *que* du corps eiont la feste,
 Tout oubliont le viel dolour. 11040
 Itiel paour, q'est ensi pris,
 Du vertu ne doit porter pris,
 Car dieus de sa part ne le prise.
 Saint Augustins dist son avis,
 Paour q'est sanz amour compris
 Pert sa merite en toute guise,
 Car qant d'ascune paine assisse
 Hom crient et doute la Juise
 Plus *que* de perdre paradis,
 Il pert l'onour de sa franchise, 11050
 Que dieus avoit en l'alme mise,
 Puisq'en servage il est soubmis.
 A les Romains en conseillant
 Par ses epistres envoiant
 L'apostre envoia son message ;
 Si dist q'ils fuissent *enpernant*,
 Si *que* paour de son bobant
 Ne les pot mettre en son servage,
 Pour *perte* ne pour avantage
 Du siecle avesques son oultrage, 11060
 Que leur pot faire aucun tirant ;

Mais *que* tout franc de leur corage,
 Malgré le siecle ove son visage,
 Soient a soul dieu entendant.
 Quiconque ait homme plus cremu
 Que dieu, tost cherra despourveu,
 Si *comme* ly sages nous ensense :
 Auci j'ay deinz la bible lieu
 De Mardochee le bon Judieu,
 Q'au tiel paour fist resistance ; 11070
 Car pour paour du conscience
 Ne volt tollir la reverence
 Q'il devoit donner a son dieu,
 Et la donner par violence
 A fals Aman, q'ert plain d'offense,
 Et la voloit avoir eeu.
 Prodhomme estoit cil Mardochee,
 De qui Aman n'estoit doubtée,
 Ainz volt son dieu soul redoubter :
 Car tout bon homme en son degré 11080
 Deinz soy ad une liberté,
 Par quoy rien doubte seculier ;
 Mais ly malvois fol losenger
 Q'est a son peccé costummer,
 Cil ad paour d'adverseté :
 Dont dist ly sage proverber,
 Tous tieux paour tient en danger
 Par servitude du Peccé.
 Cil fols qui tiel paour enprent
 Du siecle, fol loer en prent 11090
 Sicomme fist la gent Moabite,
 Qui se doubteront durement,
 Nounpas pour dieu, ainz soulement
 Pour Josué, qui leur visite :
 Mais Josué ce leur acquite,
 Car pour loer de leur merite
 En son servage il les comprunt,
 Dont *jammis* puis il *leur* respite :
 Vei la comment cil se profite
 Qui crient le siecle folement. 11100
 En l'evangile truis escript,
 'N'eietz paour de luy q'occit
 Le corps, qant plus ne porra faire,
 Ainz luy q'ad plain poair parfit,
 Q'il poet le corps ove l'espirit

11062 Maisque

El feu d'enfern sanz fin desfaire.
 Pour luy dois criendre de mesfaire,
 Pour luy t'abandonne au bien faire ;
 Car il te puet par autre plit
 Donner le ciel a ton doaire : 11110
 Itiel paour est necessaire,
 Dont ly loer sont infinit.
 Molt valt paour du bon endroit,
 Sicomme Judith le recontoit
 A Olophernes l'orgueilleux
 Du poeple dont venue estoit ;
 Disant *que* chascuns se doubtoit
 Des *grans* peccés, dont ils trestous
 Furont coupable et paourous.
 Mais dieus sur ce *leur* fuist pitous, 11120
 Quant vist la gent que luy cremoit ;
 Dont en la fin furent rescous,
 Occis fuist ly vein glorious,
 Judith sa teste luy coupoit.
 Ce dist David ly saint prophete,
 'Qui dieu cremont au droite mete,
 N'est meschief dont soient desfaitez'
 Si dist auci que la diete
 Dont l'alme quiert estre replete
 Ne leur doit amerrir *jammis*. 11130
 Ly sages dist, 'Cil clers ou lais
 Qui son dieu crient pour ses bienfais,
 Il *avera* vie bien complete :
 Car *quique* soit ensi parfaitz,
 Qant ad sa conscience en paix,
 Molt est par tout en grant quiete.'
 El livre de levitici
 Dieus a son poeple dist ensi,
 'Je vuill,' ce dist, '*que* vous cremetz
 Mon saintuaire, et puis, vous di, 11140
 Les jours q'a moy sont establi
 Je vuill que vous saintefiez :
 Car s'ensi criendre me vailletz,
 Beal temps ove grant plenté des bleedz,
 Frument et oille et vin auci,
 Sanz guerre en pes vous averetz.'
 Trop porront estre beneurez
 Qui tiel loer ont deservi.
 Par Moÿsen auci j'ay lieu,
 Par Moÿsen auci j'ay lieu,

11090 enprent

Que dieus dista son poeple hebreu, 11150
 ' Si mes commans vulletz doubter,
 Lors vous pourretz en chascun lieu,
 Par tout u serretz devenu,
 Sanz nul paour enhabiter.'
 D'Elye en poet om essampler,
 Qant Jezabell luy fist guaiter
 Au mort, par ce qu'il cremoit dieu,
 Par tout, u qu'il voloit aler,
 Dieus luy faisoit saulf conduier,
 Q'ascune part n'ert arestu. 11160
 Le dieu sermon auci l'en doit
 Doubter, q'ensi le commandoit
 La viele loy, quant establiz
 Fuist *que* la gent s'assembleroit,
 Que Moyses leur precheroit
 De dieu les saintz sermons et ditz,
 Au fin q'il fuissent bien apris
 Endroit paour: car qui toutdis
 Dieu crient et ayme en tiel endroit,
 Ly sages dist, ja n'ert suspris 11170
 Du siecle, ainz doit avoir son pris
 De dieu, qui son corage voit.
 Par Jeremie escript je voi,
 ' Dieus dist, a qui regarder doi
 Forsq'a celluy q'en droit timour
 Crient mes paroles et ma loy?'
 Et Neemye auci du soy
 Pria son dieu par tiel atour:
 ' O dieus, saint pierre et creatour,
 Entens, beau sire, le clamour 11180
 De tes servantz, q'en droite foy
 Ont tout leur cuer mis en paour
 De ton saint noun et ton amour,
 Que riens desiront *forsque* toy.'
 Thobie el paour dieu vivant
 Enseina son treschier enfant
 Pour criendre dieu du jofne enfance;
 E si luy dist, que pour ytant
 Serroit de tous biens habondant,
 Du corps et alme en suffiance. f. 64
 Judith en porta tesmoignance, 11191
 Si dist, ' O dieus, c'est m'esperance,
 Tout cil q'au droit te vont doubtant,

11155 enpoet

11191 enporta

11194 enaueront

Ils en averont ta bienvuillance
 Et serront grans en ta puissance,
 Par toy no dieu, q'es toutpuissant.'
 Je truis escript en Ysale,
 Qu'il molt tresdure prophecie
 Dist sur Egipte, dont la gent
 Dieu creindre ne voloient myc: 11200
 Si dist, *que* pour leur estoultie
 Se vengeroit dieus fierement;
 Dont ly futur et ly present,
 Qui l'orront dire ensi comment,
 Se doubteront de tiel oye.
 Secré sont ly dieu juggement,
 Comme plus le peccheour attent,
 Plus sa vengeance multeplie.
 Quant dieus son poeple ot aquité
 Du servitude a salveté, 11210
 Par Moysen leur dist cela,
 Qe s'ils luy tienont redoubté
 En droit paour d'umillité,
 Prosperité leur avendra;
 Mais autrement les manaça
 Qu'il les la voie remerra,
 Dont pardevant les ot mené,
 Et en servage remettra,
 U chascun s'espoentera
 De leur primere adverseté. 11220
 Et oultre ce leur dist auci,
 Qe s'ils n'eussent paour de luy,
 Il les dourroit paour mondein;
 Dont tant serroient esbahy,
 Q'au soir dirroient, ' Dieus, ay my!
 O si verrons venir demein!'
 Et au matin dirront en vein,
 ' Helas! qui nous ferra certain
 Que nous verrons le soir compli?'
 Ensi qant dieus hoste sa mein, 11230
 Qui ne voet criendre dieu soulein
 Ert d'autre paour anienty.
 Molt est paour de grant vertu,
 Qant om le met tout soul en dieu,
 Car tiel paour d'especial
 Tout autre paour ad vencu;
 Cil q'ad paour il ad salu:

Et par paour om prnt tout mal;
 Car le paour q'est mondial
 De tous mals est original: 11240
 Mais qant dieus est pour soi cremu
 En droit paour espirital,
 Ja n'ert tiel paour corporal,
 Dont l'alme serra corumpu.
 Le droit Paour pour deviser,
 Al huiss du chambre il est huissher,
 Qui porte defensible mace;
 Dont, quant ly deable voet entrer
 Pour faire l'alme foloier,
 Paour le fiert enmy la face 11250
 Et le deboute au force et chace:
 Paour auci la Char manace,
 Qe d'orguil n'ose forsvoier:
 Paour est gardeins de la place,
 U il herberge Bonne grace,
 Et laist Pecché dehors estier.
 Paour jammais commence chose,
 Ainçois qu'il deinz son cuer pourpose
 Au quel fin ce pourra venir;
 Dont, si bon est, son fait despose, 11260
 Et si mal est, lors le depose
 Pour doute de mesavenir.
 Ensi se quart d'enorguillir,
 Car bien conoist *que* le finir
 De la mondeine veine glose
 En grant tristour doit revertir;
 Mais qui dieu crient, ne poet faillir
 Q'au fin sanz tout paour repose.
 Paour est ly bons tresorers,
 Qui gart tous les tresors entiers, 11270
 Qui deinz le cuer sont enserré,
 Sique nuls malvois adversiers
 Embler porra les boums deniers
 Qui des vertus sont tout forgé,
 Dont l'alme serra rançonné:
 Auci Paour est comparé
 Du gardin au bon sartilliers,
 Qui celle urtie maluré
 Ove la racine envenimé
 Estrepe d'entre les rosiers. 11280
 Et d'autre part par droit appell

11297 plusriche et pluspuissant

11309 enprist

Paour est guaité du chastell,
 Qui ja ne dort de nuyt ne jour;
 Mais s'il ascoulte ascun revell,
 Il vait tantost sus au qernell,
 Savoir q'amonte ytiel clamour,
 Et lors, s'il voit peril entour
 Du liere ou d'autre guerreiour,
 Tost va fermer son penouncell
 Et sa baniere enmy la tour; 11290
 Si la defent par tieu vigour
 Qe ja n'ad garde du quarell.
 C'est ly bons gaites bien cornant
 Q'esveille le Ribauld dormant,
 Q'a la taverne ad tout perdu,
 U gist tout yvres en songant
 Q'il est plus riche et plus puissant
 Qe Charlemains unques ne fu.
 Cil q'est des vices tant enbu,
 Ne conoist dieu ne sa vertu, 11300
 Qant l'alme est yvre et someillant;
 Mais ly bons gaites de salu
 Par son corner l'ad tant esmu,
 Dont il esveille maintenant.
 Ly sage en son proverbe dist:
 ' En ses pechchés qui long temps gist,
 Resemble au fol qui dort ou nief,
 Tancomme en halte mer perist':
 Q'ainçois q'il aucun garde en prist,
 L'en voit perir sanz null relief. 11310
 Cil q'en prisonne auci soubz clief
 Gist, et attent le hart deinz brief
 Pour le forsfait dont il forsüst,
 Sovent par vanité du chief
 Tout songe q'il sanz nul meschief
 Au noece et feste s'esjoyst:
 Ensi ly peccheour s'esjoie,
 Sicomme dormant, qui ne s'esfroie,
 Ainz que vengeance luy surprnt,
 Si ly bons gaites ne luy voie, 11320
 Qui deinz le cuer en halt cornoie
 Q'il perdurable peine attent:
 Mais lors s'esveille et se repent,
 Et voit des oïls tout clierement
 Qe tout est songe et veine joye,

Dont s'est mesalé longement ;
 Pour ce laist son fol errement
 Et se reprént au droite voie.
 Au Job venoient trois amys
 Pour conforter de leur bons ditz : 11330
 L'un Eliphas ce luy disoit,
 Q'es nuytz q'om solt estre endormis
 Lors du paour fuist tant espris,
 Q'au meinz ly cuers de luy veilloit.
 Ensi cil qui dieu ayme et croit,
 De son amour paour conçoit,
 Que luy ferra veiller toutdis
 Dedeins le cuer, *comme* faire doit,
 Pour penser s'il d'ascun endroit
 Vers son amour ait riens mespris. 11340
 Mais qui ne crient de son corage,
 Ainçois se prent au rigolage,
 Est semblable a cel enfant
 Qui tout vendist son heritage ;
 Dont en luxure et en putage
 Vait ses folies demenant
 En terre estrange, u fuist paiscant
 Les porcs, et ot famine atant
 Q'il fist des *glains* son compernage ;
 Mais lors au fin vint escriant 11350
 Paour, dont il mercy criant
 Revint au piere et son lignage.
 Paour, q'al alme riens concele,
 Tout quatre pointz chante et repelle
 Les peccheours ; si dist primer,
 'U es?' Di, fol, je t'en appelle :
 El siecle, qui toutdis chancelle,
 U rien certain om puet trover,
 Ore es trop froid jusq'au trembler,
 Ore es trop chald jusq'au suer, 11360
 Ore es trop plain en ta bouelle,
 Ore es trop vuïd *par* trop juner ;
 En un estat n'y pus estier,
 Tous jours ta paine renouvelle.
 Ce dist le livre Genesis,
 Qant Adam ot le *pomme* pris,
 Lors tielement dieus l'appelloit :
 'U es?' ce dist, mais ly caytis
 N'osa respondre, ains *comme* futis,
 Pour ce q'il nu tout se veoit, 11370

Entre les arbres se musçoit ;
 Dont cil qui toute rien pourvoit
 Luy fist chacer du paradis
 Aval, u susmes orendroit,
 La *que* la femme en doel conçoit,
 Et l'omme ad son labour enpris.
 Mais ore vuïl savoir de toy,
 Si nueté mist en effroy
 Adam, n'es tu ore aici nu ?
 Certainement oyl, je croy, 11380
 Si tu te penses en recoy
 Comment tu es primer venu, f. 65
 Et puis au fin tout desvestu
 T'en *partiras* ; dont lors si tu
 N'as fait ascun *bienfait*, du quoy
 Devant dieu soiez revestu,
 Je tiens le temps tout a *perdu*,
 Dont *grant* doubtance avoir je doy.
 Le point seconde c'est, 'Quoy fais?'
 Si tu regardes a tes faitz, 11390
 Paour t'en dirra meintenant
 Que cent mil fois sont tes mesfaitz
 Du greignour pois que tes bienfaitz.
 Itiel acompte est mal seant,
 Si es en doubte nepourqant
 Du vivre au fin *que* l'amendant
 Facez ; car Mort de ses aguaitz
 Par aventure ert survenant,
 Qant plus te vais glorifiant,
 Dont ont esté plusours desfaitz. 11400
 Que tu morras tout es certains,
 Mais au quelle heure es *nouncerteins*,
 Ou en quel lieu tu n'en *saveras* :
 Mestre Helemauns, qui fist toutpleins
 Lez Vers du Mort, tesmoigne au
 meinz
 Que mort t'ad dist *comme* tu orras :
 'Houstez voz troeffes et voz gas,
 Car tiel me couve soubz ses dras
 Q'assetz quide estre fortz et seins.'
 Mort t'ad gary de ses fallas, 11410
 Dont *par* droit ne t'escuseras,
 Si tu *par* luy soies atteins.
 Deux autres pointz je truis escrit
 En Genesis, que l'angel dist

El grant desert, u qu'il trova
 L'ancelle Agar, que s'en fuyt
 Enceinte d'un enfant petit,
 Danz Abraham quel engendra,
 Et Ismahel puis luy noma ;
 Dont celle ancelle s'orguilla, 11420
 Et de sa dame tint despit,
 Par quoy sa dame l'enchaça
 Et la batist et desfoula,
 Dont l'autre en paour s'en *partist*.
 Mais qant cel angel, *comme* vous dy
 Agar trova, lors dist a luy,
 'Dont viens, Agar? ne me celetz :
 Et puis vous me dirrez aici,
 U vas.' Agar luy respondi
 Tout *comme* devant oÿ avetz. 11430
 'Agar,' dist l'angel, 'retournez,
 Au Sarre, q'est ta dame, irrez,
 Dieus te *communde* a faire ensi,
 Et basse a luy te soubmettez ;
 Car si *pardoun* luy prieretz,
 Trouver pourras grace et mercy.'
 Ensi Paour te dist, 'Dont viens?'
 Tu viens, caitifs, si t'en souviens,
 De la taverne au deablerie,
 U plus vileins q'esragé chiens 11440
 Tu as despendu tous les biens
 Que dieus ot mys en ta baillie,
 Au fin que l'alme meulx garnie
 En ust esté ; mais la folie
 Du veine gloire, que tu tiens,
 Les t'ad hosté, dont en partie
 Paour ta conscience eserie ;
 Quoy dirray lors, si n'en reviens ?
 Je dy, revien et toy soubmette :
 Paour t'appelle en sa cornette, 11450
 Que porte molt horrible *soun* :
 'Revien,' ce dist, 'a la voiette,
 Que ly malfiés ne te forsmette
 En la deserte *regioinn* :
 Retourne arere en ta *maisoun*,
 Et te soubmette a ta *raisoun*,
 Si fai ta conscience nette,
 Et puis responde a ta *leçoun*,

U vas, si tu le scies u *noun* :
 Paour te chante en sa musette. 11460
 Paour te dist, 'U vas? dy moy :
 Au Mort, qui n'ad pité de toy,
 Et puis apres au juggement
 Devant luy q'est tant just en soy,
 Que n'est pour prince ne pour Roy
 Dont voet flecchir aucunement ;
 Et puis irrez sanz finement
 A cel Herode le pulent,
 Qui fait tenir le grief tournoy
 En bass enfern du male gent. 11470
 He, fol, si tu bien penses ent,
 Molt doit ton cuer estre en effroy.'
 Ce dist Jerom, *que* quoy qu'il face,
 Mangut ou boit, plourit ou solace,
 Paour toutdis le fait entendre,
 Comme s'il oiast deinz brief espace
 Un corn cornant, qui luy manace,
 Et dist, 'Vien ton acompte rendre' :
 Du tiel paour se fist susprendre,
 Dont son penser faisoit descendre 11480
 La jus en celle horrible place
 En son vivant ; si ot plus tendre
 La conscience pour ascendre
 Amont a la divine grace.
 Paour q'au droit se voet tenir,
 Un fois le jour se vait morir,
 Et en enfern fait la descence,
 U qu'il ne voit forsque suspir,
 Doloir, plorer, plaindre et ghemir,
 En feu de sulphre u se tormente : 11490
 Crepald, lusard, dragoun, serpente,
 Cils font la paine violente,
 Mais sur trestout, qant voit venir
 Le deable, lors deinz son entente
 En ceste vie il se repente,
 Q'apres ne luy falt repentir.
 Une autre fois deinz sa memoire
 Paour s'en vait en pourgatoire,
 Et voit y moult diverse peine
 Laide et puante, horrible et noire, 11500
 Plus que nuls cuers le porroit croire,
 Ou langue dire q'est humeine :

Atant q'enfern celle est grieveine
 Mais d'une chose tout souleine,
 Q'en pourgatoire l'alme espoire
 En fin d'avoir sa joye pleine,
 Mais en enfern elle est certeine
 Du perdurable consistoire.
 Par droit Paour cil q'ensi pense
 D'enfern la paine et la sentence, 11510
 Que sanz mercy toutdis endure,
 Et puis dedeins son cuer *compense*
 Du pourgatoire l'evidence,
 Quel froid y ad et quelle arsüre,
 Je croi q'il ad tresbonne cure
 Trové; et s'il apres tient cure
 Du veine gloire, et reverence
 Du siecle quiert, je ne l'assure
 En celle gloire q'est dessure
 Pour venir en la dieu presence. 11520
 Ly sages dist en sa doctrine
 Que la coroune et la racine
 Du sapience c'est paour,
 Qant envers dieu soulein encline
 Par droit amour et discipline;
 Car qui dieu crient *ovesque amour*,
 Lors n'est vertu qui soit meillour.
 Paour est mol plus *que* la flour,
 Et plus poignant *que* n'est l'espine,
 As bons est joye, as mals hidour; 11530
 Qui son cuer serche en tenebrouer
 Paour la chandelle enlumine.
 Paour qui dieu aime et confesse,
 C'est le tresor et la richesse
 De l'alme, ce dist Ysaie;
 Et David dist parole *expresse*,
 'Qui dieu criemont en droite *humblese*
 Dieus les eshaulce et glorifie.'
 Ce dist la vierge auci Marie,
 'Du progenie en progenie 11540
 La mercy dieu leur ert *imprese*,
 Qui criemont dieu en ceste vie.'
 Pour ce fols est q'a ce ne plie,
 Qant elle en fait si beau *promesse*.
 Du droit Paour je truis escript,
 Saint Jeremie ensi le dist

11544 en fait

A dieu par droite humilience:
 'O Roys du poair infinit,
 Qui est celluy sans contredit,
 Qui ne doit criendre ta puissance? 11550
 Sur tout puiss faire ta plesance,
 Car trestous susmes ta faisance,
 Sibien ly *grant comme* ly petit.'
 O dieus, pour ce c'est ma creance,
 N'est creature en nulle estance,
 Q'a ton poair ne soit soubgit.

Ore dirra del a tierce file de Humilite, quelle ad noun Discrecioun, contre le vice de Surquiderie.
 D'Umilite la tierce file

Ne laist *que* Surquidance avile
 Celle alme q'est par luy gardée;
 Ainçois trestoute orguil exile, 11560
 Et toute vertu reconcile,
 Si est Discrecioun nomée:
 Qant sens, valour, force ou beaute,
 Honour, richesce ou parentee
 Luy font des autres plus nobile,
 Au dieu soulein rent grace et gré,
 Pensant toutdis d'umilite
 Que sa nature est orde et vile.

Discrecioun en governance
 Ad tout quatre oils, en resemblance 11570
 Des bestes, dont par leur figure f. 66
 L'apocalips fait remembrance:
 De l'oill primer sanz variance
 Voit clierement sa *propre* ordure;
 De l'autre voit la grande cure
 Du siecle que chascuns endure;
 Du tierce oil voit la *permanance*
 Du ciel, u est la joye pure;
 Du quarte oil voit la peine dure
 D'enfern ove celle circumstance. 11580

Des quatre *partz* cil q'ensi voit
 Ne doit orguil avoir par droit;
 Car pour soy mesmes regarder,
 Comment son pierc l'engendroit,
 Comment nasquit du *povere* endroit,
 Comment par mort doit terminer,
 Comment les verms doivent ronger

11565 plusnobile

Si char puante et devourer,
 Comment l'acompte rendre doit
 Des biens *que* dieus l'ad fait bailler,
 Par tous ces pointz considerer 11591
 Orguil de cest oil ne conçoit.
 Pour regarder le siecle avant,
 Si tu richesce y es voiant,
 Povere encontre ce verras,
 Si saunté, maladie atant,
 Si joye, dolour habondant,
 Que pour veoir trestous estatz,
 Les uns en halt, les uns en bas,
 Tout gist parentre six et as, 11600
 Tant est fortune variant:
 Si de cel oil bien garderas,
 Ne croi *que* tu t'orguilleras
 Du siecle, q'est si deceivant.

Mais l'oil qui vers le ciel regarde
 Par resoun ne doit avoir garde
 D'orguil; car la verra tout voir
 Que cil qui tint y l'avantgarde
 Des angles, en la reregarde
 D'enfern orguil luy fist choir: 11610
 Auci David nous fait savoir,
 Que presde dieu porra manoir
 Nuls orguillous; dont cil q'agarde
 De cest oill, puet tresbien veoir,
 Poy valt orguil françoise avoir,
 Q'au Surquider n'est pas bastarde.

De l'oill q'envers enfern s'adresce,
 Que nulle orguil son cuer adescce
 Par resoun doit bien eschulr:
 Car la verra *comme* gist oppresse
 Orguil en peine felonnesse 11621
 Du flamme que ne puet finir.
 Qui de tiels oils se fait pourvir
 D'orguil se porra bien guenchir,
 Que surquidance ne luy blesce;
 Et s'il tiels oils volra tenir,
 Tout droitement porra venir
 Au ciel, u dieus *coronne* humblesecc.

Discrecioun bien ordiné
 Par quatre causes hiet Pecché: 11630
 Primer pour ce *que* le corage
 De l'omme par sa malvoisté

Destourne de sa liberte,
 Et fait *que* l'omme est en servage;
 Auci Pecché de son oultrage
 Corrupte fait la dieu ymage,
 Puante, vile et abhosmée,
 C'est l'alme, quelle se destage:
 Pour ce Pecché du toute hontage
 La droite mere est appellée. 11640
 L'en sert pour loer au final,
 Car sans loer om *prnt* au mal
 D'ascun service sustenir;
 Mais *quique* soit official
 Du Pecché par especial,
 De son loer ne doit faillir:
 L'apostre dist que le merir
 Que l'en du Pecché doit tenir,
 C'est celle mort q'est eternal.
 Fols est pour ce qui voet servir 11650
 Pour tiel reguerdoun deservir,
 Dont le *proffit* est infernal.

Mais ly discret ove ses oils cliers
 Est des vertus ly charetiers,
 Q'es fosses ne les laist cheir:
 Si est auci par haltes mers
 Du nief de l'alme conduisers,
 Q'au port arrive sans perir.
 Du trop se sciet bien abstenir,
 Et a trop poy noun assentir, 11660
 D'ascune part n'est oultragiers;
 Bien sciet aler, bien revenir,
 Bien sciet les causes *parfournir*,
 Dont est bien digne des loers.

Discrecioun deinz sa peitrine
 Toutdis *prnt* garde a la doctrine
 Que Salomon luy vait disant,
 Qui dist q'au vanité decline
 Trestout le siecle ove sa covine,
 N'est un soul rien q'est *permanant*. 11670
 Ce vait dieus mesmes tesmoignant,
 Que ciel et terre en temps venant
 Et l'un et l'autre se termine;
 Excepcioun fait nepourqant
 Que sa parole ert ferm estant
 Du perdurable discipline.
 Du vanité trestout est vein

Le siecle, et l'omme est aici vein,
 Pour qui le siecle fuist creé.
 Trois choses le me font certain, 11680
 L'estat de l'omme est noncertein
 Et plein de mutabilité:
 Primer de sa mortalité
 Saint Job le dist en son degré:
 'Comme l'ombre, ensi la vie humein;
 Huy tu le voies en sauté,
 Mais point ne scies u ert trouvé,
 Si tu le voes sercher demein.
 He, dieus, q'est cil qui ne dirroit
 Que l'omme vanité ne soit? 11690
 Qant huy ce jour tes oïls voiant
 Chantoit, dançoit et caroloit,
 Et a joster les grés avoit,
 Et tous crient, 'Vaillant! vaillant!
 Et se sont mis a son devant
 Pour son honour sicomme servent:
 Mais au demein di que ce soit;
 Q'iert tous païs hier pourpernant,
 Soubz poy de terre ore est gisant,
 N'est uns qui jammais le revoit. 11700
 Par ses mortalités ensi
 L'omme est trop vein; si est aici
 Sa curiosité trop veine:
 Car tous les faitz q'om fait icy
 Comme songe se passent parmy,
 Molt est la gloire noncerteine.
 Le songe en sa figure enseine
 Les joyes de la char humeine;
 Qant l'en meulx quide estre saisy
 De l'un ou l'autre en son demeine, 11710
 Sicomme la chose q'est foreine,
 Semblablement sont esvany.
 L'omme est encore, pour voir dire,
 Des pechés que sa char desire
 Sur tout plus vein, bien me sovient:
 Car du peché dont l'alme empire
 L'omme est des autres bestes pire,
 Et au plus malvois fin devient.
 Si toutes bestes vont au nient,
 Que chalt, qant plus ne leur avient? 11720
 Mais l'omme, q'est des bestes sire,

11715 plusvein

11718 plusmaluois

11742 ensoit

Par peché que son corps detient
 Sanz fin celle alme enfern retient:
 Tieu vanité fait a despire.
 Trestous ces pointz Discreciom
 Reguarde en sa condiciom,
 Dont se pourvoit par ordinance,
 Comme s'ordina pour sa maison
 Cil Rois q'ot Ezechias noun,
 A qui dieus faisoit pardonance: 11730
 Discreciom sanz fole errance
 Fait sagement sa pourvoiance,
 Le corps sustient en sa raison,
 Et l'alme en juste governance
 Sanz orguil et sanz surquidance
 En ciel fait sa provisiom.
 Qant femme est belle et om la prise,
 Au mirour court, si s'en avise,
 Et s'esjoÿt qant se pourvoit;
 Mais si sa face ait tache prise, 11740
 Lors fait sa peine en toute guise
 Tanq'elle au plain garie en soit:
 Du conscience en tiel endroit
 En le mirour se mire et voit
 Discreciom q'est bien aprise;
 Et solonc ce q'elle aparçoit,
 Ou laide ou belle, ensi se croit,
 Et ensi son estat divise.
 Discreciom tout a son gré
 Ad trois servantz en leur degré, 11750
 Des queux orretz les nouns avant,
 Ordre, Maniere, Honesteté;
 Dont qui par Ordre est governé
 Toutdis luy vait encosteiant
 La reule dont ly dieu sergant,
 Chascuns solonc son afferant,
 Sont de leur ordres ordiné,
 Que trop derere ou trop devant
 N'est uns qui vait le point passant
 Q'appartient a sa dueté. 11760
 Et d'autre part aici Maniere
 Devant la gent et parderere
 Perest toutdis de si bon port, f. 67
 Noun orguillouse, ainçois sa chere
 Vers tous porte amiable et chere,

Dont tous luy font joye et desport:
 Car courtoisie est de s'acort,
 Q'a nul bien unques se descort,
 Ainçois la sert comme chamberere.
 Cassodre en son escript recort, 11770
 Et dist toute autre vertu mort,
 Si ceste n'est avant guere.
 Ce dist Senec, q'en trestous lieux
 Om doit cherir et loer plus
 Maniere, car qui Manere a,
 Il ad la guide des vertus.
 Car sanz Maniere sont confus
 Tout autre vertu q'om avra:
 Beauté, Jovente que serra,
 Richesce ou force a quoy valdra, 11780
 S'il n'ait ove ce Manere en us?
 Cil q'est discret, u qu'il irra,
 S'aucune chose luy faldra,
 Prent du Manere le surplus.
 Pour la descrire proprement,
 Bonne maniere en soi comprend
 De l'omme toute la mesure,
 Dont il gouverne honestement
 Son corps et son contienement,
 Primer au creatour dessure, 11790
 Et puis au toute creature:
 Trop halt ne vole a desmesure,
 Auci ne trop en bass descent,
 Ainz comme voit venir l'aventure
 Des temps, des causes, a tout hure
 Se contient bien et sagement.
 Nature en soy se pourveoit,
 Les membres d'omme qant fourmoit,
 Si fist les beals aperticer,
 Nonpas les lais, ainz les musçoit. 11800
 Par tiele essample et tiel endroit
 Honesteté se fait garder;
 Car des vertus dont aourner
 Se puet en faire ou en parler,
 Dont corps et alme enbelli soit,
 Se veste et laist les lais estier;
 Car nullement voet adescer
 La chose en quelle ordure voit.
 Primer qant homme dieus crea,

11835 iendiroie

Des deux natures luy fourma, 11810
 C'est d'alme et corps ensemblement,
 Et deux delices leur donna,
 Dont chascuns se delitera
 Au dieu loenge soulement:
 L'un est au corps tout proprement,
 Que les cynk sens forainement
 Luy font avoir, mais pour cela
 Que l'autre a l'espirit appent,
 Ce vient d'asses plus noblement
 Dedeins le cuer, u l'alme esta. 11820
 Oir, veoir, flairer, gouster,
 Taster, ce sont ly cynk porter,
 Par queux trestous les biens foreins
 Vienont le corps pour deliter;
 Mais q'om n'en doit pas mesuser
 Discreciom est fait gardeins.
 Car trestous biens qui sont mondeins
 Bons sont as bons, mals as vileins;
 Mais ly discret se sciet temprer,
 Q'il ja n'en ert par mal atteins; 11830
 Solonc q'il ad ou plus ou meins,
 Honestement se fait garder.
 Ly bien mondain q'ay susnomé,
 Du quoy ly corps s'est delité
 Par les cynk sens, si j'en dirroie,
 N'est q'une goutte de rosée,
 Dont si mon corps ay abeveré
 Ma soif estancher ne porroie,
 Au regard de celle autre joye,
 Dont l'alme boit et se rejoye 11840
 Pensant a la divinité:
 C'est la fontaine cliere et coye,
 La quelle sauté nous envoye,
 Si tolt la soif d'enfermeté.
 As ses disciples dieus disoit:
 'Quiconque de celle eaue boit
 Que je luy donne, en soy sourdra
 Une fontaine au tiel exploit,
 Q'en perdurable vie droit
 Sanz nul arest saillir le fra.' 11850
 C'est la fontaine pour cela,
 Discreciom dont bevra,
 Et noun du goutte que deçoit

11849 in rassura

Par vanité, dont secchera :
 L'un comme fantosme passera,
 Mais l'autre sanz fin estre doit.
 Discrecion surquide point,
 Ainz met les choses a ce point,
 U voit tout la plus saine voie :
 Resoun toutdis l'argue et poingt 11860
 Et sustient, siq'en un soul point
 Du droit chemin ne se forsvoie.
 Des deux biens au meillour se ploie,
 Et de deux mals le pis renioe ;
 Bien sciet eslire a son desjoint,
 Q'il puis ne dirra, ' Je quidoie' :
 Car sapience le convoie,
 Q'as tous temps est ove luy conjoint.
 Je sui certains que Salomon
 N'estoit pas sans discrecion, 11870
 Qant il l'espeie demandoit
 Pour faire la division
 Du vif enfant, pour qui tençonn
 De les deux femmes fait estoit :
 Par loy escript ce ne faisoit,
 Ne commun us ce ne voloit,
 Ainz la discrete impressioun,
 Q'il deinz son cuer de dieu avoit,
 Tiel jugement lors l'enseinoit,
 Dont tous loeront sa raisoun. 11880
 Ensi discrecion vaillable
 Fait l'omme de vertu menable
 De l'une et l'autre governance,
 C'est l'alme et corps ; car profitable
 N'est chose plus ou busoignable,
 Que tient mesure en la balance.
 Vers dieu primer sa pourvoiance
 De l'alme fait, et puis avance
 Le corps sanz nul peccché dampnable
 D'orguil ou fole surquidance, 11890
 Par quoy puis pour sa bienfesance
 Reçoit la vie perdurable.
 Ore dirra de la quarte file de
 Humilité, quelle a noun Vergoigne,
 contre le vice d'Avantance.
 Encontre l'orguil d'Avantance,
 Que maint prodomme desavance,

11859 plussaine.

Naist une file d'umble endroit,
 La quelle quart sanz fole errance
 Del huiss du ferme circumstance
 Sa bouche, comme David disoit ;
 Ses lieveres clot, q'il n'en forsvoit.
 Vergoigne ad noun : bien se pourvoit
 Q'en dit n'en fait n'en contenance 11901
 Se vante, ainz taist comme faire doit ;
 Et s'aucuns priser luy voldroit,
 Pour ce ne fait greigneur parance.

Vergoigne ad une damoiselle,
 Hontouse ad noun, molt prest belle,
 Et molt se sont entresemblable :
 Mais Honte pour descrire est celle,
 Qe ja si faulse n'est querelle,
 S'om la surmet q'elle est coupable,
 Tantost sa chere en est muable ; 11911
 Mais Vergoigne ad la chere estable,
 Si du falsine l'en l'appelle,
 Qant voit bien que ce n'est que fable,
 Mais si la culpe est veritable,
 Tantost ly change la maisselle.

Molt est Vergoigne simple et coye,
 Car toutdis d'umble cuer se ploie,
 Sique jammais en orguil monte
 Pour l'onour que le siecle envoie : 11920
 Jammais du bouche se desploie
 Pour soy vanter en nul acompte,
 Ainz ad le cuer si plain de honte,
 Qe s'aucun autre le raconte,
 Toute sa chere tourne en voie :
 Del pris du siecle se desmonte,
 Dont voelt que l'alme se remonte
 En honour et parfaite joye.

Qui du Vergoigne est vertuous,
 Ensi tout soul comme devant tous 11930
 Eschuie en soy trestoute vice ;
 Car du penser q'est vicious
 Commence a estre vergoignous,
 Comme cil qui ses mals apertice.
 Car qant Vergoigne est en l'office
 De l'alme, et que peccché l'entice,
 Tantost, comme femme a son espois,
 S'escrie et prie la justice

11911 enest.

De dieu, au fin q'il l'en guarise
 Des mals qui sont si perilous. 11940
 Car la Vergoigne dont parole
 N'est par norrie de l'escole,
 Sicomme l'en fait communement,
 Qant om rougist la face sole
 Pour truffes ou pour la parole
 Q'ascuns luy dist devant la gent :
 Mais Vergoigne est tout autrement ;
 Car deinz le cuer fait argument,
 Qant l'omme pense chose fole,
 D'oneste resoun le repret, 11950
 Si dist que dieus voit clierement
 Tout le secret dont il affole. f. 68

Et nepourqant ce dist le sage,
 Qe cil qui rougist le visage
 Par vergonder de sa folour,
 C'est un bon signe du corage ;
 Car quiq'il soit, il crient hontage,
 Dont meulx doit garder son honour.
 Car ce distront nostre ancessour,
 'Honte est ly droit chief de valour, 11960
 Que soit en toute vasselage' :
 Dont gart le corps sanz deshonour,
 Et fait que l'alme est conquerour
 Du ciel, u toute orguil destage.

Ly philosopre ce tesmoigne,
 Qe nul vivant, en sa busoigne
 Qant ad mesfait, porroit avoir
 Greignour penance que Vergoigne ;
 Qu'elle en secré sanz autre essoigne
 Trestout le cuer fait esmouvoir 11970
 Si fort que de la remouvoir
 Ne il ne autre ad le pooir,
 Ainz siet plus pres que haire au moigne ;
 Car deinz le cuer fait l'estouvoir
 De honte et doel matin et soir,
 Dont ses pensers martelle et coigne.

De son parable en essamplant
 Ly sages ce nous vait disant,
 'Devant grisile fouldre vait ;
 Et ensi grace vait devant 11980
 Vergoigne comme son entendant,
 Dont gracios en sont ly fait.'

11939 lenguarise

11973 pluspres

Car grace est toutdis en agait
 Contre tous mals, dont se retrait
 Vergoigne, qant voit apparant
 Temptacioun d'ascun forsfait :
 Par resoun ne serra desfait
 Cil q'ad conduit tant sufficient.
 A Thimotheu l'apostre escrit, 11990
 Par son consail et son excit
 Qe femme se doit aourner
 Honestement de son habit,
 Maisq'a Vergoigne soit soubgit,
 Qe fait les dames saulf garder.
 Ce dist ly sage proverbier :
 'La grace q'est en vergonder
 Valt sur trestout fin orr eslit' :
 Car son office et son mestier
 Maintient et gart sanz reprover
 Le corps ovesques l'espirit. 12000

De la Vergoigne estoit garni
 Saint Job, qant il disoit ensi,
 'Ce dont jady me vergondoie
 Est avenu, la dieu mercy.'
 David le saint prophete auçi
 Dist que tous jours enmy sa voie
 Vergoigne encontre luy rebroie,
 Que luy tollist la veine joye
 D'orguil, qui l'avoit assailly.
 Dont vergonder tresbien me doie, 12010
 Depuisq'en ceaux vergoigne voie,
 Q'au dieu furont prochein amy.

Tout comme toi mesmes fais garnir
 Par ta Vergoigne d'eschuir
 Les vices qui sont a reprendre,
 Ensi te falt bien abstenir
 Del autry honte descouvrir ;
 Car cuer honteus doit estre tendre,
 Et d'autry honte honte prendre ;
 Car s'autry mal porrez entendre, 12020
 Du quoy sa honte doit venir,
 Celer le dois et bien defendre :
 Ce puiss tu bien d'essample aprendre,
 Comme deinz la bible hom puet ofr.

L'un fils Noë, qui Cham ot noun,
 Qui puis en ot la maleçoün,

11982 ensont

12026 enot

Les secretz membres de son pierre
 La qu'il gisoit en *verreisoun*
 Moustroit par sa *desrisioun*
 A Sem et a Japhet son frere ; 12030
 Mais cils par *vergondouse chere*
 En *tournant* leur visage arere
 Doleront de la *visioun* ;
 Si luy *coeveront* la part derere,
 Que vilainie n'y appere,
 Dont puis avoient *benecioun*.
 Si la *vergoigne* est necessaire
 Au fin que tu ne dois mesfaire,
 Ce n'est *Vergoigne* nequedent,
 Qant pour la gent te fais retraire, 12040
Sique tu n'oses le bien faire
 Pour dieu plesance *apertement* :
 De ce nous mostra plainement
 Judith, quelle au *consailement*
 De Vago le fel *deputaire*
 La chambre entra *souleinement*,
 U ly Prince Olophern l'attent,
 Dont dieus complist tout son affaire.
 Molt valt apert et en privé
Vergoigne soit ensi *gardé* 12050
 Q'apres ne soions *vergondez* ;
 Car dieus, vers qui riens est celée,
 Ce nous ad dit et *conseilé*,
 Q'au fin nous verrons *desnuez*
 Noz hontes et noz *malvoistés*.
 Par l'evangile *auci* *trovetz*,
 Que ja n'est chose tant *privé*
 Q'aperticer ne la *verretz* :
 Ce q'en l'oraille *consailetz*
 Sur les maisons serra *preché*. 12060
 Quoy valt ce lors *que* l'en se vante,
 Puisque la chose ert *apparante*
 A jour de dieu *judicial* ?
 Me semble *que* la poy *parlante*
Vergoigne serra plus *vaillante*
 Que n'iert *Vantance* a ce *journal* :
 Car qant langue est *superflual*,
 Trestout bien fait *tourner* en mal
 D'orguil, dont elle est *gobeiante* ;
 Mais la *Vergoigne* *especial* 12070

12032 Entourmant

12080 plussouerein

12094 plusgentil

Du pris doit porter *coronnal*,
 Que bien faisoit et fuist *taisante*.
Vergoigne ad une sue *aqueinte*,
 Noblesse ad *noun*, molt *perest* *seinte*,
 Et poy tient de l'onour *mondein*,
 U voit la gloire *courte* et *feinte* :
 De la nobleie ne se *peinte*,
 Ainz ad le cuer noble et *haltein*,
 Dont puet venir a son *darrein*
 A l'onour q'est plus *soverein* ; 12080
 Pour ce fait mainte belle *enpeinte*,
 Et fiert maint beau cop de sa *mein*,
 Dont false orguil trestout au *plein*
 Abat et met soubz sa *constreinte*.
 Celle est sans falte la *noblesce*
 Quelle est par droit la *garderesse*
 De l'alme. O fole *Avanterie*,
 Comme tu es pleine de *voeglesce*,
 Qant tu te fais de *gentillesce*
 Avanter, et tu n'el es *mye* : 12090
 Terre es et terre au *departie*
 Serras, et tiel a ma *partie*
 Sui je : di lors en ta *grandesce*
 Q'est plus gentil ? Si je voir *die*,
 Qui plus vers dieu se *justefie*,
 Plus est gentil, je le *confesse*.
 Auci si meulx de moy *vestu*
 Soiez, je n'en *douns* un *festu* ;
 Ou si tu mangez meulx de moy
 Pour ta richesce, et sur ce tu 12100
 Te vantes, lors de sa *vertu*
Vergoigne te puet dire, *Avoy* !
 Car tous les bestes que je voy
 Nature veste de sa *loy*,
 Et puis q'ils soient *sustenu*,
 Les paist la terre ensi *comme* toy ;
 Pour ce cil qui se vante en soy,
 De *Vergoigne* ad son pris *perdu*.
 Ore dirra de la *quinte* file de *Humilité*,
 Quelle ad *noun* *Obedience*.
 La *quinte* file *bonne* et *belle*
Obedience l'en l'appelle, 12110
 Que naist du *Resoun* et d'*Umblesce* :
 Plus est *soubgite* que l'ancelle,

Ne puet monter en sa *cervelle*
 La chose dont Orguil l'adesce,
 Ce sciet son Abbes et s'Abesse
 En la *maisoun* u est *professe*,
 Que ceste file est sans *querelle*,
 Ainz s'obeit et se *confesse*
 Solonc la droite *reule* *expresse*
 Et au *moustier* et au *chapelle*. 12120
 Quiconque soit le droit *amant*
 De ceste file, tout avant
 A dieu du corps et du *corage*
 S'obeie ; et s'il aviene tant
 Q'adverseté luy soit *venant*,
 De ses chateaux *perte* ou *damage*,
 Ou de *pourchas* ou d'*eritage*,
 Ou *maladie* en son *corsage*,
 Ou *piere* ou *mere* ou son *enfant*
 Ou l'autre gent de son *lignage* 12130
 Verra *morir*, tout coy s'estage,
 Q'encontre dieu n'est *murmurant*.
 Tout scies tu bien *que* tu *morras*,
 Et nientmeins tu le *prins* en *gas*,
 Disant *que* tous devons *morir* :
 Di lors q'est ce que tu *ferras*.
 Pour quoy pour l'autri mort *plouras*,
 Qant tu ta *propre* mort *ghemir*
 Ne voes ? Pour fol te *puiss* tenir,
 Qant l'autri mort ne fais *souffrir*, 12140
 Comme tu ta *propre* *souffreras* :
 Car deux biens t'en porront *venir*, f. 69
 L'un que tu *fras* le dieu *plesir*,
 Et l'autre c'est pour ton *solas*.
 Obedience du bon *gré*,
 Solonc que dieus l'ad *commandé*,
 Tient les *preceptz* du *sainte* *eglise*,
 Et son *prelat* et son *curée*
 Chascun solonc sa *dueté*
 Honourt *comme* doit par *bonne* *guise*,
 Et ses *parens* en toute *assisse*, 12151
 Si *comme* la *loy* luy est *assisse*,
 Sert et obeie en leur *degré* ;
 As ses *seigneurs* tient *leur* *franchise*,
 Et ses *soubgitz* point ne *despise* :
 Molt ad le cuer bien *ordiné*.
 L'en doit honour au *president*,

Du *quelque* loy q'il est *regent*,
 Depuisqu'il est *jugge* *establi*
 En *sainte* *eglise* ou autrement : 12160
 Par Moyses car *tielement*
 El livre *deutronomii*
 Dieus dist et puis *comande* *ensi*,
 Que cil qui ne s'est *obei*
 Solonc son *saint* *commandement*
 Au *prestre* et autre *jugge* *auci*,
 Je *vuil*, quiconque soit *celly*,
 Qu'il en *morra* par *juggement*.
 L'onour de tes *parens* *enseine*
 L'apostre par *tresbonne* *enseigne*, 12170
 Si te *promet* pour l'obeir
 Sur *terre* *longue* *vie* et *seine* ;
 Et de la *loy* puis te *constreigne*
 Que d'obeissance dois *servir*
 Ton *prince*, et puis te dois *vulr*
 A tes *voisins*, et *chier* *tenir* .
 Et ton *prochein* et ta *procheine*
 Sans *orguillous* *desobeir* ;
 Dont *humblement* le dieu *plesir*
 Ferras et ton *proffit* *demeine*. 12180
 Mais par *diverse* *discipline*
 Au *prelacie*, q'est *divine*,
 Et au *terriene* *seigneurage*
 Dois obeir en ta *covine* ;
 L'un ad ton corps en sa *seisine*,
 Et l'autre ad t'alme en *governage* :
 Sur quoy dist Salomon le *sage*,
 'Obeie t'alme au *presterage*,
 Maisque la *teste* soit *encline*
 Au *prince*, et ensi sanz *oultrage* 12190
 Par obeissance te *desguage* :
 Fai d'un et d'autre la *doctrine*.
 Et sur trestout obeie *toy*
 A ton *baptisme* et a ta *foy*
 Solonc ton dieu as *joyntes* *meins*.
 Ce dist l'apostre *endroit* de *soy*
 Enfourmant la *novelle* *loy*
 Par ses *epistres* as *Romeins*
 Et as *Hebreus*, ne plus ne *meinz* :
 'Gardetz,' ce dist, 'voz *cuers* *de-*
deinz,
 Que la *creance* y soit tout *coy* ; 12201

12168 enmorra

Car je vous fais tresbien certains,
C'est impossible a les humeins
De plaire a dieu s'ils n'ont ce quoy.
Je truis escript aici cela,
Que l'omme just du foy vivra,
Et dieus en porte tesmoignance
En s'evangile quant precha;
Si dist, ' Qui se baptizera,
Gardant la foy sanz variance, 12210
Tout serra sauf; car par creance
Serront soubgit a sa puissance
Tous mals, que riens luy grevera:
Et cil qui par desobeissance
S'est mis au fole mescreance,
Par jugement dampné serra.
Abel en foy sacrifia,
Dont en bon gré dieus l'accepta,
Mais du Cahym le refusoit:
Noë, qui droite foy guarda, 12220
Fesoit celle arche dont salva
Les vies que dieus commandoit:
La foy d'Enok, que dieus veoit,
Le fist ravir au tiel endroit,
Q'il mort terrene ne goustá;
Et Sarre, qant baraine estoit,
Par droite foy q'en dieu creoit
De Abraham un fils porta.
Et d'Abraham l'obedience
Puis apparust qant main extense 12230
Ot pour son fils sacrefier;
Mais dieus en fesoit sa defense,
Et si luy dist q'en sa semence
Trestoutes gens volt benoier.
Q'om doit obedience amer
Ly sages nous fait enseiner,
Et donne a ce bonne evidence,
Qant dist que plus fait a loer
Obedience d'umble cuer
Que sacrefice ove tout l'encense. 12240
De Isaak aici je lis,
Qui molt estoit du foy garnis,
Qant pour le temps q'ert a venir
Volt benoier Jacob son fitz:
Et puis Jacob a son avis

12207 enporte

12232 enfesoit

12243 avenir

Des dousze enfans volt plus cherir
Joseph, et pour plus eslargir
Ses graces luy fist benoier:
Du foy c'estoit trestout enpris, 12250
Dont dieus, qui savoit leur desir
Et leur creance, fist complir
Que l'un et l'autre avoit requis.
Qant Moyses nasquist primer,
L'en luy faisoit pour foy muscer
Trois moys, siq'il ne parust mye;
Et puis, qant fuist aulques plener,
Pour foy se fist aperticer,
La file Pharaos s'amie
Lessant, q'avant l'avoit norrie;
Et puis se mist en jeupartie, 12260
Qant il l'Egipcien tuer
Fesoit de ce qu'il ot laidie
Sa foy; dont dieus de sa partie
Luy fist en grant estat monter.
Puis Moyses en foy feri
La rouge mer, que s'en parti
En deux, dont ly Hebreu passeront;
Mais Pharaos qui les suy
Ove ses Egipcienz aici
En halte mer sanz foy noieront: 12270
Ly autre apres qui foy garderont
Ove Josué tout conquereront
La terre, dont furent seisi.
Par ce que cils la foy ameront
Du viele loy, nous essampleront
Que la nouvelle eions cheri.
La foy du novel testament
Devons cherir, car povere gent
Encontre toute cruauté
Des les tirantz primerement 12280
Venquiront vertuosement
Le siecle, et ont en dieu fondé
La foy du cristieneté;
Dont semble a moy q'en no degré
Bien devons estre obedient,
Puisque cil ont la foy gaigné,
Que par nous soit si bien gardé,
Que nous la perdons nullement.
L'apostre donne au foy grant pris,

Du quoy ly saint furent apris, 12290
Qant les miracles en fesoient,
Dont convertiront les paiis:
Par foy le feu, qant fuist espris
Pour les ardoir, ils exteignoient;
Par foy les bouches estouppoient
De ces lyons, q'ils ne mordoient;
Par foy soubmistront l'espiritiz,
Par foy les mortz resuscitoient,
Par foy le siecle surmontoient,
Par foy gaigneront paradis. 12300
Sachez que la fondacioun
Du toute no Religioniun
C'est foy, comme saint Jehan le dist;
Car qant a no salvacioun,
La foy fait supplicacioun
Devant la face Jhesu Crist;
Et ce que l'oill jammais ne vist,
Ne cuer de l'omme ne l'aprist,
Ainz est en hesitacioun,
La droite foy trestout complist; 12310
Et la que resoun ne souffist,
La foy fait mediacioun.
En l'evangile, pour voir dire,
Ne lis je point que nostre sire
Ascun malade fesoit sein,
Q'au foy riens voloit contredire;
Mais cils qui le creioient mire
Et fils au pierre sovereign,
Sur tieux mettoit sa bonne mein,
Dont corps et alme tout au plein 12320
Mist en sauté que duist souffire:
Par cest essample sui certain
Que des tous biens le primerein,
C'est droite foy que l'alme enspire.
La foy est celle treble corde,
Du quelle Salomon recorde
Q'au paine jammais serra route:
Car cil q'au droite foy s'acorde,
Lors char et monde et deble encorde
Et lie, si que celle route 12330
Ne puet grever du grein ou goute
A l'alme dont la foy degoute;
Car grace y est de sa concorde,
Que tous ensemble les deboute, f. 70

12291 enfesoient

Et luy conduit sanz nulle doute
Au porte de misericorde.
Le lyen dont la foy nous lie
Tous les lyens d'Adam deslie,
Des queux ainçois nous ot liez
D'origenale felonnie, 12340
Qant nous creons que dieus Messie
Est de la douce vierge nez,
Ove les articles ordinez
Du sainte eglise et confermez:
Et si prover ne porrons mye
La foy par sensibilités,
Merite avons le plus d'asses
De croire la sanz heresie.
Pour ce t'obeie en ton voloir,
Si comme saint March te fait savoir.
A qui s'obeient vent et mer; 12351
Car meulx valt obeissance avoir
A soul dieu, que pour nul avoir
Du vanité les gens flater:
David le dist en son psalter,
' Meulx valt en dieu soul esperer
Q'es princes': car cils n'ont pooir
Forsque le corps de toy grever;
Mais dieu te puet par tout aider,
Si tu vers luy fais ton devoir. 12360
La droite foy est fondement,
Ce dist Senec, que seurement
Supporte toute sainteté
Si fermement et loyaument,
Que nuls la puet ascunement
Par grief d'ascune adverseté
Flechir un point du verité,
Ne par donner prosperité
Du siecle ove tout le bien q'appent;
Car foy q'est ferm enracinée 12370
Est corrupue en nul degré,
Ainz verité tient et defent.
Mais comme l'apostre nous aprent,
Par ce q'om croit tantsolement
La foy, om nul loer reporte,
S'il ne fait oultre ce q'appent
Des bonnes oeuvres ensement;
Car foy sanz oeuvre est chose morte:
Et d'autre part son oeuvre amorte

Cil qui sanz foy son oeuvre apporte.
 Ly deables croit tout fermement 12381
 La foy de Crist, mais mal enhorte :
 A luy ressemble cil qui porte
 La foy et fait malvoisement.
 Mais la vertu d'Obedience
 Au droite foy son point commence,
 Et puis procede en son bienfait.
 N'est pas en vein ce q'elle pense :
 Car u que fra la reverence,
 Du cuer ains que du corps le fait; 12390
 Et d'autre part ne se retrait,
 Par tout le siecle u q'elle vait
 Et voit des poveres l'indigence,
 Que lors a sa bource ne trait,
 Et s'obeit, si riens y ait.
 Pour leur donner de sa despense.
 Obedience el cuer humein
 Est au chival du bounté plein,
 Ou au bonne asne ressemblant :
 L'un court plus tost et plus certain, 12400
 Qant om le meine par le frein
 Que qant souleyn se vait corant ;
 L'autre est tout commun obeissant
 Au mestre ensi comme au servant,
 Tant au seignour comme au vilein ;
 Frument ou feve en un semblant,
 Maisq'il son charge soit portant,
 N'ad cure quelque soit le grein.
 Senec t'enseigne que tu fras ;
 Si tout le mond veintre voldras, 12410
 Lors a raisoun te fai soubgit :
 Par ce q'ensi t'obeieras,
 Le siecle veintre tu porras,
 Si conquerras bien infinit.
 Pour ce, solonc que j'ay descrit,
 D'umilité sans contredit
 En cuer et corps toy mette en bas,
 Sique le mond soit desconfit,
 Et tu le corps ove l'espirit
 Amont el ciel eshaulceras. 12420
 D'Obedience la vertu
 Tu puiss essampler de Jhesu,
 Qant il de sa tres humble port,

12400 plusost

12430 plusfort

12455 plussages

Comme cil qui n'estoit esperdu,
 Pour rançonner que fuist perdu,
 Se fist obedient au mort
 Par ceaux qui luy firont grant tort :
 Mais il nous donne en ce confort
 Q'obedience soit tenu,
 Moustrant que c'est un tout plus fort,
 Que l'alme encontre orguil support,
 Et la fait humble devers dieu. 12430
 Ore dira la descripcion de la
 vertu de Humilité par especial.
 Gregoire dist en son Moral,
 Trois choses par especial
 D'umilité font demoustrance :
 C'est le primer et principal,
 Ses soverains en general
 Obeie sanz desobeissance,
 En fait, en dit, en contenance ;
 Puis n'appara par demoustrance 12440
 Q'a son pareil soit parigal,
 Ne des soubgitz vaine honouurance
 Requiere ; car d'umiliance
 Lors portera verrai signal.
 'Humilité,' seint Bernard dist,
 ' Soy mesmes tant tient en despit
 Que nuls la porroit tant despire ' :
 D'umilité saint Bede escrit,
 Que c'est la chief soubz quelle gist
 Science, dont tout bien respire. 12450
 Q'umilité l'en doit eslire,
 Du Tholomé l'en porra lire,
 Q'estoit un philosopre eslit,
 Qui dist : ' Tous sages a descrire,
 Cil est plus sages, pour voir dire,
 Qui plus est humble d'espirit.'
 Humilité la graciouse
 A l'arbre belle et fructuose
 Est ressemblable en sa covine ;
 Car tant comme l'arbre plus ramouse^{se}
 Soit, et du fruit plus plentivouse, 12460
 De tant vers terre plus s'encline :
 Semblable auci je la diffine
 Au piere dyamant tresfine,
 Q'en orr scoir est dedaignouse,

De la richesse se decline
 Et est au povre ferr encline,
 Si en devient plus vertuose.
 La palme endroit de sa nature
 Porte une fourme d'estature 12470
 Sur toutes arbres plus souleine ;
 Elle ad son tronc en sa mesure
 Petit par terre et pardessure
 Le tronc est gross : ce nous enseigne
 Humilité, que l'alme meine
 Humble et petite en vie humeine
 Sanz orguil et sanz fole cure :
 Par terre croistre se desdeigne,
 Mais vers le ciel est grosse et pleine
 Plus que nulle autre creature. 12480
 L'umle est semblable au bon berbis,
 Q'a nous proufite en tous païs,
 Mais son honour ne quiert ne pense ;
 Et puis au fin q'il soit occis
 Il souffre, siq'en nul devis
 Voet faire aucune resistance :
 Et par semblable obedience
 L'omme humble ne quiert reverence,
 Combien qu'il digne soit du pris,
 Ne ja pour tort ne pour offense, 12490
 Q'aucuns luy fait, sa conscience
 Ne serra ja d'orguil espris.
 Humilité, ce semble a moy,
 Se tient semblable au fils du Roy,
 Q'est jofne et sucche la mamelle ;
 Q'il porte grant honour, du quoy
 Petit luy chalt, ainz souffre coy
 Que l'en luy trete, sa cil et celle :
 Humilités ensi fait elle,
 En halt estat plus est ancelle, 12500
 Et meinz loenge quiert du soy ;
 Sicomme solail deinz sa roelle,
 Comme plus y monte, plus est belle,
 Et plus commune al esbanoy.
 Cil q'est vrais humbles d'espirit
 Plus q'a son propre s'obeit
 Al autry sen, q'il voit plus sage ;
 Car chascun autre plus parfit
 De soy repute, et plus profit

12468 endevient

12507 plussage

12510 Enquide

En quide avoir d'autry menage, 12510
 Que de son propre gouvernage :
 Pour ce les faitz de son corage
 A l'autry conseil tient soubgit ;
 Il met soy mesmes en servage,
 Dont du franchise l'avantage
 Avoir porra, q'est infinit.
 Ly sages de son essamplaire
 Te dist, ' Tant comme tu soiez maire,
 Tant plus t'umilie au toute gent ' :
 Si dist auci, que pour dieu plaire 12520
 Meulx valt ove l'umle et debonnaire
 Vivre en quiete simplement,
 Q'ove l'orguillous de son argent
 Partir et vivre richement. f. 71
 Pour ce pren garde en ton affaire,
 Si fai selonc l'essamplément
 Du sage, ou certes autrement
 T'estoet compleindre le contraire.
 Ce dist dieus, qu'il eshaulcera
 Quiconque en soi s'umilera, 12530
 Mais qui d'orguil soy proprement
 Eshaulce, il le tresbuchera ;
 Car cuer sovent soy montera
 Encontre son ruinement.
 Om dist auci q'abitement
 En terre basse seurement
 Valt plus q'en halt, u l'en cherra :
 Pour ce cil qui vit humblement
 Se tient en bass si fermement,
 Que d'orguil monter ne porra. 12540
 Combien que l'umle soit gentil
 Et vertuous plus q'autre Mill,
 Encore deinz son cuer desire
 Que nuls luy tiene forsque vil,
 Car de sa part ensi fait il :
 C'est la vertu que nostre sire
 Loa, qant vint de son empire,
 A ce q'il voit l'orguil despire,
 Dont jady fuismes en peril ;
 Vilté souffrist sans escondire : 12550
 Bien devons donque humblesce eslire,
 Puis q'ensi faisoit ly dieu fil.
 Sa douce mere auci Marie

L

Nous lessa bon essamplerie
 Q'umilité soit bien tenu ;
 Car sur trestoute humaine vie
 Elle estoit humble en sa partie.
 Pour ce portoit le fils de dieu,
 Par qui l'orgueil fuist abatu,
 Dont noz parentz furent deçu, 12560
 Qant ils perdirent leur baillie
 Du paradis ; mais en salu
 Qui voet remonter a ce lieu,
 Lors falt q'umilité luy guye.
 Ly deable, q'avoit grande envie
 Au saint Machaire et a sa vie,
 Ensi luy dist par grant irrouer :
 ' Si tu te junes en partie,
 Je fai plus, car sanz mangerie
 M'abstien toutdis et sanz liquour ; 12570
 Et si tu es en part veilour,
 Je fai plus, car de nuyt ne jour
 Unques des oils ne dormi mye ;
 Et si tu fais en part labour,
 Je fai plus, car sanz nul retour
 Et sanz repos je me detrie.
 ' En tout ce je te vois passant ;
 Mais tu fais un point nepourquant,
 Du quoy ne te puiss surmonter ;
 Ainz tu m'en vas si surmontant, 12580
 Qe n'ay poair de tant ne qant,
 Q'a toy porroie resister :
 Et c'est que tu tout au primer
 D'umilité te fais garder,
 Dont dieus par tout te vait gardant.'
 Par cest essample om puet noter,
 Que qui se voet humilier
 Il ad vertu de beau guarant.
 Auci l'en puet estre essamplé
 Du viele loy, q'umilité 12590
 Dieus ayme ; et ce parust toutdroit,
 Qant Rois Achab, q'avoit peccché
 Vers dieu, s'estoit humilié ;
 Car tantost qu'il s'umilioit,
 Dieus son peccché luy pardonnoit,
 Et en ses fils le transportoit ;
 Helye ensi luy ot contée.
 Asses des autres l'en porroit

Trover d'essamples, qui voldroit
 Sercher l'escrriptz d'antiquité. 12600
 Quoy plus coustoit et meinz valoit,
 Et plus valoit et meinz coustoit,
 Jadis uns sages demanda :
 Et uns autres luy respondoit,
 Q'orgueil plus couste en son endroit,
 Et sur tout autre meinz valdra ;
 Mais cil q'umblesce gardera
 Meinz couste et plus prouffitera
 Au corps et alme, quelque soit. 12610
 Dont m'est avis que cil serra
 Malvois marchant q'achatera
 Le peiour, qant eslire doit.

**Ore dirra de les cink files du
 Charité, des queles la primere ad
 noun Loenge, contre le vice de
 Detraccioun.**

Encontre Envie est Charité,
 Quelle est au resoun mariée ;
 Si ad cink files voirement,
 Dont la primere est appellée
 Loenge, q'est des tous amée ;
 Car celle loue bonnement
 Et ayme toute bonne gent : 12620
 N'est qui plus charitousement
 Se contient en bonne ameisté ;
 Detraccioun hiet nequedent,
 Car male bouche aucunement
 Jammais serra de luy privé.

Loenge au dieu primer s'extent,
 En ciel, en terre, en firmament,
 Et en toute autre creature :
 Car le prophete tielement
 As angres dist primerement
 Et as les corps qui sont dessure, 12630
 Solaill et lune, estoille pure,
 Q'ils dieu loer doivent toute hurc :
 La mer de sa part ensement,
 Feu, neif, gresil, glace et freidure,
 Ly jours, la nuyt en leur nature,
 Chascuns loenge a dieu purtent.
 Sicomme les choses paramont
 Loenge au dieu reporteront,

Ly saint prophete dist q'ensi
 Les choses que sur terre sont 12640
 Loenge au creatour ferront :
 Riens est vivant en terre, qui
 Ne doit loenge faire a luy,
 Oisel, piscon et beste auci,
 Ove les reptils, dieu loeront,
 Et l'arbre qui sont beau floury ;
 La terre en soy n'en est failly,
 Qe tous loenge au dieu ne font.
 Mais au final, je truis escrit,
 Loenge fait tout esprit 12650
 Au dieu q'est seigneur souverain ;
 Mais sur trestout grant et petit
 Pour dieu loer en chascun plit
 Plus est tenu l'estat humein :
 Car il nous forma de sa mein,
 Et puis rechata du vilein
 Qui nous avoit au mort soubgit.
 Pour ce loons dieu primerein,
 Qe son bienfait ne soit en vein,
 Mais que luy sachons gré parfit. 12660
 Et si tu voes au droit donner
 Loenge au dieu, lors falt garder
 Qe tu ne soiez en peccché.
 Saint Piere le fait tesmoigner,
 Qe dieus ne le voet accepter,
 S'il soit du male gent loé :
 Ly sage auci par son decreté
 Dist que ce n'est honesteté
 Q'om doit en peccché dieu loer ;
 Car qant le cuer as entusché, 12670
 Falt que la langue envenimé
 En soit, dont bien ne puet parler.
 Ly Rois David commence ensi :
 ' O dieu, beau sire, je te pry,
 Overetz mes leveres que je sace
 Donner loenge au ta mercy.'
 Et d'autre part il dist auci :
 ' O dieus, vous plect il que je face
 A ton saint noun loenge et grace ?' 12680
 Et puis dist en une autre place :
 ' Je frai loenge au dieu, par qui
 Je serray saulf, quique manace ;

12660 Maisque

12672 Ensoit

12716 enait

L 2

Car dieus mes detractours forschace,
 Par ce que fai loenge a luy.'
 En Judith l'en porra trover,
 Mardoche faisoit dieu prier,
 Qu'il de son poeple en ceste vie
 Loenge vorroit accepter ;
 Car David dist en son psalter,
 Qe mort ne loera dieu mye ; 12690
 Car l'alme q'est ensi partie
 Ne fait loenge en sa partie,
 Dont dieu porra regracier :
 Pour ce vivant chascuns s'applie
 Au dieu loer, q'il nous repplie
 Loenge que ne puet plier.
 En charité si tu bien fras,
 Dieu en soy mesmes loeras,
 Q'est toutpuissant en son divin,
 Et puis pour dieu t'acorderas, 12700
 Solonc que digne le verras,
 Donner loenge a ton veisin
 De sa vertu, de son engin.
 Loer le dois sanz mal engin,
 Car d'autry bien n'envieras ;
 Mais si voes estre bon cristin,
 Au pris d'autry serras enclin,
 Et l'autry blame excuseras.
 Rois Salomon ce nous aprent,
 Qe l'en doit charitousement 12710
 Du bonne langue sanz mestrait
 Loer la gloriouse gent
 Qui vivent virtuousement f. 72
 Et sont des bonnes mours estrait ;
 Car qui plus valt de son bienfait,
 C'est drois q'il plus loenge en ait,
 Et que l'en parle bonnement
 Par tout u tiel prodhomme vait :
 Si male bouche est en agait,
 Iceste vertu le defent. 12720
 Ly sage ce nous vait disant,
 Solonc que pueple vait parlant
 L'estat de l'omme s'appara :
 Escrript auci j'en truis lisant,
 Au vois commune est acordant
 La vois de dieu ; et pour cela

Catoun son fils amonesta,
 Q'il ne soy mesmes loera
 Ne blamera; car sache tant,
 Ou bons ou mals quelq'il serra, 12730
 Le fait au fin se moustrera;
 N'est qui le puet celer avant.
 Catoun dist, 'Tu ne loeras
 Toy mesmes, ne ne blameras':
 Enten l'aprise qu'il t'en donne:
 Il dist, 'Fai bien, car si bien fras,
 Ton fait doit parler en ce cas,
 Maisque ta bouche mot ne sonne.'
 La bouche qui se desresonne
 Abat les flours de la coronne, 12740
 Et fait ruer de hault en bas:
 Qui trop se prise il se garçonne,
 Et cil qui l'autry desperonne
 Ne serra sanz vengeance pas.
 Mais si des gens loé soiez,
 Pour ce ne te glorifiez;
 Ainz loez dieu du tiele prise,
 Et fai le bien que vous poetz,
 Si q'en son noun loenge eietz,
 Comme Salomon te donne aprise:
 Car si malfais, n'as point enprise 12751
 Loenge au droit, car de mesprise
 C'est tort si l'en serra loez.
 L'apostre dist, 'Del bien vous prise;
 Mais d'autre part je vous desprise,
 Qant a malfaire vous tournez.'
 La vertu de Laudacioun,
 Quelle est du generacioun
 De Charité, jammais nul jour
 Ne fist malvois relacioun 12760
 Par envieuse elacioun
 A l'autry blame ou deshonor;
 Ainz qant la bouche au detractour
 Mesdit et parle en sa folour
 Pour faire desfamacioun,
 Encontre tout tiel losengour
 Loenge vait du bon amour
 Pour faire l'excusacioun.
 Mais ceste vertu nepourqant
 Toutdis s'avise en son loant, 12770
 Que pour l'onour d'autry ne die

Plus que n'est voir ou apparant;
 Car ja pour nul qui soit vivant
 Ne volra faire flaterie:
 Ainz que voir sciet de la partie,
 Du bien, d'onour, du curtoisie
 Pour l'autry pris ce vait disant;
 Et s'il voit l'autry vilainye,
 Tout coy se tient, n'en parle mye,
 N'ad pas la langue au fil pendant. 12780
 Ce dist ly sage proverber,
 'Meulx vait taire que folparler,
 Ou soit d'amy ou d'adversaire':
 Car nuls doit autre trop priser;
 Ainçois plustost q'om doit flater,
 Du parler om se doit retraire:
 Et d'autre part il vait meulx taire,
 Ou soit apert ou secretaire,
 Que par envye ascun blamer:
 Dont en ce cas qui voet bien faire,
 Du trop et meinz est necessaire 12791
 Mesure en son parlant garder.
 Mais ceste vertu en balance
 Du flaterie et mesdisance
 Son pois si ovel gardera,
 Que son amy pour bienvuillance
 Du flaterie ja n'avance,
 Et d'autre part ne blamera
 Son anemy, quelq'il serra,
 Plus que resoun demandera: 12800
 Ainz vers chascun la circumstance
 Du charité reservera;
 La bonne cause loera,
 Et l'autre met en oubliance.
 Ce nous dist Tullius ly sage,
 Q'en trop priser est tant d'outrage
 Comme est en trop blamer, ou plus.
 Par trop priser je fai damage,
 Qant le saint homme en son corage
 Par vaine gloire ay abatuz; 12810
 Du ma losenge l'ay deçuz,
 Dont pert le fruit de ses vertus:
 Mais si je di l'autry hontage,
 Je fai mal a mes propres us,
 Que l'autry fame ay corrupuz,
 Mais il de s'alme ad l'avantage.

'Autry peccché,' ce dist l'auctour,
 'Dampner ne dois, car c'est folour:
 Si tu prens remembrance a toy,
 Par cas tu fus ou es peiour, 12820
 Ou tu serras n'en scies le jour,
 Car chascun homme est frel du soy.'
 Et nepourqant sovent je voy,
 Hay est abatuz au tournoy,
 Qui l'endemein ert le meillour,
 Dont portera le pris; par quoy
 En charité, ce semble a moy,
 Chascuns doit autre dire honour.
 Cil qui loenge tient au droit
 Envers autry, et mesmes soit 12830
 Despit del autry false envye,
 Ou desfamez au tort, n'en doit
 Doubter, car dieus qui trestout voit
 Par son prophete Scphonie
 Ce dist: 'Ma gent, que voi laidie,
 Despite, abjecte, ert recueillie
 Par moy, qui leur en ferray droit;
 Si leur dourray de ma partie
 Loenge et noun sanz departie,
 Je frai ce chier que vil estoit.' 12840
 Ly bons hiealds ce doit conter
 Dont l'autry pris puet avancer,
 Et autrement il se doit taire:
 Ensi la vertu de loer
 L'en doit au balsme ressembler,
 Que porte odour si debonnaire,
 Dont la doulcour devant dieu flaire.
 De l'autry vice ne sciet guaire,
 S'ascuns luy voldra demander;
 Pour ce Loenge en son affaire 12850
 Est de son droit le secretaire
 Du Charité pour deviser.
 Sicomme d'estée par les cliers jours
 Aval les pretz, u sont les flours,
 L'ées vole et vait le mel cuillante,
 Mais de nature les puours
 Eschive, et quiert les bons odours
 De l'erbe que meulx est flairante,
 Ensi Loenge bien parlante
 Autry desfame vait fuiante, 12860
 12837 enferray

N'ascoulte point les mesdisours,
 Essample prent de l'ées volante,
 Au riens s'en vait considerante
 Forsq'as vertus et bonnes mours.
 Sicomme Solyns dist en sa geste,
 La Panetere est une beste
 Que porte si tresdoulce aleine,
 Q'espiece d'ort ne flour agreste
 Ne vait pour comparer a ceste:
 Car tiel odour sa bouche meine, 12870
 Que toute beste qui l'asseine
 Y court pour estre a luy procheine,
 Presdu spelunce u que s'arest.
 Ensi je di, la bouche humeine,
 Si de loenge soit certeine,
 Sur tout odour plus est honeste.
 David le dist en prophecie,
 Que la divine curtoisie
 Est tant benigne et merciabile,
 Que ly plus povres qui mendie, 12880
 S'il du bon cuer loenge die
 Au dieu, son dit ert acceptable.
 O quelle vertu charitable,
 Que l'omme fait au dieu loable,
 Et prosme au prosme en ceste vic
 Chascuns vers autre est honorable:
 C'est une armure defensable
 Encontre malparler d'Envie.
 Ore dirra de la seconde file du
 Charité, quelle ad noun Conjoye.
 Du Resoun et du Charité 12890
 La file q'est seconde née
 Tout s'esjoyt de l'autry joye,
 Si ce soit par honesteté;
 Car du toute prosperité
 Dont voit que son voisin s'esjoye,
 Maisque ce vient par bonne voie,
 Ensemble ove l'autre se rejoye
 Sans envieuse iniquité:
 Si sagement son cuer convoie,
 Que ja d'envye ne forsvoie,
 Dont l'alme serra forsvoïe. 12900
 Pour ce q'ensi se conjoÿt
 Des biens dont l'autre s'esjoyt,
 12880 pluspoures

Conjoye Resoum l'appella. **f. 73**
 De ce vertu cil q'est parfit
 L'onour et le commun prouffit
 Plusque son propre il amera:
 Car charité, dont plein esta,
 Ne souffre qu'il enverra
 Ne son seignour ne son soubgit;
 Ainz comme plus l'autry bien verra,
 Tant plus du cuer s'esjoyera; **12911**
 Molt ad deinz soy bon esprit.
 Qui ceste vertu tient en cure
 D'envie ne puet avoir cure,
 Qant voit un autre en sa presence
 Qui plus de luy la gent honore;
 Car del autry bone aventure
 Joyst sanz enviouse offense,
 Si beauté soit, force ou science,
 Honour, valour, pris, excellence, **12920**
 Dont son voisin voit au dessure,
 Par ce qu'il l'autri bien compense,
 Il ad grant joye, qant il pense
 Qe dieus tant donne au creature.
 En l'evangile qant je lis
 Comment la femme ert conjoys,
 Sa dragme qant avoit perdu
 Et retrové, lors m'est avis
 C'estoit en nostre essample mis
 Pour conjoir del autry pru. **12930**
 Ce dist aici le fils de dieu,
 'Qant peccheour vient a salu,
 Trestous les saintz du paradis
 Luy conjoyont': par ce vois tu
 Tout s'acordont a ce vertu
 Les hommes et les espiritz.
**Ore dirra de la tierce file de
 Charité, quelle ad noun Compas-
 sioun.**
 Si comme la vertu de Conjoye
 De l'autry joye se rejoye,
 Tout ensement d'autry dolour
 La tierce file se desjoye, **12940**
 Pour doel del autry plour lermoie,
 Et d'autri trist elle ad tristour:
 Car ja son cuer n'ert a sojour,
 Tant comme verra de nuyt ou jour,

Qe son voisin par male voie
 Du corps ou d'alme est en destour,
 Ainçois comme cil q'est en l'estour
 Aide a muer les maïs envoie.
 Compassioun ne s'esjoÿt
 Qant ses voisins voit a mal plit, **12950**
 Ainçois se doelt de leur dolour,
 Et ce qu'il puet sans contredit
 Les reconforte en fait et dit:
 Au gent malade est visitour,
 As fameilantz est viandour,
 Et ceux q'ont soif abeyve lour,
 Si donne au povre son habit,
 Au prisonner est confortour,
 Au pelerin est herbergour
 De son hostel et de son lit. **12960**
 Compassioun la beneurée,
 Qant n'ad du quoy en son degré,
 Dont puet donner al indigent,
 Alors du cuer et du pensée
 Suspire et plourt en charité
 Le mal d'autry conjoÿnement;
 Et sur ce fait confortement
 Par conseil et monestement,
 Q'om doit souffrir adversité
 De les dolours qui sont present, **12970**
 Q'apres porra sanz finement
 Avoir sa joye appaillé.
 Om doit doloir bien tendrement,
 Ou soit d'estrange ou du parent;
 De ce nous suismes essamplé
 Du Roy David, q'estoit dolent,
 Qant om luy dist comme faitement
 Dessur les montz de Gelboée
 Gisoit ly Rois Saül tué,
 Et Jonathas pres sa costée. **12980**
 L'un l'ot hay mortielement
 Et l'autre estoit son bienamé,
 Mais par commune charité
 Del une et l'autre mort s'offent.
 Et d'Absolon je lis aici,
 Qant il du guerre s'orguilly
 Contre son pierre, et en boscage
 Fuiant par ses cheveux pendi,
 U que Joab le pourfendi

Des lancees; mais qant le message
 Vint a David, lors son visage **12991**
 Comme du fontaigne le rivage
 Trestout des lermes se covery:
 Ne pensoit point du grant outrage
 Q'il ot souffert, ainz en corage
 Se dolt sur le dolour d'autry.
 En une histoire aici je lis,
 Qant Alisandre el temps jadis
 Par guerre en Perse poursuoit
 Roy Daire, qu'il ot desconfis, **13000**
 Et Daire, qui s'estoit fulz
 Pour soi garir, qant meinz quidoit,
 Des ses privetz un le tuoit;
 Dont, pour loer qu'il esperoit
 Du tiele enprise avoir conquis,
 Vers Alisandre y vait toutdroit,
 Et dist qu'il son seigneur avoit
 Moerdry pour estre ses amys.
 Mais quidez vous q'il s'esjoÿ,
 Ly Rois, qant la nouvelle oy? **13010**
 Noun certes, ainçois qant survient,
 Et vist le corps q'estoit moerdry,
 Pour la compassioun de luy
 Tantost si tristes en devient
 Qe du plorer ne s'en abstient,
 Si fist au corps ce q'appartient
 De sepulture. Atant vous dy,
 De cest essample qui sovient
 Avoir compassion covient, **13020**
 Puisq'un paien faisoit ensi.
 Solonc l'istoire des Romeins
 Un Senatour y ot la einz,
 Q'ot a noun Paul, cil guerroia
 Un noble Roy fort et halteins,
 Si fuist par luy cil Rois atteins,
 Qe desconfit pris l'amena:
 Sa petitesse lors pensa
 Paul de soy mesme, et compensa
 L'autry grandesse dont fuist pleinz, **13030**
 Vist come fortune le rua,
 Et du compassioun qu'il a
 Dist que fortune fuist vileins.

13014 endeuient 13043 enessamplant
 13057 plusauant

Combien que Paul au volenté
 Ust victoire et prosperité,
 Compassion ot nepourqant
 Del autry grande adverseté,
 Tout fuist que l'autre avoit esté
 Long temps son mortiel adversant.
 Ce faisoit Paul ly mescreant,
 Et Paul l'apostre bien creant **13040**
 Dist que devons en unité
 Ove les plorans estre plorant:
 Del un et l'autre en essamplant
 Faisons le donque en charité.
 Compassioun del autry peine
 D'essample nostre sire enseine
 En Lazaron resuscitant,
 Qant vist plorer la Magdaleine
 Ove Martha sa sorour germeine.
 He, quel pité del toutpuissant! **13050**
 Il en fremist du meintenat,
 Et d'autri plour fuist lermoiant,
 Et d'autry doel sa dolour meine.
 O qui s'en vait considerant,
 Trop ert d'envye forsvoiant
 Qui cest essample ne remeine.
**Ore dirra de la quarte file du
 Charité, quele ad noun Support,
 contre le vice de Supplantacioun.**
 Encore a parler plus avant,
 Du Charité la quarte enfant
 Celle est du grace bien guarnie
 Encontre Envy et son supplant;
 Support ad noun en supportant **13061**
 La bonne gent de son aye.
 Par tout u voit que dame Envie
 A supplanter se fait partie,
 Tantost Support se mette avant,
 Succourt son prosme et justefie,
 Q'il ne deschiece en vilainye,
 Q'estoit en honour pardevant.
 L'apostre dist que charité
 Selonc sa droite dueté **13070**
 Doit a soy mesmes commencer.
 Pour ce Support en son degré

13051 enfremist 13054 senvait
 13061 ensupportant

Vers dieu primement son gré
 Fait pour soi mesmes supporter :
 Sur charité se fait planter,
 Sique d'envye supplanter
 Ly deables n'avera poesté
 De son corage le penser ;
 Par quoy porroit desavancer
 L'alme en qui dieus s'est avancé. 13080
 Et puis envers le siecle aucy
 Support par tout se fait garny,
 Que quoique nuls en parlera,
 Ses faitz serront tesmoign de luy,
 Que du bonté sont repleny,
 Dont mesmes se supportera :
 Et oultre ce tant comme porra
 A chascun autre il aidera ;
 Car pour le prouffit del autry
 Ses propres biens menusera ; f. 74
 De sa partie nuls cherra, 13091
 Si redrescer le puet ensi.
 Ly pilers sustient la mesoun,
 Et l'oss la char soy enviroun,
 Et l'omme sage en son endroit
 De son savoir, de sa resoun,
 Supporte la condicioun
 Des autres qu'il nounsages voit :
 Par tout u puet, comme faire doit,
 Defent lour tort, sustient lour droit ;
 Si est au fieble comme bastoun 13101
 Ou main, dont il supposez soit :
 Du charité bien se pourvoit
 Q'ensi respont a sa leçon.
 Ne tient la vertu de Support
 Cil qui le vice et le mal port
 De son voisin aide et supporte ;
 Ainçois cil fait a dieu grant tort,
 Q'ascunement sustient atort
 De son engin la cause torte : 13110
 Car qui que les malvois conforte,
 Dont la malice soit plus forte,
 N'ad pas du vertu le confort,
 Dont par Support loer reporte ;
 Ainz falt q'om bonne gent desporte,
 Car du mal nage malvois port.

13083 en parlera 13112 plus forte 13119 nensoit 13123 Ensoit 13126 plussouereine

Om doit supporter bonne gent
 Q'au tort portont accusation,
 Sique lour corps n'en soit en peine ;
 Et ceaux qui font malvoisement 13120
 Om doit bien charitousement
 Redrescer, sique l'alme seine
 En soit : car cil q'ensi se meine,
 Du droit Support tient en demeine
 La vertu, dont loer reprent
 Du charité plus soveraine ;
 Car qui q'ensi le corps destreine,
 Al alma fait supportement.
 Seneques dist aici, du cuer,
 Sicomme du corps, om doit curer
 Chascun les plaies del autry 13131
 Par un douls oignement primer,
 Et c'est par beal amonester,
 Dont puist amender son amy
 Qant male tecche voit en luy ;
 Et puis, s'il ne s'amende ensi,
 Lors doit om poindre et arguer ;
 Mais au final, qu'il soit guarly,
 Falt emplastrer le mal parmy
 Des griefs penances a porter. 13140
 Qui la vertu voldra comprendre
 Du vray Support, puet bien apprendre
 De ce que dieus nous supporta,
 Qant il voloit son fils descendre
 Pour supporter et pour defendre
 Adam, qui ly malfiés pieça
 Avoit ruez ; et pour cela
 La mort souffrist et rechata
 De son support l'umaine gendre :
 Pour nous joÿr il se pena, 13150
 Jusq'en abisme il s'avala,
 En halt le ciel pour nous ascendre.
 Ore dirra de la quinte file de
 Charité, quelle ad noun Bonne
 Entencioun, contre le vice de
 Faulx semblant.
 La quinte file par droit noun
 L'en nomme Bonne Entencioun,
 Que naist du Charité parfite ;
 Quelle en nulle condicioun

Du fraude ou circumvencioun
 Par fals semblant jammais endite
 Parole de sa bouche dite ;
 Ains plainement dist et recite 13160
 Ce dont il pense et autre noun :
 N'ad pas la face d'ypocrite,
 En quelle la falsine habite,
 Dont il deçoit son compaignoun.
 De ceste vertu le semblant
 Qu'il te ferra n'est dissemblant
 A son penser, ains son entente
 A sa parole est ressemblant ;
 Dont vait les graces assemblant
 As quelles l'alme se consente. 13170
 Ne vait pas par la male sente
 Au tiel amy cil qui s'assente ;
 Mais je m'en vois dessassentant
 A Fals semblant, qui me presente
 Tous biens al oill, et puis j'en sente
 Tous mals, q'il me vait presentant.
 Au dist du sage je m'affiere,
 Qui dist, 'Meulx valt que cil te fiere
 Qui deinz son cuer le bien te pense,
 Que cil te baise enemy la chere 13180
 Qui par losenge et false chere
 Tient deinz son cuer muscé l'offense ' :
 Siq' ains que tu porras defense
 Avoir, t'en fait sa violence,
 Dont ton estat met a derere ;
 Mais l'autre, combien q'il te tence,
 Toutdis gart en sa consciencie
 Du charité l'entente chere.
 Je truis escript en la clergie,
 'L'entente, quoy q'om face ou die,
 En porte le judicial' : 13191
 Car, quoy q'om fait en ceste vie,
 Nuls puet soy mesmes fuir mie
 Deinz son entente cordial ;
 Ou soit ce bon ou soit ce mal
 L'en doit bien savoir au final
 Ce que l'entente signifie :
 Dont bonne entente especial
 Doit bien porter le coronnal
 Du toute bonne compaignie. 13200
 13175 iensente 13185 aderere 13191 Enporte 13241 plus excellentz

Le bon entente en son penser
 Est bon, et qant vient au parler
 Meillour, et puis qant vient a faire
 Tresmeulx, siq' au droit deviser
 Les deux fins et le my plener
 Sont sanz defalte pour dieu plaire :
 C'est le tresfin electuaire,
 Que Charité l'ipotecaire
 Ad fait pour tous les mals curer,
 Que viennent de la deputaire 13210
 Envie, quelle en son mesfaire
 Fait tous les biens en mal tourner.
 Mais bon entente en sa baillie
 Est semblable a la bonne lye,
 Que le vessell ove tout le vin,
 Et l'un ove l'autre en sa partie,
 D'odour et seine beverie
 Fait garder savourable et fin :
 Car qant l'entente a chascun fin
 Est bon et plain sanz mal engin, 13220
 Les faitz suiont du bonne vie ;
 Dont om est en l'amour divin
 Si charitous et si cristin,
 Qu'il est suspris de nulle envie.
 Ore dirra la descripcioun de la
 vertu de Charité par especial.
 O Charité du bounté pleine,
 Sur toutes autrez soveraine,
 L'apostre te fait tesmoigner
 Que tu es celle quelle meine
 La voie au ciel, u comme demeine
 Deis proprement enheriter : 13230
 Tu es cil bon hospiteller,
 Par qui se volt dieus herberger
 El ventre d'une vierge humeine :
 Nuls te porroit au plain loer ;
 Tu es du ciel le droit princer,
 Et Roys de la vertu mondeine.
 Les philosophres du viel temps
 Sur tout mettoient cuer et sens
 Pour enquerir la verité,
 Les queux de tous les biens presens
 Sont de vertu plus excellentz : 13241
 Les uns du grant felicité

Delit du corps ont plus loée,
 Les uns richesce ont renommé,
 Les uns en firon argumentz
 Q'oneste vie en son degré
 Sur tous est la plus beneuré ;
 Ensi dist chascun ses talentz.
 Mais Paul, l'apostre dieu loyal,
 Le grant doctour celestial, 13250
 Q'estoit au tierce ciel raviz,
 Desprovoit leur judicial,
 Moustrant par argument final
 Que sur tout bien doit porter pris
 La Charité par droit devis :
 C'est celle q'ad deinz soy compris
 Toutes vertus en general,
 Dont vif et mort homme est cheriz ;
 Car toutes gens luy sont amis,
 Et dieus luy est especial. 13260
 Du Charité pour deviser,
 En trois pointz hom la doit loer :
 C'est de doulcour primement ;
 Car seulement pour dieu amer
 Ne puet adversité grever
 D'ascune peine q'est present :
 Du verité secondement
 Hom la doit faire loement,
 Car en tresfine loialté
 Maintient le cuer de son client, 13270
 Siq'envers dieu n'envers la gent
 A nul jour ferra falseté :
 Du tierce pris que l'en luy donne
 Digne est a porter la coronne ;
 Car si tresprecieuse esta
 De la vertu que luy fuisonne,
 Q'achater puet en sa personne f. 75
 Son dieu et tous les biens q'il a.
 O quel marchand, q'ensi ferra !
 La bource dont il paiera 13280
 Du covoitise point ne sonne,
 Ainz de vertu q'au dieu plerra
 Du fin amour, et pour cela
 Dieus soi et tous ses biens redonne.
 O Charité la dieu amy,
 Comme peres sage en marchandie !

13245 enfront

13247 plusbeneure

13303 ypuet

Des toutez partz tu prens le gaign ;
 Meulx valt donner la soule mie,
 Maisque ce vient de ta partie,
 Que sanz toi donner tout le pain ; 13290
 Et plus reçoit loer certain
 Qui par toi june un jour soulain,
 Q'uns autres, sanz ta compaignie
 S'il volt juner un quarantain ;
 Car tu ne fais aucun bargain
 Dont ton loer ne multeplic.
 Du Charité que l'alme avance
 Si l'en voet faire resemblance,
 Hom la puet dire et ressembler
 De son effect, de sa semblance, 13300
 Q'elle est le droit pois ou balance,
 Dont saint Michieus fait balancer,
 Que riens y puet contrepriser ;
 Ce fait les almes surmonter,
 Sique le deable ove s'alliance
 Est desconfit del agarder,
 Qant n'ad du quoy dont puet grever
 Par contrepois a l'amontance.
 Du Charité ce dist Fulgence
 Par la divine experience, 13310
 Q'elle est la source et la fonteine,
 Du quelle trestout bien commence
 A gouverner la conscience
 Et vertuer la vie humeine :
 Si est la voie bonne et seine,
 Par quelle qui d'aler s'asseine
 Ne puet errer du necligence,
 Ainz jusq'au joye souveraine
 Par vertu du bon overeigne
 Irra devant la dieu presence. 13320
 Ambroise dist que Charité
 Comprant en soy tout le secré
 Et le misteire d'escripture,
 Que sainte eglise ad confirmé,
 Dont nostre foy est approvée :
 Restor de nostre forsfaiture,
 C'est Charité la belle et pure,
 Quelle ad deinz soy de sa nature
 Des trestous biens la propreté ;
 Car en humeine creature 13330

Toute autre vertu est obscure
 Qant n'est de celle esluminee.
 Gregoire ce nous vait disant,
 'Trois portes sont au ciel menant,
 Dont foy est la premiere porte,
 Que meine droit en oriant ;
 Car par la foy primer s'espant
 Lumere que le cuer conforte :
 Et la secunde au north resorte,
 C'est esperance, que reporte 13340
 Bouldour au peché repentant
 Du vray pardoun, et si l'enhorte,
 Par quoy s'avise l'alme morte
 Et quiert le droit chemin avant :
 'La tierce porte est la plus certe,
 Q'envers mydy se tient overte ;
 Car au mydy plus haltement
 Le solail monte toute aperte,
 Et de son halt sur la deserte
 Se laist raier plus ardentment : 13350
 C'est Charité q'ensi respent
 Du fin amour dont elle espent
 En dieu, vers qui tout se converte
 Et vers ses proesmes ensement :
 Cil q'au ce porte huchant attent,
 Entrer y doit par droit decerte.'
 La Cedre endroit de sa nature
 Sur toutes arbres d'estature
 Est la plus halte au droite lyne,
 Et maint toutdis en sa verdure ; 13360
 D'encoste qui jammais endure
 Corrupcioun de la vermine ;
 Car ly douls fuil et la racine
 Flairont de vertu si tresfine,
 Que riens forsque la chose pure
 Ne maint du pres : ensi diffine
 Ly clerics que Charité tolt fine
 Des noz pechés la vile ordure.
 O Charité, dieus te benye !
 Car par ta sainte progenie 13370
 Des filles que tu fais avoir,
 La compassante tricherie
 Des falses files dame Envie
 Destruire fais de ton pooir,

13347 plusaltement

13350 plusardantment

13359 plushalte

Que ja ne porront decevoir
 Celluy que tu voes recevoir
 A demorrer en ta baillie :
 Car q'en toy maint doit bien savoir
 Q'il maint en dieu sanz remouvoir,
 Ce nous tesmoigne la clergie. 13380

Ore dirra de les cink files de
 Pacience, des quelles la premiere
 ad noun Modeste, contre le vice
 de Malencolie.

D'une autre dame vuil descrire,
 Que des vertus tient un empire,
 Si est appellé Pacience ;
 Celle ad cink filles pour voir dire,
 Les quelles sanz pointure d'ire
 Les almes gardont sanz offense :
 Car ja leur cuer irrous ne pense,
 Ne ja leur langue en ire tence
 Par malpenser ne par mesdire,
 Ne ja serra leur main extense 13390
 Pour faire au corps aucun defense,
 Dont l'alme en son estat empire.

De cestes filles la premiere
 Par vertu de sa bonne mere
 En ire ja ne se tempeste,
 Ainz est vers tous amy chiere
 Sanz malencoliouse chere.
 La damoiselle ad noun Modeste,
 Q'est en ses ditz et faitz honweste :
 Combien q'ascun luy fait moleste, 13400
 A coroucer n'est pas legiere,
 Ainz au buffet que l'en luy preste
 En l'une jowe, l'autre preste
 Purten, au fin que l'en luy fere.

Selonc la dieu parole expresse,
 Q'om list en l'evangile au messe,
 Iceste vertu se contient :
 Du columb porte la simpleece,
 Que jammais d'ire la destresce
 Par mal eschaufte ne ne tient 13410
 Le cuer de luy, ainz s'en abstient ;
 Car Pacience la retient,
 Quelle est sa mere et sa maistrisse,

Siq'au tout temps qant l'ire vient,
 Bien luy remembre et luy sovient
 Q'ire est en soy sicomme deablesce.
 Modeste auci n'est pas souleine,
 Ainz ad toutdis sa chambreleine,
 Q'om nomme Bonne compaignie,
 Que ja ne sente irrouse peine, 13420
 Ainz tendrement vers tous se peine
 De faire honour et curtoisie ;
 Et s'il avient q'ascuns luy die
 Parole dont elle est laidie,
 Respont de si tresmole aleine,
 Qe toute ire et malencolie
 De l'autre qui la contralie
 Ferrera plus souple que la leine.
 Bien est Modeste vertuose,
 Curtoise et sobre et bien joyouse 13430
 Vers chascun homme en son degré :
 Par celle estoit la glorieuse
 Athenes jadys gracieuse,
 Du bonne escole esluminee ;
 Car par ce s'estoit esprové
 Ly philosopre et accepté,
 Qui plus sanz malencoliouse
 Parole, a luy qui tarié
 L'avoit, gardant la sobreté
 Ne dist chose contrariouse. 13440
 Le saint apostre en son escrit,
 Qu'il as profess de son habit
 Manda, disoit qu'ils tielement
 Soient modestez d'espirit,
 Qu'il soit conu, dont plus parfit
 En puissent estre l'autre gent
 De leur tresbon essamplément ;
 Car dieus y vient prochainement
 A chascun homme q'ensi vit.
 Pour ce je loo communement 13450
 Qe nous vivons modestement
 Malgré dame Ire et son despit.
 Ore dirra de la seconde file de
 Pacience, quele ad noun Debon-
 aireté, contre le vice de Tençonn.
 La soer q'apres vient secundaire
 Trop est curtoise et debonnaire,
 13428 plussouple

Si ad noun Debonnairété ;
 Q'encontre Tençonn se fait taire ;
 Car ja parole de mal aire
 Parny sa bouche n'ert parlé,
 Ainz est taisante et avisé
 Et en apert et en privé, 13460
 N'est qui la puet irrouse faire :
 Dont m'est avis en mon degré,
 Cil q'est au tiele marié
 Par resoun ne se doit displeire. f. 76
 Bien vit en ease la maisnye,
 U dame Debonnaire guye
 L'ostell, car lors aucunement
 N'iert deinz les murs tençonn oïc,
 Ainçois par sens et curtoisie
 Du mole aleine simplement 13470
 Prie et commande ensemblement ;
 Et s'il y falt chastiment,
 Sanz ire ensi se tient garnie,
 Qe point al oultrage se prent,
 Et si ne laisse nequedent
 Qe solonc droit ne justefie.
 Saint Augustin ce nous diffine,
 ' Meulx valt, ' ce dist, ' q'om se decline
 Et fuie la tençon par soy,
 Que du parole serpentine 13480
 En la maniere femeline
 Respondre et veintre le tournoy.
 Meulx valt que tout l'argent du Roy
 Garder la langue sanz desroy ;
 Car danz Catons de sa doctrine
 Dist, qant om voit resoun pour quoy,
 Qui se sciet taire plus en coy
 Plus est prochain au loy divine.
 C'est un proverbe de la gent,
 ' Cil qui plus souffre bonnement 13490
 Plus valt ' : et certes c'est au droit,
 Car souffrir debonnairement
 Fait l'omme ascendre molt sovent
 En halt estat de son endroit,
 Qui sanz souffrance honour perdrait :
 Pour ce sens et resoun serroit
 Avoir souffrance tielement ;
 Car si nuls garde enprenderoit
 13446 Enpuissent

Du bien et mal, sovent verroit
 Et l'un et l'autre experiment. 13500
 De l'evangile en essamplaire
 Avons comment au debonnaire
 Dieus la terre en (la) fin donna,
 Et puis au povre en son doaire
 Donna le ciel. He, deputaire !
 Dame Ire u se pourvoiera,
 En quel lieu se herbergera,
 Qant terre la refusera,
 Et d'autre part ne porra gaire
 Le ciel avoir, lors coviendra 13510
 Q'enfern la preigne, et pour cela
 Remembre toy de cest affaire.
 Ore dirra de la tierce file de
 Pacience, quelle ad noun Dilec-
 cioun, contre le vice de Hange.
 Encontre Hange la perverse
 Dame Pacience la converse
 Ad une fille de beal age,
 La quelle deinz bon cuer converse ;
 Du quoy malice ou chose adverse
 Ne laist entrer en son corage,
 Ainz tient du fin amour l'estage :
 Dont Ire, qui les cuers destage, 13520
 D'ascun corous jammais la perce.
 Molt est benigne celle ymage,
 Car a nul homme quiert damage
 Plus que l'enfant qui gist en berce.
 A son primer original
 Resoun par noun especial
 Iceste file fist nommer
 Dileccioun, q'espirtal
 En ceste vie bien pour mal
 Fait rendre sanz soy revenger : 13530
 Car son amour tout au primer
 Vers dieu, q'om doit sur tout amer,
 Prest si ferme et cordial,
 Qe creature en nul mestier
 Ne puet haïr, qant le penser
 Luy vient de dieu celestial.
 Saint Augustin fait deviser
 Qe trois maneres sont d'amer ;
 Dont le primer nous est dessus,
 13503 en fin 13524 Plusque

C'est envers dieu au commencer ; 13540
 Et l'autre presde nous estier
 Chascune jour veons al huss,
 Ce sont no proesme ; et oultre plus
 Du tiers amour sumes tenus
 Nous mesmes en amour garder,
 Que corps et alme en ait salutz :
 Cil q'ad ces trois bien retenuz
 De droit amour se puet vanter.
 Saint Augustin ly grant doctour
 Dist a soy mesmes, ' Grant erreur
 Et grant folie j'en ferroie, 13551
 Si je mon dieu, mon creatour,
 Sur tout le terrien honour
 N'amasse ; car a ce que soie
 Et vive, qant je nient estoie,
 Une alme me donna, q'est moye,
 Qe chascun membre en sa vigour
 Sustient et mes cink sens emploie,
 Des queux je sente, asculte et voie,
 Odoure et parle chascun jour. 13560
 ' Et que je vive ordeinement,
 Si m'ad donné dieus ensement
 Savoir de l'alme resonnable,
 Sique par ce le bien m'apprent ;
 Car qant nature en soi mesprent,
 Tantost resoun la tient coupable :
 Mais autre chose meulx vailable
 M'ad dieus donné, q'est merçiable,
 C'est le bien vivre a son talent ;
 Dont de sa grace permanable 13570
 Puis me fait vivre perdurable
 En joye perdurablement.
 Ore ay je dit comment au fin
 L'en doit tenir l'amour divin,
 Et puis falt regarder avant
 Comme l'autre amour soit bon et fin,
 Le quel devons a no voisin ;
 Sicomme l'apostre vait disant,
 Qui dist que tout ly bien vivant
 N'ont q'un soul chief, dont sont te-
 nant, 13580
 C'est Crist, dont sont nommé cristin,
 Et sont comme membre appartenant
 13546 enait 13551 ienferroie

Au chief, dont resoun le commant
 Que d'un amour soient enclin.
 Si comme l'un membre s'associe
 A l'autre, et fait tout son ate,
 Ensi nous devons a toute hure
 Sanz ire et sanz malencolie
 Porter amour et compaignie
 Chascun vers autre en sa mesure.
 Car ce voit om de sa nature, 13591
 Que qant l'un membre en aventure
 Se hurte a l'autre en sa partie,
 Et fait par cas ascun lesure,
 Pour ce cil qui le mal endure
 Sur l'autre se revenge mye.
 Ensi comme membre bien assis
 Nous devons entramer toutdis.
 Voir, sicomme dieus le commandoit,
 Devons amer noz anemys; 13600
 Car soulement qui ses amys
 Tient en amour, n'ad pas au droit
 Dileccioun, ainz qui reçoit
 L'amour d'autry amer le doit,
 Car par resoun l'ad deserviz :
 Ensi ly puppican fesoit,
 Mais dieus en gré pas ne reçoit
 L'amour q'ensi se fist jady.
 Plus que moy mesme en mon recoy
 De tout mon cuer amer je doy 13610
 Mon dieu, et puis mon proesme auci
 Semblablement atant comme moy ;
 Mais Charité comprend en soy
 Que m'alme tendray plus cheri
 Que je ne fray le corps d'autri :
 Car pour salver trestout parmy
 Le siecle ne freindray ma loy,
 Dont pecché face encontre luy
 Qui m'ad fourmé ; car tout ensy
 Je truis escript, et je le croy. 13620
 Dileccioun n'ad pas sotie
 Du fol amour, ainz le desfie,
 Et d'autre part auci ne tient
 Son conseil ne sa compaignie
 Ove ceaux qui meinont fole vie :
 Du tiele gent ainz s'en abstient,

13614 pluscheri

Et nepourqant bien ly sovient
 Du Charité, par quoy luy vient
 Compassioun de leur folie ;
 Commune as tous les bons devient,
 Et as malvois, comme luy covient,
 Du Charité se modifie. 13621
 En six pointz tu te dois garder
 De comuner et consailler :
 Guar toy de l'omme q'est nounsage ;
 Comme plus te fras ove luy parler,
 Tant meinz le porras doctriener ;
 Et d'autre part en nul estage
 Au derisour ne te parage,
 Car a soy mesmes quiert hontage 13640
 Qui voelt tiel homme acompaigner ;
 N'a luy q'ad langue trop volage
 Jammais descovrere ton corage
 Du chose que tu voels celer :
 Et d'autre part ne t'associe
 A l'omme q'ad malencolie ;
 L'essample en puiss avoir du fu,
 Qui plus le leigne y multeplicie,
 Tant plus la flamme s'esparglie ;
 Ensi l'irous qant est commu, 13650
 Comme plus l'en parle honour ou pru,
 Tant en devient plus irascu, f. 77
 Fuietz pour ce sa compaignie :
 N'al yvere ne descovrere tu
 Ton conseil, ce t'ad defendu
 Ly sage en son essamplerie.
 Fols est qui se fait consailler
 Ove celluy qui conseil celer
 Ne sciet : pour ce ly sages dist
 Que nuls son conseil doit mostrer 13660
 Al yvere ; car bon essampler
 Abigail de ce nous fist,
 Qant a Nabal ne descovrist
 Son conseil, qant yveres le vist,
 De ce q'elle ot fait presenter
 Viande, q'au desert tramist
 Au Roy David, q'en gre le prist,
 Dont puis luy rendoit son loer.
 Que dist Senec ore ascultez :
 'Q'est ce,' dist il, ' que vous querretz

13652 endevient

De l'autre qu'il doit bien celer 13671
 Ce que tu mesmes ne celetz ?
 Dit q'une fois s'est avolez
 Ja nuls le porra reclamer.
 Alphonse dist, ' Tu dois garder
 Ton conseil comme ton prisonner
 Clos deinz le cuer bien enserrez ;
 Car s'il te puet hors eschaper,
 Il te ferrera tieux mals happer
 Dont tu serras enprisonnez.' 13680
 Dileccioun communement
 Tous ayme, et pour ce nequedent
 Ove l'orguillous point ne s'aqueinte ;
 Car Salomon ce nous defent,
 Disant pour nostre essablement,
 ' Cil qui pois touche en avera teinte
 La main d'ordure, et tiele atteinte
 Luy falt souffrir cil q'ad enpeinte
 Sa cause ove l'orguillouse gent' :
 Car qant aignel quiert son aqueinte
 Du leon, trop perserra queinte, 13691
 S'il au final ne se repent.
 Mais l'en doit bien avoir cheri
 Bonne ameisté, car tout ensi
 Nous dist Senec ly bon Romein,
 Q'assetz meulx valt pour son amy
 Morir que pour son anemy
 Vivre ; car cil n'ad le cuer sein
 Q'est en discort de son prochein,
 Ainz en languist chascun demein,
 Dont en vivant est mort demy ; 13701
 Que meulx valsist morir au plein
 En Charité, q'estre longtein
 D'amour que dieus ad establi.
 Amour est de sa dueté
 Ly droit portiers du Charité,
 Qui laist entrer de son office
 Resoun, Mesure et Loyalté,
 Et comme la dame d'Equité
 Entre les autres vient Justice, 13710
 Qui meyne Peas en son service,
 Et comme l'enfant ove sa norrice
 Cil duy se sont entrebeisé :
 Sique d'Amour le benefice

13700 enlanguist

Du guerre exteigt toute malice
 Et nous fait vivre en unité.
 Ly sage en son escript diffine
 Que l'orr et l'argent que l'en fine
 Riens valt en comparacioun
 A l'amisté q'est pure et fine ; 13720
 Car bons amys d'amer ne fine,
 Ainz fait continuacioun.
 Pour ce, qant as probacioun
 D'un tiel, sanz hesitacioun
 Met ton estat en sa covine
 Sanz ire et sanz elacioun ;
 Car il ad sa relacioun
 Sicomme la chose q'est divine.
 Amy q'est de tiele amisté,
 De fine et ferme loyalté, 13730
 Tout mon amour je luy presente.
 Ambroise dist en son decret :
 ' Mon bon amy est l'autre je ' ;
 Car ma personne il represente,
 Et combien que le temps tourmente,
 Ou gele ou negge ou pluit ou vente,
 Ou fait chalour desmesuré,
 Mon bon amy ne se destente,
 Ainz tient vers moy son bon entente,
 Comment que soie fortunée. 13740
 Mais en un prophetizement
 Je lis que vendront une gent
 Que tout serront soi soi amant :
 La cause pour quoy doublement
 Dist ' soy,' vous dirray brievement :
 Car double amour nous est devant,
 Au dieu l'un est appartenant,
 L'autre au voisin ; et nepourqant
 Ne l'un ne l'autre au temps present
 Est uns q'au droit le vait gardant ;
 Ainz, si nuls ayme maintenant, 13751
 C'est pour soy mesmes proprement.
 Primerement s'omme ayme dieu,
 En ce quiert il son propre pru,
 Car bien sciet dieus luy poet aider,
 Donner honour, donner salu,
 Si puet auci de sa vertu
 Tout bien retraire et esloigner ;

13686 enaura

Pour ce voet il son dieu amer,
Mais tout ad mys en oublier 13760
Les biens dont dieus l'ad revestu,
C'est corps et alme, en son poer
Que dieus du nient volait fourmer,
Par quoy d'amer homme est tenu.

Et pour garder le siecle en bas,
Di voir si tu me troveras
Bonne ameisté du franche atour.
Pour verité dire en ce cas,
Je di, si tu richesce n'as,
Office ou digneté d'onour, 13770
Par quoy tu es de moy maieur,
Et que je voie chascun jour
Que tu bienfaire a moy porras,
Tu as failly de mon amour;
Mais si je sente ton socour,
Mener me puiss u voldras.

Mais puisque j'ayme a mon profit,
Ce n'est resoun q'amour soit dit,
Du covoitise ainz est la vente,
Qant lucre m'ad d'amer soubgit; 13780
Tout ay pour moy l'amour confit,
Non pour l'autry, car si n'aveute
Mon prou d'amer, ne me consente;
Sique le proufit que je sente
Est cause dont mon esprit
Tantsoulement d'amer s'assente;
Mais au jour d'uy par celle sente
S'en vont trestous, grant et petit.

Dieus a saint Piere demandoit
Diverses foitz s'il luy amoit, 13790
Et cil respont, 'Certes, beal sire,
Tu scies bien que je t'ayme au droit.'
O qui vit ore, en tiel endroit
Q'au dieu, qui tous noz cuers remire,
Porroit ensi respondre et dire
Sanz ce que dieus l'en volt desdire?
Je croy certain que nuls y soit:
Car ce savons, deinz nostre empire
Amour de jour en jour s'empire,
Et s'esvanist que nuls le voit. 13800

Ne say ce q'en apres vendra,
Mais qui l'escrit bien entendra,

13787 au lourduy

13788 Senvont

13801 qenapres

Sicomme l'apostre nous enhorte,
Et n'ayme, alors dur cuer avra:
Car il nous dist tresbien cela,
Que l'alme en ceste vie est morte
La quelle amour en soy ne porte:
Non pas l'amour dont l'en apporte
Profit du siecle, ainz ce serra
Dileccioun, q'est pure et forte, 13810
Dont l'alme en dieu se reconforte
Sicomme je vous ay dit pieça.

Ore dira de la quarte file de
Pacience, q'ad noun Concorde,
contre Contek.

Du Pacience naist apres
La quarte file, et est du pres
Norrie, ensi comme meulx covient,
Dedeinz les chambres dame Pes;
Si tient en compaignie ades
Amour, par quoy jammais avient
Contek en place u q'elle vient.
Elle ad a noun, bien me sovient, 13820
Concorde, plaine des bienfetz;
As gentz q'ovesque soy retient
D'estrif ne d'ire ne partient
Porter les charges ne les fes.

C'est la vertu dont les cités
Sont en leur point au droit gardez;
C'est la vertu, comme truis escrit,
Par qui poy croist en chose assez,
Et sanz qui sont desbaratez
Les grandes choses en petit; 13830
C'est la vertu par quoy l'en rit
En corps et alme a grant delit;
C'est la vertu dont sont semez
Les champs dont chascun homme vit;
C'est la vertu dont vient proufit
Sanz nul damage en tous degrés:

C'est la vertu que fait la lance
Tourner en sye, et malvuillance
En bon amour, et la ravine
En pure almosne, et la nuisance 13840
En bien commun, siq'abondance
Envoit, et hoste la famine. f. 78
Nient plus que l'arbre sanz racine,

Ou que sanz herbe medicine,
Sont en nature de vaillance,
Nient plus valt homme en sa covine,
S'il voet tenir la loy divine,
Qant n'ad Concorde en s'alliance.

Concorde ad une sue amye, 13850
Cest Unité, que luy falt mye
Au pes garder en son degré;
Dont dist David en prophecie:
O comme joyouse compaignie
Et bonne, quant fraternité
Cohabitont en unité:
Car mesmes dieus lour est privé,
Et comme lour frere s'associe.
Molt est Concorde benuré,
Q'est compaignie a la deité,
Et donne pes en ceste vie. [gence

Mais uns grantz clerics q'ot noun Ful-
Nous dist par droite experience, 13862
Que soubz le cercle de la lune,
Queu part q'a sercher l'en commence,
Pour mettre y toute diligence,
N'est pleine pes n'a un n'a une.
En l'air primer n'est pes ascune,
Car deble y sont queux dieus y pune
Qui tout sont plain de grant offense,
Si nous font guerre en lour rancune;
Dont pour sercher la pes commune
En l'air voi je nulle evidence. 13872

La pes en terre est forsbanie
Par gent toutplein de felonnie,
Qui vuillont pes ne tant ne qant:
En mer auci pes est faillie,
Car la tempeste y vente et crie,
Dont maint peril est apparant;
Enfern sanz pes vait languissant,
U vont les almes tourmentant 13880
De ceaux q'ont mené male vie:
Lors falt a sercher plus avant
Dessur la lune en contemplant,
Car pardessoubz la pes n'est mie.

Ensi la file de Concorde
Ces ditz et autres bien recorde,
Au fin que par son recorder

13864 qasercher

13882 plusauant

Paisible envers son dieu s'acorde;
Sique dame Ire de sa corde
Par mal ne luy puet encorder: 13890
Car ja ne puet om recorder
Concorde en ire descorder
A son voisin, ainz qui descorde,
L'amour quiert elle et l'acorder,
Pour tous ensemble concorder
En pes et en misericorde.

Ore dira de la quinte file de
Pacience, quelle ad noun Pités,
contre Homicide.

La quinte file paciente
Molt prest tendre en son entente
Vers tous; mais elle est au contraire,
Q'al Homicide ne s'assente: 13900
Dont ad a noun par droit descende
Pités la douce et debonnaire;
La quelle en trestout son affaire
Retient Mercy comme secretaire,
Que ja n'avera la main extente
D'espeie a la vengeance traire,
Et s'autres voit en ce mesfaire
Dedeins son cuer trop se desmente.

Molt plus y ad diverseté
Entre Homicide et la Pité, 13910
Que n'est parentre fu ardent
Et l'eaue de la mer salé;
Car comme le fu q'est embracé
Del eaue s'en vait estreignant,
Ensi Pités fait le guarant
Contre Homicide, et du tirant
Convertre en douçour la fierté,
U que Pités serra regnant,
Le regne en vait establistant;
Ce dist Cassodre en son decret. 13920

De Rome Constantin pieça
Nous dist, que cil se provera
Seigneur de tous, qui par vertu
Serf du Pité se moustrera:
Et Tullius nous dist cela,
Que cil q'est du Pité vengu
Doit du victoire avoir escu
Perpetuel pardevant dieu.

13883 encontemplant

13919 envait

Saint Jake dist, cil qui ferra
 Sanz pité juggement, perdu 13930
 Serra qant vient en autre lieu,
 U qu'il pité ne trouvera.
 La vertu dont vous ay chanté
 N'ad pas le cuer d'ire enchanté
 Pour tuer homme en juggement,
 Si ce ne soit par equité,
 Dont soit destruite iniquité
 De laroun et de male gent
 Pour le commun profitement;
 Et nepourqant pitouement 13940
 Toutdis retient sa charité:
 'Tuetz,' ce dist, et nequedent
 S'en dolt que l'autre duement
 Ad deservi d'estre tué.
 Ensi Pité n'oumpas moerdrice
 Souffre a tuer solonc justice,
 Mais ja par tant est meinz vailable;
 Car pour nulle ire que l'entice,
 Ou de rancour ou de malice,
 Pité de soy n'est pas vengable, 13950
 Ainz est de son droit conestable
 D'Amour, pour faire pes estable.
 L'apostre dist, q'en son office
 Pités a tout est proufitable:
 Est la vertu plus defensable
 De cruauté contre le vice.
 Pités est le treacle droit
 Que tout garist en son endroit
 Le cuer de venimouse enflure,
 Qe d'aposteme riens y soit 13960
 Du viel rancour, dont Ire boit:
 Ainçois trestoute mespriseure
 Que l'en l'ad fait par demesure,
 Pour la mercy, dont elle est pure,
 Met en oubly, que plus n'en voit:
 Car vengeance a la creature
 Quelle est semblable a sa nature,
 Pour tout le monde ne querroit.
 Ore dirra la descripcion de la
 vertu de Pacience par especial.
 He, debonnaire Pacience,
 Comme est gentile ta semence 13970

13955 Et

Des files, q'ay dessus nommé!
 Pour faire a toy la reverence,
 Du naturele experience
 Ly philosopre t'ad loé,
 Disant que tu du propreté
 As la vengeance apropié
 Deinz ta paisible conscience,
 Par soule debonnaireté
 A veintre toute adveseté
 Sanz faire tort ou violence. 13980
 Ly martir, qui par grief destour
 Du paine avoient maint estour,
 N'en furont venqu nequedent;
 Ainz toute peine exterior
 Par Pacience interior
 Venquiront bien et noblement.
 Du Job avons l'essamplement,
 Qant il ot perdu plainement
 Saunté du corps et tout honour
 Du siecle, encore pacient 13990
 Estoit, dont venquist le tourment
 Ensemble avec le tourmentour.
 Du Pacience en faitz et ditz
 Molt furent ly martir jadis
 Expert, car le cruel martire
 De leur bon gré n'oumpas envis
 Souffriront, si q'a leur avis
 Rendront grace a nostre sire,
 Qu'il a tieu fait les volt eslire.
 Des confessours l'en porra lire 14000
 Auci, qui pour leur espritz
 Garder firon leur corps despire,
 Dont puis gaigneront cel empire
 Q'est plain des joyes infinitz.
 Gregoire dist que par souffrir
 Les mals qui pourront avenir
 Du siecle, qui tous mals envoie,
 Hom se puet faire droit martir
 Sanz le martire de morir:
 Car combien que tuez ne soie, 14010
 Je me martire d'autre voie
 Du Pacience simple et coie,
 Du quelle ades me fais garnir,
 Issint que nullement me ploie

D'adversité, qant se desploie,
 Et les meschiefs me fait sentir.
 Ce dist David, que dieus est pres
 As tous ceaux q'ont le cuer oppres
 Du tribulacioun mondeine:
 Sur quoy Bernars souhaide ades, 14020
 Q'il puist toutdiz sanz nul reles
 De tribulacioun la peine
 Avoir yci par tiel enseigne,
 Qe l'ameisté luy soit procheine
 De dieu et sa divine pes:
 Car qant dieus est en la deinzaine,
 Du toute anguisse q'est foreine
 Ne puet chaloir n'avant n'apres.
 Si nous faisons la dieu aprise,
 Par nous n'ert la vengeance prise; f. 79
 Car dieus ce dist, comme vous dirray,
 Q'il volt que toute la mesprise 14032
 Et la vengeance soient mise
 En son agard, et il du vray
 Le vengera; dont bien le say
 Fols est qui se met a l'essay
 De soy venger par autre guise:
 Qant dieu mon champion aray,
 Ne fait que je m'en melleray,
 Puisq'il voet faire tiele enprise. 14040
 L'apostre en son escript diffine
 Et dist, comme feu q'attempre et fine
 Metall, si q'om le puet forger,
 Ensi l'adversité terrine
 Attempre et forge la covine
 De Pacience en son mestier:
 Car la fortune d'adverser
 Fait l'omme sage experimenter
 Selonc la droite medicine;
 Qe qant le tourment seculer 14050
 Nul autre rien puet terminer,
 Lors Pacience le termine.
 Ce voit om, ainz que la chalice
 Soit digne a si tressaint office,
 Ou que la coupe d'orr ensi
 Soit mise au table d'emperice,
 Leur falt souffrir dure justice

Du feu, dont sont purgé parmy,
 Et des marsteals maint cop auci;
 Mais qant serront au plein bourny, 14060
 Lors ont honour de leur service:
 Du Pacience ensi vous dy,
 Ainçois q'elle ait tout acomply,
 Soffrir ly faldra mainte anguisse.
 Ly mestres q'ad chien afaité
 Ja ne luy fra tant deshaité,
 Qant il l'avra plus fort batu,
 Qe tost apres de son bon gré
 Ne salt sus et en son degré
 Fait joye a luy qui l'ad feru, 14070
 En signe qu'il n'est irascu:
 Ensi sanz gleyve et sanz escu
 Fait l'omme qui s'est esprové
 De Pacience la vertu;
 Car il ne voet que defendu
 Soit par corous ou revengé.
 Pison y ad, ce dist un sage,
 Quelle en nature ad tiele usage,
 Qant le tourment verra plus grant,
 Et la tempeste plus salvage, 14080
 Plustost se baigne enemy le rage
 Et s'esjoyt plus que devant.
 Je dy du Pacience atant,
 Qant plus le siecle est adversant,
 Et sa fortune plus volage,
 Plus tendrement en vait loant
 Son dieu, et plus se met avant
 Au tout souffrir de bon corage.
 O Pacience, comme toy prise
 Ly sage Ovide en son aprise, 14090
 Disant que toute autre vertu
 Que tu n'as en ta garde prise,
 N'est sufficient d'ascune enprise,
 Plus q'une femme q'ad perdu
 Son baroun: car bien le scies tu,
 N'ad pas le corps au droit vestu,
 Q'ad double cote sanz chemise;
 Ne cil est pas au droit pourveu,
 Q'ad Mill des autrez retenu,
 Si ta vertu n'y soit commise. 14100

14064 in ras.

14067 plusfort
14082 plusque14079 plusgrant
14086 envait

14080 plussaluage

Ore dirra de les cynk files de la vertu de Prouesce, des quelles la primere ad noun Vigile, contre le vice de Sompnolence.

Encontre Accide lasse et lente
Resoun, a qui travail talente,
S'est a Prouesce mariée,
Q'est une dame bonne et gente
Et corps et alme bien regente;
Si ad cynk files engendrée,
Dont la primere est appellée
Vigile sainte et benurée,
Que par nature et par descente
Hiet Sompnolence en son degré; 14110
Car long dormir au matiné
Ne puet amer en son entente.

Vigile plus dormir ne quiert,
Mais tant comme resoun le requiert,
Dont soit nature sustenue,
Escharcement, que trop n'y ert;
Et largement, comme meulx affiert,
D'esveiller l'alme s'esvertue:
Pour ce, qant Sompnolence engue
Les oels du corps, yceste argue 14120
Les oels du cuer, et si les fiert,
Que vuille ou noun le corps remue,
Plus que falcoun, qant de sa mue
S'en ist et puis sa proie adquiert.

Vigile est celle chambreleine
Q'esveille le pastour souleine
Pour les ouailles saulf garder:
Vigile porte auçi l'enseigne
Des championns queux dieus enseigne,
Qant devont contre l'adverser 14130
Combatre; et ce scievent primer
Canoun et moigne reguler,
Si fait ly frere et la noneine,
Si font ly autre seculer,
Chascun endroit de son mestier
A labourer Vigile meine.

A l'omme qui s'est endormi
La loy civile dist ensi,
Comment, s'il ait ou droit ou tort,
Les drois ne font socour a luy, 14140

14143 plusfort

Ainçois socourront a celluy
Qui veille: et tout ytiel enhort
Nous fist Catoun, siq'au plus fort
Veillons; car il dist et recort,
Q'en tiel les vices sont norry,
Qui trop de sa coustume dort:
Q'il est au siecle ensi comme mort,
Car tout bien sont en luy failly.

Mais la vigile proprement
La beneïcoun de dieu attend, 14150
Qant om l'enprent et bien maintient;
Car nostre sire tielement
Par s'evangile, qui ne ment,
Le promettoit, bien me sovient,
Et dist, qant il ensi avient,
Qe luy seigneur par cas y vient,
Et son serf trove bonement
Veillant, pour benuré le tient,
Dont sur tout ce q'a luy partient
Des biens luy fait estre regent. 14160

As ses desciples commandoit
Dieus, qant endormiz les trovoit,
'Veillez,' ce dist, 'que point n'entretz
En templement de fol endroit:
Car l'espirit,' ce lour disoit,
'Est prest as toutes malvoistés,
Et la char frele des tous léés':
Pour ce leur dist, 'Veillez, oretz,'
Pour l'alme garder en son droit;
Car ja maisouns n'ert desrobbez 14170
U ly gardeins s'est esveillez
Pour garder ce que faire doit.

Le castell serra bien secur,
U que Vigile pardessus
Les murs vait serchant environ:
Quelque le temps soit, trouble ou pur,
N'y laist entrer ne mol ne dur
Que puist grever a la maisoun.
Car qant malfié sicomme laroun
En l'alme par temptacioun 14180
Entrer voldroit tout en oscur,
Vigile esveille de randoun
Ses soers, que vienont a bandoun
Pour faire le defense au mur.

En l'evangile est dit auçi
Q'om veille, car nuls sciet de fy
Qant nostre sire y ert venant,
Ou soit ce soir ou nuyt demy
Ou coc chantant: et tant vous dy
Les heures dont vous vois parlant
Trois ages vont signefiant, 14191
Dont nuls en terre est droit sachant
En quelle il doit partir d'icy.
Pour ce bon est veiller atant,
Q'au temps qant dieus nous vient cla-
mant
Veillant puissons respondre a luy.

Ore dirra de la seconde file de Prouesce, quelle ad noun Magnanimité, contre le vice de Peresce.
Encontre celle de Peresce
Naist une file de Prouesce,
Quelle ad noun Magnanimité;
Celle est toutpleine de vistesce, 14200
De labour et de hardiesce,
Sanz point de pusillamité;
Car jammais pour prosperité
De la mondeine vanité
Ne surjoÿt de sa leesce,
Ne pour ascune adversité
Ne se contriste en son degré,
Du quoy sa conscience blesce.

Senec reconte en son escrit,
Qe l'omme q'est de tiel abit 14210
Molt est de halte vasselage;
Car trop luy semble estre petit
Le siecle, dont son appetit
Ne moet a ce ne son corage;
Ainçois comme cil q'est prus et sage f. 80
Du ciel quiert le grant heritage,
U tout ly bien sont infinit;
Pour ce labourt et l'avantage
En prent, siq'en chescun estage
Il ad Peresce desconfit. 14220

L'estoille en halt le firmament
Petite semble al oil du gent,
Pour ce q'om ne la voit de pres;
Et tout ensi semblablement

14219 Enprent

Fait cil qui vertuosement
Se voet tenir, car cil ades
Du siecle esloigne tous les fes;
Car il n'en quiert veoir jammes
Le vein honour procheinement,
Ainçois labourt pour autre enres
Avoir, dont en richesce apres 14231
Puet vivre perdurablement.

Quant voit du siecle la richesce,
La veine gloire et la noblesce,
Pour ce que poy du temps n'endure
Tout ce luy semble petitesce;
Et puis regarde a la grandesce
Du ciel, u la richesce est pure,
Si laist le siecle a nounchalure,
Car riens y voit forsaventure: 14240
Ensi pensant son corps adresce
De labourer a sa mesure,
Dont les grans biens qui sont dessure
Porra conquerre sanz Peresce.

Iceste file ad sa compaignie,
Q'en tous les oeuvres l'accompaigne,
Magnificence est appellée,
Tant sont ce deux de vertu plaine,
N'est riens q'encontre lour remaine
Que par labour n'est conquestée:
Car n'est vertu d'ascun degré 14251
Dont ceste Magnanimité
Commencer n'ose l'overaigne;
Et qant la chose est commencée,
Ja n'ert si forte honnesteté
Qe l'autre a son droit fin ne maine.

Encore une autre damoiselle,
Q'est vertuose, bonne et belle,
Leur vient toutdis en compaignie,
Seurté ad noun, et si est celle 14260
Qui des vertus la penoncelle
Doit porter par chivalerie;
U point n'y ad du couardie,
Mais sanz Peresce et sanz Envie
La tendre char, q'est fole et frele,
Fait labourer en ceste vie;
Sique du corps la pensantie
Ne tolt al alme sa querelle.

14228 nenquiert

Celle est aici la chambreleine
 Qui deinz bon cuer toute souleine
 Ses chivalers ad adoubez 14271
 Des trois armures q'elle meine,
 Q'unques Artus ne Charlemeine
 A nul temps furont meulx armez :
 Car mesmes dieus les ad forgiez,
 Dont sont tant fortz et adurez,
 Qe cil qui porte leur enseigne
 Pour nul travail ert alassez,
 Ne cils ne serront ja quassez
 De la Peresce q'est mondeine.
 La vertu du primere armure 14281
 Fait l'omme enprendre chose dure,
 Et la seconde a poursuir
 La chose en quele ad mis sa cure,
 La tierce q'est de vertu pure
 Donne esperance sans faillir
 De la busoigne bien finir ;
 Dont qant Peresce a son venir
 Par ses folies luy court sure,
 C'est pour ses esases maintenir, 14290
 L'autre se fait contretenir
 Et la met a desconfiture.
 Itiele adversité n'est une
 Q'avenir puet dessoubz la lune,
 Dont Seurtés s'espoentera,
 Ce dist Senec ; car la fortune
 Ne tolt al homme chose ascune,
 Si ce ne soit q'a luy donna ;
 Mais les vertus que prodomme a
 Fortune ne les fortuna, 14300
 Car ce n'est pas de sa commune :
 Dont, quique vertuous esta,
 Fortune point ne doubtera,
 Qant ses vertus ne tolt ne pune.
 Ly cuers de Magnanimité
 Est semblable au dée quarré ;
 Car quelle part soit descheable,
 Ovel se tient amont drescé :
 Et ensi l'autre en son degré,
 Combien fortune la muable 14310
 Luy soit adverse ou amiable,
 Ovelement toutdis s'estable
 Deinz soy ; si que l'adverseté

Ne la prosperité changable
 Le porront faire descordable
 Au riens q'est de sa ducté.
 Ore dirra de la tierce file de
 Prouesce, quelle ad noun Con-
 stance, contre le vice de Lacheté.
 Prouesce que les cuers avance,
 Sa tierce file ad noun Constance,
 Q'encontre Lacheté guerroie :
 Le folquider et pourloignance, 14320
 Dont Lacheté fait tariance,
 Iceste fille paremploie ;
 Car nuyt et jour toutdiz se ploie
 Au bien de l'alme, et tout apploie
 Le corps a ce ; si que plaisance
 Ne fait au char, ainçois la voie
 De labour tient, dont nuls envoie
 La puet hoster par fole errance.
 Plus est Constance en son degré
 Estable, ferme et adurée 14330
 Qe n'est du tour le fondement,
 Sur ferme roche q'est fondée,
 Et plus que l'arbre enraciné
 En terre bien parfondement :
 Car jammais pour tempestement,
 Q'avenir puet ascunement
 Du siecle, serra destourné
 De vivre vertuousement ;
 Ainçois jusques au finement
 Maintient le bien q'ad commencé. 14340
 C'est la vertu que sanz retrait
 Parmy les deux fortunes vait,
 Sicome Senec nous fait estrure,
 Si plainement q'en dit ne fait
 Ja deinz son cuer ne se desfait,
 Ou pour la mole ou pour la dure ;
 C'est la vertu quelle aventure
 Ne puet mettre a desconfiture ;
 C'est la vertu de qui parfait
 Furont ly bon angre au dessure, 14350
 Qant fait y fust la forsfaiture,
 Dont Lucifer avoit forsfaite.
 Qui sa main met a la charue
 Et son regard arere rue,
 Cil n'est pas apt au ciel venir :

Pour ce Constance en sa venue
 Perseverance ad retenue
 Deinz son hostel a luy servir,
 Le regne dieu pour deservir ;
 Car celle afferme le desir, 14360
 Dont chascun membre s'esvertue,
 A commencer et accomplir
 Le dieu labour sans allentir,
 Dont corps et alme ait son ayue.
 L'apostre dist, 'Tous sont cur-
 rour' ;
 Mais ceste soule au chief du tour
 Loer devant les autres gaigne :
 Toutes vertus sont combatour,
 Mais ceste au fin est venqueour,
 Qui la coronne tient certaine, 14370
 Toutes s'en vont a l'overaigne,
 Mais ceste ensi comme soveraigne
 Trestout le gaign de lour labour
 Reçoit au fin de la semaigne :
 Car tout est celle vertu vaine
 Q'a ceste ne fait son retour.
 Toute autre vertu se desvoie,
 Si ceste au point ne la convoie ;
 Toute autre vertu gist oppresse,
 Si ceste amont ne la survoie : 14380
 Ne puet venir aucune voie
 A dieu qui ceste ne professe,
 C'est des vertus la guideresse,
 C'est des vertus la droite hostesse,
 La quelle porte a sa courroie
 Trestous les cliefs, siq'au distresce
 Celle est au soir herbergeresce,
 Sans qui nuls puet entrer en joye.
 Sans ceste vertu tout avant
 Volt nostre sire a nul vivant 14390
 Le ciel promettre ne donner ;
 Mais l'evangile est tesmoignant,
 Qe cil q'est droit perseverant
 Salfs ert et doit enheriter
 Le ciel ; si que perseverer
 Pour merite acquerre et loer
 A chascun fin meulx est vaillant :
 Pour ce se doit om aviser,

14371 servont

Qant voet bon oeuvre commencer,
 Q'il soit jusq'en la fin constant. 14400
 Ore dirra de la quarte file de
 Prouesce, la quelle ad noun Solli-
 citude, qui est contraire au [f. 1
 vice de Oedivesce.
 La quarte file de Prouesce
 Sollicitude hiet Oedivesce,
 Car celle n'ert jammais oedive :
 Ou du penseie bien impressé,
 Ou du parole bien expresse,
 Ou du bien faire elle ert active ;
 Toutdis labourt, toutdis estrive,
 Et quiert le bien dont l'alme vive,
 Et dont le corps en sa destresce
 Ait sa viande sustentive : 14410
 Ne l'un ne l'autre point ne prive
 Par trop poverte ou trop richesce.
 Thobie a dieu devouement
 Pria molt resonnablement,
 Qe du richesce l'abondance
 Ne du poverte le tourment
 Ne luy dorroit, ainz soulement
 Sa necessaire sustenance :
 Car par si mesurée balance
 L'alme en son point ne desavance,
 N'au corps tolt le sustienement ; 14421
 Ensemble quiert lour pourvoiance,
 Ne plus ne meinz mais sufficance
 Pour faire a dieu ce q'il appent.
 Mais sur trestout je truis escrit
 Q'au main oiseuse soit desdit
 Le pain, que point n'en mangera :
 Auci qant dieus ot entredit
 Au primer homme et contredit
 Son paradis, lors commanda 14430
 Q'au labourer en terre irra
 Et en suour pourchacera
 Le pain, dont chascun homme vit :
 Dont m'est avis, cil qui serra
 Sollicitous molt luy valdra,
 Car corps et alme en ont prouffit.
 A chascun homme droiturer
 Les labours de ses mains manger

14436 enont

David en son psalter enhorte :
 Auci l'en dist en essampler 14440
 Que dieus tous biens fait envoier,
 Mais par les corns le boef n'apporte :
 Helie, qui se desconforte,
 Combien que l'angel le conforte
 Disant qu'il devoit pain gouster,
 Ove ce nientmeinz labour reporte
 De la journee longe et forte
 Que dieus luy fist depuis aler.
 Pour ce nous disoit en ses vers
 Pamphilus ly sages cleres, 14450
 Que joyntement dieus et labour
 Nous apportont les biens divers :
 Car sanz labour, soiez tout certz,
 Ne puet om faire ascun bon tour,
 N'a siecle n'a son creatour :
 Noz mains nous serront labourour,
 Car pour ce sont al corps adhers,
 Q'ils doivent faire au corps socour ;
 Et noz cuers serront nuyt et jour
 Tantsoulement a dieu convers. 14460
 D'umeine vie qui sovient
 Sciet bien q'au labourer covient
 Le fieble corps pour sustenir ;
 Et l'alme ne vit pas du nient,
 Grant peine et labour y partient,
 Q'en son droit point la voet cherir.
 Pour ce le corps a maintenir
 Ascuns s'en vont les champs tenir,
 De qui labour le pain nous vient ;
 Ascuns sont cleres et ont desir 14470
 Pour faire tout le dieu plesir,
 Dont l'alme en bon estat devient.
 Ove ceste vertu dieus dispense,
 La quelle paie la despense
 Al alme et corps, sicomme doit faire.
 C'est la vertu que providence
 Retient, si prent bonne evidence
 De la formie en son affaire ;
 Quar quant le jour d'estee s'esclaire,
 Lors fait sa pourvoiance attraire, 14480
 Dont puis, qant froid d'yver commence,
 A sa cuillette en saulf repaire,

14505 Envint

Et vit par ese en son doaire ;
 Mais l'omme oedif de ce ne pense.
 Mais qui par covoiter d'avoir
 Solicitude voet avoir,
 N'est pas honeste tiele enprise ;
 Car q'ensi fait son estovoir,
 Il fait la vertu remouvoir
 Loigns en pecché du covoitise : 14490
 Mais qui le prent par bonne guise,
 Solicitude a chascun lise
 Du providence a recevoir
 Ce dont puet vivre en sa franchise ;
 Car si ma chose me souffise,
 De tant porrai le meulx valoir.
 Je lis q'en terre nostre sire
 Pour ses despenses a voir dire
 Ot souffiance de monoie ;
 Mendicité ne volt eslire 14500
 Ne la richesce tout despire,
 Ainçois tenoit la meene voie :
 Pour ce bon est q'om se pourvoie ;
 Car si dieu tous les biens envoie,
 Et volt en terre ensi confire
 Sa pourvoiance, lors serroie
 Trop a blamer si ne querroie
 Ce qui me doit par droit souffire.
 De les apostres qui lirra,
 Parmy leur actes trovera, 14510
 Combien q'ils propreté n'avoient,
 Poverte nulle les greva ;
 Ainçois des biens q'om leur donna
 Au suffiance ils habondoient :
 Mais pain oiseus point ne mangoient,
 Car ou labour des mains fesoient,
 Ou sicomme dieus leur commanda
 Precher la droite foy aloient ;
 Siq'en tous lieux u q'ils venoient
 De leur labour dieus s'agreea. 14520
 Joseph par la vertu divine
 Trois ans devant vist la famine,
 Dont maint palais puis fuist grevé ;
 Mais il, ainçois que la ruine
 En vint, de nuyt et jour ne fine,
 Par grant labour tanque amassé

Avoit des bledz, dont la contrée
 D'Egipste en la necessité
 Fuist salve soubz sa discipline,
 Si fuist trestout son parentée : 14530
 Sa providence en fuist loé,
 Par quoy troveront medicine.
 A luy q'est droit solicitous,
 Covient q'il soit laborious
 En deux pointz : le primer serra
 Labour du cuer bien gracios,
 Sovent contrit et dolerous
 De ses pecchés ; et puis cela
 Autre labour luy coviendra,
 Dont il au corps pourchacera 14540
 Ce q'est pour l'omme busoignous
 Noun soul pour soy, ainz il le fra
 Pour son voisin ce qu'il porra,
 Car tiel labour est vertuous.
 Solicitude la guarnie
 Primer labourt, si quiert et prie
 Le regne dieu celestiel,
 Au fin que s'alme en soit guarie ;
 Car ce nous dist le fils Marie,
 En terre qant il fuist mortiel, 14550
 'Primer,' ce dist, 'queretz le ciel,
 Car lors tout bien q'est temporel
 Du quelque chose multeplicie :
 Dont semble a moy q'espirituel,
 Sibien comme labour corporiel,
 Est proufitable a ceste vie.
 Qui bien Solicitude meine,
 La vie active en soy demeine,
 Sicomme fesoit de sa partie
 Martha la suer du Magdeleine, 14560
 Qant nostre sire en char humeine
 Mangoit deinz leur hostellerie ;
 La Magdeleine as piés Messie
 S'assist, et Marthe au compaignie
 Par grant labour toute souleine
 Servoit : Martha nous signefie
 La necessaire active vie,
 Et l'autre contempler enseine.
 Ambroise, qui s'en vait tretant,

14531 enfuist

14546 Pimer

14571 plushalte

14572 encontemplant

Les deux vertus vait devisant ; 14570
 Si dist plus halte et honorable
 Est celle vie en contemplant ;
 Mais vie active nepourqant
 Est au commun plus proufitable,
 Pour vie humeine et plus vaillable.
 A ce tout furent concordable
 Ly philosophe cy devant,
 Q'elle est as tous si busoignable,
 Que sanz luy gaire n'est durable
 En terre riens que soit vivant. 14580
 Isidre dist, 'Cil q'au primer
 Se fait en vie active entrer
 Pour le proufit commun enprendre,
 Par celle active bien mener
 En l'autre, q'est de contempler,
 Du plus legier puet condescendre ;
 Mais l'omme oedif est a reprendre,
 Qui nul bien sciet, ne voet aprendre
 De labour faire en nul mestier :
 Pour ce bon est en quelque gendre
 A labourer, que puis engendre 14591
 Proufit de l'alme et corps entier.' f. 82
 Ore dirra de la quinte file de
 Prouesce, la quelle ad noun
 Science, contre le vice de Necligence.
 Encontre fole Necligence
 La quinte file ad noun Science :
 Celle est de l'alme droit Priour,
 Q'el cloistre de sa Conscience
 Le cuer du fine intelligence
 Et le voloir sanz nul erreur
 Defent et quart par nuyt et jour.
 Du Reson est remembrançour, 14600
 Que tout remeine en sa presence ;
 Du temps passé est recordour,
 Et le present voit tout entour,
 Et le futur pourvoit et pense.
 Science poise la parole,
 Ainçois que de la bouche vole,
 S'il soit a laisser ou a dire ;
 Car ja ne parle du frivole.

14548 ensoit

14568 contemplacioun

14575 plusvaillable

14586 pluslegier

Molt est apris du bonne escole
 Cil q'a sa discipline tire ; 14610
 Bien dist, bien pense et bien desire,
 Bien sciet, bien fait, bien se remire,
 Du fine resoun se rigole,
 Fole ignorance fait despire,
 Bien sciet la meene voie eslire
 Parentre dure chose et mole.
 Science que depar dieu vient
 Mesure en sa science tient,
 Q'ensi l'apostre nous aprent,
 Disant que chascun s'en abstient 14620
 De plus savoir que luy covient,
 Mais que l'en sache sobrement.
 Saint Bernards le dist ensemment,
 Et si nous donne essamplément
 De l'estomac, qui trop se ghient,
 Qant om le paist trop plainement ;
 N'en puet avoir nourricement,
 Ainz maladie luy survient.
 Coment porroit en sa mesure
 Le sen d'ascune creature 14630
 Savoir le sen du creatour ?
 N'est pas resoun, n'est pas droiture,
 Que ly mortieux y mettont cure ;
 Car ce n'appartient pas a lour,
 Ainz ferme foy et fin amour
 Ce doit om bien avoir tout jour
 A dieu luy toutpuissant dessure ;
 Car autrement tout sont folour
 Les argumentz au desputour,
 Qant plus de sa science assure. 14640
 Qant le fils dieu, qui tout savoit,
 A ses disciples recontoit
 Par queux signals, par quelle guise
 Le jour de juggement vendroit,
 Ils luy demandont la endroit
 Le certain temps de la Juise ;
 Mais il leur dist que tiele assise
 En son poair dieus ot assise,
 Par quoy ne leur appartienoit
 Science de si halte enprise : 14650
 Dont m'est avis, fole est l'aprise
 De plus savoir que l'en ne doit.

14622 Maisque

De saint Bernard ce truis escrit :
 'Ascuns y sont qui pour delit
 L'art du science ont conquesté ;
 Mais qant om l'ad par si mal plit,
 Lors n'est ce pas vertu parfit,
 Ainz vaine curiosité :
 Ascuns science ont covoité,
 Par quoy plus soient honouéré, 14660
 Et dont puissent avoir prouffit
 D'argent et d'autre digneté ;
 Mais cils qui l'ont par tiel degré,
 N'est pas honour, ains est despit.'
 Cil q'ad science du clergie,
 Ne falt point qu'il se glorifie
 En beal parole noncier,
 Ainçois covient qu'il sache et die
 Dont soy et autres edefie
 Au bien de l'aime ; et ce trover 14670
 De saint Jerom bon essamplé
 Porrons, qant il estudier
 Voloit en la philosophie
 Du Tulle pour le beau parler ;
 Mais dieus l'en fesoit chastier,
 Pour ce que vain fuist sa clergie.
 Prodhomme qui science quiert
 Du vanité point ne requiert,
 Ainçois la quiert par tiel endroit
 Q'il fait tout ce que meulx affiert ; 14680
 Du siecle nul loer adquiert
 Du bien, d'onour, plus q'il ne doit.
 Gregoire dist, 'Comment que soit,
 Qui bien sciet et mal se pourvoit
 Du propre main soy naufre et fier ;
 Mais qui science tient au droit,
 Le corps en est yci benoit,
 Et l'alme paradis conquiert.'
 C'est la science que dieus prise,
 Qant om retient la bonne aprise 14690
 En l'alme sanz oblivion ;
 Dont soy defent de la feintise
 Du deable, qui par mainte guise
 Devant nous sa temptacion
 Presente plain d'illusioun,
 Pour faire ent no confusioun ;

14687 enest

Car il conoist de sa quointise
 La nature et complexioun
 De nous et la condicioun,
 Dont plus soubtilement s'avise. 14700
 Si sanguin soie de nature,
 Lors me fait tempter de Luxure,
 D'Orguil et de Jolietée ;
 Malencolie si j'endure,
 Lors ert d'Envie ma pointure
 En tristesse et en malvoistée ;
 Si fleumatik soie attemprée,
 Lors Gloutenie et Lacheté
 Me font tempter en chascune hure ;
 Si coleric, que soie irrée, 14710
 Discord lors m'ert abandonnée,
 Dont sui tempez a demesure.
 Pour ce cil qui Science meine
 Du vray prouesse souveraine,
 Au tout plus fort combateroit
 Encontre celle vice humeine
 Que plus l'assalt et plus l'estreine,
 Selon ce q'il en sente et voit :
 Car qui chastel defendre doit,
 U q'il est fieble, la endroit 14720
 Mettra defense plus procheine ;
 Et ensi par semblable endroit
 Du malfié se defenderoit
 Chascun bon homme en son demeine.
 Au Rome el grant paleis jady
 Fesoit Virgile a son avis
 Plusieurs ymages en estant,
 Et en chascune enmy le pis
 Ot noun du terre ou du pais
 Escrip, et puis fesoit avant 14730
 Sur un chival d'arrein seant
 Un chivaler q'ert bel et grant,
 Si ot l'espeie ou main saisissez.
 Ly mestres qui ce fuist fesant
 Du grant science estoit sachant,
 Mais ore oietz par quel devis.
 Qant terre ascune ou regioun
 Pensoit de sa rebellioun
 Encontre Rome a resister,
 L'ymage q'en portoit le noun 14740

Escrip, tantost a grant random
 Fist une clocke en halt sonner ;
 Et maintenant le chivaler
 S'espeie commença branler
 Vers celle ymage qui le sonn
 Ot fait ; et ensi d'encombrer
 Leur Cité fironz saulz garder
 Ly citezein tout enviroun.
 Ensi ly sages du science
 L'ymage de sa conscience 14750
 Enmy son pis escrivers ;
 Du quoy, qant peccché le commence
 Tempter, tantost du sapience
 La sainte clocke il sonnera,
 Sique Resoun soy guarnira
 Et des prieres s'armera,
 L'espeie ou main de penitence,
 Dont par vertu defendera
 Du peccché s'alme et gardera
 Par la divine providence. 14760
 Uns grans clerks q'ot noun Dionis
 Reconte que par son avis
 L'alme est semblable au mirour,
 Que de nature en soy compris
 Reçoit ce q'est devant luy mis
 Et en semblance et en colour :
 Cil q'est de tous les mals auctour,
 C'est ly malfié, ly tricheour,
 Pardevant l'alme en tiel devis
 Se transfigure nuyt et jour, 14770
 Dont il meulx quide en sa folour
 L'alme en serra plus entrepris.
 Car sicomme del oill la prunelle,
 Ou soit ce chose laide ou belle,
 Que passe pardevant sa voie,
 Malgré le soen de sa casselle
 La fourme et la semblance d'elle
 Ne puet guenchir, maisque la voie,
 Ne l'alme auci, malgré q'il doie, 14780
 L'ymaginer q'au cuer convoie
 Au primer point de la querelle f. 83
 N'el puet du tout hoster envoie ;
 Mais lors luy falt pour sa manioie
 Q'au dieu bien sagement appelle.

14715 plusfort 14718 ensente 14721 plusprocheine 14740 qenportoit 14772 enserra

Ou soit veillant ou soit dormant,
 Toutdis ly deable est compassant
 Pour l'alme faire forsvoier ;
 Mais lors vait il trop soubtilant,
 Qant l'omme tempte en son pensant
 Ascun tiel oeuvre ymaginer 14790
 Que semble bon au commencer,
 Mais bien sciet cil fals aduerser,
 Le fin en serra decevant.
 Par si tressoubtil enginer
 Ad fait maint homme tresbucher,
 Q'assetz quide estre ferm estant.
 Pour ce l'apostre nous defent
 De croire ensi legierement,
 Combien q'il ait du bien semblance,
 A tout esprit : car tieux ment, 14800
 Qui l'en quide au commencement
 Estre verray en apparence.
 Mais ly sage homme en governance,
 Ainz q'il deschiece en ignorance
 Qant a ce point, molt sagement
 Consail demande et sa vuillance
 Reconte et met en l'ordinance
 Du prestre par confessement.
 Si chose vient en ta pensée,
 Ainz que le fait soit commencé, 14810
 Fai ce que Salomon t'enseigne,
 C'est que tu soiez consaillé :
 Car fait du consail approuvé
 Du repentir ne porte enseigne ;
 Et si d'ascun mal overeigne
 Soyez coupable, toy remeine
 Au bon consail, dont réparée
 Soit le mesfait ; et que la peine
 Apres ta mort ne soit greveine,
 Un confessour te soit privé. 14820
 Saint Job endroit de sa partie
 Dist, 'Tant est fieble humaine vie,
 Q'au paine en bien se puet tenir' :
 Car peccché, qui la char desfie,
 La fait tant frele et mal norrie
 Que sovent change son desir ;
 Dont trop porroit mesavenir,
 Si voie n'eust a revenir

Du vray Science, que la guye
 Par confess et par repentir : 14820
 Pour ce confession oir
 Primement fuist estable.
 Uns cleres Boëce en sa leçon
 La fourme de confessioun
 En sept maneres nous aprrent,
 Des quelles il fait mencioniun
 Par science et discrecioun,
 Et si les nomme tielement :
 C'est qui, quoy, u, qant et comment,
 Ove qui, pour quoy darreinement,
 Ce sont ly sept divisioun. 14830
 A chascun part partie appent,
 Dont il falt necessairement
 Au confess rendre sa resoun.
 Primer de qui s'om voet descrire,
 Ly confess son estat doit dire,
 Queux homme il est, malade ou seins,
 Ou riche ou povre, ou serf ou sire,
 Ou cleres ou lais, n'el doit desdire,
 S'il est champestre ou citezeins, 14840
 Ensi dirra les pointz tous pleins :
 Et lors falt que ly chapelleins
 Son age et son estat remire,
 Car en l'estat qu'il est atteins
 Le peccché poise plus ou meinz,
 Soit de mesfaire ou de mesdire :
 Et puis apres le quoy dirra,
 C'est le peccché tiel qu'il peccha
 Sanz riens celer d'aucun endroit :
 Et u le fist confessera ; 14850
 C'est qu'il le lieu devisera,
 Ou lieu forain ou lieu benoit :
 Et qant le fist raconter doit,
 S'au jour du feste le faisoit,
 Ou jour ou nuyt, ce contera,
 Ou si quaresme lors estoit,
 Ou autre temps le quelque soit,
 Un point del tout ne celera :
 Et puis comment ; c'est qu'il devise 14860
 Tout plainement et bien s'avise
 De son peccché la circumstance,
 Par quel delit, par quelle guise,

14793 enserra

Par soudain cas ou longe enprise,
 Par savoir ou par ignorance,
 Et qantes fois fist la fesance,
 Et selonc ce q'estoit par chance
 Apert ou privé la mesprise,
 Et s'il ad fait continuance,
 Tout ce dirra sanz oubliance
 Qui voet tenir la droite assisse : 14880
 Et puis ove qui ; ce signifie,
 Il dirra l'aide et compaignie
 Q'il avoit a son peccché faire,
 Et qantz et queux de la partie :
 Et au darrein falt q'il en die
 Pour quoy le fist, ne s'en doit taire,
 Ou pour profit q'il en volt traire,
 Ou pour delit q'a soi duist plaire,
 Ou pour l'onour de ceste vie ;
 Car en ce trois gist tout l'affaire, 14890
 Dont aucun homme poet forfaire,
 Sicomme je truis en la clergie.
 Confessioun doit estre entiere,
 Que riens y doit lesser derere :
 Pour ce l'escript du conscience
 On doit parlire en tieu maniere,
 Sique l'acompte en soit plener.
 Ce dist Boëce en sa science :
 'Cil q'est naufrez et garir pense,
 Devant le mire en sa presence, 14900
 Sicomme la plaie est large et fiere
 Discoverir doit sanz necligence ;
 Lors puet garir.' Ceste evidence
 Essample donne a la matiere.
 Nient plus que ly naufrez garist
 Sanz bon enplastre que souffist,
 Nient plus cil qui s'ad confessé
 Se fait garir par ce qu'il dist,
 Mais deux emplastres covenist,
 Ainçois q'il soit au plain sané ; 14910
 Contricioun l'une est nommée,
 Que toute en plour s'est remembrée
 De ses peccchés, comme jadyz fist
 Rois Ezechie en son degré,
 Par quoy pardoun luy fuist donné
 En la maniere qu'il requist.

14885 endie

14887 envolt

Contricioun ne voet souffrir
 Son client en peccché dormir,
 Ainçois l'escrie en conscience
 Q'il doit confession suir : 14920
 Et qant au point la poet tenir,
 Lors fait du plour sa providence,
 Le quel, depuis q'il le commence,
 Ne cesse, tanq' al audience
 De dieu parviene le suspir.
 Au tieu message dieus despense,
 Q'a luy par tiele obediencie
 Contrit ses lermes vient offrir.
 Peccché, sicomme le feu ardent,
 De l'eau s'en vait esteignant, 14930
 Mais chalde lerne pour l'exteindre
 Y falt. O, qui verroit ardent
 Sa maisoun et de maintenant
 Ne se voldroit a l'eau enpeindre
 Pour le peril du feu restreindre ?
 En si grant haste, encore et greindre,
 Ly contritiz l'eau vait cerchant ;
 Et si par cas la puet atteindre,
 Tout son poair y met sanz feindre,
 Q'il en soit largement versant. 14940
 Crisostomus en son decret
 Nous dist, que tout ert mesurée
 La fourme de contricioun,
 Qant vient du cuer bien ordiné,
 Selonc la droite egalité
 Du peccché delectacioun :
 Mais celle meditacioun
 Que fait la mediacioun,
 Par quoy l'en doit en equité
 Plorer en contemplacioun, 14950
 Bernards nous fait relacioun ;
 Ore escoutez en quel degré.
 A grant resoun plorer cil doit,
 Qui tendrement deinz soi conçoit
 L'ingratitude au pecccheour ;
 Primement q'il contre droit
 Desobeit en son endroit
 A dieu son pere et creatour,
 A qui par reson tout honour
 Om doit donner de bon amour ; 14960

14925 par viene

14940 ensoit

Et d'autre part om doubteroit
D'offendre a si tresbon seignour,
Soubz qui vivons de nuyt et jour,
Car chascun de son bien reçoit.
Mais de plorer encore plus
Grant cause y ad, sicomme je truis,
Q'au dieu le fitz avons fait tort,
Q'est homme pour nous devenuz,
Trahiz, penez et fort batuz,
Et au darrain souffrist la mort 14970
Pour nous donner vie et confort.
O qui deinz soy tout ce recort,
Du tendre cuer et s'est pourveuz, f. 84
S'il lors ne puet trouver le port
De plour, ne say par quel report
Il serra lors au plour renduz.
Encore om puet considerer
Trois choses pour plus exciter,
Dont pecheour serra plorant,
Qu'il est atteint par son pecher 14980
Comme laroun, traître et puis moertre :
Primer laroun, qu'il est emblant
Le bien de l'alme resonant,
Qe dieus luy bailla commandant
Qu'il le devoit multeplier,
Dont il au fin serra comptant ;
Mais s'il n'ad quoy dont soit paiant
Il ad grant cause de plorer.
Mais est il traître ? Certes si :
Car il le chastel ad trahi 14990
Du cuer u fuist l'entendement,
En quel, qant Pecché l'assailli,
Par grace l'Alme se guari
Et faisoit son defendement :
Mais cil qui par contendement
Du deable en fist le rendement,
Et au Pecché se consenti,
Ne puet faillir du pendement,
S'il grace n'ait d'amendement,
Et soit contrit de plour aici. 15000
Est il moertre ? Oïl. Du quoy ?
He, certes d'une file au Roy,
C'est l'Alme, q'est la dieu figure,
Car il la fist semblable au soy ;

14981 in ras.

14996 enfist

Mais cil moertre par son desroy
L'ad fait tuer de vile ordure
Encontre resoun et nature ;
Dont dieus et toute creature
Au fin dirront, ' Vilains, avoy ! '
Qui tout ce pense et lors ne plure, 15010
Il m'ad mys a desconfiture,
Que plus ne say que dire en doy.
Mais sur tout il ad belle grace
Pour son peché, si l'omme sace
Plorer par tiele discipline :
Je lis que lerne chalde esrace
Le deable et hors du cuer le chace,
Q'il n'ose attendre la covine,
Nient plus que mastin ou mastine
Attent celle eue en la cuisine, 15020
Qant om leur gette enemy la face.
Contricoun trop perest fine
A luy q'ensi ses plours diffine,
Dont verray pardoun se pourchace.
Et oultre ce je truis escrit,
Si ly confess serra parfit,
Ne doit plus estre pourposable
De retourner en ascun plit
A son peché, ainz tout delit
Quel est a l'alme descordable 15030
Renoncera de cuer estable ;
Et pour les mals dont est coupable
Tendra soi mesmes en despit,
Dont ert vers dieu plus amiable :
Car s'il ensi soit resonnable,
Adonque est il verray contrit.
Mais ad il plus encore affaire,
Dont ly confess a dieu repaire
Plainement ? Certes si a :
Car reparer falt et refaire 15040
Les mals de son primer affaire ;
Dont satisfacioun ferra
Et sa penance portera,
Sicomme ly chapellains dirra :
Pour son delit doit paine traire,
Car de nature l'en verra
Q'au plus sovent om garira
Le froid par chald, q'est son contraire

15012 endoy

15047 plussouent

Trestous peccés que nous desvoient,
Ou envers nostre dieu forsvoient 15050
Ou envers nostre proesme apres,
Ou vers nous mesmes se reploient ;
Dont envers qui plus se comploient,
Selonc l'effect de noz mesfetz,
Du peine en porterons le fess :
Si envers dieu soit ly mals fetz,
De ce prieres nous envoient
Pardoun, et d'autre part reles
Nous fait almoisne des forssetz
Q'envers noz proesmes se desploient.
Mais en ce cas tu dois entendre, 15061
Qe tant puet om son proesme offendre,
Sicomme tollir son heritage,
Ou s'il sa male fame engendre,
Q'a lors n'est autre forsque rendre,
Dont restitut soit le damage :
Mais si d'envie ou d'autre outrage
D'orguil, qui vient du mal corage,
Son proesme offent, lors porra prendre
Et le pardoun et l'avantage 15070
D'almoisne ; mais son fals tollage
Ly falt au fin ou rendre ou pendre.
Mais ce q'au freleté partient,
Si corporiel peccé nous tient,
Selonc que poise la balance
De noz delices, il covient,
Au confesser qant homme vient,
Qu'il en resçoive sa penance
De juner ou d'autre observance
Solonc la droite circumstance, 15080
Om doit le corps desporter nient.
Du confesser qui ceste usance
Voldra tenir, n'ad mais doubance
De ses peccés, s'il ne revient.
Confession est celle tour
Au quelle acueillont leur retour
Tous ceaux q'a dieu vuillont tourner.
Saint Pierre, qant ot fait le tour
Qu'il renoia son creatour,
Revint a dieu par confesser : 15090
La Magdaleine aici plener
Confesse avoit le pardonner

15055 enporterons 15078 enrescoiue

De ses peccés : pour ce de leur
Porrans nous autres essampler
De la confessioun amer,
Qe l'ire dieu change en amour.
Ore dirra la descripcioun de la
vertu de Prouesce par especial.
Les filles de Prouesce néez
Lour droitz nouns et leur propretés,
Comme vous ay dit, avetz oy ;
La bonne mere en soit loez, 15100
Par qui d'Accide les peccés
Sont des vertus tout anienty :
Car du Prouesce tant vous dy,
Qe du leon plus est hardy,
Et d'oliphant plus fort assetz,
Plus que Solail durable aici,
Qant en un jour le ciel parmy
Transcourt les cercles et degrés.
Saint Job, q'estoit de dieu eslit,
Sur terre vie humeine escrit 15110
N'est autre que chivalerie :
Car chascun homme q'icy vit
Covient, ainçois q'il soit parfit,
Trois guerres veintre en ceste vie,
Que molt sont plein de felonnie :
La char du primere envate
L'assalt de son tresfol delit,
Le siecle de sa tricherie,
Ly deables d'orguil et d'envie,
Q'au peine serront desconfit. 15120
Mais cil prous champion de dieu
Qui du Prouesce ad la vertu,
Des bonnes armes s'est armé,
Du bon haubere, de bon escu,
De healme fort, d'espé mola,
Que des vertus sont tout forgé,
Dont il veint toute adverseté
Du char, du siecle et du malfié,
Q'encontre luy sont arestu.
He, comme Prouesce est benurée, 15130
Q'ensi maintient son adoubé
Au fin q'ils tout soient venu !
Des tieles armes bien et fort
Les saintz apostres par confort

15100 ensoit 15105 plusfort 15106 Plusque

Au Pentecoste s'adouberont ;
Dont doute n'avoient du tort
De ces tirantz jusq'a la mort,
Mais pardevant cel temps doubteront.
Et puisq'ils Prouesce aculleront,
As tous perils s'abandonneront, 15140
Q'au char fesoient nul desport ;
Et tout le siecle despiseront,
Et le fals deable ensi materont
Q'il tout s'estuyt a leur enhort.

He, quel honour Prouesce atire !
Son chivaler l'en puet bien dire,
Q'il est bien digne d'estre Roy :
Car il conquiert le fort empire
Sanz quel nul homme est verai
sire,

C'est q'il est conquerour du soy. 15150
Resoun, constance et bonne foy
Luy font trover assetz du quoy
Des biens del alma q'il desire ;
Dont il sa guerre et son tournoy
Maintient par si tresfort conroy,
Que tous les mals fait desconfire.

Senèques dist du vray Prouesce,
Que tous les mals dont par duresce
Fortune la puet manacer,
N'ont force envers sa hardiesce 15160
Plus q'une soule goutte enresce
Les undes de la halte mer.
O dieus, comme vaillant chivaler, f. 85
Qui par Prouesce puet gaigner
Le ciel ove toute la grandesce,
Et veintre tout mal adverser,
Charnel, deable et seculer,
Sanz mortiel plaie que luy blesce.

Prouesce est bien de vertu plein,
Car tout ly bien qui sont mondein, 15170
Sicome delit, prouffit, honour,
Sont tout soubgit dessoubz sa mein ;
Dont est sanz vice souverain,
Et use les comme droit seignour
Par fine vertu sanz erreur :
Il ad delit sanz fol amour,
Prouffit sanz tricher son prochein,
Honour sanz orguillous atour ;

Si est du siecle conquerour,
Et puis du ciel serra certain. 15180

Ore dirra de les cink files de
Franchise, des quelles la primere
ad noun Justice, contre Covoitise.

Sicomme le livre nous devise,
Contre Avarice naist Franchise,
Si est a l'alme necessaire :
Les vices q'Avarice prise
Franchise en sa vertu despise
Et fait ses oeuvres au contraire.
Elle ad cink files du bon aire,
Q'envers le siecle et saintuaire
Se gardont sanz vilain enprise ;
Des quelles la primere et maire 15190
Justice ad noun, q'en droit affaire
Guerroie encontre Covoitise.

De ceste vertu bonne et fine
La loy civile ensi diffine,
Et dist : ' Justice est ferm constant
Du volenté que ja ne fine,
Q'au riche et povre en joste line
Son droit a chascun vait donnant ' :
A nully triche et nul trichant
La puet tricher, car tout avant 15200
Tient Equité de sa covine,
Q'ove sa balance droit pesant
Vait la droiture ensi gardant,
Q'al un n'al autre part s'acline.

Platons nous dist tout platement
Que ceste vertu proprement
Fait l'omme solonc son degré
Par reule et par gouvernement
Envers dieu et envers la gent
Bien vivre ; car d'onesteté 15210
Rent a chascun sa dueté,
As ses seignours honour et gré,
As ses voisins molt bonnement
Fait compaignie et ameisté,
As ses soubgitz grace et pité ;
Vers nul des trois estatz mesprent.
Civile du viele escripture
Endroit d'umeine creature
Deinz briefs motz tout comprennent la loy

Q'attient a resoun et mesure : 15220
C'est ' Fai a autre la mesure,
Sicomme tu voes q'il face a toy.'
Q'ensi justice tient en soy
N'est covoitous, tresbien le croy,
Del autry bien par conjecture ;
Ainz son voisin lerra tout coy,
Car conscience en son recoy
L'enseigne affaire sa droiture.
Justice que les droitz avance
Encore ad de sa retenance 15230
Trois autrez, dont se puet fier,
Prudence, Force et Attemprance.
Chascun des trois en sa faisance
Ad trois offices a garder ;
Prudence sert tout au primer,
Le dit, le fait et le penser,
Comme dist Platoun, sanz fole errance
Au droite lyne fait reuler
Du resoun sanz rien covoiter
Del autry contre dieu plesance. 15240

Prudence, dist saint Augustin,
L'amour du cuer quart enterin,
Q'il soulement quiet et desire
Les richesses quelles sanz fin
Devont durer ; car son engin
Et son aguait, dont il conspire,
Trestout sont mis a cel empire
U le conquiste ja n'empire,
Ainz ly pourchas est tout divin :
Vers la se tient, vers la se tire, 15250
Nulle autre chose le detire,
Dont soit au covoitise enclin.

C'est la prudence du serpent,
Quant hom luy fait enchantement,
Soubtilement lors s'esvertue,
Des ses orailles l'une estent
Plat a la terre fermement,
Et l'autre estoupe de sa cue,
Q'elle en oiant ne soit deçue :
C'est une aprise contenue 15260
En l'evangile proprement,
Dont nostre sire nous argue,
Et s'elle soit bien retenue,
Molt puet valoir au temps present.

Quant Covoitise nous assaille,
Tendrons au terre l'une oraille,
C'est assavoir, nous penserons
Comme tout fuist nostre commen-
çaille
Du vile terre et de merdaille ;
Et l'autre oraille estouperons 15270
Du keue, si considerons
Q'en terre au fin revertirons,
La serra nostre diffinaille.
S'ensi Prudence garderons,
Je croy que poy covoiterons
La terre que si petit vaille.

' Cil q'ad prudence en son avoir
Ad tous les biens q'om puet avoir,
Ce dist Senec : car ly prudent
Ad temperance en son savoir, 15280
Et cil q'est temperat pour voir
Il ad constance fermement,
Et ly constant du rien present
Se fait doloir ascunement,
Et qui du riens se fait doloir
Ne porra vivre tristement :
Et ensi suit par consequent
Prudence ad ce que puet valoir.

Force est si forte de corage,
Ne quiert ne lucre n'avantage 15290
Du prouffit qui du siecle vient ;
Et d'autre part pour nul orage
Ne crient ne perte ne damage,
Que par fortune luy survient ;
Mais sur tous mals il se sustient,
Au destre ne s'abeisse nient,
N'au part senestre se destage ;
Le ciel covoite et la se tient,
Car en la fin, bien luy sovient,
Le siecle n'est que vain ombrage. 15300

Et Attemprance est si garnie,
La chose ne covoite mye
Dont en la fin doit repentir ;
Car pour les biens de ceste vie
La droite loy que l'alme guie
Forsfaire voet pour nul desir :
De trop se sciet bien abstenir,
Et meinz q'assetz ne voet tenir ;

Ouel se tient de sa partie.
 Vers dieu se fait tant convertir, 15310
 Que riens luy porra pervertir
 Au fin q'il la justice oublie.
 Attemprance est la meene voie,
 En jugement qui droit convoie
 Parentre justice et reddour;
 C'est la vertu que ne forsvoie
 Ou par priere ou par monoie,
 Ou par hatie ou par amour;
 Ainz tient justice en sa vigour,
 Chastie et pent le malfesour, 15320
 Dont bien commun se multeploie:
 Pité nient meinz interieur
 Se dolt du paine exteriour,
 Que d'autry mal n'ad point du joye.
 Ce dont je parle n'est justice
 Itiel comme vendont cil Justice,
 Selonc que parle le decré,
 Qui pour le gaign de leur office
 La vertu font tourner en vice,
 Qant droit vendont et equité; 15330
 Dont font semblable le peccché
 A Judas, qui le corps de dée
 Vendist par voie d'avarice:
 Mais vray Justice en son degré
 Ne volt falser sa loyauté
 Pour tout l'avoir q'est en Galice.
 Ly philosopre nous reconte,
 Justice les vertus surmonte
 Pour garder le commun proufit;
 Du covoitise ne tient conte, 15340
 Ainz sur tous biens du siecle monte
 Et dessoubz dieu se tient soubit:
 Dont cil qui par justice vit
 Doit sur tous autres estre eslit
 Au Roy, au Prince, au Duc, au Conte;
 Car franchement sanz nul despit
 Fait droit, dont puis serra parfit,
 Qant Covoitise ert mise a honte.
 Ore dirra de la seconde file
 de Franchise, la quelle ad noun
 Liberalité, q'est contraire au
 vice de Usure. f. 86
 Franchise a garder sa droiture

Encontre l'averouse Usure 15350
 Ad la seconde de sa geste,
 C'est Liberalité la pure,
 Que tant est franche de nature,
 Tant liberale et tant honneste,
 Que sa richesce as tous est preste:
 Car pour nul bien que celle apreste
 Ne quiert ja plus que sa mesure;
 Meulx voet donner que mal aqeste
 Resceivre, car du tiel conquete
 Ne prent sa coffre la tenure. 15360
 De ce vertu cil q'est doé
 Asses luy semble avoir gaigné,
 Qant il apreste a ses amys
 Ou a qui autre en son degré,
 S'il puet avoir de dieu le gré
 Et de son proesme grans mercys:
 En les Cités, en les païs,
 U tiel prodhomme est poestis,
 Molt valt sa liberalité
 Au povre gent q'est entrepris; 15370
 Qant duist paier au double pris,
 Socourt a la necessité.
 Usure dolt de la covine,
 U ceste vertu est voisine,
 Car ranque Usure par brocage
 Attrait dessoubz sa discipline
 Del orphanin ou l'orphanine,
 Qui pour meschief mettont en gage
 Leur moebles et leur heritage, 15380
 Iceste vertu les desgage,
 Qant voit d'Usure la falsine:
 Car tant est franche de corage,
 Ne lerra point au tiel paiage
 Garder son proesme de ruine.
 Par tout u Liberal s'en vait
 Usure ad toutdis en agait
 Pour sa falsine redrescer;
 Et tout ce pour deux causes fait,
 Que l'un ne l'autre soit desfait, 15390
 Ne le dettour ne l'usurer:
 Le corps de l'un fait socourir
 Q'est au meschief de nounpaier,
 Et l'autre du mal gaign retraits,
 Dont s'alme devoit periller:

Molt fait tieu vertu a loer,
 Par qui vienont tant du bienfait.
 Mais d'autre part s'il ensi soit
 Q'au liberal ly povres doit,
 Et n'ad dont paier la monoie,
 Pour ce jammais d'ascun endroit 15400
 Ne fait que povre en ert destroit,
 Ainz luy pardonne toute voie.
 Au charité tout se convoie,
 Ne quiert le soen, ainz le desvoie,
 Ne fait, comme dire l'en soloit,
 De l'autry quir large courroie;
 Ainçois ses propres biens emploie,
 Dont l'autre son proufit reçoit.
 Le quelque Liberal ad plus,
 Ou la richesce ou les vertus; 15410
 Et l'un et l'autre franchement
 Departe as povrez gentz menuz:
 Mais ja pour tant de luy resçuz
 Ne quiert leur orr ne leur argent,
 Ne leur chapoun ne leur frument;
 Ainçois de dieu loer attent,
 Et pour cela met a refus
 Tout autre bien; dont dieus ly
 rent
 Cent mil fois plus d'avancement
 De son tresor qu'il ad la sus. 15420
 Ore dirra de la tierce file de
 Franchise, la quelle ad noun Al-
 mosne, contre le vice de Ravine.
 La tierce file de Franchise,
 C'est une dame que dieu prise
 Et ad a noun pitouse Almosne,
 La quelle par divine aprise
 Ravine hiet et sa mesprise:
 Molt sont contraire leur personne,
 L'un fait a l'autre molt dissonne,
 Car l'une tolt et l'autre donne;
 L'une a deservy par juÿse
 Le hart, et l'autre la coronne, 15430
 L'une est malvoise et l'autre bonne,
 L'une aime et l'autre dieu despise.
 Du franche Almosne la nature
 Se tient d'especiale cure

15401 enert

Les povrez gens a socourir,
 Selonc q'il voit le temps et l'ure,
 De sa viande et sa vesture,
 De son florin et son denier:
 Et sur tout ce fait envoyer
 Entour les villes pour sercher 15440
 De la maison, de la demure,
 U puet les indigentz trover;
 Ne sciet ou meulx porra gaigner
 Q'aider la povre creature.
 Thobie enseigna son enfant,
 Q'il de ses biens soit entendant
 De faire almosne a dieu plesance:
 Roy Salomon auci disant
 S'en vait et son fils enseignant,
 'Honoure dieu de ta substance, 15450
 Et donne au povre la pitance,
 Plus en serra ta sufficance
 Et plus te serront habondant
 Tes biens a la multipliance:
 Car cil qui fait la dieu chevance
 Ne puet faillir du gaign suiant.
 Qui droite almosne fait et use
 Ses biens par ce ja n'amenuse,
 Nient plus que jady la farine
 Q'estoit ou pot de la recluse, 15460
 N'auci que l'oille deinz la cruse,
 La quelle par vertu divine,
 Comme Helisetus le divine
 Au povre vedve et orphanine,
 De tant comme plus estoit effuse
 Revient tout pleine et enterine;
 Dont fuist garie en la famine
 Que par Sarepte estoit diffuse.
 Comment Almosne s'esvertue
 Essample avons, car dieus la veue
 Au saint Thobie en ce rendist, 15470
 Q'au ciel s'almosne estoit venue;
 Dont dieus envoia de sa nue
 Saint Raphael, qui le garist.
 Au bon Corneille Jhesu Crist
 Auci son angel y tramist
 Pour estre de sa retenue,
 Q'estoit païens, mais ce q'il fist

15452 enserra

D'almoisne dieu en gré le prist,
 Par quoy sa foy luy fuist rendue. 15480
 Qui donne almoisne il se proufite,
 Qant il pour chose si petite
 Reprint tant large avancement :
 De cest essample nous excite
 La vedve que donna deux myte,
 Comme l'evangile nous aprent ;
 Car tant puet homme franchement
 Un soul denier de son argent
 Donner du volenté parfite,
 Q'il par decerte plus reprint 15490
 Q'uns autres, s'il donast tiel Cent
 De sa richesce mal confite.
 Pour ce chascun ove largez meins,
 Selonc q'il ad ou plus ou meinz,
 La povre gent almoisnera
 Sanz escondit des motz vileins :
 Si l'en soit du richesce pleins,
 Ses downs au povre esclargira,
 Et du petit un poy dorra ;
 Et s'il du quoy doner n'ara, 15500
 Du large cuer q'il ad dedeinz
 En lieu du fait, qant ce faldra,
 Son bon voloir aprestera
 Pour l'amour dieu et de ses seintz.
 Je sui de Marcial apris,
 Qe cil qui tient ses downs en pris
 Et donne tristement a dieu,
 Qant ad ses downs ensi partiz
 Des deux proufitez s'est departiz,
 C'est q'il ses downs q'il ad rendu 15510
 Et le merite ad tout perdu :
 Mais cil qui n'est pas esperdu,
 Ainz voet oïr les povrez cris,
 Et ad le bras prest estendu
 Pour donner, cil ert entendu
 De grant loer, ce dist l'escris.
 Si droite Almoisne a dieu se fiere,
 Om doit donner ove lée chiere
 Au cry du povre gent menour,
 Q'Almoisne luy soit oreillere : 15520
 Car Salomon en sa maniere
 Nous dist que trop fait grant folour
 Qui clot s'oraille a tiel clamour

Des povres, et n'est auditour
 Pour leur donner de s'almosnerer ;
 Car q'ensi fait, verra le jour
 Q'il criera vers dieu socour
 Sanz nul exploit de sa priere.
 L'apostre dist que dieu s'agréa
 Qant om luy donne du bon gré ; 15530
 Car dieus reguarde soulement
 Du cuer la bonne volenté.
 Seneques dist en son degré
 Qe nulle chose aucunement
 Est achaté si chierement,
 Comme celle q'est darreinement
 Du longue priere adquestée ; f. 87
 Car q'ensi donne, son down vent,
 Dont en la fin loer ne prent :
 Vei la folie et nyceté ! 15540
 Et si tu voes doner a droit,
 Des propres biens covient q'il soit
 L'almoisne que tu voes bailler :
 Car autrement en nul endroit
 Dieus en bon gré ne la reçoit,
 Q'il ne voet estre parçoner
 De pilour ne de ravener :
 Et si du propre voes donner,
 Encore il covient que ce soit
 En nette vie, car denier 15550
 De ta main ne voet accepter
 Dieus, qant ton cuer en peché voit.
 D'un homme riche truis escrit,
 Qui jadis une eglise fist
 Del autri bien q'ot par ravine ;
 Mais qant l'evesque vint au plit
 Del dedier, le deable y vist
 Seoir et avoir pris saisine ;
 Si dist d'orrible discipline,
 ' Ja ceste eglise n'ert divine, 15560
 Ainz est a moy parenterdit,
 Car tout fuist faite du falsine.'
 Ensi disant par sa ruine
 S'en vole, et tous les murs desfist.
 Pour ce dist dieus par Ysate :
 ' Q'est ce que vous par tirannie
 Maison a mon oepe atiretz ?
 Je n'y prendray herbergerie.

Le ciel ma propre sée guarnie
 Prest, et terre, ce sachez, 15570
 Est l'eschamelle de mes piés.
 Quel mestier ay, lors responnez,
 De vo richesce mal cuillie ?
 Noun ay, ainz tout ert refusez :
 Mais quique fait mes volentés,
 Son down refuseray je mye.'
 La questioun je truis escrite
 Du bon saint Job, qui nous recite :
 ' S'almoisne vient du torte line,
 O quel espoir de sa merite 15580
 En poet avoir cil ypocrite
 Qui l'autri bien tolt par ravine ?'
 Ce dont quide avoir medicine
 Luy fra languir, car la divine
 Justice almoisne ensi confite
 Desdeigne ; car de la covine
 Dieus ne puet estre, u que falsine
 Se melle, ainçois la tient despite.
 Quiconques par ypocrisie
 Almoisne donne ou june ou prie, 15590
 Ore escoultez comme faitement
 Dist nostre sire en Jeremie :
 Il dist que tiele gent faillie
 Semont le blé, mais nequedent,
 Qant messon vient darreinement,
 Nul fruit en ont, ainz folement
 L'espine en cuillont et l'urtie,
 Dont serront point molt asprement :
 Ensi guilour pour guilement
 Serra guilé de guilerie. 15600
 Almoisne est down, noumpas bargaign,
 Car droite Almoisne ne quiert gaign
 Reprendre de s'almosnerie ;
 C'est q'il ne quiert loer humain
 Du cuer, du bouche ne du main :
 Du cuer primer, ce signifie
 Qe veine gloire n'en ait mye,
 Dont en son cuer se glorifie,
 Ne de la bouche son prochain
 N'en quiert loenge en compaignie,
 Ne d'autre main sa rewardie 15610
 Attent forsque de dieu soulain.

15581: Enpoet

15596 enont

15597 encuillont

15642 qadonwer

Ce nous tesmoigne l'escripture,
 Qe sicomme d'eaue la moisture
 Extaignt du ficu la violence,
 Si fait Almoisne en sa nature,
 Du peché la tresvile ordure
 Extaignt del infernal descense ;
 Dont falt que chascun se pourpense,
 Pour luy de qui tout bien commence
 Donner almoisne en sa mesure 15620
 Pour espourger sa conscience ;
 Car poy sont cils qui sanz offense
 N'eiont mestier de celle cure.
 O quel surcrois du gaignerie
 Almoisne prent en marchandie,
 Voir plus d'asses que ly sergant
 Q'ot cink besantz a sa partie,
 Et pour ce q'il deinz sa baillie
 Les fist au double surrescant, 15630
 Sur cynk Cités fuist seignourant :
 Mais qui d'almoisne est droit marchant
 Adquiert tout autre seignourie,
 L'amour de dieu q'est toutpuissant,
 Le ciel ove tout q'est pourttenant,
 En joye et perdurable vie.
 Je lis q'almoisne est le semaille
 Le quel, au fin qu'il cresce et vaille,
 En megre terre et noun en crasse 15639
 Om doit semer ; car un soul maile
 Q'om de s'almoisne au povre baille
 Valt plus q'a donner une masse
 Au riche, q'ad tout plain sa tasse :
 Et qui du pité se desquasse
 Et donne au povre la myaille
 Du pain, dont il sa faim aquasse,
 Si poy d'almoisne excède et passe
 Le feste au riche et le vitaille.
 Ly sages dist en sa maniere,
 ' Si le povre homme te requiere, 15650
 Donnnetz, et si n'en targetz mye,
 Ainçois que toy la mort surquiere :'
 Lors ert trop tard, si l'en te quiere,
 Qant perdu as ta manantie.
 Pour ce donnnetz en ceste vie,
 Car la lanterne meulx te guie

Devant la main que *parderere* :
 Tant *comme* tu as la seignourie,
 Meulx valt *donner* la soule mye,
 Q'après la mort la paste entiere. 15660
 Ly sages te dist ensement,
 'Ce que l'en *donne* au povre gent
 Est a dieu mesmes apresté,
 Et il a cent fois plus le rent.'
 Car il dist mesmes tielement,
 'Quiconque as povres ait *donné*
 El noun de moy par charité,
 A moy le *donne*, et de bon gré
 Je le reseive, et proprement
 Frai que ce serra repaié.' 15670
 O *comme* almoisne est benurée,
 Quelle ad si bon repleggement.
 Escoulte qui le povre oublie
 Que Raphael dist a Thobie :
 'Meulx valt,' ce dist, 'a dieu *donner*
 Almoisne, que la tresorie
 Combler d'estroite muscerie.'
 Du quoy le deable est tresorer.
 Ce dist David en son psalter :
 'Cil est benoit qui regarder 15680
 Deigne a la povre maladie
 Pour leur desease socourer ;
 Car les mals jours ne doit doubter
 Ne les perils de ceste vie.'
 Ce dist Senee, 'Al indigent
 Dorrai des mes biens franchement,
 Au fin que sauf sanz indigence
 Du corps et alme ensemblement
 En soie' : car tout voirement
 Saint Isafe nous ensense, 15690
 Disant que cil qui fait expense
 D'almoisne, dieux le recompense
 En halt le ciel molt richement
 De sa lumere et sa presence,
 U sanz tenebre en conscience
 Il verra dieu tout clierement.
 Almoisne ensi *comme* procurour
 S'en vait au ciel superiour,
 Si fait la voie et le brocage 15699
 Vers dieu et vers les seintz entour,

15689 Ensoie

15710 entrouons

Dont sont rescez en grant honour
 Tous cils qui l'ont en *leur* message
 Mandé devant la main *comme* sage :
 Car *franche* Almoisne en son langage
 Tant sciet parler au creatour,
 Et porte ove luy tant riche gage,
 Que l'alme des tous mals desgage
 Et la remette en bon amour.
 Q'Almoisne les pecchés exteigne
 Nous en trovons aperte enseigne, 15710
 Car Daniel ce vait disant
 Au Roy qui Babiloine meine,
 Q'il des *grans* biens de son demeine
 Almoisne au povre soit *donnant*,
 Dont ses pecchés soit rechatant.
 He, quel finance soufficant,
 Que l'alme a salveté remeine,
 Et le fait franc qui *pardevent*
 Fuist en servage du tirant :
 Vei la, *comme* *bonne* chambreleine !
 Almoisne est celle chamberere 15711
 Que l'alme lave nette et clere,
 Q'ascune tache n'y appiert :
 Du ciel Almoisne est la portiere,
 Qui tous les soens ove *leur* charrere
 Y laist entrer, qant om le quiert :
 Qant om saint Julian requiert
 Pour bon hostel, Almoisne y ert,
 Sicomme la tresbonne hostelliere : f. 88
 Almoisne ensi, *comme* meulx affiert,
 A tout bienfaire se refiert, 15711
 Et tous les mals met a derere.
 Almoisne est faite en mainte guise,
 Dont je te dirray la divise,
 Bon est si tu l'entenderas :
 Primer tu q'as richessee adquise
 Dorras la cote et la chemise
 Au povre, qant nud le verras,
 De saint Martin t'essampleras ;
 Manger et boire aici dorras 15710
 As fameillous, car tiele aprise
 Del dieu commandement en as ;
 Auci d'almoisne herbergeras
 Celluy qui n'ad meson u gise.

15732 aderere

15742 enas

Auci d'almoisne visiter
 Tu dois malade et prisonner
 De tes biens et de ta presence :
 D'almoisne *donne* ton denier,
 U meulx le quidez assener,
 Nounpas a chascun qui te tence, 15750
 Ainz du suffraite l'evidence
 Tu dois sercher de ta prudence,
 Et u tu vois greigneur mestier,
 Dorretz du large main extense ;
 Mais la plus grevouise indigense
 C'est riche en povreté *tourner*.
 Je lis d'un *homme* qui pieça
 Fuist riche, et puis luy fortuna
 Q'il devint povre, et *pour* soy pestre
 Trois de ses filles ordina 15760
 Au bordell, siqu'il par cela
 Viveroit, qant meulx ne poait estre.
 Mais celle nuyt *par* sa fenestre
 Saint Nicholas, qui scieust bien l'estre,
 Argent et orr aval rua,
 Si que l'almoisne de sa destre
 Les files ove leur fol ancestre
 Du peccché tint et remonta.
 O quel essample nous entrait
 Cil saint, q'ensi fist son aguait 15770
 De nuyt pour ses almoisnes faire ;
 Assetz le pot bien avoir fait
 Du jour, mais il volt son bienfait
 Celer sanz sa loenge en traire ;
 De tant estoit s'almoisne maire.
 Ly sages dist, 'Si voes dieu plaire,
 Fai que ly povres almoisne ait
 Muscé trestout en secretaire
 Deinz son giroon, car ly bienfaire
 De tiele almoisne a dieu s'en vait.'
 Ensi l'almoisne de tes biens 15781
 Dorras, et puis falt une riens,
 Que si plus sages es d'autry
 Et tu d'almoisne au droit soviens,
 En tous les lieus u que tu viens
 Ton sen dorras a chascuny,
 Q'est du bon consail desgarny :
 Car Salomon te dist ensi,

15755 plusgreouise

15774 entraire

Que s'au tiel point ton sen detiens,
 Tu pecchez, car l'orr enfouy 15790
 Et sens muscé, qant n'est oy,
 Ne l'un ne l'autre vale riens.
 En general l'almoisne est grant,
 Qui plus sciet ou plus est puissant,
 Qant son voisin voit en destresse
 Du charge qui trop est pesant,
 Aider luy doit de maintenant
 De sa force et de sa vistesce,
 Pour supporter l'autry fieblesce ;
 Car c'estoit la doctrine expresse 15800
 Du saint Apostre en son vivant :
 Pour ce jofne *homme* a la vielesce
 Et ly viels *homme* a la jofnesse,
 Chascun vers l'autre soit aidant.
 Ly saint *prodhomme* sont tenu
 Prier, car c'est en chascun lieu
 Almoisne al alme et grant profit.
 Du bon saint Piere j'ay bien lieu,
 Combien q'il d'orr n'estoit *pourveu*,
 Pour ce s'almoisne n'escondist 15810
 Au povre clop, ainçois luy dist,
 'Va t'en tout sein,' et cil guarist :
 Mais au jour d'uy n'est pas veu
 L'almoisne q'est ensi confit,
 Et nepourqant c'est un excit
 Q'om doit *donner* almoisne a dieu.
 Du petit poy serra *donné*,
 Du nient l'en dorra volenté ;
 Car si tu n'as du quoy *donner*,
 Encore as tu la liberté 15820
 D'avoir le cuer piteus et lée :
 Poverte n'en dois allegger ;
 Cil n'est pas *povere* a droit jugger
 Q'ad poy ou nient ove large cuer,
 Ainz cil est povre et malurée
 Q'ad molt et plus voet convoiter ;
 Mais qui la *savera* bien garder,
 Poverte est noble et beneurée.
 Le philosopre en son aprise
 Poverte en sept maneres prise ; 15830
 Si dist a son commencement
 Que c'est un bien que l'en despise.

15783 plussages

15813 au lourduy

Si nous agardons la divise,
 Bonne est, car dieus tout *franchement*
 Son ciel donne a la povre gent ;
 L'estat du povre il ensement
 Eslut, qant vint a sa juisse,
 Dont fuist despit trop vilement ;
 Lors m'est avis, qui bien l'enprent,
 C'est un estat du bonne enprise. 15840
 Celle est aici la droite mere
 Du sauté et la remuere
 De toute cure et de destance ;
 Car n'est gloutouse ne lechiere,
 Dont maladie luy surquiere,
 Ne trait phisque a sa queintance :
 Poverte aici de s'alliance
 Ne fait avoir la guerre en France,
 N'est mye as armes coustumere ;
 N'ad pas le siecle en governance, 15850
 Ainz en quiete et en souffrance
 Met toute cure loign derere.
 Poverte aici du sapience
 Fait controver l'experience
 De dieu servir, amer, doubter :
 Quique debat ou crie ou tence,
 N'est qui la quiert en evidence,
 Dont ait destourbé le penser
 D'ymaginer, de contempler,
 Pour biens et mais considerer, 15860
 Tanq'il tout voit de sa prudence ;
 Et lors est sage a terminer,
 N'est autre q'un soul dieu amer,
 Par qui tout bien fine et commence.
 Poverte est celle marchandie,
 Dont perdre l'en ne porra mye,
 Car mesmes dieus promis nous a
 Qe cil qui laist en ceste vie
 Pour luy parent ou manantie,
 Ou chose quelque ce serra, 15870
 Centante plus resceivra
 En vie que jammais faldra.
 O comme poverte multeplie !
 Sage est qui la bargaignera,
 Car pour nient om l'achatera,
 Et tout repret au gaignerie.

15914 plusparit

Poverte est la possessionn
 Du quelle en nulle sessionn
 N'est qui la part voet chalanger :
 Dont dist ly sage Salomon, 15880
 Q'un tout soul oef deinz la mesounn
 Q'en ese l'en porra manger
 Meulx valt que la meson plener
 Du qanq' om porroit souhaider,
 U l'en doit manger en tençoun.
 O comme te dois eleüser,
 Franche poverte sanz danger !
 Tous ont envye, mais tu noun.
 Poverte sanz sollicitude,
 Tu es du vray beatitude 15890
 Felicité, car tu deinz toy
 As sufficance et plenitude.
 Quique des gens ait multitude,
 Tu as soul dieu deinz ton recoy,
 Qui te pourvoit assetz du quoy,
 Dont tu te tiens peisible et coy,
 N'est qui tes biens de toy exclude.
 Ne say dont plus loer te doy ;
 Si dieus te voet donner a moy,
 Bien viene: ensi de toy conclude. 15900
 Ore dirra de la quarte file de
 Franchise, la quelle ad noun Lar-
 gescce, contre le vice d'Escharceté.
 La quarte file ad noun Largescce,
 Que d'Avarice n'est oppresse,
 Ainz hiet vilaine Escharceté :
 Franchise l'ayme et la professe,
 De son hostel commanderesse
 L'ad fait pour sa grant largeté ;
 Dont la poverte en son degré
 Reçoit en hospitalité :
 Ne laist un soul avoir destresce
 Tant comme porra du charité, 15910
 Maisque par trop necessité
 Son propre estat en ce ne blesce.
 Car la vertu de mon escrit
 Ne parle yci du plus parfit,
 Q'om doit ses biens tout refuser
 Et du poverte le despit
 Souffrir du siecle en povre plit :

Bien fait qui ce porra durer ; f. 89
 Mais nepourquant ly droiturer,
 Qui dieus des biens fait habonder,
 S'il solonc sa richesce vit 15921
 Et voet Largescce au droit mener,
 Ce doit souffire a son loer,
 Qant il est humble d'espirt.
 As bons est bonne toute chose,
 Car l'omme bon bien se dispose
 Des biens que dieus luy ad donné ;
 Ne tient pas avarice close
 D'Escharceté, ainz la desclose
 Par mesure et par largeté 15930
 Sanz point de prodegalité.
 Ne quiert pour ce la renomée
 Du poeple ne la veine glose,
 Ainçois le fait de dueté,
 Au fin que dieus l'en sache gré
 Du conscience en la parclose.
 La vertu de Largescce en soy
 Le ny tient entre trop et poy ;
 Dont si tu voes largescce faire,
 Fai selonc ce que tu as quoy ; 15940
 Despen sur tiele gent et toy,
 U meulx verras que soit a faire :
 Car si tu fais despense maire
 Que n'est du resoun necessaire,
 Ce n'est largescce, ainz est desroy ;
 Et sur la gent q'est de mal aire
 Si tu despens, c'est au contraire
 Du resoun et de bonne loy.
 Ice t'enseigne Marcial, 15950
 Que soietz large et liberal
 Envers tous autres parensi
 Q'a toy n'en facetz trop du mal ;
 Car ce n'est pas largescce egal :
 Et d'autre part te dist aici
 Danz Tullius, q'a ton amy
 Largez soietz, maisque d'autry
 Ne piletz par especial,
 Dont ta largescce soit compli ;
 Car l'un et l'autre sont bany
 Loigns de largescce natural. 15960
 Largescce pour bon governage

Ad retenu de son menage
 Discrecionn et Attemprance.
 Discrecionn, q'est assetz sage,
 Voiant le temps, le lieu, l'usage,
 Et son estat et sa soubstance,
 Fait ordiner la pourvoiance,
 Et lors par juste circumstance
 Attrait les bons a son hostage, 15969
 Pour avoir leur bonne aqueintance ;
 Mais sur trestout pour dieu plesance
 Y met le plus de son coustage.
 Discrecionn te fra despendre
 La que tu puiss honour repprendre,
 Et Attemprance endroit de luy
 Te fait de sa mesure entendre
 Q'au trop ne dois ta main extendre ;
 Car si tu follargescce ensi
 Fais, dont tu soiez anienti,
 Ly sages dist, comme je te dy, 15980
 Tu fais comme cil qui soi surprandre
 Se laist comme fol et malbailly
 De son trespertiel anemy,
 Qant n'ad rançoun dont porra rendre.
 Ce dist David en son escript,
 'Selonc ton cuer et t'espirt
 Ou plus ou meinz dieus te dorra' :
 Au cuer eschars dorra petit,
 Au large dorra large habit, 15990
 Dont largement largescce fra :
 Mais au large homme bien esta,
 Car seignour de ses biens serra,
 Dont porra faire son delit ;
 Mais l'autre n'ad dont s'aidera,
 Ainz en grant doute il servira,
 Q'a ses richesces est soubgit.
 Dans Tullius ly bons parliers
 Encontre les eschars aviers
 Ensi parlant de sa doctrine,
 Dist que trestout sont comuners 16000
 Les biens de l'omme seculiers
 Solonc nature et loy divine ;
 Si te consaille en sa covine
 Depuisque dieus ensi diffine
 Et voet que soions parconiers,

15935 lensache

Comme plus fortune te destine,
 Fai ta largesce au gent voisine
 De ta viande et tes deniers.
 Au vray largesce dieu fuisonne,
 Et ce parust en sa personne, 16010
 Qant de sa propre large mein
 Viande a cink Mil hommes donne :
 De sa largesce tous estonne,
 Car du petit tout furent plein ;
 C'estoit le fait du souverain
 Pour essampler le poeple humein
 Qe qui largesce au droit componne,
 Dont fait prouffit a son prochein,
 Dieus est en ce comme capitein,
 Qui sa largesce au fin coronne. 16020
 Dieus qui fait droit a chascuny
 Te dist en l'evangile ensi,
 'Rende a Cesar q'a Cesar dois,
 Et donne a dieu que dois a luy '
 Comme jadis fit Jacob, le qui
 A dieu donna la disme, ainçois,
 Par ce q'a dieu donna ses droitz,
 Dieux ly donna molt bel encroiss,
 A son pais quant reverti :
 Sique del une et Pautre loys 16030
 Bon est, des biens que tu reçois
 La disme soit a dieu parti.
 Cil q'est droit large en sa partie
 Tout de sa propre pourpartie
 Fait sanz ravine sa largesce ;
 Au covoitise ne s'aplie,
 Ainz du justice bien complie
 Au point tout son affaire adrese :
 Si donne au povre gent oppresse,
 Et fait as nobles sa noblesse, 16040
 Des toutes partz se justefie,
 Sique son noun du bien enresce ;
 Par quoy comme sa demesne hostesse
 Tient Bonne fame en compaignie.
 Sidrac te dist tout ensemment,
 'Qant covoitise te susprent,
 Tantost te dois rementevoir
 De ton bon noun, sique la gent
 Mal n'en diont, car nul argent

1606a enporte

Te porra contre ce valoir ; 1605a
 Ainz te valt meulx bon noun avoir
 Qe Mill tresors d'ascun avoir.
 Si dist auci qu'il proprement
 Meulx ayme a perdre son manoir,
 Ainz que son proesme a decevoir,
 Dont porroit gagner laidement.
 Par tout u que Largesce irra,
 Bon noun ades luy sufra
 Du renomée ; dont dist ly sage,
 Qe ce plus que nul or valdra 1606a
 A celluy qui dieus amera,
 Et plus en porte d'avantage.
 Roy Salomon au franc corage
 De sa largesce en chascun age
 Par tout le monde om parlera :
 Meulx valt largesce que parage,
 Car sanz largesce seigneurage
 N'est riens si vil comme est cela.
 La gent par tout le siecle prie
 Que dieus Largesce salve et guie 1607a
 Pour profit que de luy avient :
 'Largesce,' dist le povre et crie ;
 La vois de tiele heralddie
 Pour luy qui povrez gentz sustient
 Jusques as nues monte, et vient
 Pardevant dieu, qui le retient,
 Et donne le Seneschalcie
 Du ciel ove tout le bien q'attient ;
 U sa largesce puis maintient
 En corps et alme sanz partie. 1608a
 Ore dirra de la quinte file de
 Franchise, quelle ad noun Saint
 pourpos, contre le vice de Si-
 monie.
 Franchise ad sa cinkisme file,
 La quelle ses clergons n'affile
 Du Simonie ou d'Avarice ;
 Ainçois se quart q'en champ ne
 ville
 Sa conscience ja n'avile
 Par down, priere, ou par service,
 Dont elle acate benefice,
 Q'ensi ne voet en nulle office

Du sainte eglise entrer l'ovile :
 N'est pas si sote ne si nyce, 1609a
 Q'offendre voet la dieu justice
 Ou par Canoun ou par Civile.
 De ceste franche dammoiselle
 Le noun Saint pourpos om appelle ;
 Car son corage est tout divin,
 Comme la verraie dieu ancelle,
 Que jammais cure ne chapelle
 Desire avoir par mal engin :
 Par luy le vice Simonin 1610a
 Ne fait l'eschange du florin,
 Ne pour l'exploit de sa querelle
 Les lettres vont en parchemin,
 Ne ly message, en son chemin
 Qui vole plus que l'arundelle.
 Ly clerks q'ensi s'est pourposant
 Ne vait point les seignours glosant,
 Ensi comme fait ly courtejour ; f. 90
 Ne d'autri mort est expectant,
 N'a Rome s'en vait pas serchant,
 Ensi comme fait cil proviseur 1611a
 Du symonie devisour,
 Voir plus que n'est cil assissour
 Qui vait l'enqueste devisant ;
 Ainz tout attourne son amour
 Vers dieu, sanz qui de nul honour
 L'estat desire tant ne qant.
 L'en dist ensi communement,
 'Bon fin du bon commencement,
 Du bon pourpos vient bon exploit' :
 Et je vous dy tout tielement, 1612a
 Ly clerks qui ceste file aprent
 Son commencer bon estre doit.
 Qant le saint ordre de Benoit
 Primerement pour dieu reçoit,
 Son noun doit sufr proprement,
 Qu'il de benoit ne soit maloit ;
 Car clerks qui tourne en tiel endroit
 C'est un mal retrogradient.
 Melchisedech fuist le primer
 Qui dieus eslust pour celebrer 1613a
 El ordre de presbiterie :
 Saint pourpos ot au commencer,

16138 Sa

16142 plushalt

Car autrement, n'estuet doubter,
 De dieu eslit ne fuist il mye ;
 N'achata point par Simonie
 Ses ordres, ne pour rectorie
 Si saint estat volt covoitier :
 La viele loy nous signefie,
 Q'ensi devons de no partie
 En sainte eglise ministrer. 1614a
 Aron auci du viele loy
 Estoit Evesque al plus halt Roy
 Par droite eleccioun divine,
 Du saint pourpos q'il ot en soy,
 Pour sa justice et pour sa foy,
 Dieus s'agree de sa covine ;
 Ne pourchaça de sa falsine,
 Ne par brocage simonine
 Le mitre ne l'anel au doy :
 Soient de tiele discipline 1615a
 Ly cleric qui sont en ce termine ;
 Meulx en valdront, tresbien le croy.
 U la vertu du Saint pourpos
 El cuer du prestre gist enclos,
 Ja Simonie n'ert enclose,
 Ainz tout le mal en ert forsclos ;
 Du sainteté fait son parclos,
 Si q'Avarice entrer n'y ose.
 He, dieus, comme est honeste chose,
 Qant conscience ensi repose 1616a
 Du sainte eglise en bon repos,
 Quant Simonie ne l'oppose :
 Cil prelatz q'ensi se dispose
 Bien gardra son divin depos.
 C'est la vertu que l'en diffine
 Semblable au seinte pelerine,
 Qui son voiage bien commence,
 Et bien le vait, et bien le fine :
 Celle est auci la dieu meschine,
 Qe deinz ses chambres en silence
 Son cuer ove tout ce q'elle pense 1617a
 Luy dist, et cil donne audience :
 Celle est del arbre la racine,
 Que porte fruit du providence :
 Celle est sanz neele le semence,
 Dont om la paste fait divine.

1615a envaldront

16156 enert

Ore dira la description de la
vertu de Franchise par especial.

O comme Franchise ad belle issue,
Dont d'Avarice se dessue
Chascun prodomme en son corage!
N'est riens si franc dessoubz la nue,
Car qui de celles s'esvertue 16181
Trestout ert franc de vil servage,
D'argent et d'orr et du pilage;
Car d'Avarice en nul estage
De plus ou meinz son cuer englue:
Benoit soit tiele seignourage
Q'as povrez gentz fait avantage
Et a soy mesmes grant aiue.

Franchise pense bien cela,
Que du malvoise mammona 16190
Dieu commanda q'om face amys,
Et q'om son tresor comblera
El ciel, u ja ne ruillera:
Franchise en tient le dieu devis;
Dont qant d'icy serra failliz,
Son tabernacle en paradis
Appareill prest trouvera,
U riches ert et manantis
De la richesce que toutdis
Sanz fin en joye luy durra. 16200

Quant dieus en terre descendoit,
Franchise lors ove luy venoit,
Dont l'Avarice a l'anemy,
Q'el gouffre de Sathan tenoit
Et soubz les chiefs d'enfern gardoit
Des almes q'il avoit trahi:
Franchise tous les enfranchi
Et leur rançon paia parmy,
Et grant richesce leur donoit
En paradis; pour ce vous dy 16210
Faisons franchise envers autry
Sicomme vers nous dieus le fesoit.

Ore dira de les cink files que
naiscont de la vertu de Mesure,
des quelles la primere ad noun
Diete, contre le vice de Ingluvis.
Encontre vile Gloutenie

16194 entient

Naist une vertu bien norrie
Du resoun et divine grace;
Mesure ad noun, la dieu amy:
Cink files ad en compaignie,
Chascune suit sa mere au trace,
Des quelles l'alme se solace,
Dont falt que chascun homme sace
Les nouns de ceste progenie. 16211
O ventre glous, mal prou te face,
Car la primere te manace
Que trop manger ne dois tu mie.

De cestes files la primere
Par conseil de sa bonne mere
En droite nominacioun
Diete ad noun, la dieu treschiere,
Quelle a mesure toute entiere
En viande et potacioun 16212
Se prent: car pour temptacioun
Ne quiert sa recreacioun,
Si noun que resoun la requiere;
Et lors par estimacioun
Sa droite sustentacioun
Prent entre vuide et trop plene.

Cil qui de ceste s'esvertue,
Ja pour gloutouse sustenue
Glouteïment ne mangera;
Ne ja pour haste au jour se mue, 16213
Ainçois q'il voit celle heure due
Pour manger, mais ce ne serra
Au matin qant se levera.
Car ja son ventre n'emplera,
Dont s'alme vuide soit tenue,
Ainz au primer dieu servira,
Dont l'alme se desjunera,
Et puis laist que le corps mangue.

Le ventre vit en grant quiete, 16214
Qui se gouverne par Diete
Et vit solonc bonne attemprance
De sa pitance consuète;
Car qui se paist au droite mete,
Son corps du santé bien avance.
Cil q'ensi fait n'avera doubtance
Q'il doit morir du mal du pance,
Si noun q'il d'ascun planete

Soit corrupt d'autre circumstance:
Dont m'est avis meulx valt pitance
Que Gloutenie trop replete. 16260

Par vray Diete bien se guie
Cil q'a son ventre ne s'aplie
Pour gloutenie soulement,
Du quoy la char se glorifie,
Ainz voet que l'alme soit norrie
Avoec le corps ensemblement:
Auci qant sainte eglise aprent
Q'om doit juner devotement,
Ce voet juner de sa partie;
Par quoy molt resonnablement 16270
Qant doit venir au jugement
S'excusera de gloutenie.

Ore dira de la seconde file de
Mesure, la quele ad noun Abstin-
ence, contre le vice de Delicacie.

Une autre file de Mesure
Loigns des delices se mesure,
Ne voet pas estre delicat;
Ainz s'en abstient en chascune hure,
Tanque famine la court sure,
Du quoy devient et maigre et mat:
Mais lors, qant force le debat,
Un poy mangut, pour son estat 16280
Tenir en droit de sa nature.
Cest la vertu que sanz rebat
Ove Gloutenie se combat,
Et la met a desconfiture.

Quiconque ceste file meine,
Ne se delite en paindemeine,
Ainz mangut pain d'une autre paste,
Ne par delit bon vin asseine; f. 91
Combien q'en ait sa coupe pleine,
Molt est petit ce qu'il en taste: 16290
Ainz tient en toise l'arcbalaste,
Dont l'alme tret et fiert en haste
La char q'est contre luy halteine,
Et toute sa delice guaste:
En tiele guise il la repaste,
Qu'il fait courtois de la vileine.
Mais s'il avient ensi par cas
Que l'abstinent d'ascun solas

16290 entaste

Par compaignie estuet manger,
Des bons mangers le doulz ou crass,
Ou boire vin des beals hanaps, 16301
La bouche s'en poet deliter
Des tieus delices savourer,
Mais ja ly cuers de son gouster
Par mal ne s'en delite pas;
Ainz rent loenge a dieu loer,
Dont bouche se fait solacer
Ly cuers dist, 'Deo gracias.'

U ceste vertu l'ostel garde,
Le deable d'y venir se tarde, 16310
Car point ne trove y du vitaille
Dont il la frele char enlarde,
Ne dont les fois delitz rewarde,
Ainz des tieux mess y trove faille:
Lors qant ne trove que luy vaille,
Le siege laist, que plus n'assaille;
Car Abstinence n'est couarde,
Ainçois l'enchace et fiert et maille,
Dont il s'en fuit de la bataille,
Q'il n'ose attendre l'avantgarde. 16320

Sainte Abstinence en sa mesoun
Retient comme pier et compaignoun
Discrecioun en compaignie:
Si l'une hiet replecioun,
Celle autre endroit de sa resoun
L'estat du trop juner denye;
Mais toute voie ensi la guye,
Sique la frele char chastie
Et la met en subjeccioun
Par poy manger; mais q'elle occie
Sa char, cela ne souffre mye 16331
Par tressoubtile inspeccioun.

La loy divine ne dist pas
Ensi, que tu ne mangeras,
Ainçois te dist et te defent
Que gloutenie nulle fras.
Pour ce te covient en ce cas
Parentre deux discrettement
Guardar; car si trop pleinement
Manges, lors ton sentement 16340
Du gloutenie accuseras,
Et si tu es trop abstinent,

16291 entoise

Nature en dolt, *que* folement
Lors tu toy mesme occieras.
Mais q'abstinence soit parfait,
Encore il falt *que* plus soit fait,
Comme saint Gregoire nous divise ;
Qui dist *que* si ly povres n'ait
Ce que du bouche l'en retrait,
Tiele abstinence dieu ne prise ; 16350
Car qui s'abstient *par* tiele guise
Ne fait a dieu son sacrifise,
Ainz d'avarice trop mesfait,
D'escharceté qu'il ad enprise,
Qant la viande q'est remise
As *propres* oeps garder le fait.
Encore al Abstinent covient
Que deinz son cuer bien luy sovient
Q'il d'ascun pecché n'ait lesure.
Isidre dist *que* qui s'abstient 16360
En son pecché, c'est tout *pour* nient ;
Q'ensi font deable, qui nulle hure
Vuillont manger, mais sanz mesure
Leur pecché par malice endure.
Mais l'omme qui bien se contient
En abstinence droite et pure,
Ensi *comme* vous ay dit dessure,
C'est cil qui dieus ove luy retient.
Ore dirra de la tierce file de
Mesure, quelle ad noun Norreture,
contre le vice de Superfluité.
Mesure encore y enfantoit
Sa tierce file en son endroit, 16370
Que Norreture est appellé ;
C'est celle que mangut et boit
Tout prest a desrainer son droit
Encontre Superfluité :
C'est la vertu plus mesuré,
En qui n'ert pas desmesuré
Le goust, mais *que* la vie en soit
Norrie en sa necessité :
A l'alme rent sa dueté,
Et fait au corps que faire doit. 16380
Selonc s'estat et son pour quoy
Se fait norrir de plus ou poy,
S'il fort ou fieble ait le corsage,

16343 endolt 16377 ensoit

S'il fait labour ou se tient coy,
Tout ce compense en son recoy,
Et sa jofnesse ou son viel age :
Solonc son temps et son usage
Mangust du meillour compernage,
Et boit del meulx q'il ad du quoy ;
Dont poet suffire en son corage 16390
Ou a priere ou a l'overage
Solonc la dueté de soy.

Dieus qui fourma trestoute beste,
Ou soit marrine ou soit terrestre,
Tous les norrist de sa mesure,
Dont ils vivent solonc *leur* geste,
Et ly salvage et ly domestie,
Sanz faire excess de norreture :
Mais l'omme q'est al dieu figure
Et est plus digne de nature, 16400
S'il soit plus malnorri de ceste,
Lors m'est avis q'il desnature ;
Car sur trestoute creature
Resoun voet bien q'il soit honeste.

C'est la vertu *que* tout se plie
A mesure et a courtoisie ;
Bon manger ad, bien le mangue,
Le claret boit et la florie ;
Mais ce n'est pas *par* gloutenie,
Ainz est *par* sa nature due, 16410
Sique sa force est maintenue,
Dont soy et autrez meulx aiue
Ou soit du siecle ou de clergie :
Qant dieus la Gloutenie tue,
A ceste q'ensi s'esvertue
Dorra la perdurable vie.

Ore dirra de la quarte file de
Mesure, quelle ad noun Sobreté,
contre le vice de Yveresce.

La quarte file en ceste histoire
L'en nomme Sobreté du boire,
La quelle *jammais* par excess
Pert sa science ou sa memoire ; 16420
A la taverne n'est notoire
Pour soy aqueinter d'Yveresce.
Vin donne au cuer sen et leésce,
Qant homme sobrement l'adesce,

16400 plusdigne 16401 plusmalnorri

Sicomme dist l'escripture voire ;
Et autrement dolour, tristesse,
Enfermeté, folour, fieblesce,
Plus *que* nul homme porroit croire.
Mais la vertu de Sobreté
Est en ce cas tant mesurée, 16430
C'est *pour* le meulx, qant le vin boit ;
Et *pour* conter sa digneté
D'especiale honnesteté,
En quatre pointz loer l'en doit :
Primer bien gart en son endroit
Que l'omme en sa franchise soit
Du resoun q'est a luy donné,
Et tous les membres en *leur* droit
Sustient, ensi *que* nul forsvoit,
Ne pert sa franche poesté. 16440

Puis fait le seconde avantage,
Car l'omme franc du vil servage
Du Gloutenie fait garder ;
Et puis sustient le seignourage,
Dont l'espirit en son estage
Desur la char fait seignourer,
Sique l'enfernal buteller,
Qui fait les glous enyverer
De son tresmalvois taverneage,
Ne luy puet faire forsvoier, 16450
Ainz droitement le fait mener
Jusques au fin de son voiage.

Le quarte bien especial,
Dont Sobreté nous est causal,
C'est q'elle garde salvement
Du cuer la porte principal,
C'est *notre* bouche natural ;
Sique le deable ascunement
N'y entre ove son enticement,
Comme fist a no primer parent, 16460
Qui de sa bouche le portal
Overy, et puis ficha le dent
El pomme, qui soudainement
Deinz paradis luy fuist mortal.
Qant dieus qarante jours juna,
Le deable trop se soubtila,
Combien *que* ce fuist tout en vein ;
La bouche encore luy tempta,
Et en tieu fourme luy rova,

' Dy *que* ces pierres soient pain ' : 16470
Mais dieus, qui scieust devant la
main
Tous les agaitz du mal vilain,
Par Sobreté luy resista ;
Dont bon serroit a tout humain f. 92
Garder la bouche ensi certain
Comme *notre* sire la guarda.
Du Sobreté l'en doit loer
Celly q'ensi se fait garder :
De saint Jerom escript je truis,
Qui dist, ' La bouche tout primer 16480
Doit l'avantgarde gouverner
En la bataille des vertus ' :
Si bien ne soit gardé cel huiss,
Le deable y entre et fait confus
Tout quanq'il puet dedeinz trover,
Dont corps et alme sont perduz :
Mais cil q'est sobre est au dessus
Pour fort combatre et resister.

Ore dirra de la quinte file de
Mesure, quelle ad noun Modera-
cion, contre le vice de Prodegalité.
La quinte de Mesure née
Est Moderacioun nomée, 16490
Que les chiefs porte et est gardeins
Du pain, du char, du vin, du blée,
Chascun office en son degré
Fait gouverner de plus ou meinz :
Des biens *que* passent *par* ses meins
Trop large n'est ne trop vileins,
Ainz est bien sage et mesurée ;
Bien fait dehors, bien fait dedeinz,
Bien fait a soy, bien as procheinz,
Dont dieus reçoit son fait en gré. 16500
Cil q'est de ceste file apris,
Excess par luy ja n'ert enpris
Plus q'il ne doit *par* droit enprendre,
Ainz sa mesure tient toutdiz :
Il expent bien les noef des diz,
Mais diz de noef ne voet expendre.
Comme son estat le poet comprendre,
Partie de ses biens voet prendre,
Et part donner a ses amys,
Mais oultre ne se voet extendre ; 16510

Car pour sa bouche ne voet vendre
Son boef pour manger le perdis.

Ce nous dist dieus pour essampler :
' Cil qui voet tour edifier,
Primer doit son acompte faire
Q'il ait du quoy dont poet paier
Des propres biens sanz aprompter,
Pour acomplir tout son affaire :
Car s'il commence sanz parfaire,
Les gentz dirront de luy contraire,
Pour ce qu'il prist a commencer 16521
Ce qu'il ne pot a bon chief traire.'
Lors m'est avis meulx valt a taire
Que grant outrage a desmener.

Selonc l'effect de ceste aprise
Iceste file bien s'avise
Q'en son hostel nient plus expent
Mais ce q'a resonn luy suffise ;
Car tiel excess fuit et despise
Dont suit poverté au finement : 16530
Si molt avra lors molt enprent,
Du poy petit mesurement ;
Ensi par ordre se devise,
Noun pas au ventre soulement,
Ainz au commun du povre gent,
Ses biens departe en tiele guise.

**Ore dirra la descripcioun de la
vertu de Mesure par especial.**

Par ce que vous ay dit dessure
Savoir poetz, bonne est Mesure,
Du quelle naist si bonne orine,
Dont corps et alme en droite cure 16540
Sont en santé. Qui bien se cure
De leur phisique et discipline,
Que bonne et seine est leur covine
Trois choses nous en font doctrine :
Primerement sainte escripture,
Et puis nature a ce s'acline,
Si fait la beste salvagine
Et tout mondeine creature.

Qui l'escriptures voldra lire,
Que les doctours fironc escrire, 16550
Notablement trover porroit,
Que du manger om doit despire

16559 pluspetit et plusetroit

Oultrage, et la mesure eslire
Que par resonn suffire doit.
Nature aici voet q'ensi soit,
Car pour regarder bien au droit,
Des tous les bestes q'om remire
L'omme ad la bouche en son endroit
Et plus petit et plus estroit,
Pour ce que poy luy doit suffire. 16560
Nature aici se tient content,
Qant om la paist petitement,
Du poy volt estre sustenue,
Car lors vit elle longuement ;
Et s'om la paist trop plainement,
Legierement s'est abatue.
Trestoutes bestes soubz la nue
Deinz soy mesure ont contenue,
Sicomme nature leur aprent :
Puisque si fait la beste mue, 16570
La resonnable trop se mue
Qant se paist outragousement.

**Ore dirra de les cink files queles
naiscont de la vertu de Chasteté,
dont la premiere ad noun Bonne-
garde, contre le vice de Fornica-
cion.**

Encontre Leccherie frelle
Une autre vertu bonne et belle
Dieus de sa grace y ordina,
Et a Resonn donna yeelle,
Dont puet defendre la querelle
De l'Alme, et puis si la nomma
Dame Chasteté, quelle enfanta 16580
Cink files : mais q'amys serra
A la premiere dammoiselle,
Ja fornicacioun ne fra ;
Car ceste ensi le gardera
Qu'il ja vers autre ne chancelle.

Iceste file Bonneguarde
Estroitement les cynk sens garde,
Siq'ils ne doivent forsvoier ;
L'oraille n'ot, ne l'oill regarde,
Ne bouche parle par mesgarde, 16590
Ne nees delite en odourer,

16585 bonne garde

Ne main mesprent au foltoucher,
Du quoy le cuer font enticer
Au folpenser deinz son einzgarde ;
Ce sont le forain officer,
Qui du malfaire ou mal lesser
La char font hardie ou couarde.
Les cynk sens par especial,
Ce sont ly porte et fenestral,
Par queux le deable y est entrant
A l'Alme par si fort estal 16600
Que molt sovent le resonnal
En bestial vait destournant :
Mais saint Jerom te vait disant,
Que jammais deable ert pourpernant
La tour du cuer judicial,
Si Bonnegarde y soit devant
Pour garder que tout ferm tenant
Soient du chastel ly portal.

Ly saint Apostre nous defent
De parler leccherousement ; 16610
Car le parler de ribaldie
Corrupt les bonnes mours sovent :
De tiel soufflet molt tost s'esprent
Le fieu de chalde Leccherie.
Pour ce la bouche de folie
Si Bonneguarde bien ne guie
En ce q'a son office appent,
Le cuer s'assente en sa partie,
Si tret la char en compaignie,
Dont ils sont ars ensemblement. 16620

Quel es, ytiel ert ta parole,
Honeste ou laide ou sage ou fole,
Car ce dont cuers habonde al hure
S'en ist plustost de bouche et vole :
Ce tesmoignent de leur escole
Le philosopre et l'escripture.
Mais Bonnegarde bien s'en cure,
Sa lange ne laist pas sanz cure,
N'ad point la goule chanterole 16630
Pour dire ou chanter de luxure,
Ainz de resonn q'est au dessure.
La lange tient comme en gayole.
Du chose que n'est pas a faire
Sanz emparler om se doit taire,

Ce dist Senec, dont m'est avis
Q'om doit du leccherouse affaire
De bouche clos scilence attraire,
Et garder soy par tiel devis
Que ses paroles et ses ditz
Soient d'onesteté toutditz : 16640
Car qui de si fait essamplaire
Se voet garder, je truis escriis,
Que grant honour luy est promis
En ciel, u tout honour repaire.

El main du lange est vie et mort,
Dont sages est qui s'en remort,
Si q'il sa lange poot dancier.
La bouche souffle a malvois port,
Qant des folditz fait son report ;
Car ce voit om, que par souffler 16650
Le fieu tantost estenceller
Commence, et si continuer
Sufflant voldra, lors a plus fort
La flamme esprent ; ensi parler
Du mal les maïs fait enticer,
Et donne as vices le support.

Senec te dist que ta parole f. 93
Du vanité ne du frivole
Ne soit. Enten, tu foldisour :
Dieus dist, du quanque l'en parole 16660
Om doit compter a celle escole,
U q'il ert mesmes auditour :
Lors croy je bien que cil lechour,
Qui meulx quide ore en fol amour
Queinter ses ditz, dont se rigole,
Perdra l'exploit de son labour,
Qant ly chançons se tourne en plour
Et toute ardante ert la carole.

De folparler te dois retraire ;
'Mieux valt,' ce dist ly sage, 'a taire
De folparler, car par cela 16670
Sovent avient folie maire.'
De ce nous fist bon essamplaire
Uluxes, qant il folparla
A Circes et a Calipsa ;
Du folparler les enchanta,
Dont leur fesoit folie faire ;
Auci, qant il les rescoulta,

16653 plusfort

Des *lour* fols ditz tant assota
 Q'il du *resoun* ne savoit gaire. 16680
 Pour ce luy covient abstenir
 Du folparier et foloïr,
 Qui selonc *Bonnegarde* vit;
 Car s'il l'oraille voet *overir*,
 Au paine se porra *coverir*,
 Qu'il chasteté sovent n'oblit.
 Qui les chançons en mer oït
 De les *Sereines*, s'esjoÿt,
 Qe tout le cuer le font ravir;
 Mais soubz cela du mort soubit, 16690
 Qant il meulx quide estre a bon plit,
 En halte mer luy font perir.
 Auci covient garder la veue,
 Car l'oïll q'au folregard se mue
 Sovent reporte au cuer *damnage* :
 David, qant passa *par* la rue,
 Des fols regartz son cuer englue
 Voiant la beauté du visage
 Du *Bersabé*, dont fist folage :
 Auci Paris ne fist *que* sage, 16700
 Qant vist *Helcine*, q'ert venue
 En l'isle pressé son rivage;
 Pour l'oïll lessa le cuer en gage,
 Trop fuist l'eschange chier vendue.
 Pour ce bon est q'om s'*aparaille*
 De bien garder l'oïll et l'oraille;
 Car si le deable overt les voit,
 Un dart y tret en repostaille,
 Dont fiert le cuer *par* tiele entaille,
 Tan*que* *Resoun* tout morte y soit: 16710
 Et lors l'atorne a son endroit,
 Et dist au main, 'Tastetz tout droit,
 C'est suief et moll *que* je te baille,
 Fai ce que l'omme faire doit':
 Ensi la sote gent decoit,
 Qant *Bonnegarde* *lour* defaille.
 Quintiliens uns sages clerics
 Dist *que* les oils, qant sont *overtz*,
 As vices sont la halte voie,
 Dont vont au cuer tout au *travers*, 16720
 Et tost ruer luy font *envers*,
 Et les vertus tollont envoie.

16683 bonne garde

He, quel meschief cel oil emploie,
Par folregard qant se desploie
 Et du *prodhomme* fait *pervers* !
 Pour ce, *siqur* ton oil bien voie,
 Du *Bonnegarde* le convoie,
 Car l'oïl de l'omme est molt divers.
 Ce dist le *prophete* *Ysale*,
 'La mort *parmy* no fenestrie 16730
 Entre et desrobbe no *mesoun*';
 C'est *par* les oils qui l'en mesguie.
 Pour ce te dist le fils Marie,
 Qe si ton oil te soit feloun,
 Hostetz le sanz aresteisoun :
 'Meulx valt,' ce dist a bon *resoun*,
 'Avoec un oil entrer en vie
 Q'ove tout deux oils estre en *prisoun*
 D'enfern, u flambent ly *tisoun*
 Du fieu q'exteindre ne puet mie.' 16740
 Saint Job disoit q'il assurance
 Ot pris par ferme covenance
 Avoec ses oils, q'il du virgine
 Ou d'autre *femme* remembrance
 Ne duist avoir *par* l'aqueintance
 De leur regard en sa poitrine.
 De son essample et sa doctrine
 Savoir poons *que* la covine
 Des oils enportont *grant* nuisance ;
 Du cuer esmovent la racine, 16750
 Dont vait la char a sa ruine,
 Qant n'ad du vertu la substance.
 'Tourne ton oïll,' David disoit,
 'Siqu'il la vanité ne voit,'
 La quelle tout le corps fait vain :
 Car dieus le dist *par* tiel endroit,
 Qe si l'oïll vil et obscur soit,
 Le corps ert obscur et vilain,
 Et si l'oïll soit tout elier et sain,
 Le corps du clareté tout plain 16760
 Sicomme lanterne luire doit,
 Pour l'alme conduire au darrein
 Vers ciel le halt chemin certain
 En la *presence* dieu toutdroit.
 Encore falt a regarder,
 Qui chasteté voldra garder,

16745 auor

De fuïr fole compaignie,
 C'est soule ove sole acompaigner :
 De ce nous faisoit essampler
 Amon, qui par sa grant folie 16770
 De sa sorour faisoit s'amie,
 Et la pourgust du leccherie,
 Soulaine qant la pot trover;
 Par ce q'ert sole fuist honie,
 Si du soulein s'estoit fule,
 Ja n'eust eeu tiel encombrer.
 Ly bon Joseph bien s'en fuï,
 Qant *par* son mantell le saisi
 La dame qui rovoit s'amour :
 La guerre en son fuiant venqui; 16780
 Pour ce meulx valt fuïr ensi,
 Dont l'en poet estre venqueour,
 Q'attendre et estre combatour,
 Dont l'en soit vencu sanz retour
 Par force du fol anemy.
 Fuïr t'en puïss a ton honour,
 Mais cil q'attent en cel estour,
 Miracle s'il n'en soit hony.
 Sicomme du paste ly levains
 Attrait a son savour les pains, 16790
 Et comme la poire q'est purrie
 Corrompt les autres *que* sont sains,
 Et comme l'ardant charbons soulains
 Un moncell d'autres enflambie,
 Tout ensi fole compaignie
 Les autres tret a sa folie
 Et des courtois les fait vilains ;
 Pour ce je vous consaille et prie,
 Vous qui voletz honneste vie,
 Fuietz le sort des tieux compains.
 Nous d'une estoille ensi lison, 16801
 Q'est appellé cuer du lion,
 La quelle est froide de nature,
 Mais pour ce q'elle en le giroin
 Du solaiïl vait tout envirown,
 S'eschalfe et art ; et *par* figure
 Ensi fait l'omme de luxure
 Par compaignie et envoiserie.
 David te dist en sa leçon,
 'Ove l'omme saint pren ta demure, 16810

16788 nensoit

Car cil q'ove l'omme mal demure
 Estre ne poet si malvois noun.'
 Encontre tous autres pecchés
 Resistetz fort et combattez
 Pour veintre la temptacioun ;
 Mais cy endroit ne resistez,
 Ce dist l'apostre, 'En tous degrés
 Fuietz la fornicacioun' :
 Ne te mette au *probacioun*,
 Ainz sanz avoir dilacioun 16820
 Du compaignie tost fuietz,
 Qe t'alme en ait salvacioun :
 Retien ceste enformacioun
 Du *Bonnegarde*, et t'en gardetz.
 Ore dirra de la seconde file de
 Chasteté, quelle ad noun *Virginité*,
 contre le vice de *Stupre*.
 Encontre *Stupre* le pecché
 Est la seconde file née
 Du Chasteté par droit descente,
 La quelle ad noun *Virginité* ;
 Si est de pure netteté,
 Sur toutes autres la plus gente 16830
 De son fait et de son entente.
 C'est celle qui de sa jovente
 Toutdis ovesque Chasteté
 Converse et toute se presente
 A dieu, qui jammais ne s'assente
 Au char du fait ne du pensée.
 Iceste file ensi confite
 A la tresfine margarite
 Est en trois choses ressemblable :
 La pierre est blanche et bien petite,
 Si ad vertu dont molt profite ; 16841
 Au quoy la vierge est concordable,
 Q'ad blanche vie et amiable,
 Du cuer petit et resonnable
 D'umilité, dont est parfite ;
 De sa vertu molt est vaillable. f. 94
 Qant mesmes dieu est entendable
 De l'onorer pour sa merite.
 Et d'autre part, ce m'est avis,
 Virginité par droit devis 16850
 L'en porra raisonnablement

16822 enait

16830 plusgente

Resembler a la flour de lys,
 Quelle ad cink feuilles bien assis
 Ove trois grains dorrez finement :
 Le fuil primer au corps appent,
 Dont n'est corrupt ascunement,
 Ne donne au char ses foldelitz ;
 Le fuil seconde au cuer s'extent,
 Qe le penser tout purement
 Sustient sanz foldesir toutdis. 16860

Ly cuers q'a ceste vertu pense
 Deinz soy jammais ne contrepense
 Q'eschanger vuille son estage ;
 Car saint Jerom ce nous ensense,
 Si dist, 'Poy valt la conscience,
 Qant vierge pense au mariage' :
 Par tiel penser, par tiel corage
 Virginité se desparage ; 16868
 Car bon overeigne qui commence,
 S'il n'en parfait trestout l'overage,
 N'est droitz q'il ait plain avantage,
 Qant il n'en met la plaine expense.

Le tierce fuil c'est humblété,
 Qui bien s'acorde a chasteté ;
 Car saint Bernard ce vait disant,
 Qe molt est belle l'unité
 D'umblesee et de virginité ;
 Car ne puet estre a dieu plesant
 Virginité q'est orguillant,
 Nient plus que s'om te meist de-
 vant 16880

Viande bonne et savourée
 En un vessel ord et puant :
 Ja n'en fuissietz si fameillant,
 Qe tout n'en serretz abhosmé.

Mais nostre dame en sa manere
 De l'un et l'autre fuist plene,
 Humblessee avoit et fuist virgine :
 Pour ce fuist faite la dieu mere,
 Et par vertu de dieu le pere
 Virginité fuist enterine. 16890
 C'estoit la flour de lis divine
 De fuil, de fruit et de racine,
 Dont dieux faisoit sa chamberere,
 Et en la gloire celestine,

16883 nenfuissietz

Pour faire y nostre medicine,
 La fist planter et belle et chere.
 De les trois feuilles cy devant
 Conté vous ai, mais ore avant
 Au quarte fuil frai mon retour,
 Q'est du vergoigne apparissant ; 16900
 Et puis du quinte fuil suiant,
 Q'ad la verdure de paour.
 Vergoigne hiet tout fol amour,
 Les ditz n'ascoute du lechour,
 Ainz tout foldit et folsemblant,
 Ou soit secret ou soit clamour,
 Sa face enrougist du colour,
 Et s'en retrait de maintenant.

Les vierges serront vergoignouses,
 Auci serront et paourouses ; 16910
 Car el vessel q'est frel et vein
 Portont les fleurs tant precieuses,
 Dont au fin serront glorieuses,
 Si la fleur gardent saul et sein ;
 Mais si la fleur flestre au darrein,
 Lors tout perdront et flour et grein,
 Dont ont esté laborieuses :
 Ly fiebles q'aler doit longtein,
 S'il n'ait dont supponer ou mein,
 Les voies sont plus perillouses. 16920

Pour ce ly vierges q'est flori
 Doit vergoigne et paour auci
 En sa main destre toutdis prendre
 Pour suppoer le corps de luy ;
 Et s'il par cas soit assailly,
 Du tiel bastoun se doit defendre.
 Ce nous fait saint Ambroise entendre,
 Qe vierges doit avoir cuer tendre,
 Dont du legier soit esbahi :
 Vierge en ses chambres doit attendre,
 Q'aillours ne laist sa flour susprendre,
 Dont son chapeal soit desflory. 16930

Qui pert son virginal honour,
 De son chapeal deschiet la flour,
 Q'est sur trestoutes blanche et mole ;
 Meulx valsist estre enclos de tour,
 Q'es champs pour faire tiel atour
 Du violette ou primerole,

16891 delis

Par quoy sa flour de lys viole.
 Riens valt dancier a la carole, 16940
 Dont puis covient ruer en plour :
 Qant pierre hurte a la viole,
 Ou l'ostour luite au russinole,
 Sevoir poetz q'ad le peiour.
 La femme fieble a l'omme fort,
 Ou soit a droit ou soit a tort,
 Sa force ne puet resister,
 Ainz son delit et son desport
 Souffrir l'estuet sanz nul desport,
 Si soule la porra trover. 16950

Pour ce ne doit pas soule aler
 La vierge, car ly proverber
 Dist, 'Way soulein q'est sanz resort
 Du compaignie, car aider
 N'est autre, qant vient encombrer,
 Luy puet pour faire ascun confort.'

Jacob de s'espouse Lya
 Ot une file a noun Dyna,
 La quelle pure vierge estoit :
 Avint que la pucelle ala 16960
 Pour regarder les gens de la
 En terre estrange, u demorroit ;
 Mais pour ce que souleine estoit,
 Sichen, qui sa beauté veoit,
 De son amour enamoura,
 Dont la ravist et desflouroit :
 Mais si ses chambres bien gardoit,
 Ja Sichen ne l'eust fait cela.

Virginité n'est bien florie,
 Si ly deux fuil ne soient mie, 16970
 Vergoigne et paour ensement.
 Vergoigne et paour ot Marie,
 Qant l'angre de la dieu partie
 La dist, 'Ave !' soulainement :
 C'estoit la dame voirement
 Q'ot les cink feuilles plainement
 El fleur de virginal vie,
 Ove les trois grains certainement ;
 Dont vous dirray, oietz comment, 16980
 Des ces trois grains quoi signifie.
 Trois fourmes sont de dieu amer,
 Ce sont les grains dont vuil parler,
 Au fin que vierge soit parfit :

Car vierge doit tout au primer
 D'entendement sanz folerrer
 Amer son dieu, q'est son eslit,
 Et si se dolt ou s'esjoyt,
 D'entier voloir sanz contredit
 Tendra l'amour sanz retourner :
 N'est pas amy qui tost oublit, 16990
 Ainçois du tout son esprit
 Luy doit chérir et mercier.

Tieux sont les grains dont est parfait
 La flour ; si vierge ensi les ait,
 Lors rent a dieu son droit paige ;
 Et autrement, s'ensi ne vait,
 Tout est en vein que vierge fait,
 Car plus ne valt le pucelage
 Qe lampe exteinte sanz oillage ;
 Dont ly cink fole au mariage 17000
 Au port entrer furent desfait,
 Mais l'autre cink, qui furent sage,
 Et d'oille avoient l'avantage,
 Entreront y sanz contreplait.

Mais pour compter tout au final,
 Trois causes sont en general
 Pour exciter l'humanité
 D'amer l'estat q'est virginal :
 Primerement c'est un causal
 Pour la tresfine bealté, 17010
 La seconde est pour la bonté,
 Et la tierce est pour digneté :
 Ce sont ly cause principal
 Q'om doit amer virginité ;
 De chascun point en son degré
 Vous dirray par especial.

Ly sages dist en sa doctrine :
 'O comme perest et belle et fine
 La flour du virginal endroit !'
 Auci Jerom de ce diffine, 17020
 Si dist que belle est la virgine
 Comme robe blanche, en quelle om voit
 Legierement si tache y soit.
 C'est la beauté que dieus amoit
 Et la retint de sa covine,
 Qant prendre nostre char venoit :
 Dont m'est avis amer l'en doit
 L'estat que si bell eslumine.

De la bonté ce nous devise
 Jerom, qui dist en ceste guise. 17030
 Q'estat du vierge est purement
 Offrende a dieu et sacrefise,
 Qant om le gart du bonne enprise ;
 Dont grant loer au fin repront.
 De saint Jehan l'experiment
 Avoir porrons *que* d'autre gent
 Virgine est de plus halte assisse ;
 Car il porta resemblement f. 95
 Al Aigle, qui plus haltement
 Vola de la divine aprise. 17040
 De tous les saintz q'om doit nommer
 Estoit Jehans plus familier
 Et plus privé de son seignour :
 Apocalips doit tesmoigner
 Que vierges doit plus halt monter
 Et d'autres plus avoir l'onour ;
 Q'en halt le ciel *superiour*
 Devant le throne dieu maïour
 Ly vierge devant assister,
 Et pour la grant bonté de leur 17050
 L'aïnel de dieu *par* tout entour
 S'en vont suiant pour luy loer.
 L'aïnel de dieu sanz departie
 En blanches stoles sanz partie
 Ly vierge vont suiant toutdis,
 Ly quel de sa bonté complice
 A faire leur honeur se plie
 Ove trois coronnes de grant pris,
 Q'il portont sur le chief assis :
 Virginité dont m'est avis 17060
 Sur tous estatz se glorifie ;
 De sa beauté dieus fuist surpris,
 De sa bounté le paradis
 Est *nostre*, quoy *que* nuls endie.
 Virginité, qui bien la meine,
 Fait l'alme digne en son demeine ;
 Car saint Gregoire vait disant,
 Que cil qui vit en char humeine
 Et contre char sa char restreine,
 Si q'a sa char n'est obeissant, 17070
 Est as bons angres comparant :

17037 plushalte
 17045 plushalt

17039 plushaltement
 17073 plushalteine

17042 plusfamilier
 17093 enparloit

Et plus le loe encore avant
 Du digneté q'est plus halteine.
 Le Genesis vait tesmoignant
 Que l'alme vierge est ressemblant
 Au magesté q'est *sovereine*.
 Ambroise ce vait demandant :
 ' Qui porroit estre meulx vaillant
 De luy q'est de son Roy amé,
 Et de son juge ferm, constant, 17080
 En jugement, le poeple oiant,
 Sanz nul erreur est apprové,
 Et est sur ce saintefié
 De dieu, q'en ad la poesté
 Sur toute rien *que* soit vivant ?'
 C'est plus ne meinz en verité
 Que l'ordre de virginité,
 Qui toutz les autres vait passant.
 Un *Emperour* jadis estoit
 Q'om Valentinian nomoit ; 17090
 Cil avoit oitante auns compliz :
 Sovent fortune luy donnoit
 Victoire, et qant om en parloit
 Pour luy loer, il n'en tint pris,
 Ainz dist q'assetz plus ot enpris
 De ce q'il un soul anemys
 Vencu de sa bataille avoit,
 Que du tout autre a son avis ;
 C'estoit sa char q'il ot soubmis,
 Dont sa loenge demenoit. 17100
 Virginité molt valt en soy ;
 Essample avons du viele loy :
 Ce parust qant le poeple hebreu
 Les Madians ove leur desroy
 Trestout venquirent au tournoy ;
 Car Moyses, qui s'est pourveu,
 Commanda lors *que* tost veu
 Soit toute *femme* qui parcru
 Fuist de la Madiane foy,
 Et les corruptes en tout lieu 17110
 Fuissent occis en l'onour dieu,
 Mais les virgines laissa coy.
 Ce dist Gilbert en son sermoun :
 ' Virginité sanz mal feloun

Est de sa char la pes entiere
 Et des peccés redempcioun,
 Princesse et dame de *resoun*,
 Sur toutes vertus la *primere*.
 Ce dist Jerom en la matiere :
 ' Jadis ly Prince et l'Emperere 17120
 Par les Cités tout enviourn
 Donneront voie ove liée chiere
 A la virgine belle et chere,
 Pour l'onour de si noble *noun*.'
 Saint Ciprian en son escript
 Virginité ensi descrit,
 Q'elle est la flour de sainte eglise
 Et l'ornement bon et parfit
 Et la grace du saint esprit,
Oversaigne *bonne* sanz reprise ; 17130
 Si est en dieu l'ymage assisse,
 Que n'est corrupte ne malmise,
Soverein amour, *soverein* delit,
 Dont l'alme q'est de tiele aprise
 Les angres passe en mainte guise,
 Et a dieu mesmes s'associt.
 Ore dirra de la tierce file de
 Chasteté, la quelle ad *noun*
 Matrimoine, contre le vice de
 Avolterie.
 Encontre Avolterie vile
 Ad Chasteté sa tierce file,
 Que Matrimoine est appelée :
 La loy *Canon*, la loy Civile 17140
 Diont q'elle est *bonne* et gentile
 En quatre pointz dont est doé,
 D'auctorité, de digneté,
 Du sainteté, d'onesteté,
 Ces quatre pointz deinz soi *compile* ;
 Dont sa vertu est honouré
 Du *bonne* gent et molt amé
 Solonc l'agard de l'evangile.
 D'auctorité notablement 17150
 Dieus ordina *primement*
 En paradis le mariage
 D'Adam et d'Eeve no parent,
 Qui lors estoient innocent,
 Tant *comme* furent en cel estage,
 Mais puis, qant firent cel oltrage,

Dont nous avint mortiel damage,
 Encore en terre nequedent
 Du viele loy du viel usage
 Les patriars, q'estoient sage,
 L'estat gardoient voirement. 17160
 Auctorité solempne avoit,
 Qant mesmes dieu le confermoit ;
 Grant digneté y ot aici,
 Qant ly fils dieu nestre voloit
 En mariage tant benoit :
 Soubz cel habit trestout *covery*
 Le rançoun et le bien, par qui
 Nous rechata del anemy,
 Que ly malvois ne s'aparçoit.
 Dont m'est avis pensant ensi 17170
 Que Matrimoine est establi
 De molt treshonorable endroit.
 Du sainteté sanz contredit
 Le Matrimoine est aici dit
 Un sacrement du *grant* vertu,
 Par sainte eglise q'est confit ;
 Dont signefie a son droit plit
 Le marier q'est avenu
 De sainte eglise et de *Jhesu*,
 C'est entre la *bonne* alme et dieu, 17180
 L'amour pourporte q'est parfit.
 Si Matrimoine est bien tenu,
 Saint est l'estat, car en tout lieu
 Est sacré du saint esprit.
 Qui Matrimoine voet cherir,
 D'onesteté ne poet faillir,
 Car mariage fin, loyal,
 Nous enfranchist sanz nous blemir
 Solonc nature a no plesir
 De faire le fait natural, 17190
 Q'est autrement peccé mortal ;
 Et plus encore especial
 Nous fait merite deservir,
 L'estat qant matrimonial
 Solonc la loy judicial
 Volons par loyalté tenir.
 Trois autrez pointz om poet noter,
 Par quoy fait bon a marier.
 Le primer est pour compaignie ;
 En Genesi l'en puet trover, 17200